

為唐生

後晉 劉 眗 等撰

華 書 局

中

卷一五四至卷一六九(傳)第 一 三 册

舊唐書卷一百五十四

列傳第一百四

孔巢父 從子戡 戣 戢 許孟容 呂元膺 劉栖楚 張宿

熊望 柏耆

中,李季卿爲江淮宣撫使,薦巢父,授左衞兵曹參軍。大曆初,澤潞節度使李抱玉奏爲賓 **表巢父試祕書少監、兼御史中丞、行軍司馬。** 幕,累授監察御史,轉殿中、檢校庫部員外郎,出授歸州刺史。建中初,涇原節度留後孟 史,少時與韓準、裴政、李白、張叔明、陶沔隱於徂來山,時號「竹溪六逸」。 史、湖南觀察使。 |永王||璘起兵||江淮,聞其賢,以從事辟之。||巢父知其必敗,側身潛遁,由是知名。 孔巢父,冀州人,字弱翁。父如珪,海州司戶參軍,以巢父贈工部郎中。 未行,會普王爲荆襄副元帥(1),以巢父爲元帥府行軍司馬、兼御史大夫。 **尋拜汾州刺史,入爲諫議大夫,出爲潭州刺** 巢父早勤文 廣德

四〇九五

第一

百四四

孔

巢

與大將邢曹俊等稟命於巢父。巢父因其衆意,令田緒權知軍務,以紓其難 其下厭亂,且喜巢父之至。數日,田承嗣之子緒以失職怨望,因人心之搖動,遂構謀殺悅而 道,士衆欣悚喜抃曰:「不圖今日復覩王化。」及就宴,悅酒酣,自矜其騎射之藝、拳勇之略,因 甚賞之。尋兼御史大夫,充魏博宣慰使。巢父博辯多智,對田悅之衆,陳逆順利害君臣之 曰:「若蒙見用,無堅不摧。」巢父謂之曰:「若如公言而不早歸國者,但爲一好賊耳。」悅曰: 「爲賊旣日好賊,爲臣當作功臣。」巢父曰:「國方有虞,待子而息。」悅起謝焉。 悅背叛日久, 尋屬涇師之難,從德宗幸奉天,遷給事中、河中陝華等州招討使。 累獻破賊之謀,德宗

備禮葬祭。 聞罷懷光兵權,時懷光素服待命,巢父不止之,衆咸忿恚咄嗟曰:「太尉盡無官矣!」方宣 以巢父嘗使魏博,田悅死於帳下,恐禍及。又朔方蕃渾之衆數千,皆在行列,頗 韶,讙躁,懷光亦不禁止,巢父、守盈並遇害。上聞之震悼,贈尙書左僕射,仍韶收河中日 興元元年,李懷光擁兵河中,七月,復以巢父兼御史大夫,充宣慰使。旣傳詔旨,懷光 賜其家布帛米粟甚厚,仍授一子正員官。從子戡、戣、戢。 「驕悖

驕, 與王承宗、田緒陰相連結,欲效河朔事以固其位。 戡,巢父兄岑父之子,方嚴有家法,重然諾,尙忠義。盧從史鎭澤潞,辟爲書記。 | 戡每秉筆至不軌之言,極諫以爲不 從史度

臘。 貶逐。 可,從史怒。 及戡韶下,給事中呂元膺執之,上令中使慰喩元膺,制書方下。 憲宗不得已,授衞尉丞,分司洛陽。初,貞元中藩帥誣奏從事者,皆不驗理, 戡歲餘謝病歸洛陽。李吉甫鎭揚州,召爲賓佐。從史知之,上疏論列, 戡不調而卒,贈駕部員 便行降 請行

外郎。

通事舍人李涉知上待承璀意未衰,欲投匭上疏,論承璀有功,希光無事,久委心腹,不宜遽 鎖,事敗,賜希光死。時吐突承璀以出軍無功,諫官論列,坐希光事出爲淮南監軍。試太子 甚激切,韶貶涉爲陝州司倉。倖臣聞之側目,人爲危之。 體。上疏論時政四條, **凌**之,<u>戮無所屈降。入爲侍御史,累轉尙書郎。元和初,改諫議大夫。侃然忠讜,有諫</u> 残字 君 嚴。 登進士第,鄭滑節度使盧羣辟爲從事。 帝意嘉納。六年十月,內官劉希光受將軍孫璹路二十萬貫以求方 | 本,命| 幾權掌留務,監軍使以氣

位爲州將韋岳讒譖於本使監軍高重謙,言位結聚術士,以圖不軌。追位至京師,鞠於禁中。

列傳第一百四 孔巢父

位 之,或日祭酒孔戣嘗論此事,度徵疏進之,卽日授廣州刺史、兼御史大夫、嶺南節度使。 馬。 入爲大理卿,改國子祭酒。十二年,嶺南節度使崔詠卒,三軍請帥,宰相奏擬皆不稱旨。 入對,上謂變度曰:「嘗有上疏論南海進蚶菜者,詞甚忠正,此人何在,卿第求之。」度退訪 好黃老道 時非效論諫,罪在不測,人士稱之。愈爲中官所惡,尋出爲華州刺史、潼關防禦等使。 時修齋籙,與山人王恭合鍊藥物,別無逆狀。以岳誣告,決殺。 貶位 建州司 因

蠻,以求功伐,遂至嶺表累歲用兵。唯殿以淸儉爲理,不務邀功,交、廣大理。穆宗卽位(三), 長慶四年正月卒,時年七十三。 書左丞。累請老,詔以禮部尙書致仕,優詔褒美。仍令所司歲致羊酒, 召爲吏部侍郎。長慶中,或告戣在南海時家人受賂,上不之責,改右散騎常侍。 自犯風波而往。 人爲奴婢,戣不受託。 **| 戏剛正清儉,在南海,請刺史俸料之外,絕其取索。 先是帥南海者,京師權要多託買南** 韓愈在潮州,作詩以美之。時桂管經略使楊旻、桂仲武、裴行立等騷動生 至郡,禁絕賣女口。先是準韶禱南海神,多令從事代祠。一幾每受韶, 如漢禮徵士故事。 二年,轉尙

儒子輝,自有傳。 子 **遵焉、温裕**,皆登進士第。 大中已後,迭居顯職。 温裕位京兆尹、天平軍節度使。 遵

其 才 尉。 侍 陽 御 御 爲 史 ·, 執 昭義 戦学方 史、 以長兄戡 ,轉殿中,分司 庫部 能 事 節度,復欲用政爲賓佐 者 鳥竄獸伏, 舉 員 召 未 外郎。 至京師。 残母 仕 東都。 ,固乞迴授。舉明 弟也。 乃違道以干譽,子盍效季孫行父之逐莒僕 初涇師之亂, **戢謂京兆** 時昭 以季父巢父死難, 義 一, |**戢** 節度 尹 經登第,判 **遂牒澤潞收**致以俟命 朱泚 奏武 判官徐玟 署彭偃爲舍人。 曰:「朱泚爲僞詔指斥乘輿,皆彭偃 入 **德宗嘉其忠**, ,以狡慝助 、高等,授祕書省校書郞、 ,然後列狀 至是偃 成從史之惡。 韶 與一 以 子充符爲鄜坊 勉 子正 上 事 聞 君者。」武 員官, 竟流 陽翟 從史旣 之詞 尉 因 從 得罪 授戦 卽 也。 事 日 拜 ·, 孟 修武 逐 悖 監 或 逆 察 薦 韓

於 兄弟皆 曲 遷京兆 池 温業, 居節鎭 是夕大雨。 尹 登進 朝野榮之。 出爲汝州 主 文宗 大中後 甚悅, 入爲 刺史、 右散騎 詔 大理 歷位 兼 御 卿(三)。 常侍,拜京兆 通 史 大夫。 顯 出為潭州 温業子晦。 大和 尹 三年正月卒, 0 刺史、 時累月亢旱,深軫 湖南觀察使。 贈 工部尙書。 室情。 時兄 戢 自 雨

符。

許 孟 容字公範 京京 兆 長安人也。 父鳴謙 究通易象 官至撫州 刺 史,贈禮 部尙書。 孟

少 寇。 使, 追 兵,因請修好。 以 表為 文詞 建封 判 遣將 知 官。 名 吏 貞元. 舉 《數輩告論,不聽。 **遂表孟容爲濠州** 進 初,徐州節度使張建封 1 甲科, 後究王 於是遺孟容單車詣納, 刺 一氏易, 史。 無幾,德宗知其才 辟爲從事 登科授祕書省校書郞。 ·, 四 遷 爲 侍 ,徴爲禮 陳 御 逆順 史。 趙贊 禍 部 李納 福 員 之計, 爲 外郎 屯兵 境上,揚 襄等 納 卽 道 日 運動 發使 言入

澤。 東 戎之地 史。 可以 歸 京兆 執 轉 判官 可錄, 綱 兵 奏竟得。 少 部 時 紀 但 尹 有公主之子 駐。」 總 陛 顧 鄓 `陛下須要酬勞,卽明書課最,超一兩資與改。 今韶 下 中。 或 爲 臣 少 遷本曹郎中。 詔 連 肅 受官中謝 有 使品官覆 敕稱 未滿 剝 雖 已下。 不 ,請補 獲已超授者。 不 下 權 許 嵗 進 知留後,攝 視後 奉以希恩, 日 敕出、孟容執 ,遷給事中。 ,公議是之。十八 弘文、崇文館諸生,孟容舉令式不許。 伏伏 德宗 ,更擇憲 請 降誕 詔 今衢州 都 敕有須詳 遽授大郡 團 日 奏曰:「五 十七 官 御麟 練 人 無他 年 副 年夏,好時縣 一,浙江 使 府縣 議者 ,再令驗察, 德殿,命孟容等登 虞, 向 物 東道 來 議 上事不實,罪 ,則乞停留晷刻,得以奏陳。 齊總 喧然。 無 此 觀察使裴肅 無殊績 風雹 敕命。 覆視: 今舉朝之人, 不知總之功能 韶出 傷麥,上命 轉審 止奪俸停官,其於 座,與釋、老之徒講 便用 主 忽此 ,孟容執奏曰:「陛下 訴 卒,以攝副 隱欺 此韶 於 超授,羣情 上,命中使 品官覆視 一、尤恐 益明。 使齊總 此 驚 不 弘宥 敕旣 事 論。十 問 可 賅 不 宜 狀。 比 爲 實 非急宣 觀 ,已是殊 衢州 者以 若 總 衢 聽 儿 詔罰 孟容 州 是 總 法法 浙 刺 兵 必 浙

宗 此 東 召 大 詔 密使 郡 孟容對於延英, 爺之曰:「使百執事皆如卿, 總自大理許事兼監察御史授之,使遐邇 人聽察,必賀聖朝無 私。 今齊總韶謹隨狀 不甘 肸 何憂 封 ,兇惡騰 進。」尋有諫 也。」自給 П 官論 如臣 事 中袁高論盧杞後,未嘗 言不切,乞 列,乃留中不下 陛下 暫停 德

十九年夏旱,孟容上疏曰:

有

可否,及聞孟容之奏,四方皆感上之聽納,嘉孟容之當官。

若播 **死者**; 貫。 政之中,有流 之大者、遠者。京師是萬國所會,強幹弱枝,自古通規。其一年稅錢及地租 至,甘澤未答也? 變災爲 而 百餘萬 密雲不雨,首種未入。 臣伏冀陛下即日下令, 臣伏 種 沉滯 貫、代京 福 無 望,徵斂如舊,則必愁怨遷徙,不顧墳墓矣。 聞陛下數月已來,齋居損膳,爲兆庶心疲, 期 鬱 移征 在 抑 兆百 斯 臣歷觀自古天人交感事,未有不 當伸而未伸者。 一防,當還 須。 姓 戶 年差科, 、部所收掌錢,非度支歲計,本防緩急別用。 **豈**觴醪有闕 而未還者; 全放免之; 其次, 三分放二。 實陛 有一於此,則特降明命, • 徒役禁錮,當釋而未釋者; 下巍巍睿謀, 祈祝 非 誠 由百姓利病之急者、切者,邦家教令 爲陰陽適然, 天下鼓舞歌揚 又敕有司, 臣愚 且使旱涸之際, 以爲德音 令有司條列,三日內聞奏。 走於羣望, 豐歉前定, 逋懸饋送,當免 者也。 今此炎旱,直支一 一發, ,出入一百萬 復更省察庶 性於 膏澤立應 **免更流亡。** 何聖意: 百 而未 精

其當還、當釋、當免、當伸者,下韶之日,所在卽時施行。 臣愚以爲如此而神不監,歲不

事雖不行,物議嘉之。貞元末,坐裴延齡、李齊運等讒謗流貶者,動十數年不量移,故因旱

歉,孟容奏此以諷。然終貞元世,罕有遷移者。

部侍郎。俄以本官權知禮部貢舉,頗抑浮華,選擇才藝。出爲河南尹,亦有威名。俄知禮 送本軍,<u>孟容繫之不遣。中使再至,乃執奏曰:「臣誠知不奉韶當誅,然臣職司輦戰,合爲</u>陛 部選事,徵拜吏部侍郎 下彈抑豪強。錢米盡輸,是不可得。」上以其守正,許之。自此豪右斂迹,威望大震。改兵 益縱橫,府縣不能制。

孟容剛正不懼,以法繩之,一軍盡驚,冤訴於上。

立命中使宣旨,令 日(四):「不及期當死。」自興元已後,禁軍有功,又中貴之尤有渥恩者,方得護軍,故軍士日 神策更李昱假貸長安富人錢八千貫,滿三歲不償。孟容遣吏收捕械繫,剋日命還之, 孟容以諷諭太切,改太常少卿。元和初,遷刑部侍郎、尚書右丞。四年,拜京兆尹,賜

有成功。言事者繼上章疏請罷兵。是時盜賊竊發,人情甚惑,獨孟容詣中書雪涕而言曰: 「昔漢廷有一汲黯,姦臣尙爲寢謀。 會十年六月,盜殺宰相武元衡,丼傷議臣裴度。時淮夷逆命,兇威方熾,王師問罪,未 今主上英明,朝廷未有過失,而狂賊敢爾無狀,寧謂國

源。」後數日, 無人乎? 丞,奉詔宣慰汴宋陳許河陽行營諸軍,俄拜東都留守。 然轉禍爲福,此其時也。 度果爲相, 而下詔行 誅。 莫若上聞,起裴中丞爲相,令主兵柄,大索賊黨,窮其姦 時孟容議論人物 元和十三年四月卒,年七十六,贈太 ,有大臣風彩。 由太常卿爲尚書左

士,士多歸之。 孟容方勁,富有文學。 其折衷禮法考詳訓典甚堅正,論者稱焉。而又好推轂,樂善拔

子少保、諡曰憲

| | | | | | 曹參軍,以元曆贈祕書監。元曆質度瓌偉,有公侯之器。 呂元曆字景夫,鄭州東平人。曾祖紹宗,右拾遺。 同州刺史侯鐇聞其名, 辟爲長春宮判官。屬蒲賊侵軼,鱎失所, 祖霈、殿中侍御史。父長卿,右衞倉 建中初,策賢良對問第,授同州安 元膺遂潛跡不務

関,除右司員外郎,出爲蘄州 宗俾栖曜留署使職,咨以軍政。 貞元初,論惟明節制渭北,延在賓席,自是名達於朝廷。惟明卒,王栖曜代領其鎮。 刺 史,頗著恩信。 累轉殿中侍御史,徵入眞拜本官,轉侍御史。丁繼母憂,服 嘗歲終閱郡獄囚,囚有自告者曰:「某有父母

冽

傳第

百四四

呂

元

쪵

辭氣激切,上嘉之。翌日謂宰相曰:「元膺有讜言直氣,宜留在左右,使言得失,卿等以爲何 宗將以吐突承璀爲招討處置使。元膺與給事中穆質、孟簡,兵部侍郎許孟容等八人,抗論 之,爲改使號,然猶專戎柄,無功而還。出爲同州刺史,及中謝,上問時政得失,元膺論奏, 能數進忠言,孤負聖心,合當罪戾。 請留元膺給事左右。」尋兼皇太子侍讀,賜以金紫。 中、兼侍御史知雜事,遷諫議大夫、給事中。規諫駁議,大舉其職。及鎭州王承宗之叛,憲 如?」李藩、裴垍賀曰:「陛下納諫,超冠百王,乃宗社無疆之休。 臣等不能廣求端士,又不 不可,且曰:「承璀雖貴寵,然內臣也。若爲帥總兵,恐不爲諸將所伏。」指諭明切,憲宗納 元膺曰:「吾以忠信待之。」及期,無後到者,由是羣盜感義,相引而去。 在,明日元正不得相見。」因泣下。元膺憫焉,盡脫其械縱之,與爲期。守吏曰:「賊不可縱。」 元和初,徵拜右司郎

甲,與方鎭同。及允膺受任不賜,朝論以淮西用兵,特用元膺守洛,不宜削其儀制,以沮威 觀察使裴堪奏虔州刺史李將順贓狀,朝廷不覆按,遽貶將順道州司戶。元膺曰:「廉使奏刺 史贓罪,不覆檢即謫去,縱堪之詞足信,亦不可爲天下法。」又封詔書,請發御史按問,宰臣 相奏論,孟陽除散騎常侍,遂爲鄧州刺史,皆假以美詞。元膺封還詔書,請明示枉直。 **蕁拜御史中丞,未幾,除鄂岳觀察使,入爲尙書左丞。 度支使潘孟陽與太府卿王遂迭** 代權德輿爲東都留守、檢校工部尙書、兼御史大夫、都畿防禦使。舊例,留守賜旗 江西

諫官論 列,援華、汝、壽三州例。 上曰:「此數處,並宜不賜。」 留守不賜旗甲,自元膺始。

殺掠。 敢辨。 折。 結,以其孥偕行,出長夏門,轉掠郊墅,奪牛馬,東濟伊水,望山而去。」元膺誠境上兵,重購 期以嘉珍竊發時舉火於山中,集二縣山棚人作亂。及窮按之,嘉珍、門察皆稱害武元衡者。 其職署而爲之耳目,自始謀及將敗無知者。初,師道多買田於伊闕、陸渾之間,凡十餘處, 使洛城流血!」死者凡數十人。留守防禦將二人,都亭驛卒五人,甘水驛卒三人,皆潛受 其魁,乃中岳寺僧圓淨,年八十餘,嘗爲史思明將,偉悍過人。初執之,使折其脛,鎚之不 以捕之。數月,有山棚賣鹿於市,賊過,山棚乃召集其黨,引官兵圍於谷中,盡獲之。窮理 攻者,防禦判官王茂元殺一人而後進。或有毀其墉而入者,賊衆突出,圍兵奔駭。賊乃團 山 故以舍山棚而衣食之。 元膺以聞,送之上都,賞告變人楊進、李再興錦綵三百匹、宅一區,授之郞將。 河子弟以衞宮城,從之。盜發之日,都城震恐,留守兵寡弱不可倚,而元膺坐皇城門,指 圓淨駡曰:「脚猶不解折,乃稱健兒乎!」自置其足教折之。臨刑歎曰:「誤我事,不得 因 已烹牛饗衆,明日將出。 與元濟北犯,郊畿多警,防禦兵盡戍伊闕。師道伏甲百餘於邸院,將焚宮室,而肆 七月,鄆州李師道留邸伏甲謀亂。初, 有豐嘉珍、門祭者,潛部分之,以屬圓淨。以師道錢千萬僞理佛寺, 會小將李再興告變,元膺追兵伊闕,圍之半日〔刑〕,無敢進 , 師道於東都置邸院, 兵諜雜以往來, 吏不 元膺因請募

使部分,氣意自若,以故居人帖然。

來中貴,無不敬憚。 數年,改河中尹,充河中節度等使。時方鎭多事姑息,元膺獨以堅正自處,監軍使洎往 入拜吏部侍郎,因疾固讓,改太子賓客。元和十五年二月卒,年七十

不及識婁、郝,殆斯人之類乎!」其業官行已,始終無缺云。 元膺學識深遠,處事得體,正色立朝,有台輔之望。初遊京師時,故相齊映謂人曰:「吾

二,贈吏部尙書。

性果敢,逢吉以爲鷹犬之用,欲中傷裴度及殺李紳。 劉栖楚,出於寒微。爲吏鎭州,王承宗甚奇之。後有薦於李逢吉,自鄧掾擢爲拾遺。

起。西宮密邇,未過山陵,鼓吹之聲,日喧於外。伏以憲宗皇帝、大行皇帝皆是長君,恪勤 之初,莫不躬勤庶政,坐以待旦。陛下卽位已來,放情嗜寢,樂色忘憂,安臥宮闈,日晏方 敬宗即位,畋遊稍多,坐朝常晚,栖楚出班,以額叩龍墀出血,苦諫曰:「臣歷觀前王嗣位

官,致陛下有此,請碎首以謝!」遂以額叩龍墀,久之不已。宰臣李逢吉出位宣曰:「劉栖楚 庶政,四方猶有叛亂。陛下運當少主,即位未幾,惡德布聞,臣盧福祚之不長也。臣忝諫

休 又云:「不可臣奏,臣即碎首死。」中書侍郎牛僧孺復宣示而出,敬宗爲之動容。 叩頭,候詔旨。」栖楚捧首而起,因更陳論,搕頭見血,上爲之動容,以袖連揮令出。 栖楚

觀察使。 右,甚有鈎距,人多比之於西漢趙廣漢者。 無何,遷起居郞,至諫議。俄又宣授刑部侍郞,丞郞宣授,未之有也。 逾年,卒於任,時大和元年九月。 後恃權寵,常以詞氣凌宰相章處厚,遂出爲桂州 改京兆尹,推抑豪

前言其狡譎,不可保信,乃用爲濠州刺史。制下,宿自理乞留,乃追制。上欲以爲諫議大 貶郴州郴縣丞。十餘年徵入,歷贊善大夫、左補闕、比部員外郎。 宰相李逢吉惡之,數於上 宿時入謁,辨譎敢言。洎監撫之際,驟承顧擢,授左拾遺。 東川節度。乃用宿權知諫議大夫,俄而內使宜授。 用宿,請先去臣卽可。」上不悅。又逢吉與裴度是非不同,上方委度討伐,乃出逢吉爲劍南 夫,逢吉奏曰:「諫議職重,當以能可否朝政者爲之。 宿細人,不足以汙賢者位。 張宿者,布衣諸生也。憲宗爲廣陵王時,因軍使張茂宗薦達,出入邸第。及上在東宮, 以舊恩,數召對禁中,機事不密, 陛下必須

初,宰相崔羣、王涯奏曰:「諫議大夫前時亦有拔自山林、起於卒伍者,其例則少,用皆有 ·列 傳 第一 百 四 張 宱 熊 夕

恩由 中。」上命如初,羣等乃請權知,尋又宜授。宿怨執政擯己,頗加讒毀。 身爲累。 或道義彰明,不求聞達;或山林卓異,出於羣萃。以此選求,是愜公議。 一時,雖有例超升,卽時議未允。宿本非文辭入用,望實稍輕。 臣等所以累有論諫,依資且與郎中,事冀適中,非於此人情有厚薄,請授職方郎 驟加不次之榮,翻恐以 依附皇甫鎛等,傷害 或事迹未著,

十三年正月,充淄靑宣慰使,至東都,暴病卒,於是正人相賀。 韶贈祕書監

清正之士,陰事中要,以圖進取。

門庭無晝夜,塡委不息。望出入栖楚之門,爲伺密機,陰佐計畫, 官才堪任學士者爲之。栖楚以望名薦送,事未行而昭愍崩。 隙,學爲歌詩。以翰林學士崇重,不可褻狎,乃議別置「東頭學士」,以備曲宴賦詩,令採卑 指抉時政。 熊望者,登進士第。粗有文詞,而性憸險。有口辯,往往得遊公卿間,率以大言詭意, 旣由此而得進士第,務進不已。而京兆尹劉栖楚以不次驟居清貫,廣樹朋黨 人無知者。 昭愍嬉遊之

必榮;朝廷廣設衆官,踐正途者其道必達。前鄉貢進士熊望,因緣薄伎,偷冀褻幸。營居 文宗卽位,章處厚輔政,大去姦黨,旣逐栖楚,又詔曰:「孔門高懸百行,由至順者其身

中之密職,擾惑朝經,鼓逼下之囂聲,因依邪隙。 及衆議波湧,累月不寧,司門驗繻 累月 可潭

州司戶。

宗,以大義陳說,承宗泣下,請質二男,獻兩郡,由是知名。元和十五年,王承元歸國(弘),移 穆宗韶耆往諭旨。耆至,令承元集三軍,宣導上旨,衆心乃安。轉兵部郎中。 鎭滑州,朝廷賜成德軍賞錢一百萬貫,令諫議大夫鄭覃宣慰軍人,賞錢未至,浩浩然騰口。 恩澤撫之。耆於蔡州行營以畫干裴度,請以朝旨奉使鎭州, 柏耆者,將軍良器之子。素負志略,學縱橫家流。會王承宗以常山叛,朝廷厭兵,欲以 乃自處士授左拾遺。 同捷窮蹙 既見承

將害膏邀功,爭上表論列,文宗不獲已,貶循州司戶,判官沈亞之貶虔州南康尉。 求降。香既宜輸訖行,與節度使李祐謀,香乃帥數百騎入滄州,取同捷赴京,滄、 大和初,遷諫議大夫。俄而李同捷叛,兩河藩帥加兵滄、德,宿師於野連年, 德 平。 內官馬國

後,鬱爲昌族,爲善之利,豈虚言哉! 徒,鷹犬下材,爲人鳴吠,誠可醜也。柏耆恃縱橫之算,欲俯拾卿相,忘身蹈利,旋踵而誅, 宜哉。巢父使不辱命,志在致君,遭罹喪亂,竟陷虎吻。而戣、戢諸子,世載忠貞,大中之 之歾軍吏,呂尙書之封詔書,詞義可觀,聳動人聽,以爲沽激,傷善何多!而栖楚、張宿之 史臣曰:"人臣事君,犯顏匡政,不避死亡之誅。 議者以爲徇名,臣惡其訐也。 如許京兆

贊曰:君子重義,小人殉利。巢殞膏誅,其道即異。許、呂封駁,照耀黃扉。 死而可作,

校勘記

吾誰與歸?

(1) 普王為荆襄副元帥 「副元帥」,本書卷一五〇舒王傳作「元帥」,新書卷七德宗紀、卷八二舒王

傳作「都元帥」。

穆宗 今據新書卷一六三孔巢父傳改。 各本原作「敬宗」,按本卷下文云:「長慶中,或告殿在南海時家人受賂」,當爲穆宗時事,

(1) 大理卿 合鈔卷二〇五孔巢災傳「大」上有「遷」字。

記

- (五) 日 各本原作「日」,據新書卷一六二許孟容傳改。
- (#) 圍之半日 「日」字各本原作「月」,據本書卷一二四季正已傳、冊府卷六九五改。
- (代) 元和十五年王承元歸國 各本原作「元和十年王承宗歸國」,據本書卷一四二、王武俊傳、冊府卷
- 會使與判官沈亞之諭旨」等字。 六五六、通鑑卷二四一改。下同。

舊唐 書卷 一百五十五

列傳第一百五

穆寧 子贊 質 員 賞 崔邠 弟鄯 郾 鄆 竇羣 兄常 牟 弟庠 鞏

李遜 弟建 薛戎 弟放

因奏署大理評事、河北採訪支使。寧以長子屬母弟曰:「惟爾所適,苟不乏嗣, 義,舉郡兵以拒禄山。會間使持書遺眞卿曰:「夫子爲衞君乎?」更無他詞。眞卿得書大喜, 及攝縣。初, 寇郡,寧以攝東光令將兵禦之。 思明遺使說誘,寧立斬之。 郡懼賊怨深後 大兵至,奪寧兵 山始叛,偽署劉道玄爲景城守。寧唱義起兵,斬道玄首,傳檄郡邑,多有應者。賊將史思明來 偃 師縣丞、安陽令。寧淸愼剛正,重交遊,以氣節自任。少以明經調授鹽山尉。是時,安祿 穆寧,懷州河內人也。父元休,以文學著,撰洪範外傳十篇,開元中獻之,玄宗賜帛,授 寧佐採訪使巡按,常過平原,與太守顏眞卿密揣祿山必叛。 至是, 眞卿亦唱 `吾無累矣。]

列傳第一百五 穆寧

狀,眞 卿深然之。 直 因往平原謂眞卿曰:「先人有嗣矣!古所謂死有輕於鴻毛者,寧是也,願佐公以定危難。」眞 失旨,事遂止。 「卿曰:「臣不用穆寧之言,功業不成。」帝奇之,發驛召寧,將以右職待之。 其後, 寧計或不行,眞卿追蹙棄郡,夜渡河而南,見肅宗於鳳翔。 會眞卿以抗 帝問拒賊之

虔州 絕。 御 行其職。 譖 京 史中丞,爲河南、江南轉運使。 於光願,光願揚言欲殺寧。 賜金紫。 師 與寧夾准爲理,憚寧威名,寇盜輒止。沔州別駕薛彦偉坐事忤旨,寧杖之致死,寧坐貶 司 上元二年,累官至殿中侍御史,佐鹽鐵轉運使。副元帥李光弼以餉運不繼,或惡寧者誣 馬, 選鎭夏口者,韶以寧爲鄂州刺史、鄂岳沔都團練使及淮西鄂岳租庸鹽鐵沿江 寶應初,轉侍御史,爲河南轉運租庸鹽鐵等副使。明年,遷戶部員外郎。無幾,加象 重貶昭州平集尉。 時推西節度使李忠臣貪暴不奉法,設防戍以稅商賈,又縱兵士剽劫,行人殆 寧直抵徐州見光願,喻以大義,不爲撓折。光弼深重之,寧得 廣德初,加庫部郎中。是時河運不通,漕輓由漢、沔自商山 1轉運

代寧者以天寶版籍校見戶,誣以逋亡多,坐貶泉州司戶。 大曆四年, 轉運留後事於江西。 起授監察御史,領轉運留後事於淄靑。間一年,改檢校司封郎中、 明年,拜檢校祕書少監,兼和州刺史,理有善政。 寧子贊,守闕三年告冤,詔遣御史 居無何,官罷。 兼侍御

興元 辭病居家, 制、故處之散 按覆,而人戶增倍,詔書召寧除右論德。 初,改右庶子。 請告幾十旬者數矣。 位。 寧默默不得志,且曰:「時不我容,我不時徇,則非吾之進也,在於退乎! **德宗還京師**, 親友強之,復一朝請。上居奉天, 寧日:「可以行吾志矣。」因移病罷歸東都。 寧強毅不能事權貴,執政者以爲不附己,且憚其難 寧詣行在,拜祕 貞元六年,就 書少監

「吾聞君子之事親, 寧好學,善教諸子,家道以嚴稱。 四子:贊、質、員、賞。 養志爲大, 直道 而已。 事寡姊以悌聞。通達體命,未嘗服藥。 愼無爲諂,吾之志也。」貞元十年十月卒,時年七 每誠諸子曰:

拜秘書監致仕

州 史,轉侍御史,分司 奉君之命, 司 戶參軍。 楚劍不衝於牛斗,秦臺自洗於塵埃。」由是知名。 **贄奔赴闕庭,號泣上訴,詔御史覆問,寧方得雪。** 東都 時父寧爲和州刺史,以剛直不屈於廉使,遂被誣奏,貶泉 累遷京兆兵曹參軍、殿中侍御 韶曰:「令子申父之冤,憲臣

佐之,令深繩髮罪 時陝州 觀察使 ,實持平不許。 盧岳妾裴氏,以有子,岳妻分財不及,訴於官,贊鞫其事。 宰臣竇參與侶善, 參、侶俱持權, 怒贊以小事不受指使, 遂 御史中丞盧侶

傳第一百五 穆寧

列

即位,拜宣州刺史、御史中丞,充宜歙觀察使,所莅皆有政聲。」永貞元年十一月卒,時年五 **贊三執不許,以款狀聞。延齡誣贊不平,貶饒州別駕。丁母憂,再轉虔、常二州刺史。憲宗** 爲御史中丞。時裴延齡判度支,以姦巧承恩。屬吏有贓犯,贊鞫理承伏,延齡請曲法出之, 聞鼓。詔三司使覆理無驗,出爲郴州刺史。參敗,徵拜刑部郞中。 下贊獄。 十八,贈工部尚書。 侍御史杜倫希其意,誣贊受裴之金,鞭其使以成其獄,甚急。贊弟賞,馳詣闕,撾登 因次對,德宗嘉其才,擢

| 贄與弟質、員、賞以家行人材爲搢紳所仰。| 贄官達,父母尚無恙,家法清嚴。| 贊兄弟奉指

使,答責如僮僕,贊最孝謹。

使。 子左庶子。 私鹽繁囚,須與州府長吏監決。自是刑名畫一。憲宗以王承宗叛,用內官吐突承璀爲招討 先論諫。元和初,掌賦使院多擅禁繫戶人,而有答掠至死者。 質率同列伏閣論奏,言自古無以中官爲將帥者。 質強直,應制策入第三等,其所條對,至今傳之。自補闕至給事中,時政得失,未嘗不 五年,坐與楊憑善,出爲開州刺史。未幾卒。 上雖改其名,心頗不悅,尋改質爲太 質乃論奏鹽鐵轉運 司 應決

質兄弟俱有令譽而和粹,世以「滋味」目之: 贊俗而有格爲酪,質美而多入爲酥,員 員工文辭,尙節義,杜亞爲東都留守,辟爲從事、檢校員外郞。

早卒,有文集十卷。

授渭南 崔 外字處仁,清 尉。 遷拾遺、 河武城人。 補闕。 常疏論。裴延齡,爲時所知。 祖結,父倕,官卑。 那少舉進士,又登賢良方正科。 以兵部員外郎知制誥至中書舍人, 貞元中

凡

七年。

叉權

知吏部選事。

明年,爲禮部侍郎,轉吏部侍郎,賜以

金紫。

奉朝 子瓘、璜,瓘子彥融,皆登進士第,歷位臺閣。 憂,歲餘卒,元和十年三月也,時年六十二。 四部樂於署,觀者縱焉。 請者四人,頗以孝敬怡睦聞。 | 邪 温裕沉密,尤敦清儉,上亦器重之。 **那自私第去帽親導母興,** 後改太常卿,知 裴垍將引爲相,病難於承答,事竟寢。 贈吏部尚書,諡曰文簡。 吏部尚書銓事。 公卿逢者回騎避之,衢路以爲榮。 故事,太常卿初上,大 弟鄯、郾、鄲等六人。 兄弟同時

德。 大將 軍。 鄯 鄯 大和 少有文學,舉進士。 漸 九年 昆弟六人,仕官皆至三品。 多,爲左金吾大將軍,無病暴亡。不旬日有訓、注之亂,其亂始自金吾, 元和中,歷監察御史。 |邠、||郾、||單三人,知貢舉,掌銓衡。 大和元年十月, 自太子詹事拜左金吾衞 冠族聞望,爲時名 君

列

傳

第

百五

崔

雅

子乃知鄫之亡,崔氏積善之徵也。贈禮部尙書。子瑄

之,畋遊稍簡。長慶中,轉給事中。 爲吏部員外。姦吏不敢欺,孤寒無援者未嘗留滯,銓敍之美,爲時所稱。 資質秀偉,神情重雅,人望而愛之,終不可捨,不知者以爲事高簡拘靜默耳。 居內憂,釋服 元和十三年,鄭餘慶爲禮儀詳定使,選時有禮學者共事,以團爲詳定判官、吏部與中。十五 年,遷諫議大夫。穆宗卽位,荒於禽酒,坐朝常晚。郾與同列鄭覃等延英切諫,穆宗甚嘉 再遷左司 郎中。

嘉之,賜錦綵二百匹、銀器等。 | 鐵日 [1]:「陛下意雖樂善,旣未延接儒生,天下之人,寧知重道。」帝深引咎,賜之錦綵。 退與同列高重抄撮六經嘉言要道,區分事類,凡十卷,名曰諸經纂要,冀人主易於省覽。 有餘,未嘗問臣經義。今蒙轉改,實慚尸素,有愧厚恩。」帝曰:「殷機務稍閑,卽當請益。」高 昭愍卽位,選侍講學士,轉中書舍人。 入思政殿謝恩,郾奏曰:「陛下用臣爲侍講,半歲

士,至大中、咸通之代,爲輔相名卿者十數人。出爲陝州觀察使。舊弊有上供不足,奪吏俸 其年,轉禮部侍郎,東都試舉人。凡兩歲掌貢士,平心閱試,賞拔藝能,所擢者無非名

使。 車,率由淸簡 以 ·益之,歲八十萬,

壓以廉使常用之直代之。 又五 一死罪。 年 一、移浙 少事,財用有餘, 江湖之間 西道都團練觀察使,所至用寬政 `, 佳蒲是叢, 因造蒙衝 人遂 | 寧泰。 開成元年卒,年六十九, 小艦 居二年, 安疲 ,上下千里,期月而 人三。 政績聞於朝,遷鄂岳安黃等州觀察 及居鄂渚 贈吏部尙書, 盡獲 季盜。 則 峻 法嚴 諡 凡三按康 日德 刑 未

圆 與兄別、弟鄲等皆有令譽。 而郾疏財恢廓,昆仲所不及。 子瑤、 躨、瑾、珮、 璆

拜

得人。 諫。 禮 部 侍 瑾 瑶 大和三 郎, 尋拜禮部侍郎,出爲<u>湖</u>南觀察使。 大中十年登進士第,累居使府,歷尙書郎、知制誥。 出為浙西 一年登進士第,出佐藩方,入 觀察使。 又遷鄂州刺史、鄂岳觀察使, (升朝列)累至中書舍人。 咸通十三年, 終於位。 大中六年, 瓌、 知貢 琊 璆官至 皋 知貢舉, 選拔 鄓 が頗爲 署給 旋

别? 革否?」李石對曰:「令錄可以 六年,罷學士。八年,爲工部侍郎、集賢殿學士,權 」帝召三銓謂之曰:「卿等比選令錄, 郼 文宗勤於政道,每苦選曹訛弊, 登進士第,累遷監察御史,三遷考功郎中。大和三年,以本官充翰林學士,轉中書舍人。 商量, 他官且宜循舊。」上曰:「循舊如配官耳,賢不肖安能甄 延英謂宰臣曰:「吏部殊不選才, 如何注擬? 知禮 部,眞拜兵部侍郎,本官判 」鄲對曰:「資敍相當, 安得 摭實無濫, 問其爲治之術 東部 東 、銓事。 可釐

列

之才治邊民,則疾苦可知也。凡朝廷求理,遠近皆須得人。苟非其才,人受其弊矣。」 視可否而擬之。」帝曰:「依資合得,而才劣者何授?」對曰:「與邊遠慢官。」帝曰:「如以不肖

與鄲弟兄素善。 卿。七月,以本官同中書門下平章事,尋加中書侍郎、銀靑光祿大夫。會昌初,李德裕用事, **蕁拜吏部侍郎。開成二年,出爲宣州刺史、兼御史中丞、宣歙觀察使。四年,入爲太常** 鄲在相位累年,歷方鎮、太子師保卒。

遺。 爲和審判官,一何易也?」德宗異其言,留之,復爲侍御史。 置棺中,因廬墓次終喪。後學春秋於啖助之門人盧庇者,著書三十四卷,號史記名臣疏 貞元中,蘇州刺史章夏卿以丘園茂異薦,兼獻其書,不報。及夏卿入爲吏部侍郎,改京兆 曰:「陛下卽位二十年,始自草澤擢臣爲拾遺,是難其進也。今陛下以二十年難進之臣,用 中謝日,因對復薦羣。徵拜左拾遺,遷侍御史,充入蕃使祕書監張薦判官,羣因入對,奏 | 本兄常、年,弟子,皆登進士第,唯| 本獨爲處士,隱居毗陵,以節操聞。 及母卒,囓一指 寶羣字丹列,扶風平陵人。 祖亶,同昌郡司馬。 父叔向,以工詩稱,代宗朝,官至左拾

王叔文之黨柳宗元、劉禹錫皆慢羣,羣不附之。其黨議欲貶羣官,章執誼止之。羣嘗

李實伐恩恃貴,傾動一時,此時公逡巡路旁,乃江南一吏耳。 今公已處實形勢,又安得不慮 謁王叔文,叔文命撤榻而進,羣揖之曰:「夫事有不可知者。」叔文曰:「如何?」羣曰:「去年

路旁有公者乎?」叔文雖異其言,竟不之用。

袋。宰相武元衡、李吉甫皆愛重之,召入爲吏部郎中。元衡輔政,舉羣代已爲中丞。羣奏 刑部與中呂温、羊士諤爲御史,吉甫以羊、呂險躁,持之數日不下,羣等怒怨吉甫。 見,羣危言激切,順甚悅,奏留充山南東道節度副使、檢校兵部郎中、兼御史中丞,賜紫金魚 憲宗卽位,轉膳部員外、兼侍御史知雜,出爲唐州刺史。節度使于頗素聞其名,旣謁

其城郭,復築其城,徵督谿洞諸蠻,程作頗急,於是,辰、歸生蠻乘險作亂,羣討之不能定。 將誅羣等,吉甫救之,出爲湖南觀察使。數日,改黔州刺史、黔州觀察使。在黔中屬大水壞 第,翌日,羣令吏捕登考劾,僞構吉甫陰事,密以上聞。帝召登面訊之,立辯其僞。 憲宗怒, 六年九月,貶開州刺史。在郡二年,改容州刺史、容管經略觀察使。 三年八月,吉甫罷相,出鎭淮南,羣等欲因失恩傾之。吉甫嘗召術士陳登宿于安邑里

入,云欲大用,人皆懼駭,聞其卒方安。 二子:謙餘、審餘 九年,韶還朝,至衡州病卒,時年五十。。羣性狠戾,頗復恩讎,臨事不顧生死。是時徵

轉水部 不就。 書爲事,凡二十年不出。 元年卒,時年七十。 兄常字中行,大曆十四年登進士第,居廣陵之柳楊。 其年,杜佑鎭淮南,奏授校書郎,爲節度參謀。 員外鄓。 出爲朗州刺史,歷固陵、潯陽、臨川三郡守。 子弘餘,會昌中爲黃州刺史。 貞元十四年,鎭州節度使王武俊聞其賢,遣人致聘,辟爲掌書記, 元和六年,自湖南判官入爲侍御史, 結廬種樹,不求苟進,以講學著 入為國子祭酒,求致仕。

二年卒,時年七十四。子周餘,大中年祕書監。 檢校水部 年字貽周,貞元二年登進士第,試秘書省校書郎、東都留守巡官。歷河陽、昭義從事 郎中,賜緋,再爲留守判官。 入爲都官郎中,出爲澤州刺史,入爲國子祭酒。 長慶 ,

判官,歷信、婺二州刺史。卒年六十三。子繇、載。 年弟庠,字胄卿,釋褐國子主簿。 |使、殿中侍御史,遷澤州刺史。又爲宣歙副使,除奉天令、登州刺史、東都留守 吏部侍郎韓皐出鎭武昌,辟爲推官。皐移鎭浙西,奏

仲之間,與牢詩俱爲時所賞重。 奏爲副使、檢校祕書少監、兼御史中丞,賜金紫。 記之任。 |鞏字||友封,元和二年登進士第。 平盧薛平又辟爲副使。入朝,拜侍御史,歷司勳員外、刑部郎中。 性温雅,多不能持論,士友言議之際,吻動而不發,白居易 袁滋鎭滑州,辟爲從事。滋改荆、襄二鎭,皆從之掌管 被移鎮武昌, 鞏又從之。 鞏能五言詩, 昆 元稹觀察浙東,

李遜字友道,後魏申公發之後,於趙郡謂之申公房。 會祖進德,太子中允。 祖珍玉

明令。父震,雅州別駕。世寓於荆州之石首。

以寧息。觀察使旨限外徵役,皆不從。入拜虞部郞中。 不自戢,因行攘剽。及遜至郡,餘亂未殄,徐驅其間,爲陳逆順利害之勢,衆皆釋甲請罪,因 先是,豪州之都將楊騰,削刻士卒,州兵三千人謀殺騰。騰覺之,走揚州,家屬皆死。 遜登進士第,辟襄陽掌書記,復從事於湖南,主其留務,頗有聲績,累拜池、濠二州刺史。

先是,貞元初,皇甫政鎮浙東。嘗福建兵亂,逐觀察使吳詵,政以所鎮實壓閩境,請權益兵 三千,俟賊平而罷。賊平向三十年,而所益兵仍舊。 貧富、扶弱抑強爲已任,故所至稱理。 元和初,出爲衢州刺史。以政績殊尤,遷越州刺史、兼御史大夫、浙東都團練觀察使。 遜視事數日,舉奏停之。 遜爲政以均

誠啓沃,不必擇辰。今羣臣敷奏,乃候隻日,是畢歲臣下覩天顏、獻可否能幾何?」憲宗嘉 九年,入爲給事中。 遜以舊制隻日視事對羣臣, 遜奏論曰:「事君之義,有犯無隱。 陳

傳第一百五 李遜

列

之,乃許不擇時奏對。俄遷戶部侍郎。

方討吳元濟,朝議以唐、蔡鄰接,遂以鄧隸唐州,三郡別爲節制,命高霞寓領之,專俟攻 元和十年,拜襄州刺史,充山南東道節度、觀察等使。 襄陽前領八郡,唐、鄧、隋在焉。

討。遜以五州賦餉之。

降爲恩王傅。 遜撓霞寓軍,所以致敗。上令中使至襄州聽祭曲直,奏言遜不直,乃左授太子賓客分司,又 霞寓爲賊所敗,乃移過于遜,言供饋不時。 霞寓本出禁軍,內官皆佐之。 旣貶官,中人皆言 兵於唐州,其襄陽軍隸于霞寓。 軍士家口在襄州者,遜厚撫之,士卒多拾霞寓亡歸。 旣而 時遜代嚴綬鎭襄陽,綬以八州兵討賊在唐州。 既而經以無功罷兵柄,命高霞寓代經將

具,示賞罰必信,號令數百言,士皆感悅。 度、陳許溵察等州觀察處置等使。 是時,新罹兵戰,難遽完緝。 旋爲其下所惑而止。遜還,未幾,除京兆尹,改國子祭酒。 十三年,李師道劾順,命遜爲左散騎常侍,馳赴東平論之。 十四年,拜許州刺史,充忠武節 及遜至,集大軍與之約東嚴 師道得韶意動,卽請効順

發兵,故先諸軍而至,由是進位檢校吏部尙書。尋改鳳翔節度使,行至京師,以疾陳乞,改刑 長慶元年,幽、鎭繼亂,遜請身先討賊,不許,但命以兵一萬,會于行營。遜奉詔,卽日

部尙書。長慶三年正月卒,年六十三,廢朝一日,贈右僕射。

爲營丐,成其志業。建先遜一年卒。兄弟同致休顯,士君子多之。 遜幼孤,寓居江陵,與其弟建,皆安貧苦,易衣倂食,講習不倦。 諡日恭肅。 遜兄造,知二弟賢,日 造早卒。

官知禮部貢舉。建取捨非其人,又惑於請託,故其年選士不精,坐罰俸料。 翰,改京兆尹。與宰相韋貫之友善,貫之罷相,建亦出爲澧州刺史。徵拜太常少卿,尋以本 祕書省校書郎。德宗聞其名,用爲右拾遺、翰林學士。元和六年,坐事罷職,降曆事府司 郎,竟以人情不治,改爲刑部。 高郢爲御史大夫,奏爲殿中侍御史,遷兵部郎中、知制誥。自以草詔思遲,不願司文 建字杓直,家素清貧,無舊業。 與兄造、遜於荆南躬耕致養,嗜學力文。 舉進士,選授 明年,除禮部侍

子:訥、恪、朴。 建名位雖顯,以廉儉自處,家不理垣屋,士友推之。長慶二年二月卒,贈工部尙書。 訥最知名,官至華州刺史、檢校尙書右僕射。

薛戎字元夫,河中寶鼎人。 少有學術,不求聞達,居於毗陵之陽羨山。 年餘四十,不易

其操。 江西 「觀察使李衡辟爲從事,使者三返方應。 故相齊映代衡, 又留署職, 府罷歸山。

福建觀察使柳冕表爲從事,累月,轉殿中侍御史。

徐起以見,一揖而退。 意 使 **遂辭職寓居於江湖間。** 成總之罪。 ,別白其狀。|戎還自泉州,冕盛氣據衙而見賓客。|戎忿歷東廂從容而入。|冕度勢未可屈, 誣奏,貶泉州別駕。 會泉州 闕刺史,冕署戎權領州事。 操心如一,竟不動搖。杜佑鎭淮南,知戎之冤,乃上其表,發書諭冕,戎難方解, 又構其罪以狀聞,置法于佛寺,環以武夫,恣其侵辱,如是累月,誘令 **冕附會權勢,欲構成總罪,使|**戎按問曲成之。||戎以總無辜,不從冕 是時,姚南仲節制鄭滑,從事馬總以其道直爲監軍

宗族。 歲 部 員外郎。 ,以疾辭官。 後 · 閻濟美爲福建觀察使,備聞其事,奏充副使。 又隨濟美移鎭浙東,改侍御史,入拜刑 身歿之後,人無譏焉。 出爲河南令,累改衢、湖、常三州刺史,遷浙東觀察使。 長慶元年十月卒,贈左散騎常侍。 兄弟五人,季弟放最知名。 戎檢身處約,不務虛名。 俸入之餘,散於 所莅皆以政績聞。 居數

擢 拜右拾遺 放登進士第,性端厚寡言,於是非不甚繁意。 轉補闕、歷水部、兵部二員外,遷兵部郎中。 累佐藩府,莅事幹敏,官至試大理評事,

類也。 叩頭曰:「臣實庸淺,獲侍冕旒,固不足猥塵大位。輔弼之任,自有賢能。」其言無矯飾,皆此 在 左右,密參機命。穆宗常謂放曰:「小子初承大寶,懼不克荷,先生宜爲相,以匡不逮。」放 遇憲宗以儲皇好書,求端士輔導經義,選充皇太子侍讀。及穆宗嗣位,未聽政間,放多 穆宗深嘉其誠,因召對思政殿,賜以金紫之服,轉工部侍郎、集賢學士,雖任非峻

切,而恩顧轉隆。轉刑部侍郎,職如故。

部侍郎、禮部尙書,判院事。 乂寧。蓋人知孝慈,氣感和樂之所致也。」上曰:「聖人以孝爲至德要道,其信然乎!」轉兵 以漢朝論語首列學官,光武令虎賁之士皆習孝經,玄宗親爲孝經注解,皆使當時大理,四海 參,是非無準的,固不可爲經典比也。」帝曰:「六經所尙不一,志學之士, 白首不能盡通 明,皆天人之極致,誠萬代不刊之典也。史記前代成敗得失之迹,亦足鑒其興亡,然得失相 何得其要?」對日:「論語者六經之菁華,孝經者人倫之本,窮理執要,眞可謂聖人至言。 是 穆宗常謂侍臣曰:「朕欲習學經史,何先?」放對曰:「經者,先聖之至言,仲尼之所發 一, 如

年,卒於江西觀察使,廢朝一日。 其時偶以節制無闕,乃授以廉問。及鎭江西,惟用淸潔爲理,一方之人,至今思之。寶曆元 放閨門之內,尤推孝睦,孤孀百口,家貧每不給膽,常苦俸薄。 放因召對,怨求外任。

英氣動人,嚴穴之流,罕能及此。 然矯激過當,君子不爲。 如塤如篪,不通不介,士行之美, 史臣曰:穆祕監之剛正不奪,如寒松倚嚴,千丈勁節。而竇容州之敢決,如驚鳥逐雀,

崔氏諸子有焉。建、遜之貞方,戎、放之道義,元和已來,稱爲令族,宜哉!

贊曰:穆之贊、質、寶之常、羣,迹參時傑,氣爽人文。 二字英英,四崖濟濟。 **韓氏三門**

難兄難弟。

校勘記

(二) 高鐵 本書卷一六八高釴傳、新書卷一六三崔卿傳作「高釴」。

(II) 所至用寬政 「所」字各本原無,據冊府卷六八〇補。

舊唐書卷一百五十六

列傳第一百六

于頔 韓弘子公武 弘弟充 李質附 王智與子晏平

劉灣辟爲判官。 于頔字允元,河南人也,周太師燕文公謹之後也。始以蔭補千牛,調授華陰尉,黜陟使 又以櫟陽主簿攝監察御史,充入蕃使判官。再遷司門員外郎、兼侍御史,

賜紫,充入西蕃計會使,將命稱旨〔1〕,時論以爲有出疆專對之能。

褊狹, 政有績, 今賴之。 疏鑿,溉田三千頃,久堙廢。順命設堤塘以復之,歲獲秔稻蒲魚之利,人賴以濟。 州境陸地 歷長安縣令、駕部郞中。 其送終者往往不掩其棺槥,頔葬朽骨凡十餘所。改蘇州刺史,濬溝瀆,整街衢,至 然橫暴已甚, 吳俗事鬼,頗疾其淫祀廢生業,神宇皆撤去,唯吳太伯、伍員等三數廟存焉。 追憾湖州舊尉,封杖以計強決之。觀察使王緯奏其事, 出爲湖州刺史。因行縣至長城方山,其下有水曰西湖,南朝 德宗不省。

列

傳

第

百

大

于頔

恣威虐。 及後頗累遷,乃與緯書曰:「一蒙惡奏,三度改官。」由大理卿遷陝虢觀察使,自以爲得志,益 官吏日加科罰,其惴恐重足一跡。據姚峴不勝其虐,與其弟汎舟于河,遂自投而

旨,擅總兵據南陽,朝廷幾爲之旰食。 殯,順以兵圍其宅,令孽男逼娶其嫡女。 順累遷至左僕射、平章事、 燕國公。 |張陽縣,| 順命部將領士卒數百人劫||洪至||襄州,拘留之。中使奔歸京師,德宗怒,答之數十。 地。 判官薛正倫,奏貶峽州長史。及敕下,頗怒已解,復奏請爲判官,德宗皆從之。 順又表洪其責太重,復降中使景忠信宣旨慰諭,遂除洪吉州長史,然後洪獲赴謫所。 又怒 聞順事狀,亦無可奈何,但允順而已。順奏請無不從,於是公然聚斂,恣意虐殺,專以凌上 威下爲務。 唐州,收吳房、朗山縣,又破賊於濯神溝。於是廣軍籍,募戰士,器甲犀利,僴然專有漢南之 小失意者,皆以軍法從事。因請升襄州爲大都督府,府比鄲、魏。時德宗方姑息方鎭, 貞元十四年,爲襄州刺史,充山南東道節度觀察。 鄧州刺史元洪,順誣以贓罪奏聞,朝旨不得已爲流端州,命中使監焉。至隋州 地與蔡州鄰,吳少誠之叛,頗率兵赴 俄而不奉詔 正倫卒,未

其第二子方屢諷其父歸朝,入覲,册拜司空、平章事。 及憲宗卽位,威肅四方,頔稍戒懼。 以第四子季友求尚主,憲宗以長女永昌公主降焉。

厚,頔 見任。 遣。 受, 將赴 爲三 僮 誘 一十餘 正言之僮,支解棄于溷中。八年春,敏奴王再榮詣銀臺門告其事,卽日捕順孔目官沈爅、家 日 司 殿中少監、駙馬都尉季友追奪 闕 元和中,內官梁守謙掌樞密,頗招權利。有梁正言者,勇於射利,自言與守謙宗盟情 子敏與之遊處。 沒方歸。 使按問, 孔 下 人於內侍獄鞫問。 目官沈壁決四十、配流 待罪 明 於建福門。 乃搜死奴於其第,獲之。 日 正言取頗財賄,言路守謙,以求出鎮; 復待罪於建福門,宰相喻令還第,貶爲恩王傅。 尋出付 門司 封州。 不納,退於街南, 臺獄, 兩任官階, 奴犀牛與劉幹同手殺人,宜付京兆府決殺。一敏行至 詔御史中丞薛存誠、刑部侍郎王播、大理卿武少儀 順率其男贊善大夫正、 射馬 令其家循省。 負牆 而立,遣人進表。 久之無効,敏責其貨於正言,乃 左贊善大夫正、秘書丞方並停 都尉季友,素服單 敏長流雷州,錮 **閤門使以無** 身發 引不

子賓 金 五 百 頔 、其年 兩、 其年八月卒,贈太保,諡曰「厲」。其子季友從獵苑中,訴於穆宗,賜諡曰「思」。右丞 丢 帶 十月,改授太子賓客〔三。十年,王師討准、蔡,諸侯貢財助軍,順進銀七千兩、 二,詔 不納,復還之。 十三年,順表求致仕,宰臣擬授太子少保,御筆改爲太

夫 諡 者 ,所以 懲惡勸善,激濁揚淸,使忠臣義士知勸,亂臣賊子知懼。 雖竊位於當

張

IE

甫

封

敕請

還

本諡。

右補闕

高鉞上疏論之日〔三〕:

商山

賜死,梁正

言、僧鑒虛並付京兆府決殺。

而

此 時 死 不能救,況又隳其典法乎? 加惡諡者,所以懲暴戾,垂沮勸。 孔子修春秋,亂臣賊子懼,蓋爲此也。 垂範如

倒置 兇暴。 器,君之所司,若以假人,與之政也,政亡則國家從之。順頃鎭襄、漢,殺戮不辜,恣行 惠奸宄。 四方,幸免鈇鉞之誅,得全腰領而斃,誠宜諡之「繆厲」,以沮兇邪;豈可曲加美名,以 車 服、第宅則可,若亂朝廷典法,將何以沮勸?仲尼曰:「唯名與器,不可以假人。」名 臣 移軍襄、鄧,迫脅朝廷,擅留逐臣,徼遮天使。 當先朝嗣位之始,貴安反側,以靖 伏請速追前詔,却依太常諡爲厲。使朝典無虧,國章不濫。 風聞 如此,則是于頔生爲奸臣,死獲美諡,竊恐天下有識之士,謂聖朝無人,有此 此事是徐泗節度使李愬奏請。李愬勳臣節將,陛下寵其勳勞,賜其爵祿、

太常博士王彦威又疏曰:

過朝 古之聖王立諡法者,所以彰善惡、垂勸誠。使一字之褒,賞踰敍冕;一言之貶,辱 下不忍,改賜爲「思」,誠出聖慈,實害聖政。 擅 此有國之典禮,陛下勸懲之大柄也。順頃擁節旄,肆行暴虐,人神共憤,法 興 全師,僭爲正樂,侵辱中使,擅止制囚,殺戮不辜,誅求無度,臣故定諡爲

伏以陛下自臨宸扆,懋建大中,聞善若驚,從諫不倦。況當統天立極之始,所謂執

財助國 有賜諡之例,則甫之爲相也,有犯上殺人之罪乎?以頔況之,恐非倫類。 之徒如頔者衆矣,死援頔例, **法愼名之時,一垂恩光,大啓徼倖。** ,改過來覲,兩使絕域,可以贖論。 陛下何以處之?是恩曲於前, 且如頗之不法,然而陛下不忍加懲,臣恐今後不逞 夫傷物害人,剝下奉上,納賄求幸,尤不可長 而弊生於後。 若以 如以 頔 李 常入

澤以禮成,褒貶道存,僥倖路絕,則天下幸甚。 已而 歸朝(B),故恩禮殊尤,以勸來者。 入朝,豈茂昭之比乎!縱有入財使遠之勤, 自兩河宿兵,垂七十年,王師憓征,瘡痏未息。 而于頔以文吏之職,居腹心之地,而倔強犯命 何以掩其惡迹。 及張茂昭以易定入覲,程權以滄景 伏望陛下恩由義斷

其漸焉

疏奏不報,竟諡爲思。

結客刺度。 元稹 作相,欲以其策平河朔羣盜,方以策畫干稹。 長慶中,以戚里勳家諸貴引用,于方復至和王傅,家富於財,方交結遊俠,務於速進。 事下法司,按鞫無狀,而方竟坐誅。 而李逢吉之黨欲傾裴度,乃令人告顧欲

武 爲 知 兵 軍 其 州 節 **掾**,累 韓弘 事 馬 度副 使。 朝 奏試大理評事。 潁 廷亦以玄佐故許之。 貞元十五年, 大使知節度事、宋亳汴潁觀祭等使 JII 人 、。其祖、父無聞,世居滑之匡城。 全諒卒,汴軍 玄佐卒, 自試 子士 大理評事檢校工部尚書、汴州刺史、兼御史大 懷玄佐之惠,又以弘長厚,共請爲留後 寧被逐, 弘出汴州 少孤、依母族、劉玄佐卽其舅也。 ,爲宋州 南城將、劉全諒 () 環監 時爲都 事玄佐 軍使請

卒之魁 節 左 流 陸 右 在 道 長 鉞 離理所,唯令其子公武率師三千隸李光顏軍。 王 僕 中 源 時 重胤實當旗鼓。 爲賊所敗, 卽 鍔之下。 遇害, 吳少誠 射、 也。 弘 斬其 對賓僚言笑自若。 司 弘欲 空。 頗輕主帥。其爲亂魁黨數十百人,弘視事數月,皆知其人。有部將 人以聞。立出 遭 憲宗方欲用形勢以 大振威望,一日 X 憲宗 弘方鎮汴州 至汴,密與劉全諒謀,因曲環卒襲陳許。 即位, 乃授 弘 軍 自是訖弘入朝 加同平 淮 至三千, 當兩 西諸軍 ,引短兵於衙門,召鍔與其黨三百,數其罪,盡斬 -章事。 河賊之衝要,朝廷慮其異志,欲以兵柄授之,而令李光 臨淮西,乃授以司徒、平章事, 助禁軍共討少誠。 行營都統, ,二十餘年, 時王鍔檢校司空、平章事。致書于宰臣武元衡, 令兵部與中、知制誥李程宣賜官告。 弘雖居統帥, 常不欲諸軍立功, 軍衆十萬,無敢怙亂者。 **汴州自劉** 會全諒卒,其人在傳舍,弘喜獲 士寧之後,軍益 班在鍔上。及用嚴綬爲 之以徇, 劉鍔者,兇 累授檢校 驕恣, 及 陰爲逗

撓之計。 每聞獻捷,輒數日不怡,其危國邀功如是。 吳元濟誅,以統帥功加檢校司徒、兼侍

中,封許國公,罷行營都統。

於便殿,拜舞之際,以其足疾,命中使掖之。宴賜加等,預册徽號大禮。 十四年,誅李師道,收復河南二州,弘大懼。其年七月,盡攜汴之牙校千餘人入覲,對 進絹三十五萬匹、

絁三萬匹、銀器二百七十件,三上章堅辭戎務,願留京師奉朝請。 韶日:

誕敷,王言總會,百辟攸憲,四方式膽。永念于懷,久虛其位,載揚成命,愈曰休哉 納大忠,樹嘉績,爲臣所以明極節;錫殊寵,進高秩,有國所以待元臣。 況乎邦教

徒、兼侍中、使持節汴州諸軍事、汴州刺史、上柱國、許國公、食邑三千戶韓弘,降神挺 和平,人用庶富,威聲之重,隱若山崇。 禁暴之略,仗義益彰。自鎭浚郊,二十餘載,師徒稟訓而咸肅,吏士奉法而愈明。 材,積厚成器, 宣武軍節度副大使知節度事、汴宋亳潁等州觀察處置等使、開府儀同三司、守司 中蘊深閎之量,外標嚴重之姿。有匡國濟時之心,推誠不耀;有夷兇 俗臻

遂梟元惡,惟乃有略地之效。旣聞旋旆,俄請執珪,深陳魏闕之誠,遠繼韓侯之志,朝 天有慶,就 屬者,准濆濯征,命統羣帥,克殄殘孽,惟乃有指蹤之功。及齊境興妖,分師進討, 日方伸。 又抗表章,固辭戎旅,三加敦諭,所守彌堅。 于蕃于宣,諒切於注

之長,昇之以贊萬務。 意 我弼我輔、難違其衷懇。 玄衮赤鳥,備于寵光,不有其人,孰膺斯任?可守司徒、兼中書 式遂良願: 載兼上司。 論道之榮,因之以齊八政;中樞

乃以吏部尚書張弘靖兼平章事,代弘鎭宣武。

令。

年,請 尉,賻絹 弟充爲鄭滑節度使,子公武爲鄽坊節度使。 憲宗 老乞罷戎鎭,三表從之。 二千匹、布七百端、米栗千石 崩,以弘攝冢宰。 十五年六月,以本官兼河中尹、河中晉絳節度觀察等使。 依前守司徒、中書令。其年十二月病卒,時年五十八,贈太 父子兄弟,皆秉節鉞,人臣之寵,冠絕一時。 時弘

始 道輩皆憚之。 七 千匹,兵械 終,人臣之幸也。 初,弘鎭 稱是。 韶使宣諭,弘多倨待。 大梁二十餘載,四州征賦皆爲己有,未嘗上供,有私錢百萬貫、粟三百萬斛、馬 時公武已卒, 專務聚財積栗,峻法樹威,而莊重寡言,沉謀勇斷,鄰封如吳少誠、李師 弘孫紹宗嗣。 及齊、蔡賊平, 勢屈入覲,兩朝寵待加等,弘竟以名位

公武 丁所生憂, 自宣武馬步都虞候將兵誅廢,賊平,檢校右散騎常侍、鄜州刺史、鄜坊等州節度 起復金吾將軍,仍舊職。 十四年,父弘入朝,公武乞罷節度,入爲右金吾將

軍 家門之盛 旣而 弘出鎮 懼 不 克勝。」堅辭宿 河中,季父充移鎮宣武, 衞 改右 騞 衞將 公武數曰:「二父聯居重鎭,吾以孺子當執金吾職, 軍 ٥ 性 頗 恭 遜 ,不以富貴 (白處。 弘 靇 河中, 居

永崇

里

第

,公武居宣陽里之北門,

因省父

無

疾暴卒,贈

戶

部尙書。

頗 酷 法, 充 依舅劉玄佐,歷河陽、昭義牙將,及兄弘節制宣武, 人人不自保。 充獨 7.謙恭執 禮, 未嘗懈怠, 由是 徧 召歸主親兵, 得士心。 然以親逼權重 奏授御史大夫。 常不自 弘

充 奉 腦 後 命 衞 充 在 將 屬 與承元 中牟 討 朝 軍 長 元 兵 和 介 廷 慶 於 辺 六年, 聞 三年 十二月, 紀 軍 其 充 更換所 綱 ||幽 於 謀 人人在 李質。 因獵近郊,單騎歸于洛陽。 湯氏 轉 率 汴 守, 鎭、 大 衆 州 質以計 魏 將 意 檢 徑 復亂 軍 欲 衆心 校 至 必先 ·,歷 城下 左 誅 僕射。 悦附, 朝 少府監 首 收 • , 廷以王 汴 亂 命充為 是歲 送 因 承元有冀卒數千在滑州, 十五 大 時朝廷方姑息弘,亦憐充之無異志,擢拜右金吾 歸京 宣武 **汴州** 肆俘掠。 年,代姪公武爲鄜坊節度使、檢校工部 師, 節度使,兼統義成之師往討次。 節度使李愿被三軍所逐,立都將李介爲留 充遂不戰而入大梁。 使姚文壽亦欲招許下之師 恐封疆 相接,復相勸誘, 時陳許李光顔亦 詔 加檢校司空。 會次 尚書。 疽 發

傳

韶割潁州隸滑州。 · 充旣安堵,密籍部伍間,得嘗構惡者千餘人。 一日下令,丼父母妻子立

家,素不事豪侈,常以簡約自持,臨機決策,動無遺悔,善將者多之。 出之,敢逡巡境內者斬。自是軍政大理,汴人無不愛戴。 四年八月,例加司徒。詔未至,暴疾卒,時年五十五,贈司徒,諡曰潚。 充雖內外皆將

膳而後迎流。召爲金吾將軍,長慶三年四月卒。 去二千人日膳,人情必大去;若不除之,後當無繼。不可留此弊以遺吾帥。」遂處分停日 喻不從。會內宜發首,乃與監軍姚文壽謀,斬內傳首京師。 知軍州事,使衙牙兵二千人,皆日給酒食,物力爲之損屈。 李質者,汴之牙將。一李齐旣爲留後,倚質爲心腹。及朝廷以內爲郡守,志邀節鉞,質勸 充將至,質日:「若韓公始至,頓 有韶以韓充鎭汴,充未至,質權

子詹 納怒,以兵攻除甚急。 王智興字匡諫,懷州温縣人也。 智興少聽銳,爲徐州衙卒,事刺史李洧。.及李納謀叛,欲害洧,洧遂以徐州歸國。 智興健行,不四五日齎表京師求援。德宗發朔方軍五千人隨智興赴 曾祖靖,左武衞將軍。 祖康,右金吾衞將軍。父曆,太

之,淄 圍 解。 自是 智興常以徐軍抗納, 累歷滕、豐、 沛、 狄 四鎮將。 自是二十餘年爲徐

率(徐) 急 將。 悉 無 委智興 罪 智 軍八 了, 違 元 興 和 復 軍 以抗之。 中 千會諸道之師 法也。」卽斬之以 擊敗之。 ', 王 師 耶將 誅吳元濟,李師道 於賊壁 王朝 進 撃 徇。 晏以兵攻沛,智 獲美妾,智興 ,與陳許之軍 累官 與蔡賊謀撓沮王師, 至侍御史、本軍 、懼軍 大破賊於金鄉 興擊 土 一争之,乃曰:「軍 敗之。賊 都押衙。 又令姚海 頻出軍侵險,徐帥李愿以所部步 拔 魚臺 十三年,王師誅李師道 中有· ,俘斬萬計 率 勁兵 女子,安得 二萬圍 以 功遷 不敗? 豐,攻 御 智興 此 史中 城 騎 雖 甚

丞

賊平

刺

史。

情 興 興 節 武 旅 **心**貲貨 (既首 先期 寧軍 也。 度使 長 處賓 崔 節 慶 。 率 奉治裝赴 入 羣 境 授沂州 度 初 十取 僚, 7、羣頗 慮 副 河朔 其旋 使、 聞之心 闕, 河北 復 憂疑,令府僚 軍難 亂 智興 逐濠州 微 動,率歸 行營都 制 、遺兵 密表 兵進討。穆宗素知智興善將, 刺 知兵 土 、迎勞, 師 史侯弘度 請 援送 斬 追 馬 關 赴闕 使。 且誠之曰:「兵士 羣家屬。 而 入,殺 ,授以 弘度 初 石。 棄城走。 軍中異己 1智興以 至 他官。 埇 橋, 悉輸甲仗於外, 朝廷以罷兵,力不 徐 遷檢校左散騎常侍、兼御史大夫,充 事 者十 遂掠鹽 未行, 軍三千渡河,徐之勁卒皆在部 餘 會赦王廷湊,諸道 | 鐵院緡幣及汴路 人,然後詣衙 副使以 能 加 十騎 謝羣日:「此 討, 進奉物, 遂授智興 入城。 班 智 商 智

列

傳

以路 檢 校 權勢,賈其聲譽,用度不足,稅泗口以哀益之,累加至檢校僕射、司空。 I. 部 尚書、 徐州 刺 史、御史大夫,充武寧軍節度、徐泗濠觀察使。 自是智興務積財賄,

月糧 度、陳許蔡等州觀察使。 封鴈門郡王。 九年五月,改汴州刺史、宣武軍節度、宋亳汴潁觀察等使。 王 一廷湊 銄, 八和初, ,王師經年無功。 朝廷嘉之, 賊平入朝,上賜宴麟德殿,賞賜珍玩名馬,進位侍中,改許州刺史、忠武軍節 李同捷據滄德飯,智興上章,請躬督士卒討賊,從之。 加檢校司徒、同平章事,兼滄德行營招撫使。初,同捷狂桀犯命,濟之以 及智興拔棣州,賊大懼,諸軍稍務進取。 大和七年,改授河中尹、河中節度、晉磁隰觀察等使,智興因入朝。 以智興首功,加守太傅, 乃出全軍三萬,自備五

會葬者千人。 開 成 元年七月卒, 智興 九子, 年七十九,贈太尉,不視 晏平、晏宰、晏阜、晏實、晏恭、晏逸、晏深、晏斌、晏韜,而晏平、晏 朝三日。 葬于洛陽楡林之北原,四鎮將校

字最知

名。

憲司所糾。 度。 晏平幼從父征伐,以討李同捷功授檢校右散騎常侍、靈州大都督府長史、朔方靈 丁父憂,奔歸洛陽。 減死,長流康州。 晏平居官貪黷,去鎭日,擅將征馬 以父喪,未赴流所,告於河北三鎮,三帥上表救解,請從昭雪, 四百餘 匹及兵仗七千事 自 一篇,爲 鹽節

改授撫州司馬。 給事中韋温、薛廷老、盧弘宣封還制書,改永州司戶。 章温又執不下,文宗

令中使宣諭方行。

晏宰於昆仲間最稱偉器,大中後,歷上黨、太原節度使。 **扦迴鶻、党項,屢立邊功。**

晏皐仕至左威衞將軍。

宜矣。韓、汪二帥,乘險蹈利,犯上無君,豺狼噬人,鵂鶹幸夜, 爵祿過當, 史臣曰:于燕公以儒家子,逢時擾攘,不持士範,非義非俠,健者不爲,末塗淪躓, 其可已乎?謂之 固其

功臣、恐多慚色。 贊曰:: 于子清狂, 輕犯彝章。 韓虐王剽,專恣一方。 元和赫斯、揮劍披攘。 擇肉之倫,

爪距摧藏。

校勘記

(1) 將命稱旨 「旨」字各本原作「於」,據冊府卷六五三改。

(11) 改授太子賓客 新書卷一七二于順傳作「拜戶部尚書」。

列傳第一百六 校勘記

(三) 高鉞 本書卷一六八高釴傳、新書卷一七二于頔傳作「高釴」。

(日)程權 各本原作「陳權」,據本書卷一四三程日華傳改。

四一四二

舊唐書卷一百五十七

列傳第一百七

王翃 兄翊 郗士美 李 鄘 子柱 柱子磎 辛 祕 馬 摠 章弘景

王彦威

遷 襄州 爲純臣,遷刑部侍郎、御史中丞。 王翙 刺 、太原晉陽 史、山南東道節度觀察等使。 人也。 兄娜,乾元中累官至京兆少尹。 居憲司雖 入朝,充北 不能舉振綱條,然以謹 蕃宜慰使, 性識柔,淡於聲利,自商州 稱職, 代宗 重知名。 素重之。 大曆二年卒。 及卽位 刺史

,有威望智術,所莅立名。

軍。 大 曆 五 年遷 戦 於葉縣 容州 刺史、 大敗,餘衆離散。 容管經略使。 嶺南谿洞夷游乘此相恐爲亂,其首領梁崇牽 自安、 史之亂, 頻韶徵發嶺南兵夢, 隸南陽 魯炅

列傳第一百七 王翃

四一四三

不南 李抗、侯令儀、 道 都 統一, 耿愼 及其 惑 元結、長孫全緒等,雖容州 誘 西原 賊張 侯、 夏永攻陷 刺 史,皆寄理藤州,或寄梧州 城 邑,據容州 前 後經略使陳

遁數 手札 帥上 合。 好爵 夫 日:「客州陷賊已久,羣僚方強 如如 獻 節 及翃至 百 告 未 以是 者 度 里 諭 ャ 外, 使牒 七 出 義 十餘 人各盡力。 州 藤州 師 盡復容州故境。 刺史陳仁璀、藤州 止 ,但請移牒諸 翃 人。累加 言於衆曰:「吾爲容州 用兵,翊盧惑將士 不數月, 銀青光祿 州 一,卒難圖 ,揚言出千兵援助 | 翃 斬賊魁 刺史李曉庭等, 大 使以 、夫、兼 ,匿其牒,奮起士卒,大破賊數萬衆,擒其帥 世。 歐 刺史,安得寄理他邑 聞, 陽珪。 御 若務速攻,祇自敗 奏置 史中丞,充招討 ,冀藉聲勢成萬 盟約 順州 馳於廣州, 討賊。 ,以遏餘寇。 | 栩復募三千餘人同力戰 處置 見節度使 軍 一之功。」勉然之。 郡 乃出私 前後 使。 不可復也。」翃請 李勉 大 財募將 小百 求兵爲援 餘 健, 戰 梁崇牽 生擒 百:「大 娜 許 乃 | 奏以 日 賊 賊 數 勉

殺節 日:「容州 大 敗 度使 翃 叉 令其 代宗 兵馬 呂崇 聞 虚 賁 將張利用、 而 赴 ,嶺南復 廣 壯 州, 之,遣中使慰勞, 亂, 李實等分兵討 郡 | 翃造 미 圖 也。 大將李實悉所管兵 加 於是悉衆來襲。 襲 金紫光祿大夫。 西原, 遂收復鬱林 赴 援廣州。 翃 知其 諸 州 來 西原 部 伏 兵禦之, 賊 內 漸安。 生擒覃問 復招 後因 合夷 哥 舒 其 獠 晃

時 西 蕃入寇 河中元帥郭子儀統兵備之, 乃徵翃爲河中 少尹 **'**,充節度留後,領 子儀

務。 有悍將 凌正者 ,横暴擾軍政,約其徒夜譟斬關以逐翃。 有告者,栩縮夜漏數 刻,以差其

期,賊驚而遁,卒誅正,軍城乂安。

省 史、 叛。 何,吳少誠 事 福 郊奔至 歷 建觀察使,入爲太子賓客。 東畿 汾州 阻命,翃賦車籍甲,不待完繕,東畿之人賴之。十八年卒,時七十餘,贈禮部尙書。 汝防 奉天, 刺 史、京兆 禦使。 加御史大夫,改將作監 尹。 凡開置二十餘屯, 屬發涇原兵討李希烈,軍次滻水,翃備供頓, 貞元十二年,檢校禮部尚書,代董晉爲東都留守 市勁觔良鐵以爲兵器, ,從幸山南。 車駕 還京, 簡練士卒, 改大 理 肉敗糧臭, 卿。 軍政頗 出為 衆怒以 修。 判 福 () 州 書 無 刺

疾辭。 使,踪 與顏眞 拜左庶子、集賢 外、郎中、諫議大 都 暴横 退 卿 士美字和夫,高平金鄉 歸 東洛 蕭穎士、 ,於銀臺門毀辱京兆尹 學 凡十年,自號 夫、中書舍人。 李華皆相友善。 到京 ,以年老乞身,表三上,除太子詹事致仕,東歸洛陽。 伊 人也。 川 崔昭。 田 處事 舉進士,繼以書判 父,清名高 父純,字高卿,爲李邕 不迴,爲元載所忌。 純詣 元載 節 稱 抗 於天下。 論,以爲 制策 一、張九齡等知 魚朝恩署牙將李琮爲兩街 三中 國恥,請速 及德宗即位 高第, 論 登朝歷拾遺 遇,尤以詞學 一、崔祜 奏,載 甫 **德宗召見**, 不從,遂以 作 、補闕 相,召 見推 功徳

列

僔

第

百

世。

屢 加褒歎 賜以 金紫。 公卿大夫皆賦詩祖送於都門, **搢紳以爲美談。** 有文集六十卷行於

「吾曹異日當交於二腳之間矣。」 未冠,爲陽翟丞。 士美少好學,善記覽,父友顏眞卿、蕭穎士輩嘗與之討論經傳,應對如流,旣而相謂曰: 李抱眞鎭潞州,辟爲從事,雅有參贊之

績。 其後 易二帥, 皆韶 上美佐之。

侍,封高平郡公,再遷京兆尹。 向子琪連結夷獠,控據山洞,衆號七八千,士美設奇略討平之。 由 |坊州刺史爲黔州刺史、兼御史大夫、持節黔中經略招討觀祭鹽鐵等使。 時溪州賊帥 每別殿延問,必容訪大政。 出爲鄂州觀察使。 詔書勞慰,加檢校右散騎常

會宥母卒於京師, 貞元十八年,伊愼有功,特授安黃節度。二十年,愼來朝,其子宥主留事,朝廷未能去。 利主軍權, 不時發喪。 士美命從事託以他故過其境, 宥果迎之, 告以凶

* 政之豐給浮費,至皆減損,號令嚴肅。

問,先備肩籃,即日遣之。

元和五年,拜河南尹。

明年三月,檢校工部尚書、潞州大都督府長史,充昭義節度。

前

令召至,數其罪斬之。下令曰:「敢後出者斬 及朝廷討王承宗, 士美遣兵馬使王獻領勁兵一萬爲先鋒。 獻兇惡恃亂, 逗撓不進, 遽 」」士美親鼓之。兵旣合,而賊軍大敗,下三營,

環柏鄉,屢以捷聞。上大悅曰:「吾故知士美能辦吾事。」于時四面七、八鎭兵共十餘萬,以環 未有首功,多犯法。 士美兵士勇敢畏法,威聲甚振,承宗大懼,指期有破亡之勢,會

韶班師,至今兩河間稱之。

時名稱翕然。 和 十四年九月卒,年六十四,贈尚書左僕射,諡曰景。 十二年,以疾徵爲工部尙書,稍間,拜忠武節度使、檢校刑部尙書。 士美善與人交,然諾之際豁如也,當 至鎭踰月,寢疾,元

光無以罪之。時與故相高郢同在賊廷,乃密奏賊軍虛實及攻取之勢,德宗賜手韶以勞之。 **鄘**皆遺行。後懷光知,責之,對曰:「鄘名隸軍籍,不得隨侍老母,奈何不使婦隨姑行也。」懷 馬燧就獄致禮,表爲河 陷賊中,恐禍及親,因僞白懷光曰:「兄病在洛,請母往視之。」懷光許焉,且戒妻子無得從, 又以書判高等,授祕書正字。爲李懷光所辟,累遷監察御史。及懷光據蒲津叛,鄘與母妻 事泄,懷光嚴兵召郢與鄘詰責。 李鄘 字建侯,江夏人。北海太守邕之姪孫。父暄,官至起居舍人。鄘大曆中舉進士, 東從事,尋以言不行,歸養洛中。 鄘詞激氣壯,三軍義之,懷光不敢殺,囚之獄中。懷光死, 襄州節度使嗣曹王阜致禮延辟,署

列

從事,奏兼殿中侍御史。入爲吏部員外郎。

敢犯。 **鄘爲徐州宣慰使。** 徐州 及愔上表稱兵馬留後,鄘以爲非詔令所加,不宜稱號,立使削去,方受其表。 張建封卒,其子愔爲將校所迫, 俾領軍務。 |鄘直抵其軍,召將士,傳朝旨,陳禍福,脫監軍使桎梏,令復其位,兇黨不 韶擇臨難不懾者卽其軍以諭之,遂命 遷吏部

郎中。

字, 但為鳳翔 將,有「神策行營」之號。 不安,故未幾卽改去。 五年多,出爲揚州大都督府長史、淮南節度使。鄘前在兩鎭,皆以剛嚴操下,遽變舊制, 、禁暴,威望甚著。 順宗登極,拜御史中丞,遷京兆尹、尚書右丞。元和初,以京師多盜,復選爲京兆尹,擒 隴右節度。 專拜檢校禮部尙書、

鳳翔尹、

鳳翔麗右節度使。

是鎭承前命帥,

多用武 至淮南數歲,就加檢校左僕射,政嚴事理,府廩充積 初受命,必詣軍修謁。 未幾,遷鎮太原,入爲刑部尚書、兼御史大夫、諸道鹽鐵轉運使。 鄘旣受命,表陳其不可, 韶遂去「神策行營」

獻,自此王師無匱乏之憂。 未嘗請於有司。 鄘以境內富實, 及王 師 征淮夷, 乃大籍府庫, 時憲宗以兵興, **鄆寇李師道表裏相援。** 一年所蓄之外,咸貢於朝廷。 國用不足,命鹽鐵副使程异乘驛諭江淮諸道, **鄘發楚、壽等州二萬餘兵,分壓賊境,** 諸道以鄘爲倡首,悉索以 俾助軍 日費甚

疾歸第。旣未朝謁,亦不領政事,竟以疾辭,改授戶部尙書。俄換檢校左僕射,兼太子賓 勢過,頗安外鎮。 登祖筵,聞樂而泣下曰:「宰相之任,非吾所長也。」行頗緩,至京師,又辭 歸,遂引以爲相。十二年,徵拜門下侍郎、同平章事。鄘出入顯重,素不以公輔自許,年侵 先是吐突承璀監淮南軍,貴寵莫貳,鄘亦以剛嚴素著,而差相敬憚,未嘗稍失。

手,居人頗陷非法,物議以此少之。 以峻法立操,所至稱理,而剛決少恩。鎭揚州七年,令行禁止,擒擿生殺,一委軍吏,參佐東 |鄘強直無私飾,與楊憑、穆質、許孟容、王仲舒友善,皆任氣自負。 然||鄘當官嚴重,爲吏

客,分司東都。尋以太子少傅致仕。元和十五年八月卒,贈太子太保,諡曰肅。

子柱,官至浙東觀察使。

穆仁裕鎭河陽,自監察、殿中相次奏爲從事。入爲尙書水部員外郎,累遷吏部郎中,兼史館 修撰,拜翰林學士、中書舍人。廣明中,分司洛下。遇巢、讓之亂,逃於河橋。光啓中避亂 柱子蹊,字景望,博學多通,文章秀絕。大中十三年,一舉登進士第。歸仁晦鎭大梁,

淮海,有偽襄王詔命,磎皆不從。

王鐸鎭滑臺,杖策詣之。鐸表薦于朝,昭宗雅重之,復召入翰林爲學士,拜戶部侍郎,遷 列傳第一百七 李 ĒŻ 四四 九

崇魯之惡。議者重其才而鄙其訟。昭宗素愛其才, 及蹊素不相協,密遣崇魯沮之也,乃左授太子少師。一蹊因上十章及納諫論三篇自雪,且數 崇魯掠其麻哭之,奏云:「李磎奸邪,挾附權倖,以忝學士,不合爲相。」時宰臣崔昭緯與 禮部尙書。 景福二年十月,與韋昭度並命中書門下平章事。 而急於大用。 宣制日,水部郎中、知制誥劉 至乾寧初,又上第十一 、昭度

僅百餘卷,經亂悉亡。王行瑜死,德音昭雪,贈司徒,諡曰文。 子恍,字東濟,有俊才,與父同日遇害,詔贈禮部員外郎。 |磎自在臺省,聚書至多,手不釋卷,時人號曰「李書樓」。所撰文章及注解書傳之闕疑 表,乃復命爲相。

數月,與昭度同爲王行瑜等所殺。

安尉。 郊丘二禮儀使皆署爲判官。當時推其達禮。 辛祕,隴西人。少嗜學,貞元年中,累登五經、開元禮科,選授華原尉,判入高等,調補長 高郢爲太常卿,嘉其禮學,奏授太常博士。遷祠部、兵部員外郎,仍兼博士。 山陵及

刺史,或以戰敗,或被拘執,賊黨以祕儒者,甚易之。 元和初,拜湖州刺史。未幾,屬李錡阻命,將收支郡,遂令大將監守五郡。蘇常杭睦四州 祕密遣衙門將丘知二勒兵數百人,候

賊將動,逆戰大破之。 知二中流矢墜馬,起而復戰,斬其將,焚其營,一 州遂安。 賊平,以功

賜金紫,由是僉以祕材堪將帥。

郎中 及太原節度范希朝領全師出討王承宗,徵祕爲河東行軍司馬,委以留務。 出爲汝州刺史。九年,徵拜諫議大夫,改常州刺史,選爲河南尹。 莅職修政,有可稱 **尋**召拜左司

誌。 完復者,遂以命祕。凡四歲, 產,爲時所稱。 澤潞磁洺邢等州觀察使。是時以再討王承宗,澤潞壓境,凋費尤甚。朝議以兵革之後,思能 將歿,又爲書一通,命緘致几上。 十二年,拜檢校工部尚書,代都士美爲潞州大都督府長史、御史大夫,充昭義軍節度、 元和十五年十二月卒,年六十四,贈左僕射,諡曰昭。 府庫積錢七十萬貫,餱糧器械稱是。 其家發之,皆送終遵儉之旨。久歷重任,無豐財厚 及歸,道病, 先自爲墓

從事。 福 建 觀察使 馬摠字會元,扶風人。少孤貧,好學,性剛直,不妄交遊。 南 仲與監軍使不叶,監軍誣奏南仲不法。及罷免,摠坐貶泉州別駕,監軍入掌 貞元中,姚南仲鎮滑臺 後量移恩王傅。 樞密。

列

第

百七

馬搬

窜弘景

侍郎。 部尙書、蔡州刺史、兼御史大夫,充淮西節度使。摠以申、光、蔡等州久陷賊寇,人不知法, 德,以繼伏波之迹。以綏蠻功,就加金紫。八年,轉桂州刺史、桂管經略觀察使,入爲刑部 初,遷虔州刺史。四年,兼御史中丞,充嶺南都護行了、本管經略使。 威刑勸導,咸令率化。奏改彰義軍曰淮西,賊之僞迹,一皆削盪。 南海累年,淸廉不撓,夷獠便之。於漢所立銅柱之處,以銅一千五百斤特鑄二柱,刻書唐 裴度宜慰淮西,奏爲制置副使。 吳元濟誅,度留摠蔡州,知彰義軍留後。 摠敦儒學,長於政術,在 尋檢校工

關防禦、鎭國軍等使。十四年,遷檢校刑部尚書、鄆州刺史、天平軍節度、 等使,就加檢校尙書左僕射。入爲戶部尙書。長慶三年卒,贈右僕射。 十三年,轉許州刺史、忠武軍節度、陳許澱等州觀察處置等使。 明年,改華州刺史、潼 **鄆曹濮等州觀察**

卷,行於世。 摠理道素優,軍政多暇,公務之餘,手不釋卷。 所著奏議集、年曆、通曆、子鈔等書百餘

弘景, 貞元中始舉進士, 爲汴州、浙東從事。 章弘景, 京兆人。 後周逍遙公敻之後。 祖嗣立,終宣州司戶。 元和三年,拜左拾遺,充集賢殿學士,轉左補 父堯,終洋州興道令。

仲方。弘景坐與仲方善,出爲綿州刺史。宰相李夷簡出鎭淮南,奏爲副使,賜以金紫。入爲 醫, 尋召入翰林爲學士。

普潤鎮使蘇光榮爲涇原節度使, 弘景草麻, 漏敍光榮之功, 罷學 士,改司門員外郎,轉吏部員外、左司郎中,改吏部度支郎中。 張仲方貶李吉甫諡,上怒,貶

京兆少尹,遷給事中。

容宣慰,時論翕然推 尚雲安公主,宜有加恩。 朕思賞勞睦親之意,竟行前命。」穆宗怒(三),乃令弘景使安南、邕、 宰臣不得已,改衞尉少卿。 穆宗復遣諭弘景曰:「士涇父昌有邊功,士涇爲少列十餘年,又 失,實在守官。其劉士涇新除太僕卿敕,未敢行下。」穆宗遣宰臣宣諭,弘景等固執如前。 之謹愿,陳萬年之行潔,皆踐斯職,謂之大僚。今上涇戚里常人,班敍散秩,以父任將帥,家 則寵待常厚,今叨顯任,誠謂謬官。傳曰:『惟名與器,不可假人。』蓋士涇之謂。 臣等職司違 富貲財,聲名不在於士林,行義無聞於朝野,忽長卿寺,有瀆官常。以親則人物未賢,以勳 「伏以司僕正卿,位居九列。在周之命,伯冏其人,所以惟月膺名,象河稱重。」漢朝亦以石慶 劉士涇以駙馬交通邪倖,穆宗用爲太僕卿,弘景與給事薛存慶封還詔書,論士涇曰: 重

憚其嚴勁,不敢干以非道。掌選二歲,改陝虢觀察使。歲滿,徵拜尚書左丞,駁吏部授官不 時蕭倪以淸直在位,弘景議論常所輔助。 遷刑部侍郎,轉吏部侍郎,銓綜平允, 權邪

列傳第

百七

军弘景

王彦

景素所不悅,時已請告在第,及準韶就召,以公服來謁。 弘景謂之曰:「有敕推公。」 虞卿失 當者六十人。弘景素以鯁亮稱,及居綱轄之地,與吏望風脩整。 事爲下吏所訕 轉禮部尙書,充東都留守,判東都尙書省事。繕完宮室,至今賴之。 獄未能辨,詔下弘景與憲司就尙書省詳識。 **虞卿多朋游**,人多嚮附之,弘 會吏部員外郎楊虞卿以公

持,無所阿附,當時風敎,尤爲倚賴。 大和五年五月卒,年六十六,贈尙書左僕射。 自長慶已來,目爲名卿。 弘景歷官行事,始終以直道自立,議論操

常散吏。 區分,成三十卷獻之,號曰元和新禮,由是知名,特授太常博士。 王彥威,太原人。世儒家,少孤貧,苦學,尤通三禮。 卿知其書生,補充檢討官。逐處於禮閣掇拾自隋已來朝廷沿革、吉人五禮,以類 無由自達,元和中遊京師,求爲太

氏祖顓頊而宗禹,殷人祖契而宗陽,周人郊祀后稷,祖文王而宗武王。自東漢魏晉,漸違經 意,沿革不一,子孫以推美爲先,自始祖已下並有建祖之制。 **彦威奏曰:「據禮經,三代之制,始封之君,謂之太祖。太祖之外,又祖有功而宗有德,故夏后** 憲宗晏駕,未定諡。淮南節度使李夷簡以憲宗功高列聖,宜特稱祖, 蓋非典訓,不可法也。 穆宗下禮官議。 國朝祖

名,可 宗制 武 法,守貞觀、開元之憲章,而擬議大名,垂以爲訓。 大行廟號,宜稱宗。」制從之。 尊也,故傳曰『始封必爲祖』,書曰『德高可宗,故號高宗』。今宜本三代之定制,去魏、晉之亂 、收復 度, 成法。 兩都,此皆應天順人,撥亂返正,至於廟號,亦但稱宗。 本於 、周禮, 不然,則太宗造有區夏,理致昇平;玄宗掃清內難,翊戴聖 以景皇帝爲太祖 又祖 神堯 而宗太宗。 自高宗已降, 謹按經義,祖者始也, 交; 但稱宗。 肅宗 龍 謂 宗者 之 떘 靈

館舊不 宗袝 朝廷 奪兩季俸。 會宗 人不以爲 自 Ī 廟 故事,附廟之禮,先告於太極殿,然後奉神主赴太廟。 置 一寺進 禮畢, 誅李師道 煩。 一學士,文宗特置一員以待彥威。 **彦威殊不低迴,每議禮事,守正不阿附,君子稱之。** 祀 執政詳舊典,令有司再告祔享禮畢于太極殿。 以本官兼史館修撰。 版 ,收復腦靑十二州,未定戶籍,乃命彥威充十二州勘定兩稅使。 ,誤以憲宗爲睿宗。 執政銜其強,奏祝版參差,博士之罪,彥威坐削 尋使魏博宣慰, **祔禮畢,不再告于太極殿。** 特賜金紫。 **彦威執議以爲不可**,執政怒。 累轉司封 五. 年,遷 員 外鄓中。 演議 朝法 振舉 大夫。 弘文

下 未以爲允。 彦威 彦威 通悉典故,宿儒碩學皆讓之。 奏論 中書 門下奏請依元和七年已前儀注,左右僕射 日:「臣謹按開元禮 "凡受册官, 時以僕射 ,並與卑官答拜。 上事儀注,前後不定,中丞李漢奏定, 上日 ,請受諸司四品六品 國朝官品令,三師三公正 丞 朝議 郎已

列

傳

第

自

依元 和 尙書令副 曰:『大夫之臣不稽首。』非尊家臣,以避君也。 七年已經奏議,酌爲定制,編在國章。 밂 和七年敕爲定。」時李程爲左僕射,宰執難於改革,雖不從其議,論者稱之。 尚書令正二品 《貳之職,雖端揆之重,有異百僚,然與羣官比肩事主。禮曰:『非其臣卽答拜之。』又 ,並是册拜授官。 上之日,亦無受朝官再拜之文。 近年上儀,又有受拜之禮,禮文乍變,物論未安,請 即僕射上日受常參官拜, 僕射班 事頗 次三公,又是 作儀。 況

元

州刺 宰相 御 百 王共守。 :史中丞宇文鼎以其首罪免父,有光孝義,請減死配流。 史、兼御史大夫,充平盧軍節度、淄青等觀察使。 面 興平縣人上官興因醉殺人亡竄,吏執其父下獄,興自首請罪,以出其父。 [論,語計氣盛,執政怒,左授|河南少尹。 若許殺人不死,是敎殺人。興雖免父,不合滅死。」詔竟許決流。彦威詣中書投 未幾,改司農卿。 李宗閱重之,既秉政,授青 京兆尹杜悰、

軍圖,日:「起至德、乾元之際,迄於永貞、元和之初,天下有觀察者十,節度二十有九,防禦 給,無毫釐之差。倘臣一旦愚迷,欲自欺竊,亦不可得也。」名曰度支占額圖 必足,無所 性既剛計 開成元年,召拜戶部侍郎,尋判度支。這處儒學雖優,亦勤吏事,然貨泉之柄,素非所 刻削。 ,自恃有餘。 且百 口之家,猶有歲蓄,而軍用錢物, **嘗紫宸廷奏曰**:「臣自計司按見管錢穀文簿,皆量 一切通 用,悉隨色額占定,終歲支 入以爲出,使經 既而又進

留使兵 萬〔三〕。 歲所 74 土衣賜之外,其餘四十萬衆,仰給度支。 入,總不過三千五百餘萬,而上供之數三之一 經略者三。 長 慶戶 П 凡三百三十 掎角之師 五萬,而 犬牙相 兵額 制 大都 約 九十 通 伏以時逢理安, 九萬 邑, 焉。 無不有兵, 通計三戶資一 三分之中四,二給衣賜。 運屬神聖, 都計中外兵額至八十餘 兵。 然而兵不可弭 今計天下租賦 自留州

者

初已 食哉 惟 來至貞元 時。 憂勤之端,兵食是切。 帝代功臣 ,如左氏傳體敍 臣 謬 事 司邦計,虔奉睿圖 了,號日 唐典,進之。 輒纂 事 功,庶裨聖覽。」又纂集國

彦威略不介懷, 餘,殆無虛日。 託。 賜衣 物於度支中估, 彦威 至是,彦威大結私恩,凡內官請託, 既掌 利 入司 會邊 權 ,心希大用。 視 軍 判使 事 上訴衣賜不時,兼之朽故。 多曲 及人吏受罰,左授衞尉卿 從, 時內官 厚給 其價。 仇士良、魚弘志禁中用事。 無不 ·如意 開成初, 宰臣惡其所爲,令攝度 物議鄙其躁妄。 ,停務,方還私第。 有韶禁止, 然趨 先是左右 復脩 利 支人更付 王播 者循 神策軍 舊 希意 事 |臺推| ·, 貢 多以所 從 ~奉羨 其

中, 入爲兵部侍郎,歷方鎮, 三年七月, 檢校 禮部尚書,代殷侑爲許 檢校兵部尙書。 州 卒 刺 贈僕射、諡曰靖。 史,充忠武 軍節度 陳許澱觀察等使。

榮,固其宜矣。 之旗鼓,俾士赴揚火,威振藩籬,何其壯也。 主,伸其效用,宜哉!李建侯不屈於賊庭,馬會元見伸於貝錦,臨危挺操,所謂貞臣,將相之 史臣曰:世以治軍戎,決權變,非儒者之事。 辛潞州之特達,韋僕射之峻整,王尙書之果敢,皆一時之偉器也。 若以道自 所謂非凑無人,吾謀適不用也。 而王翃、都士美釋養掖之儒衣(豆),奮將軍 二子遭遇英

牧,求福不回,即能臣也。 贊曰:見危致命,臨難不恐。 士美、建侯,仁者之勇。 弘景陸離,駁正黃扉。 貪名喪道,

而彥威欲爲巧宦,不亦疏乎?

校勘記

狂哉彦威。

(1) 嶺南都護 御覽卷二五一及卷二七八、冊府卷一三三「嶺南」均作「安南」。

(三) 穆宗怒 按此句與上文文義不貫。冊府卷四六〇此句上有 「弘景執奏不可中人宣踰再三弘景

不爲之迴」十八字。

<u>(</u>를 兵額 各本原作「各額」,據冊府卷四八六、全唐文卷七二九改。

(1) 三分之中 「分」字各本原作「萬」,據冊府卷四八六、全唐文卷七二九改。

(三) 縫掖 校勘記卷五三引張宗泰說:「裺」當作「逢」字。

舊唐書卷一百五十八

列傳第一百八

武元衡 從父弟儒衡 鄭餘慶 子澣 **酔子**允謨 茂休 處海

章貫之 兄綬 弟纁 子澳

罷,德宗目送之,指示左右曰:「元衡眞宰相器也。」 部員外郞。一歲,遷左司郞中。 者,多撓吏民,元衡苦之,乃稱病去官。放情事外,沉浮讌詠者久之。 郎。 屬文,終考功員外郎、修文館學士,事在逸人傳。 元衡進士登第,累辟使府,至監察御史。後爲華原縣令。 武元衡字伯蒼,河南緱氏人。 時以詳整稱重。貞元二十年,遷御史中丞。 會祖載德行了,天后從父弟,官至湖州刺史。祖平一,善 ` 父就,殿中侍御史,以元衡貴,追贈吏部侍 時畿輔有鎭軍督將恃恩矜功 德宗知其才, 召授比 嘗因延英對

順宗卽位, 以病不親政事。 王叔文等使其黨以權利誘元衡, 元衡拒之。 時奉德宗山

列傳第一百八 武三 衡

章事,賜金紫,兼判戶部事。上爲太子時,知其進退守正,及是用爲宰相,甚禮信之。 數日,罷元衡爲右庶子。憲宗卽位,始册爲皇太子曰,元衡贊引,因識之,及登極,復拜御 陵,元衡爲儀仗使。監察御史劉禹錫,叔文之黨也,求充儀仗判官,元衡不與,其黨滋不悅。 史中丞。 持平無私,綱條悉舉,人甚稱重。 尋遷戶部侍郎。 元和二年正月,拜門下侍郎、平

新臨大寶,天下屬耳目,若使奸臣得遂其私,則威令從茲去矣。」上以爲然,遽追之,衡果計 鄭絪請如錡奏,元衡曰:「不可。且錡自請入朝,詔旣許之,即又稱疾,是可否在錡。今陛下 初,浙西節度李錡請入覲,乃拜爲右僕射,令入朝,旣而又稱疾,請至歲暮。 上問宰臣,

窮而反。

以元衡代崇文,拜檢校吏部尚書,兼門下侍郎、平章事,充劍南西川節度使。 事節約,務以便人。比三年,公私稍濟。 福門以臨慰之。高崇文旣發成都,盡載其軍資、金帛、帝幕、伎樂、工巧以行。 接物,而開府極一時之選。八年,徵還。 先是,高崇文平蜀,因授以節度使。崇文理軍有法,而不知州縣之政,上難其代者, 撫蠻夷,約束明具,不輒生事。 至駱谷,重拜門下侍郎、平章事 重愼端謹,雖淡於 將行,上御安 元衡至,則庶

及吉甫卒,上方討准、際,悉以機務委之。時王承宗遣使奏事,請赦吳元濟。請事於宰相,辭 時李吉甫、李絳情不相叶,各以事理曲直於上前。 元衡居中,無所違附,上稱爲長者。

宰相。 股。 偕至,持火照之,見元衡已踣於血中,卽元衡宅東北隅墻之外。 時夜漏未盡,陌上多朝騎及 出 走至,遇人始辨之。旣明,仗至紫宸門,有司以元衡遇害聞,上震驚,却朝而坐延英,召見 行人,鋪卒連呼十餘里,皆云賊殺宰相,聲達朝堂,百官恟恟,未知死者誰也。 須臾,元衡馬 里東門,有暗中叱使滅燭者,導騎訶之,賊射之中肩。又有匿樹陰突出者,以棓擊元衡左 悖慢,元衡叱之,承宗因飛章詆元衡,咎怨頗結。元衡宅在靜安里,九年六月三日,將朝, 其徒馭已爲賊所格奔逸,賊乃持元衡馬,東南行十餘步害之,批其顱骨懷去。 及衆呼 惋慟者久之,爲之再不食。 册贈司徒,贈賻布帛五百匹、粟四百石, 輟朝五日,諡曰

元衡工五言詩,好事者傳之,往往被於管絃。

忠愍。

| 甫先一年以元衡生月卒,元衡後一年以||吉甫生月卒。 吉凶之數,若符會焉。 八。始元衡與吉甫齊年,又同日爲宰相。及出鎭,分領揚、益。及吉甫再入,元衡亦還。吉 末重。」月餘,李絳以足疾免。 明年十月,李吉甫以暴疾卒。 至是,元衡爲盜所害,年五十 謂暗中突擊也;「三三三」,謂六月三日也;「舞了也」,謂元衡之卒也。 「打麥麥打三三」,旣而旋其袖日「舞了也」。解者謂:「打麥」者,打麥時也;「麥打」者,蓋 初,八年,元衡自蜀再輔政,時太白犯上相,歷執法。 占者言:「今之三相皆不利,始輕 自是京師大恐, 先是長安謠日

城門加衞 兵 察其出入, 物色伺之。 其偉狀異製、 燕趙之音者, 多執訊之。 元衡從父弟

儒衡。

儒衡上疏論列,鎛密訴其事,帝曰:「勿以儒衡上疏,卿將報怨耶! 論,餘慶因亦重之。憲宗以元衡橫死王事,嘗嗟惜之,故待儒衡甚厚。 華潔,後進趨其門者多垢衣敗服,以望其知。 而儒衡謁見,未嘗輒易所好,但與之正言直 一年,權知諫議大夫事,尋兼知制誥。 儒衡字庭碩,才度俊偉,氣直貌莊,言不妄發,與人交友,終始不渝。 皇甫鎛以宰相領度支,剝下以媚上,無敢言其罪者。 累遷戶部郎中。 相國鄭餘慶不

明辟 我國家神器大寶,將遂傳於他人。 草制詞,召狄兼謨爲拾遺,曰:「殷聽政餘暇,躬覽國書,知奸臣擅權之由,見母后竊位之事, 終不至大任。 榮終老,當時不以爲累。 乃復。 儒衡氣岸高雅,論事有風彩,羣邪惡之,尤爲宰相令狐楚所忌。 宜福冑胤,與國無窮。」及兼謨制出,儒衡泣訴於御前,言其祖平一在天后朝辭 尋正拜中書舍人。 憲宗再三撫慰之,自是薄楚之爲人。 時元稹依倚內官,得知制誥,儒衡深鄙之。會食瓜閣下, 洪惟昊穹,降鑒儲祉,誕生仁傑,保佑中宗,使絕維更張, 有狄兼謨者,梁公仁傑之後,時爲襄陽從事。 然儒衡守道不 元和末年,垂將大用, 回,嫉惡太甚, 楚乃自

À

蠅 集於上,儒衡以扇揮之曰:「適從何處來,而遽集於此?」同僚失色,儒衡意氣自若。

部侍郎。長慶四年卒,年五十六。

刑部侍郎。兄弟有名於當時。父慈,與元德秀友善,官至太子舍人。 鄭餘慶字居業,滎陽人。祖長裕,官至國子司業,終潁川太守。 長裕弟少微,爲中書舍

時翕然稱重 與功德使判官諸葛述同按鞫。時議述胥吏,不合與憲臣等同入省按事,餘慶上疏論列,當 斷還俗,後又復爲僧,伯達上表論之。詔中丞宇文邈、刑部侍郎張彧、大理卿鄭雲逵等三司 侍 十三年六月,遷工部侍郎,知吏部選事。時有玄法寺僧法湊爲寺衆所訴,萬年縣尉盧伯達 ·御史,丁父憂罷。 貞元初入朝,歷左司、兵部員外郎,庫部郎中。 八年,選爲翰林學士。 餘慶少勤學,善屬文。大曆中舉進士。建中末,山南節度使嚴震辟爲從事,累官殿中

使于項素善,每奏事餘慶皆議可之。未幾,項以罪貶。時又歲旱人飢,德宗與宰臣議,將賑 給禁衞六軍。 十四年,拜中書侍郎、平章事。餘慶通宪六經深旨,奏對之際,多以古義傅之。 事未行,爲中書吏所洩,餘慶貶郴州司馬。凡六載。 順宗登極,徵拜尙書左 與度支

7. 傳第一百八 鄭餘慶

四一六三

丞。

月,正拜兵部尚書。 事,甚重之,乃改爲國子祭酒。 慶怒其僭,叱之。尋而餘慶罷相,爲太子賓客。其年八月,渙贓汚發,賜死;上寖聞餘慶叱渙 四方書幣貲貨,充集其門,弟泳官至刺史。及餘慶再入中書,與同僚集議,渙指陳是非,餘 光琦異同者,令渙達意,未嘗不遂所欲。宰相杜佑、鄭絪皆姑息之,議者云佑私呼爲滑八, 古博雅而未適時。有主書滑渙,久司中書簿籍,與內官典樞密劉光琦情通。 兵事。 憲宗嗣位之月,又擢守本官平章事。 餘慶復以古義上言,夏州軍士皆仰給縣官,又有「介馬萬蹄」之語。 時議以餘慶雖好 **尋拜河南尹。三年,檢校兵部尙書,兼東都留守。六年四** 未幾,屬夏州將楊惠琳阻命,宰臣等論奏,多議 宰相議事,與

階,而義方只據勳官,有司不詳覆而給之,議者非之,臺司將劾而未果。 各請戟立於其第。時義方以加上柱國、坦以前任宣州觀察使請戟。近代立戟者,率有銀青 發論大以爲不可。 言成準的。時京兆尹元義方、戶部侍郎判度支盧坦,皆以勳官前任至三品,據令合立門戟, 餘慶再爲相,罷免皆非大過,尤以淸儉爲時所稱。洎中外踐更,鬱爲耆德,朝廷得失, 由是,臺司移牒詰禮部,左司郎中陸則、禮部員外崔備皆罰俸,奪元、盧 會餘慶自東都來,

之門戟。

省,餘慶執之封還,以爲諸道散將無故授正員五品官,是開徼倖之路,且無闕 理,由是稍忤時權,改太子少傅,兼判太常卿事。初德宗自山南還宮,關輔有懷光、吐蕃之 餘慶受詔撰惠昭太子哀册,其辭甚工。有醫工崔環,自淮南小將爲黃州司馬。 可供。 敕至南 言 1或過

虞,都下驚憂,遂詔太常集樂去大鼓。至是,餘慶始奏復用大鼓。

以恩授三品五品,不復計考,其使府賓吏,又以軍功借賜命服而後入拜者十八九。 朝衣綠者甚少,郞官諫官有被紫垂金者。又丞郞中謝洎郞官出使,多賜章服,以示加恩,於 少師。尋以年及懸車,請致仕,韶不許。 是寵章尤濫,當時不以服章爲貴,遂詔餘慶詳格令立制,條奏以聞 九年,拜檢校右僕射,兼興元尹,充山南西道節度觀察使,三歲受代。十二年,除太子 時累有恩赦敍階,及天子親謁郊廟,行事官等皆得 由是,在

員外郎楊嗣復、禮部員外郎庾敬休並充詳定判官。 定使。餘慶復奏刑部侍郎韓愈、禮部侍郎李程爲副使,左司郎中崔郾、吏部郎中陳珮 鳳翔尹、鳳翔隴節度使。 人情美洽。憲宗以餘慶諳練典章,朝廷禮樂制度有乖故事,專委餘慶參酌施行,遂用爲詳 十三年,拜尙書左僕射。自兵興以來,處左右端揆之位者多非其人,及餘慶以名臣居之, 朝廷儀制、吉凶五禮, 咸有損益焉。 、刑部

十四年,兼太子少師、 列 傳 第 百 八 鄭 餘 檢校司空,對滎陽郡公,兼判國子祭酒事。 慶 四一六五 以太學荒毀日久,生

徒不振,奏率文官俸給修兩京國子監。

神將祝予,痛悼何及!乞言旣阻,賵禮宜優,可贈太保。」時年七十五,諡曰貞。 恭,待士比公孫之廣。焚書逸禮,盡可口傳,古史舊章,如因心匠。朕方咨稟,庶罔昏踰。 所要職,無不踐更。貴而能貧,卑以自牧。審諤聞於臺閣,柔睦化於閨門。受命有考父之 冠禮樂,行於山東,餘力文章,遂成志學。出入淸近,盈五十年。再秉台衡,屢分戎律。凡 金紫光祿大夫、檢校司徒、兼太子少師、上柱國、滎陽郡開國公、食邑二千戶鄭餘慶,始以衣 及穆宗登極,以師傅之舊,進位檢校司徒,優禮甚至。元和十五年十一月卒,詔曰:「故

清貧,不辦喪事,宜令所司特給一月俸料以充賻贈,用示褒榮。有文集、表疏、碑誌、詩賦 創立儒宮,以來學者。雖行已可學,而往往近於沽激,故當時議者不全德許之。上以家素 之,而周其所急,理家理身,極其儉薄。及修官政,則喜開廣。鎭岐下一歲,戎事可觀。又 賜,皆厚以金帛遺之。求媚者唯恐其數不廣,故王人一來,有獲錢數百萬者。 年,祿賜所得,分給親黨,其家頗類寒素。自至德已來,方鎭除授,必遣中使領旌節,就第宣 任,天子必誠其使曰:「餘慶家貧,不得妄有求取。」專欲振起儒教,後生謁見者率以經學諷 餘慶砥名礪行,不失儒者之道,清儉率素,終始不渝。四朝居將相之任,出入垂五十 餘慶每受方

共五十卷,行於世。

兄承慶, 官不顯。 弟膺甫,官至主客員外郎中、楚懷鄭三州刺史。 次弟具瞻、羽客、時

然,皆官至縣令賓佐。餘慶子濟。

者。 封 博士、史館修撰。 太常博士,改右補闕。 祕 直臣,可更相賀。」遂遷起居舍人,改考功員外郎。 刺史有驅迫人吏上言政績,請刊石紀政 書省校書鄓遷洛陽尉,充集賢院修撰,改長安尉、集賢校理。 轉太常寺主簿,職仍故。 郞中、史館修撰,累遷中書舍人。 |澣探得其情,條責廉使,巧跡遂露,人服其敏識。 時餘慶爲僕射,請改省郎,乃換國子 |澣本名||涵,以文宗藩邸時名同,改名||澣。||貞元十年舉進士。以父謫官,累年不任。 丁母憂,除喪,拜考功郎中。復丁內艱,終制,退居汜上。長慶中,徵爲司 獻疏切直,人爲危之。及餘慶入朝,憲宗謂餘慶曰:「卿之令子,殷之 自

鎭 書,兼判左丞事。出爲山南西道節度觀察使,檢校戶部尙書、興元尹、兼御史大夫。餘慶之書,兼判左丞事。出爲山南西道節度觀察使,檢校戶部尙書、興元尹、兼御史大夫。餘慶之 拔 上 (造秀,時號得人。 轉兵部侍郎,改吏部,出爲河南尹,皆著能名。 入爲左丞,旋拜刑部尙 興元,創立儒宮,開設學館,至澣之來,復繼前美。開成四年閏正月,以戶部尙書徵。 書語類,上親自發問,澣應對無滯,錫以金紫。|大和二年,遷禮部侍郎,典貢舉二年, 文宗登極,擢爲翰林侍講學士。上命撰經史要錄二十卷,書成,上喜其精博,因摘所 選

列

子:允謨、茂諶、處誨、從讜。 下之日,卒于興元,年六十四, 贈右僕射,諡曰宣。 有文集、制誥共三十卷,行於世。

|允謨以蔭累官臺省,歷圖、澎、濠、晉四州刺史,位終太子右庶子。

茂諶避國諱改茂休, 開成二年登進士第,四遷太常博士、兵部員外郎、吏部郎中、絳州

刺史,位終祕書監。

飲餞,仰視屋棟,飾以黃土,賓從皆所識。 尙書、 汴州刺史、 宜武軍節度觀察等使, 卒于 汴。 迎勞,仍致手書,令先疏所夢。 行,處誨告以所夢。 |酶爲工部侍郎,因早朝假寐於待漏院,忽夢已爲|浙東觀察使,經過|汴州,而|則爲|汴帥,留連 監察、拾遺、尙書郞、給事中。 處誨字延美,於昆仲間文章拔秀,早爲士友所推。大和八年登進士第,釋褐祕府, 明年,處誨轉刑部侍郎。其年秋,授浙東觀察使。行及潼關,朗遣從事 累遷工部、刑部侍郎,出爲越州刺史、浙東觀察使、檢校刑部 比至汴,宴于淸暑亭,賓佐悉符夢中。 明年,朗果自定州鎮宣武,辟革重掌書記。 處酶族父期。 初朗爲定州節度使時,處 朗仰視屋棟曰:「此亦 轉

ij

黄 盡思朗 七也。」四坐 Ź 感歎移時。 處 声方 雅 好古 後五年, 且 勤 歌於著述 朗卒, 處海繼爲汴州節度使,乃賦詩 撰集至多。 爲校書郞時 ,撰次明皇雜錄 章, 刻于廳事,以

於世。

故相令 使。 史、 尚書、太原 郎 轉 宣 從 武 刑 識字正求, 狐 部 軍 綯 節 尹 政 度 魏扶 吏部侍郎。 北 觀察等使。 都 會昌 皆父貢 留守、 二年登進士第, 、舉門生 河東節 典選 期年 平允,時無屈 報 度觀察等使。 ,爲之延譽 政, 美聲流聞。 釋褐祕書省校書鄓,歷拾遺、補闕、尙書鄓、 ,尋遷中書舍人。 人。 踰年 垂將作輔, 當途 乞還不允, 者懼其大用,改廣州 以權 威通 臣請託 改檢校兵部 三年, 不行, 知 貢 刺 史、嶺 舉 改檢 拜 知制 南 校 禮 部侍 節 州 刑 誥 度 刺 部

梦然 厭代 刑 五管爲南韶蠻所擾,天下徵兵,時有龐勛之亂 乃擇 從 識以久在 其土豪, 書 ,尋以本官同平 番禺 授之右職,禦侮 ,不樂風 章 土,思歸 事 打城, ,戀闕,形於賦詠,累上章求爲分司散 皆得: 其効。 ,不暇邊事。 雖 郡邑屢陷,而 從讜在鎮, |交、廣 く晏然。 北兵寡弱, 秩。 僖宗徴 俄 M 夷獠

乾符 中, 盜 起 河南,天下騷 陰山府沙陁都督李國昌部族方強,虎視北邊。 屬 靈州

用

爲

部

尙

故地,以爾嘗施惠化,尙有去思。方當用武之時,暫輟調元之職,佇殲兇醜,副我憂勤。 郡開國公、食邑二千戶鄭從讜,自處鈞衡,屢來麟鳳,才高應變,動必研機。 開幕之盛,冠於一時。 撰趙崇爲觀察判官,前進士劉崇魯充推官,前左拾遺李渥充掌書記,前長安尉崔澤充支使。 乃奏長安令王調爲副使,兵部員外郎、史館修撰劉崇龜爲節度判官,前司勳員外郎、史館修 檢校司空、同平章事、太原尹、北都留守、河東節度,兼行營招討等使。」制下,許自擇參佐。 府儀同三司、門下侍郞、 帥,雲合都下,人不聊生,沙陁連陷城邑,朝廷難於擇帥。 僖宗欲以宰臣臨制之,韶曰:「開 防禦使段文楚軍儲不繼,郡兵乏食,乃密引沙陁部攻城,殺文楚,遂據振武軍雲、朔等州。 能遏。俄而康傳圭爲三軍所殺,軍士益驕,矜功責賞,動爲譟聚。 又令其子克章、克用大合諸部,南侵忻、代。前帥竇瀚、李侃、李蔚相繼以重臣鎭井部 時中朝瞻望者,目太原爲「小朝廷」,言名人之多也。 兼兵部尚書、充太淸宮使、弘文館大學士、延資庫使、上柱國、榮陽 加以河南、河北七道兵 股以北門興王

略,召之開喻,坦然無疑,悉以兵柄委之。 於百井,中路 謀盜發, 時新承軍亂之後,殺掠攻剽,無日無之。 無不落其彀中,以是羣豪惕息。 而還,縱兵破鑰,殺故 帥 康傳圭。 舊府城都虞候張彥球者,前帥令率兵三千逐沙陁 從黨貌温而氣勁,沉機善斷,奸無遁情。 及從讜至,搜索其魁誅之,知彦球意善,有方 凡兇

慰喩 幸 團 衝 傳詔 戎 廣 明 卿 伍 日 謂 宜 初 從 遣 差 駐 讜 李鈞 牙將論安、 濕 蹕 本 |梁、 道兵 李琢繼 「卿志 漢。 士, 上 後院 安 率本道之師出雁門, 慚 · 酌量 封 九廟 軍 域 一使朱玫 一多少 權 下 總 愧萬 ~, 付 戎 一率步 麾, 北 方。 面 騎 夷 藩閩 副 五 爲 /夏具 招 千 沙陁 乍聞 討 膽 從諸 使 所 諸葛· 痛 敗。 社 葛 稷 憤 爽 燚 全賴 應 十二月, (入關: 俾令入援。 切。 赴 專差供 今月 難。 黄巢犯 \overline{H} 時 奉官劉全及 從讜 日 中 長安 草 和 承 賊 元年五 詔 僖宗 黄 雪涕 往 巢 彼 月 出

也

功立 亦以 師 近 後 入 甸 宰 事 關 論 咸 信宿 從 興 安 相 之時也。 湿宮、 駕 黨 通 至 軍 鎭 奔播 以 陰 遣 不 次離 鳳 來 發 地,以數百 大將王蟾、 翔 却 奮 蕩 所 石。 得待罪闕 克用 與從 激忠 恨 覆 是月 受命 神州 傅城 義, 讞 卒 薛 宗 沙沙 庭, 守 擅 威 血 而 不能 藩 歸 出師 戰爲國,天下之人受賜。 呼 是) 陁李克用 ,從讜集諸 同年 曰:「本軍 所 荷戈討賊, 不敢 追 願 撃之。 登 也。 、辱命, 進 軍 將南 唯僕 奄 部 以酬 翌 校 無 至, 畋亦舉兵岐下, 日 下 斬 射 以 聖獎,老夫 營于 之於 契苾 自 仰 欲 愛。 陪 汾東, 興 鞠 部 戎棨。 老夫 」克用 相 場 救 公 了,並以 (之罪 兵至 歷 稱奉詔: 面 若僕 以遏賊巢。 事 拜 言 累朝, 也。 謝 1。」從讜 沙陁 兵衆付 射 而 赴 去。 然 終以君 難 大 位 多 登 入關。 朱玫赴難 敗 忝 然雜 難 廣明首唱 M 城 將 親 圖 謂 還。 相, 虜 勳 爲 之日:「 從讜 不戢, 念 是僕 今日 初 位義 論 破 時 具 (廩餼 僕 鄭 賊 安 肆 射 羣 射 畋 桽 答

例

賊首尾,逆徒名爲「二鄭」。國威復振,二儒帥之功也。

而訣。 留後事,書記劉崇魯知觀察留後事,戒之曰:「俟面李公,按籍而還。」 在雁門,且還覲省。相公徐治行裝,勿遽首途。」從讜承韶,即日牒監軍使周從寓請知兵馬 南下,不敢蹈境,乃自嵐、石沿河而南,唯李克用以數百騎臨城敍別。 一年十一月, 三年,克用破賊立功,授河東節度代從讜,還至楡次,遣使致禮,謂從讜曰:「予家尊 代北監 軍使陳景思奉詔赦沙陁部, 許討賊自贖。 由是沙陁五部數萬人 從讜遺之名馬、器幣

史, 以疾還第。 留駐數月。 五月十五日,從讜離太原。時京城雖復,車駕未還,道途多寇。行次絳州,唐彥謙爲刺 卒,有司諡日文忠。 多, 韶使追赴行在, 復輔政, 歷司空、司徒, 正拜侍中。 光啓末,固辭機務,

彦謙 全城 國之名臣,文忠有焉 以疑間貽釁,故軍旅不寧。 判官陸晟嗜學有才思,寓於郡齋,日與之談宴,無間先後,乃稱之於朝,位至淸顯。 ,多彥球之効也,累奏爲行軍司馬。 |從讜知人善任,性不驕矜,故所至有聲績。 在||太原時,大將||張彦||珠強桀難制,前後帥守 歿於是郡, 訖一政受代, 不於公署舉樂, 其友悌知禮, 操履如此。 及從讜撫封四年,知其才用可委,開懷任遇,得其死力。 及再秉政,用爲金吾將軍, 累郡刺史。 在絳州時, 故抗虜

笏示說者曰:「實已記其名氏矣。」說者喜,驟以其語告於<u>貫</u>之,且曰:「子今日詣實而明日受 侍郎,有重名於時。貫之卽其第二子。少舉進士,貞元初,登賢良科,授校書郎。 賀矣。」貫之唯唯,數歲終不往,然是後竟不遷。 有以貫之名薦於實者,答曰:「是其人居與吾同里,亟聞其賢,但吾得識其面而進於上。」舉 調 . 判入等,再轉長安縣丞。 德宗末年,京兆尹李實權移宰相,言其可否,必數日而詔行。 章貫之本名純,以憲宗廟諱,遂以字稱。八代祖敻,仕周,號逍遙公。父肇,官至吏部 秩滿,從

是諫官。父爲宰相,子爲諫官,若政有得失,不可使子論父。改爲祕書丞。 元和元年,杜從郁爲左補闕,貫之與崔羣奏論,尋降爲左拾遺。又論遺、補雖品不同,皆 永貞中,始除監察御史。上書舉季弟纁自代,時議不以爲私。轉右補闕,而纁代爲監

忠義以藝通權倖,爲請者非一,貫之持之愈堅。旣而疏陳忠義不宜汚朝籍,詞理懇切,竟罷 人金忠義以機巧進,至少府監,蔭其子爲兩館生,貫之持其籍不與,曰:「工商之子不當仕。」 後與中書舍人張弘靖考制策,第其名者十八人,其後多以文稱。轉禮部員外郞。 改吏部員外郎。三年,復策賢良之士,又命貫之與戶部侍郎楊於陵、左司郎中鄭敬、 新羅

百八

章貫之

皆難 都官 其 踰 郎 中 年,拜中書舍人,改禮部侍郎。 詞 李益 直 貫之獨署其奏,遂出爲果州刺史,道中黜巴州 同爲考策官。 貫之奏居上第者三人,言實指切時 凡二年,所選士大抵抑浮華, 刺 史。 病, 俄徴 先行實, 不 顧 爲都官 忌 諱, 由是趨競者稍 雕 郞 同考策者 中、 知 制

息。

轉尙

書右丞,中謝日面

賜金紫。

方急 齊趙 以 陛 中 之,以行止未正,不宜 貫之議 而 爲諸 下 向 丞 裴度。 闕 獨 同 於太平,未可其奏。 明 將 .恶 ,致使梁、漢爲府,奉天有行,皆陛下所聞見。 不能寬歲月,俟拔擦而圖鎭邪? ,以本官同中書門下平章 四 初,王師征察,以汴帥韓弘爲都統,又命汝帥烏重胤、許帥李光顏合兵而 德宗 及度爲相,二寇並 面 四 討賊 年而 率天下兵,命李抱眞、馬燧急攻之, ()各銳進取,今若置統督,復令二 始克蔡。 在 內 貫之進 庭。 **零遷中** 征, 言:「陛下豈不知建中之事乎? 事 議者以物力不可。 書侍郎。 」上深然之,而業已下伐鎭韶。 准西之役,鎭州盜竊發輦下,殺宰相武元衡,傷御 同 !列以張仲素、段文昌進名爲學士, 帥連營,則 物力用 非他, 貫之請釋鎭以養威,攻蔡以專 屈, 不能忍待次第,速於撲滅故也。 持 於是朱泚乘之爲亂,朱滔隨 天下之兵,始於蔡急魏應, 重養威,未可以歲月下也。 後滅蔡而鎭 進。 自 力。 服 史

貫之爲相, 嚴身律下, 以清流品爲先,故門無雜賓。 有張宿者, 有口辯,得幸於憲宗

方鎭,皆諷令捃拾進獻。 州刺史纁,亦貶遠郡。時兩河留兵,國用不足,命鹽鐵副使程异使諸道督課財賦。异所至 事遂寢。 擢爲左補闕。將使淄青,宰臣裴度欲爲請章服,貫之曰:「此人得幸,何要假其恩寵耶?」 其 宿深銜之,卒爲所構,誣以朋黨,罷爲吏部侍郎。不涉旬,出爲湖南觀察使。 貫之謂兩稅外不忍橫賦加人,所獻未滿异意,遂率屬內六州留錢 弟虢

寡言,與人交,終歲無款曲,未曾僞詞以悅人。 身歿之後,家無羨財。 有文集三十卷。 右僕射。貫之自布衣至貴位,居室無改易。歷重位二十年,苞苴寶玉,不敢到門。性沉厚 上卽位,擢爲河南尹,徵拜工部尚書。未行,長慶元年卒於東都,年六十二,詔贈尚書 以繼獻,由是罷爲太子詹事,分司東都。

致傷,晚得心疾,故不極其用。 伯兄綬,德宗朝爲翰林學士。 貞元之政,多參決於內署。一經所議論,常合中道,然畏愼

纁有精識奧學,爲士林所器。 閨門之內, 名教相樂。 故章氏兄弟令稱,推於一時。 纁

累官至太常少卿。 貫之子澳、潾。

|澳字子斐,大和六年擢進士第, 列 第 百 窜 貫 Ż 又以弘詞登科。 性貞退寡慾,登第後十年不仕。 伯兄

必得御史。」澳不答。温曰:「高君端士,汝不可輕。」 澳曰:「然恐無呈身御史。」 竟不詣 元裕 ,與御史中丞高元裕友善。温請用澳爲御史,謂澳曰:「高二十九持憲綱,欲與汝相面,汝

戶部兵部侍郎、學士承旨。與同僚蕭寘深爲宣宗所遇,每二人同直,無不召見,詢訪時事。每 堂之上,天下自理,何要權耶?」握深然之。不周歲,以本官知制誥,尋召充翰林學士,累遷 至旦,必論其可否,上旨多從之。出爲京兆尹,不避權豪,京師誓憚。 有邦國刑政大事,中使傳宣草詞,澳心欲論諫,卽曰:「此一事,須降御札,方敢施行。」遲留 「爵賞刑罰,非公共欲行者,願不以喜怒憎愛行之。但令百司羣官各舉其職,則公斂衽於廟 曰:「才小任重,何以相救?」澳曰:「荷公重知,願公無權足矣。」與愕然,不喻其旨,澳曰: 周墀鎭鄭滑,辟爲從事。墀輔政,以澳爲考功員外郎、史館修撰。墀初作相,私謂澳

鎭,聖慈未垂矜允。」上默然不樂其奏。澳甥柳玭知其對,謂澳曰:「舅之獎遇,特承聖知,延 自明?我意不錯。爾須知時事漸不堪,是吾徒貪爵位所致,爾宜志之!」大中十二年,檢校 |英奏對,恐未得中。」|澳日:「吾不爲時相所信,忽自宸旨,委以使務,必以吾他歧得之,何以 部闕判使」者三,又曰:「卿意何如?」澳對曰:「臣近年心力減耗,不奈繁劇,累曾陳乞一小 會判戶部宰相蕭鄴改判度支,澳於延英對。上曰「戶部闕判使」,澳對以府事,上言「戶

去卿。」在河陽累年 術,可具居方口奏。」澳因中使上章陳謝,又曰:「方士殊不可聽,金石有毒,切不宜服食。」帝 嘉其忠,將召之,而帝厭代。 工 部 尙 書, 兼孟州 刺 ٠, 史,充河陽三城懷孟澤節度等使, 中使王居方使魏州 令傳韶 旨 謂 澳 辭於內殿。 曰:「久別 無恙 上曰:「卿自求 知 卿奉道,得何藥 便, 我不

於澳, 尹。 殿鑒,錯認容身作保身。」此句聞於京師,權幸尤怒之。 東部,経綜平允,不受請託。 制出,累上章辭疾,以松檟在秦川,求歸樊川別業,許之。 |懿宗卽位,遷檢校戶部尚書,兼靑州刺史、平盧節度觀察處置等使。 會吏部發澳時簿籍,吏緣爲奸,坐罷鎭 爲執政所惡,出爲邠州 ,以祕書監分司東都。 刺史、邪寧節度使。 上表求致仕,宰相疑其怨望,拜 踰年,復授戶部侍郎 嘗戲吟云:「莫將庫 宰相杜審權 入爲戶部侍郎, 素 不 變 河 悅 同 轉

拜而卒。 潾 亦 登 贈戶 進 、部尙書、諡日貞 士第,無位 而卒。 游子庾、庠、序、雍、郊。

舍人,累拜刑 庾登進 一士第,累佐使府, 部侍郎 ,判戶部 事。 入朝爲御史,累遷兵部郎 車駕還京,充頓 遞使, 至 中、諫議 鳳 翔病卒。 大夫。 從僖宗幸蜀

知制誥 一,正拜 雍、 中 郊皆登進士第。 書舍人。 昭宗末,召充翰林學士,累官戶部侍郎、 序、雍官至尚 書態。 郊文學尤高 學士承旨,卒。 累歷淸顯。 自禮部員外郎

列傳第一百八 章貫之 校勘記

四一七七

中傷,爲惡滋甚,君子之行,其若是乎?鄭貞公博雅好古,一代儒宗。 衣冠之盛, 近代罕儔。 史臣曰: 二武朗拔精裁,爲時羽儀,嫉惡太甚,遭罹不幸,傳刃喋血,誠可哀哉!令狐 韋氏三宗, 世多才俊。 純、纁忠懿,爲時元龜,作輔論兵,言皆體國。 文忠致君,無忝乃祖,

贊曰:后族崢嶸, 平一辭榮。 高風襲慶,鍾在二衡。 猗與貞公,繼以文忠。 純、 纁文

校勘記

雅,綽有父風。

澳之貞亮,不替祖風。

三代諡貞,考行無愧。

載德 各本原作「德載」,據本書卷一八三武承嗣傳、新書卷七四字相世系表改。

3 憲宗卽位始册爲皇太子 冊府卷一七二作「帝始冊爲皇太子」。

舊唐書卷 一百五十九

列傳第一百九

衞次公 子珠 胸腳 子秪德 秪德子顥 章處厚 崔羣 路隨

其子交歡,意欲次公授之琴,次公拒之,由是終身未嘗操絃。 參選 調。吏部侍郎盧翰嘉其才,補崇文館校書郎,改渭南尉。 衞次公字從周,河東人。 器韻 和雅、弱冠舉進士。 禮部侍郎潘炎目爲國器,擢居上第, 次公善鼓琴,京兆尹李齊運使

必不得已,當立廣陵王。若有異圖,禍難未已。」絪等隨而唱之,衆議方定。 云:「內中商量,所立未定。」衆人未對,次公遽言曰:「皇太子雖有疾,地居冢嫡,內外繫心。 學士。二十一年正月,德宗昇遐。時東宮疾恙方甚,倉卒召學士鄭絪等至金鑾殿。中人或 嚴震之鎭興元,辟爲從事,授監察,轉殿中侍御史。貞元八年,徵爲左補闕, 尋無翰林

及順宗在諒闇,外有王叔文輩操權樹黨,無復經制,次公與鄭絪同處內廷,多所匡正 列 傳 第 百 九 衞 氼 公 鄭 絪 二七九

秩 選 舉 陝、競等州 復棄翰林學士。 轉 ·,斥浮華 人李勣、 而遺之。 司 勳 員 外 徐有功之孫名在黜中,次公召而謂之曰:「子之祖先,勳在王府,豈限常格。」並優 都防禦觀察處置等使。 ,進貞實,不爲時力所搖。 郎。 與鄭絪善,會鄭絪罷相,次公左授太子賓客,改尚書右丞, 久之,以本官知制誥,賜紫金魚袋,仍爲學士,權知中書舍人。 請蠲 眞拜中書舍人, 仍充史館修撰, 錢三百萬, 人得蘇息, 政聞于朝。 遷兵部侍郎、知 兼判戶 徵爲兵部侍郎。 尋知禮部貢 .部事,拜 制誥,

州 累 大都 疏 諡 請 改尙書左丞,恩顧頗厚。 日敬。 督府 罷。 長史、御史大夫。 會有捷書至, 次公自少入仕,歷大僚,節操趨尙,始終 相韶方出, 元和十三年十月,受代歸朝 上方命爲相,已命翰林學士王涯草韶,時准夷宿兵歲久,次公 憲宗令追之,遂出爲淮南節度使、檢校工部尚書,兼揚 如 一,爲衆推 ,道次病卒, 重。 贈太子少保, 年六十

子洙、登進士第、 尚憲宗女臨眞 公主。 累官至給事中、駙馬都尉、工部侍郎。

張參、蔣乂、楊綰、常衮,皆相知重。 鄭絪字文明。 父羡,他州 刺史。 | 絪擢進士第, 登宏詞科,授秘書省校書郎、鄠縣尉。 大曆中, 有儒學高名, 如 張

延賞鎮 西 끠 辟爲書記, 入除補闕、起居與,兼史職。 無幾, 擢爲翰林, 轉司 勳員外郎、 知制

德宗 朝 ,在內職十三年,小心 放謙 ,上遇之頗厚。

爲工 事, 節度使。 絪 俄 違。 與杜 拜中書侍郎、平章事,加集賢殿大學士,轉門下侍郎、宏文館大學士。 一部尚 由是貶秩爲太子賓客。 貞元 及王伾、王叔 黃裳同當國柄。 書,轉太常卿, 末 大和二年,入爲御史大夫、檢校左僕射、兼太子少保。 ,德宗晏駕, 文朋黨擅權之際,絪又能守道中立。 黄裳 順宗 又爲同 出爲嶺南節度觀察等使、 多所關決, 初即位, 州刺 史、長春宮使、改東都 遺韶不時宣下,絪與同列衞次公密申正論,中人不敢 首建議誅惠琳、 廣州 憲宗監 斬劉闢 刺 留守。 史、 國 檢校禮部尙書, 及他制置。 入歷兵部尚書,旋爲河中 遷中書舍人, 憲宗初,勵精求 細 謙 依前 以廉政 默多無所 學士,

以年力衰耄,累表陳乞,遂以太子太傅致仕。 篤 ,耽悅墳典,與當時博聞好古之士,爲講論名理之游, 恬澹 踐歷華 顯, 出入中外者踰四十 三年十月卒,年七十八, 年。 時人皆仰其蒼德焉。 所居雖無赫奕之稱,而守道敦 贈司空、諡日宣。 及文宗卽

抵德 列 子 傳 顥 登進士 百 九 第,結綬 稹 絪 弘 軍 文館 處 厚 校 書。 遷右拾遺、內供奉, 詔授銀青光祿 大夫, 遷起

滯才 居郎。 至今稱之。 尚宣宗女萬壽公主,拜駙馬都尉。歷尚書郞、給事中、禮部侍郞。 遷刑部、吏部侍郎。 大中十三年,檢校禮部尙書、河南尹。 典貢士二年,振拔

方悟其 苔青』, 壽昌節 日 相與聯句。 灑夢殊庭。 1成千古,金縢閟九龄。 石門霧露白,玉殿莓苔青。若匪災先兆,何當思入冥。 顥 事。 乃書之于楹。私怪語不祥,不敢言於人。不數日,宣宗不豫,廢朝會,及宮車上僊, ,赴麟德殿上壽,迴憇于長興里第。昏然晝寢,夢與十數人納涼於別館。館宇蕭灑 居戚里,有器度。 追惟 境象非曾到,崇嚴昔未經。 予爲數聯,同遊甚稱賞。旣寤,不全記諸聯,唯省十字云『石門霧露白,玉殿莓 !顧遇,續石門之句爲十韻云:『間歲流虹節,歸軒出禁扃。 奔波陶畏景,蕭 小臣哀絕筆,湖上泣青萍。』」未幾,顯亦卒。 大中時, 恩澤無對。及宣宗棄代,追感恩遇,嘗爲詩序曰:「去年 日車鳥斂翼,風動鶴飄翎。異苑人爭集,凉臺筆不 御鑪虚仗馬, 華蓋負云亭。

覽史籍,而文思贍逸。 改名處厚。 章處厚字德載,京兆人。 **文萬,監察御史,爲**荆南節度參謀。處厚本名淳,避憲宗諱, 幼有至性,事繼母以孝聞。居父母憂,廬於墓次。 元和初,登進士第,應賢良方正,擢居異等,授秘書省校書郎。 裴垍 既免喪,遊長安。 通五經,博

ij

法,召入翰林,爲侍講學士,換諫議大夫,改中書舍人,侍講如故 以宰相監修國 旨出官,處厚坐友善,出爲開州 上之,時稱信史。 史,奏以本官充直館,改咸陽縣尉,遷右拾遺,並兼 轉左補闕、禮部考功二員 刺史。 入拜戶部郎 外。 早爲宰相韋貫之所重, 中,俄以本官知制誥。 史職。 時貫之以議兵不 修德宗實錄 穆宗以其學有 五 + 合 卷

郎。 盡,以爲利者返害,爲簡者至煩,乃取其條目尤不可者, 農積貨,疏利害十八條。 謂言無不允。 平叔以 時張平叔 征 利中穆宗意,欲希大任。 以便佞詼諧,他門捷進, 及處厚條件駁奏,穆宗稱善,令示平叔 韶下其奏,令公卿議。 自京兆少尹爲鴻臚卿、判度支,不數月, 以権鹽舊法爲弊年深,欲官自糶 處厚抗論不可, 平叔 發十難以詰之。 詞屈無以答,其事遂 以平叔條奏不周,經慮未 鹽,可富國強兵,勸 時平叔 宣授戶部侍 傾巧有恩 寢

侍鄓。 詔 類相從, 處厚 處厚以幼主荒怠, 與路隨兼充史館修撰。 爲二十卷, 謂之六經法言, 不親政務, 實錄未成 既居納誨之地,宜有以啓導 獻之。 許二人分日入內, 錫以繒帛銀器, 仍賜金紫。 仍放常參。 性靈 ,乃銓擇經義雅 以憲宗實錄未成 處厚俄又權兵部 言,以

敬宗嗣位,李逢吉用事 ,素惡李紳 乃構成其罪, 禍將不測。 處厚與紳皆以孤進,同年

列傳第一百九 韋處厚

進士

一,心頗傷之,乃上疏日

東向化、只緣宰相朋黨,上負朝廷。 下不平。伏乞聖明,察臣愚懇。 杼之疑,先師有拾塵之戒。伏望陛下斷自聖慮,不惑奸邪,則天下幸甚! 建中之初,山 今逢吉門下故吏,遍滿朝行,侵毀加誣,何詞不有?所貶如此,猶爲太輕。蓋曾參有投 道,可謂孝矣。」李紳是前朝任使,縱有罪愆,猶宜洗釁滌瑕,念舊忘過,以成無改之美。 情,皆甚歎駭。 [詩云:「萋兮菲兮,成是貝錦。 彼譖人者,亦已太甚。」又曰:「讒言罔極, 交亂四國。」自古帝王,未有遠君子、近小人而致太平者。 古人云:「三年無改於父之 神先朝獎用,擢在翰林,無過可書,無罪可戮。今羣黨得志,讒嫉大興。詢於人 臣竊聞朋黨議論,以李紳貶黜尚輕。臣受恩至深,職備顧問,事關聖聽,不合不 楊炎爲元載復讎,盧杞爲劉晏報怨,兵連禍結,天

帝悟其事,紳得減死,貶端州司馬。

死諫,縱先聖好畋及色,以至不壽,臣合當誅。然所以不死諫者,亦爲陛下此時在春宮,年 因謝從容奏曰:「臣有大罪,伏乞面首。」帝曰:「何也?」處厚對曰:「臣前爲諫官,不能先朝 已十五。今則陛下皇子始一歲矣,臣安得更避死亡之誅?」上深感悟其意,賜錦綵一百匹、 處厚正拜兵部侍郎,謝恩於思政殿。時昭愍狂恣,屢出畋遊,每月坐朝不三四日,處厚

銀器四事。

桓 左降官· 宣. 嫌,與李紳 禮 任 若 一重儀, 舉爲國相; 一付宰臣,應近年左降官,並 如)經量 此 寶 在 層 有 內廷, 天地 則 移 不 元 本非親黨,所論者全大體,所陳者 應是近年流貶官, 年四 者 該 百靈之所鑒臨, 冶長縲紲,仲尼選爲密親。 恩澤 典 自經貶官,未蒙恩宥。 月, 量 者。 移 羣 臣上尊號,御殿受册肆 不 在宥之體 言未量移者,蓋 編入赦條,令準 因李紳 億兆八紘之所瞻戴, 有所未 一人皆不得量移。 古人云:『人君當記人之功,忘人之過。』管仲拘囚 欲紳 有罪猶宜滌蕩,無辜豈可終累?況鴻名大號,册 弘。 舊例,得量移近處。」帝覽奏,深悟其事(11),乃 在至公。 赦。 不受恩例。 臣聞物議 恩澤不廣, 李逢吉以李紳之故,所撰赦文但云左降 伏乞聖慈察臣肝膽,倘蒙允許, 事體至大,豈敢不言? 皆言逢吉恐李紳量移,故有 處厚上疏曰:「伏見赦文節目中 實非所宜。 臣與逢吉素無歸 李紳先朝獎 此 仍望 · ; 齊

奉藩教 叶-{秋 之法,大義 曆 季年 以 佐 滅親,內惡必書,以明逆順。 是夕 ,急變中起,文宗底綏內難 命 功, 詔命 旋 拜 制置 中書侍郎、 一及踐祚禮儀,不暇責所司,皆出於處厚之議。 同中書門下平章事、監修國史, 韶 正名討罪,於義何嫌?安可依違,有所避諱! 命將降,未有所定。處厚聞難奔赴,昌言曰: 加銀青光祿大夫,進爵 及禮行之後,皆

鷹鷙及楊、益、

兩浙索奇文綾綿,皆抗

疏

不

奉

命,

且引前時赦書爲證,帝皆可其奏。

追

改赦

文,

紳方霑恩例。

處厚爲翰林承旨

學

主,

每立

視

草,愜會聖旨。

常奉急命於宣州徵

列

靈昌郡公。

往往 數十人,趨中書及宰相私第,摩肩候謁,繁於辭語。 三十四州別駕以處之,而淸流不雜,朝政淸肅 員 ,罷諸州別駕,其在京百司當入別駕者,多處之朝列。

一元和以來,兩河用兵,偏裨立功者, 擢在周行,率以儲案王官雜補之,皆盛服趨朝,朱紫塡擁。 處厚 在相位,務在濟時,不爲身計。中外補授,咸得其宜。初,貞元中宰相齊抗奏減冗 及處厚秉政,復奏置六雄、十望、十緊、 久次當進及受代閑居者,常

不信; 言既 下固 髙 庸 臣等不肖,用爲宰相,參議大政。 望重 作輔 宜 文宗 不從,臣宜先退。」卽趨下再拜陳乞。 上矍然曰:「何至此耶!卿之志業, 股素自知,登 謂 一,爲 親 一,百 若出於橫議,臣等何名鼎司?且裴度元勳宿德,歷輔四朝,孜孜竭誠,人望所屬, 曰:「凡卿所欲言,並宜啓論。」處厚因對彰善癉惡、歸之法制,凡數百言; 又裴度勳 勤於聽政,然浮於決斷, 重。竇易直良厚,忠事先朝,陛下固當委信。微臣才薄,首蒙陛下擢用,非出他門, 人盡 職 斯舉。 一心切直,宜久任,可壯國威。 縱股有所失,安可遽辭,以彰吾薄德?」處厚謝之而去,出延英門復令 凡有奏請,初蒙聽納,尋易聖懷。 宰相奏事得請,往往中變。處厚常獨論奏曰:「陛下不以 帝皆聽納。 自是宰臣敷奏,人不敢橫議 若出自宸衷,卽示臣等

俄

而滄州李同捷叛,朝廷加兵。

魏博史憲誠中懷向背,裴度以宿舊自任,待憲誠於不

所爲 撰大和國計 疑。 載義深然其旨。 ,自有朝典耳。」憲誠聞之大懼 嘗遣親 吏請事 二十卷以獻。 至中書, 自此 李載 處厚謂 鎭 所獲生 義 累破滄、 , 日:「晉公以 自 此 , 輸竭,竟有 配隸 鎭 兩軍 遠 百口於上前保爾使主, 地, ٠, 功於 兵士每 前後全活數百 滄州 有俘 執, 又嘗以理 一千人。 多遺 處厚則不然, 刳 財 剔, '制用爲國之本, 處厚以書喻 但 一仰俟

滄、

口

魁偉 和二年十二月, 病前 甚。 而 卒,年五十六,贈司空。 古有以浮議 處厚居家循易,如不 如甚懦者,而 書 踰 萬卷,多手自刊 因延英奏對, 坐 庶僚 廢者,故 請事,畏惕相 ·克任。 處厚當國柄二周歲,啓沃之謀,頗叶時譽,咸共惜之。 校。 推擇羣材 造膝之際, 至於廷諍敷啓, 奉 韶 修元和實錄 往往往 顧 雖 忽奏「臣病作」,遽退。 與語: [棄瑕錄用,亦爲時 移唇,不 及馭 ,未絕筆 轄待胥吏, 敢 工,其統 私 所 謁。 文宗命中官扶出 譏。 例 勁確嶷然不 取 急於用才, 雅信 捨 皆處厚 釋氏因果,晚年 可奪。 酷 創 嗜 歸第,一 起 文學 質狀非 夕 嘗 大

察嘉賞 累遷 右 崔 羣字敦詩,清河武城人,山 補 降宣 闕 旨云:「自 元 和 初 今後學士進狀 召爲翰 林 學士, 東著姓。 歷 並 取崔羣連署 中書舍人。 十九登進士第, **奉** 然後進來。」 內職,常以讓 又制策登科,授秘書省校書郎, **墨以禁密之司**, 言正論聞 於時。 憲

事 爾學士或惡直 **[醜正,則其下學士無由上言。 羣堅不奉韶,三疏論奏方允。**

以爲 |王嫡 才行,咸爲公當。 澧王作讓 (事實無名,體尤不可,請止其所進。 長 元 和 ,所宜正位青宮。」竟從其奏。 《表,羣上言曰:「大凡已合當之,則有陳讓之儀;已不合當,因何遽有讓表?今遂 七 年,惠昭太子薨,穆宗時爲遂王,憲宗以澧王居長,又多內助,將建儲貳,命羣與 轉戶部侍郞。 時魏博節度使田季安進絹五千匹,充助修開業寺。 |羣前後所論多愜旨,無不聽納。 遷禮部侍郎,選拔

宥,實· 掖廷, 奉曰:「陛 孺 宜降等。 廷(三),於法皆似稍深。 母劉氏求哀於宰相,羣因入對言之。 師古雖自襲祖父,然朝廷待之始終。 十二年七月(三),拜中書侍郎、同中書門下平章事。十四年,誅李師道,上顧謂宰臣曰: 、合弘煦之道。」於是師古妻裴氏、女宜娘,韶出於鄧州安置。 宗奭妻韋氏及男女先沒 並釋放,其奴婢、資貨皆復賜之。 下仁惻卽赦之,當速令中使宣論。 又李宗奭雖抵嚴憲, 卿等留意否?」羣對曰:「聖情仁惻,罪止元兇。其妻近屬,倘獲寬 其情比之大逆亦有不同。其妻士族也,今與其子女俱在掖 其妻於師道卽嫂叔也,雖云逆族,若量罪輕重,亦 憲宗愍其母耄年,乃曰:「朕將屈法赦長孺何如? 又鹽鐵福建院官權長孺坐贓,韶付京兆府決殺,長 如待正敕,即無及也。」長孺竟得免死長流。

á

之啓奏平恕,多此類也。

稷進羨 時 於錢 憲宗急於盪寇,頗獎聚斂之臣,故藩府由是希旨,往往捃拾,目爲進奉。 七千貫, 處州刺史苗 時論

ģ.

年罷賢 学 事 右爲之感動 用林甫、楊國忠則亂。 ,羣曰:「安危 奉日:「有睿聖 度 相 」支使皇甫鎛陰結權倖,以求宰相, 張九齡,專任奸臣李林甫,理亂自此已分矣。), 轉深恨之,而憲宗終用, 轉爲宰相。 在 則孝德在其中矣。」竟爲轉所構,憲宗不樂,出爲湖南觀祭都 出令,存亡繫所任。 人皆以天寶十五年祿山自范陽起兵,是理亂分時,臣以爲開元二十 玄宗用姚崇、宋璟、張九齡、韓休、李元紘、杜 **零累疏其奸邪。** 無何,羣臣議上尊號,皇甫鎛欲加「孝德」 用人得失,所繫非小。」詞意激切,左 嘗因對 面論, 語及天寶、開元中 | 團練 使。 **暹**則理, 兩

使,領 城內皆是父兄,開關延入,羣爲智興所逐。 刺史、 貴。』若不 意 元在 穆宗即位 徐州 武寧軍節度、徐泗濠觀察等使。初,幽、鎭逆命,韶授沂州刺史王智興爲武寧軍 陛下。 知 兵討伐。 、先帝深旨,臣豈敢輕言?」數日 ,徵拜吏部侍郎,召見別殿,謂羣曰:「我昇儲位,知卿爲羽翼。」羣曰:「先帝之 頃者授陛下淮西節度使, 臣奉命草制, 羣以智興早得士心,表請因授智興旄鉞,竟寢不報。 ·,拜御史中丞。狹旬,授檢校兵部尙書,兼徐州 朝廷坐其失守,授秘書監, 且曰:『能辨南陽之牘,允符東海之 分司東都。 智興 自河北 未幾,改 節 迴戈,

列

華州刺史、兼御史大夫,復改宣州刺史、歙池等州都團練觀察等使,徵拜兵部尚書。久之,改 |東部尙書、|江陵尹、|荆南節度觀察使。 踰歲,改檢校右僕射,兼太常卿。 大和五年,拜

檢校左僕射,兼東部尙書。六年八月卒,年六十一,册贈司空。 |羣有沖蘵精裁,爲時賢相,淸議以儉素之節,其終不及厥初。 羣年未冠舉進士, 陸贄知

舉,訪於經肅,議其登第有才行者,肅曰:「崔羣雖少年,他日必至公輔。」果如其言。

羣弟于,登進士,官至郎署,有令名。

子流,亦以文學進,歷三署,終東都留守。

路隨字南式,其先陽平人。高祖節,高宗朝爲越王府東閣祭酒。 會祖惟恕,官至睦州

刺史。祖俊之,仕終太子通事舍人。

州,排潰軍而出,再爲流矢所中,裂裳濡血,以策說渾滅,瑊深重之,辟爲從事。 傳,工五言詩。性端亮寡言,以孝悌聞於宗族。 判同居高第,泌授城門郎。屬應宗達難奉天,泌時在京師,棄妻子潛詣行在所。 父泌字安期,少好學,通五經,尤嗜詩、易、左氏春秋,能諷其章句,皆究深旨。 博涉史 建中末,以長安尉從調,與李益、章綬等書 城討懷光, 又從幸梁

累奏爲副元帥判官、檢校戶部郞中、兼御史中丞。 河中平,隨瑊與吐蕃會盟于平凉, 因劫盟

陷蕃。 在絕域累年,棲心於釋氏之敎,爲贊普所重,待以賓禮,卒於戎鹿 (四)。

累贈太子少保。 及遺錄至,朝野傷歎。 詔中疏平凉陷蕃者名氏,令歸中國。 朝廷懲其宿詐,俟更要於後信,訖數歲不報。元和中,蕃使復款塞,隨復五獻封章,請修 又上書於宰執哀訴,裴垍、李藩皆協力敷奏,憲宗可之。命祠部郎中徐復報聘,乃特於 貞元十九年,吐蕃遺邊將書求和,隨哀泣上疏,願允其請,表三上,德宗命中使諭旨。 憲宗憫之,贈絳州刺史,賜絹二百匹,至葬日,委所在官給喪事 吐蕃因復等還,遣使來朝,遂以泌及鄭叔矩之喪與銘 泌 和

至,隨居喪,益以孝聞。 然坐市中,一不介意。 氏言其形貌肖先君,遂終身不照鏡。 泌陷蕃之歲。 隨方在孩提,後稍長成,知父在蕃,乃日夜啼號,坐必西嚮,饌不食肉,母 章夏卿爲東都留守,聞而辟之,由是聲名日振。 服闋,擢拜左補闕 後以通經調授潤州多軍,爲李錡所困,使知市事 元和五年,邊吏以計 隨 翛

者敬 父代焉。 勳 會李絳諷上納諫,憲宗皇帝曰:「諫官路隨、韋處厚章疏相繼,朕常深用其言。」自是識 郞 中, 俄遷起 賜緋 魚袋,與韋處厚同入翰林爲侍講學士,採三代皇王興衰,著六經法言二 居郎 , 轉 司 勳員外郎。 自補闕至司勳員外, 皆充史館修撰。 穆宗即位

爲相,拜中書侍郎,加監修國史。初,韓愈撰順宗實錄,說禁中事頗切直,內官惡之,往往於 所納。文宗即位,韋處厚入相,隨代爲承旨,轉兵部侍郎、知制誥。 舍人、翰林學士,仍賜紫。 上前言其不實,累朝有韶改修。及隨進憲宗實錄後,文宗復令改正永貞時事,隨奏日: 十卷奏之,拜諫議大夫,依前侍講學士。將修憲宗實錄,復命兼充史職。 有以金帛謝除制者,必叱而却之曰:「吾以公事接私財耶?」終無 大和二年,處厚薨,隨代 敬宗登極,拜中書

等各上章疏,具陳刊改非甚便宜。又聞班行如此議論頗衆。臣伏以史册之作,勸誠所 陛下所言,皆是接於耳目。旣聞乖謬,因述古今,引前史直不疑盜嫂之言,及第五倫撾 存,事有當書,理宜歸實。匹夫美惡尙不可誣,人君得失無容虛載。 聰明,特蒙降祭,稍恕前謬。 公之說,皆多此比類,難盡信書。所冀睿鑒詳於聽言,深宮愼於行事。 前後,至于數四。臣及宗閔、僧孺亦以永貞已來,歲月至近,禁中行事,在外固難詳知。 記貞元末數事,稍非摭實,蓋出傳聞,審知差舛,便令刊正。 取 (史本欲加筆削。近見衞尉卿周居巢、諫議大夫王彥威、給事中李固言、史官蘇景胤 臣昨面奉聖旨,以順宗實錄頗非詳實,委臣等重加刊正,畢日聞奏。臣自奉宣命, 由是近垂宣命,令有改修。 頃因坐日,屢形聖言,通計 聖旨以前件實録 持此比類,上開

臣等伏以貞觀已來,累朝實錄有經重撰,不敢固辭,但欲粗删深誤,亦固盡存諸

冀聖祖垂休,永無慚於傳信; 下臣非據,獲減戾於侵官。彰淸朝立政之方,表公器不私 成,必懼終爲時累。且韓愈所書,亦非己出,元和之後,已是相循。縱其密親,豈害公 理?使歸本職,實謂正名。其實緣伏望條示舊記最錯誤者,宣付史官,委之修定。則 表章交奏,似有他疑。臣雖至眛,容非自請。旣迫羣議,輒冒上聞。縱臣果獲修 私嫌。以臣旣職監修,盍令詳正,及經奏請,事遂施行。今者庶僚競言,不知本 宗閔、僧孺相與商量,緣此書成於韓愈,今史官李漢、蔣係皆愈之子壻,若遺參撰,

刊去,其他不要更修。餘依所奏。」四年,轉門下侍郎,加崇文館大學士。七年,兼太子太 流 潤州刺史、鎭海軍節度、浙江西道觀察等使。大和九年七月,遘疾于路,薨于揚子江之中 長史,隨不署奏狀,始爲鄭注所忌。九年四月,拜檢校尙書右僕射、同中書門下平章事,兼 師,備禮册拜。表上史官所修憲宗、穆宗實錄。八年,辭疾,不得謝。會李德裕連貶至袁州 詔曰:「其實緣中所書應宗、順宗朝禁中事,尋訪根柢,蓋起謬傳,諒非信史。 宜令史官詳正 年六十,册贈太保,諡曰貞。 之義。流言自弭,時論攸宜。

十五年在相位〔10〕,宗閔、德裕朋黨交興,攘臂於其間,李訓、鄭注始終奸詐,接武於其後,而 隨有學行大度,爲諫官能直言,在內廷匡益。自實曆初爲承旨學士,卽參大政矣。後

列

百

路隨

校勘記

隨藏器韜光,隆汚一致,可謂得君子中庸而常居之也。

公因獻捷之書,輟已成之韶,命也夫。處厚危言切議,振士友之急,稱同列之善,君子哉! 名簡書,茲實有足多也。」糊有其位,有其時,懷獨善之謀,晦衆濟之道,左遷非不幸也。 贊曰:衞、鄭、韋、路,兼之博陵。 文學政事,爲時所稱。 史臣曰:衞次公、鄭絪、韋處厚、崔羣、路隨等,皆以文學飾身,致位崇極。 兼之忠讜,垂

校勘記

[1] 深悟其事 「深悟」二字各本原無,據冊府卷五五三補。

(三)十二年 「十」字各本原無,據新書卷一六五崔羣傳、通鑑卷二四〇改。

(三) 今與其子女 「與」字各本原無,據唐會要卷三九、冊府卷一五〇補。

(图) 卒於戎鹿 校勘記卷五三引張宗泰說:「鹿」字義不可通,疑當作「幕」。

(五) 十五年 合鈔卷二一〇路隨傳作「五年」。

舊唐書卷 一百六十

列傳卷第一百一十

韓愈 張籍 孟郊 唐衢 李翱 字文籍 劉禹錫

柳宗元 章辭

間,故相鄭餘慶頗爲之延譽,由是知名於時。 梁肅最稱淵奧,儒林推重。。愈從其徒遊,銳意鑽仰,欲自振於一代。 洎舉進士,投文於公卿 刻苦學儒,不俟獎勵。 |大曆、貞元之間,文字多尙古學,效楊雄、董仲舒之述作, 而獨孤及、 韓愈字退之,昌黎人。父仲卿,無名位。愈生三歲而孤,養於從父兄。愈自以孤子,幼

門,宰相不專機務,宮市之弊,諫官論之不聽。愈嘗上章數千言極論之,不聽,怒貶爲連州 言眞率,無所畏避,操行堅正,拙於世務。調授四門博士,轉監察御史。德宗晚年,政出多 尋登進士第。宰相<u>董晉</u>出鎭大梁,辟爲巡官。府除,徐州張建封又請爲其賓佐。 愈發

列傳第一百一十 韓愈

四一九五

è

上疏 國子博士。 軍頓 公事 Щ 役直。 理 停華陰令柳澗縣務,俾攝掾曹。 令,量移江陵府掾曹。 澗,留中不下。詔監察御史李宗奭按驗,得澗贓狀,再貶澗封溪尉。 愈自以才高,累被擯黜,作進學解以自喻日: 後刺史趙昌按得澗罪以聞,貶房州司馬。愈因使過華,知其事,以爲刺史相黨, 元和初, 召爲國子博士,遷都官員外郎。 居數月,濟美罷郡,出居公館,澗途 時華州刺 諷 百姓遮道 以愈妄論,復爲 史閻濟美以 索前年

爬羅剔抉,刮垢磨光。蓋有幸而獲選,孰云多而不揚?諸生業患不能精,無患有司之 方今聖賢相逢,治具畢張,拔去兇邪,登崇俊良。占小善者率以錄,名一藝者無不庸。 不明;行患不能成,無患有司之不公。」 國子先生晨入太學,召諸生立館下,誨之曰:「業精于勤荒于嬉,行成于思毁于隨。

姒, |老,補苴罅漏,張皇幽眇。 尋墜緒之茫茫,獨旁搜而遠紹; 障百川而東之,迴狂瀾於旣 細大不捐。燒膏油以繼晷,常矻矻以窮年。 於六藝之文,手不停披於百家之編。記事者必提其要,纂言者必鈎其玄。 軍無軍軍。 先生之於儒,可謂有勞矣。沉浸醲郁,含英咀華,作爲文章,其書滿家。 言未旣,有笑于列者曰:「先生欺予哉!弟子事先生,于茲有年矣。 先生口不絕吟 周誥、殷盤, 佶屈聱牙。 春秋蓮嚴, 左氏浮誇。 先生之業,可謂勤矣。 易奇而法,詩正而葩。 觝排異端,攘斥佛、 貪多務得, 上規姚、

見治。 少始 信於人,私不見助於友,跋前躓後,動輒得咎。 追莊、騷,太史所錄,子雲、相如,同工異曲。 先生之於文,可謂閎其中而肆其外矣。 知學,勇於敢爲;長通於方,左右具宜。 命與仇謀,取敗幾時。 冬**媛而**兒號寒,年豐而妻啼饑。頭童齒豁,竟死何裨? 先生之於爲人,可謂成矣。 暫爲御史,遂竄南夷。 三爲博士,冗不 然而公不見

不知慮此,而反敎人爲!

遺者 逃讒于楚,廢死蘭陵。是二儒者,吐辭爲經,舉足爲法,絕類離倫,優入聖域,其遇于世 以 隨之。投閒置散,乃分之宜。若夫商財賄之有無,計班資之崇庳,忘己量之所稱,指前 之促促,窺陳編以盜竊。然而聖主不加誅,宰臣不見斥,此非其幸哉!動而得謗,名亦 不顯於衆。猶且月費俸錢,歲靡廩粟,子不知耕,婦不知織,乘馬從徒,安坐而食,踵常塗 何 者,宰相之方也。昔者,孟軻好辯,凡道以明,轍環天下,卒老于行。荀卿守正,大論是弘, 人之瑕疵,是所謂詰匠氏之不以杙爲楹,而訾醫師以昌陽引年,欲進其豨苓也。」 如 成室者,匠氏之工也。玉札丹砂、赤箭青芝、牛溲馬勃、敗鼓之皮,俱收丼蓄,待用無 也。今先生學雖勤,不由其統;言雖多,不要其中,文雖奇,不濟於用;行雖修, ,醫師之良也。登明選公,雜進巧拙,紆餘爲妍,卓犖爲傑,校短量長,唯器是適 先生曰:「吁,子來前。 夫大木爲宗,細木爲桷,欂櫨侏儒、椳闌扂楔,各得其宜,施

書舍人。

執政) 覽其文而憐之,以其有史才,改比部郎中、史館修撰。 踰歲,轉考功郎中、知制誥,拜中

凡鄙 宗命翰林 淮、蔡平, 入蔡州擒 二年八月, ,近者||鍔還省父,愈爲序餞鍔,仍呼其字。 此論喧於朝列,坐是改太子右庶子。 俄有不悅愈者,撫其舊事,言愈前左降爲江陵掾曹,荆南節度使裴均館之頗厚,均子 吳元 學士段文昌重撰文勒石。 宰臣裴度爲淮西宣慰處置使, 濟 月隨度還朝,以功授刑部侍郎, ,李愬功第一,**愬不平之**。 愬妻出入禁中,因訴碑辭不實,詔令磨愈文。 兼彰義軍節度使, 仍韶愈撰平淮 西碑, 請愈爲行軍司馬,仍賜 其辭多敍裴度事。 元和十 金紫。 鍔 憲

歲豐 順門入大內,留禁中三日 頂 人泰。 **灼臂而** 鳳 翔 法門寺有護國眞 求供養者。 十四年正月,上令中使杜英奇押宮人三十人,持香花,赴臨阜驛迎佛骨。 愈素不喜佛, ,乃送諸寺。 《身塔,塔內有釋迦文佛指骨一節,其書本傳法,三十年一開 上疏諫日: 王公士庶, 奔走捨施,唯恐在後。 百姓有廢業破產、 開則 自光

在位七十年,年百 年,年百 伏以 一十歲; 佛者,夷狄之一法耳。 五歲; 少昊在位八十年,年百歲;顓頊在位七十九年,年九 帝堯在位九十八年,年百一十八歲, 自後漢時始流入中國,上古未嘗有也。 帝舜及禹年皆百歲。 十八歲; 昔黃帝在位百 此

時 七 十五 天下 歲 年, 了<u>武王年九十三歲,穆王在位</u> 太平,百姓安樂壽考, 武 1 在位五 十年,書史不言其壽,推其年數,蓋亦俱不減百歲。 然而 中國未有佛也。 百年。 此時佛法亦未至中國,非因事佛而 其後殷陽亦年百歲,陽孫太戊在位 周文王年九 致此 也

梁、陳、元魏已下,事佛漸謹,年代尤促。 宗廟之祭,不用牲牢,晝日一食,止於菜果;其後竟爲侯景所逼,餓死臺城,國亦尋滅 事 佛水 漢明帝時始 福 ,乃更得禍。 有佛法, 由此觀之,佛不足信,亦可知矣。 明帝在位纔十八 唯梁武帝在位四十八年,前後三度捨 、年耳。 其後亂亡相 繼,運祚不長, 身施佛, 宋、 齊、

闡 志 有 聖明, 倫 必行於陛下之手。 比。 高 祖始受隋禪,則議除之。 以救斯弊,其事途止。 卽位之初,卽不許度人爲僧尼、道士,又不許別 今縱未能卽行,豈可恣之轉令盛也 臣嘗恨焉!伏惟皇帝陛下,神聖英武,數千百年以來未 當時羣臣識見不遠,不能深究先王之道、古今之宜,推 立寺觀。 臣當時以爲高祖之

愚 茍 設 見陛 能 異 之 觀、 ,必知陛下不惑於佛,作此崇奉以祈 今聞陛下令羣僧迎佛骨於鳳翔, 下 如此 戲玩之具耳。 ,將謂眞心信佛。 安有聖明若此而肯信此等事哉?然百姓愚冥,易惑難曉, 皆云天子大聖,循一心敬信,百姓微賤,於佛豈合惜身 御樓 福 新也。 (以觀, 直以年豐人樂,徇人之心,爲京都士庶 **异入大內,令諸寺遞迎供養。** 臣雖

列

方,非細事

也。

命。 棄其生業。 所 以 灼 若不卽加禁遏,更歷諸寺,必有斷臂臠身以爲供養者。 頂燔指,百十爲羣,解衣散錢,自朝至暮,轉相做效,唯恐後時,老幼奔波, 傷風敗俗,傳笑四

得罪 佛太過,我猶爲容之。至謂東漢奉佛之後,帝王咸致夭促,何言之乖刺也?愈爲人臣,敢爾 疏奏,憲宗怒甚。間一日,出疏以示宰臣,將加極法。 ,然而非內懷忠懇,不避黜責,豈能至此?伏乞稍賜寬容,以來諫者。」上曰:「愈言我奉 之,不過宣政一見,禮賓一設,賜衣一襲,衞而出之於境,不令惑於衆也。 盛哉 先,桃茢不用,羣臣不言其非,御史不舉其失,臣實恥之。乞以此骨付之水火,永絕根 服口,不知君臣之義、父子之情。假如其身尙在,奉其國命,來朝京師,陛下容而接 本,斷天下之疑,絕後代之惑。使天下之人,知大聖人之所作爲出於尋常萬萬也,豈不 國,尙令巫祝先以桃茢,祓除不祥,然後進弔。 久,枯朽之骨,兇穢之餘,豈宜以入宮禁! 孔子曰:「敬鬼神而遠之。」古之諸侯,行弔於 佛本夷狄之人,與中國言語不通,衣服殊製。口不道先王之法言,身不服先王之法 豈不快哉! 佛如有靈,能作禍祟,凡有殃咎,宜加臣身。上天鑒臨,臣不怨悔。 乃至國戚諸貴亦以罪愈太重,因事言之,乃貶爲潮州 今無故取朽穢之物, 親臨觀之, 巫祝不 裴度、崔羣奏曰:「韓愈上忤尊聽,誠宜 況其身死已

狂妄,

固不可赦。」于是人情驚惋,

4

愈至潮陽,上表日:

無日。 猛,難計期程,颶風鱷魚,患禍不測。州南近界,漲海連天,毒霧瘴氛,日夕發作。 所領州,在廣府極東,去廣府雖云二千里,然來往動皆踰月。 多病,年纔五十,髮白齒落,理不久長。加以罪犯至重,所處又極遠惡,憂惶慚悸,死亡 臣今年正月十四日,蒙恩授潮州刺史,即日馳驛就路。 單立一身,朝無親黨,居蠻夷之地,與魑魅同羣。 苟非陛下哀而念之,誰肯爲臣 過海口,下惡水,濤瀧 經涉嶺海,水陸萬里。 臣 臣少 壯

綱。孽臣姦隸,外順內悖,父死子代,以祖以孫,如古諸侯,自擅其地,不朝不貢,六七十 廟,紀太山之封,鏤白玉之牒,鋪張對天之宏休,揚厲無前之偉跡,編於詩、書之策而 年。四聖傳序,以至陛下,躬親聽斷,干戈所麾,無不從順。宜定樂章,以告神明,東巡隊 海之內,莫不臣妾,南北東西,地各萬里。自天寶之後,政治少懈,文致未優,武克不 無愧,措於天地之間而無虧。雖使古人復生,臣未肯多讓。伏以大唐受命有天下,四 於當時之文,亦未有過人者,至於論述陛下功德,與詩、書相表裏,作爲歌詩,薦之郊 臣受性愚陋,人事多所不通,唯酷好學問文章,未嘗一日暫廢,實爲時輩推許。臣

山,奏功皇天,使永永萬年,服我成烈。當此之際,所謂千載一時不可逢之嘉會,而臣 畢精,以贖前過。 懷痛窮天,死不閉目! 瞻望宸極,魂神飛去。 伏惟陛下,天地父母, 負罪嬰釁,自拘海島,戚戚嗟嗟,日與死迫,曾不得奏薄伎於從官之內、隸御之間,窮思

哀而憐之。

產將盡,以是民貧。」

」居數日,

愈往視之,

令判官秦濟炮一豚一羊,

投之湫水,

呪之日: 而皇甫鎛惡愈狷直,恐其復用,率先對曰:「愈終太狂疏,且可量移一郡。」乃授袁州刺史。 臣,不當言人主事佛乃年促也。我以是惡其容易。」上欲復用愈,故先語及,觀宰臣之奏對。 憲宗謂宰臣曰:「昨得韓愈到潮州表,因思其所諫佛骨事,大是愛我,我豈不知?然愈爲人 初,愈至潮陽,旣視事,詢吏民疾苦,皆曰:「郡西湫水有鱷魚,卵而化,長數丈,食民畜

其南,鲸鵬之大,蝦蠏之細,無不容,鱷魚朝發而夕至。今與鱷魚約,三日乃至七日,如 頑而不徙,須爲物害,則刺史選材伎壯夫,操勁弓毒矢,與鱷魚從事矣! 身,以繁其卵,與刺史爭爲長。刺史雖駑弱,安肯爲鱷魚低首而下哉?今潮州大海在 處此土哉?刺史受天子命,令守此土,而鱷魚駻然不安谿潭,食民畜熊鹿麞豕,以肥其 而有之。況揚州之境,刺史縣令之所治,出貢賦以共天地宗廟之祀,鱷魚豈可與刺史雜 前代德薄之君,棄楚、越之地,則鱷魚涵泳於此可也。今天子神聖,四海之外,撫

呪之夕,有暴風雷起於湫中。 數日、湫水盡涸、徙於舊湫西六十里。 自是潮人無 鱷

袁州之俗,男女隸於人者, 踰約則沒入出錢之家。 愈至,設法贖其所沒男女,歸其父

母。 仍削其俗法,不許隸人。

旣至,集軍民,諭以逆順,辭情切至,廷凑畏重之。改吏部侍郎。 **憐之,乃追制以神爲兵部侍郎,愈復爲吏部侍郎。** 粉然不止,乃出神爲浙西觀察使,愈亦罷尹,爲兵部侍郎。 以不臺參,爲御史中丞李紳所勃。愈不伏,言準敕仍不臺參。 十五年,徵爲國子祭酒,轉兵部侍郎。會鎭州殺田弘正,立王廷湊,令愈往鎭州宣 及紳面辭赴鎭, 紳、愈性皆褊僻、移 轉京兆尹 泣涕陳敍,穆宗 , 兼御 刺往來, 史大夫。 一論。 愈

長慶四年十二月卒,時年五十七,贈禮部尚書,諡曰文。

騰,論文賦詩,如平昔焉。 愈不避寒暑,稱薦於公卿間,而籍終成科第,榮於祿仕。 愈性弘通,與人交,榮悴不易。少時與洛陽人孟郊、東郡人張籍友善。二人名位未振, 。而觀諸權門豪士,如僕隸焉, 瞪然不顧。 後雖通貴, 每退公之隙, 則相 而頗能誘厲 後進, 館之 與談

女僅十人。

者十六七,雖晨炊不給,怡然不介意。

大抵以興起名教弘獎仁義爲事。

凡嫁內外及友朋孤

常以爲自 列 第 魏、晉已還,爲文者多拘偶對,而經誥之指歸,遷、雄之氣格,不復振起矣。 百 + 醇 Ŵ 張 籍 盂 郊

故

須,譏戲不近人情:此文章之甚紕繆者。時謂愈有史筆,及撰順宗實錄,繁簡不當,敍事拙傳,譏戲不近人情:此文章之甚紕繆者。時謂愈有史筆,及撰順宗實錄,繁簡不當,敍事拙 池神,而愈譔碑以實之;李賀父名晉,不應進士,而愈爲賀作諱辨,令舉進士;又爲毛穎 以過之,故世稱「韓文」焉。然時有恃才肆意,亦有盭凡、孟之旨。若南人妄以柳宗元爲羅 愈所爲文,務反近體,抒意立言,自成一家新語。後學之士,取爲師法。當時作者甚衆,無 而韋處厚竟別撰順宗實錄三卷。有文集四十卷,李漢爲之序。 於取捨,頗爲當代所非。穆宗、文宗嘗詔史臣添改,時愈壻李漢、蔣係在顯位,諸公難之。

子昶,亦登進士第。

祝,轉國子助教、秘書郎。以詩名當代,公卿裴度、令狐楚,才名如白居易、元稹,皆與之遊, 而韓愈尤重之。累授國子博士、水部員外與,轉水部與中,卒。世謂之張水部云。 張籍者,貞元中登進士第。性詭激,能爲古體詩,有警策之句,傳於時。 調補太常寺太

孟郊者,少隱於嵩山,稱處士。 李翺分司洛中,與之遊。薦於留守鄭餘慶,辟爲賓佐。

性孤僻寡合,韓愈一見以爲忘形之契,常稱其字曰東野,與之唱和於文酒之間。 興元,又奏爲從事,辟書下而卒。餘慶給錢數萬葬送,贍給其妻子者累年。 鄭餘慶鎭

原,屬戎帥軍宴,衢得預會。酒酣言事,抗音而哭,一席不樂,爲之罷會,故世稱唐衢善哭。 涕泗不能已。每與人言論,旣相別,發聲一號,音辭哀切,聞之者莫不悽然泣下。 爲?不能發聲哭,轉作樂府辭。」其爲名流稱重若此。竟不登一命而卒。 左拾遺白居易遺之詩曰:「賈誼哭時事,阮籍哭路歧。唐生今亦哭,異代同其悲。 書叱盜時。大夫死兇寇,諫議謫蠻夷。每見如此事,聲發涕輒隨。 人?五十寒且饑。不悲口無食,不悲身無衣。所悲忠與義,悲甚則哭之。太尉擊賊日,尙 唐衢者,應進士,久而不第。能爲歌詩,意多感發。見人文章有所傷歎者, 我亦君之徒,鬱鬱何所 讀訖必哭, 嘗客遊太 唐生者何

尙氣質。 李翺字習之,凉武昭王之後。父楚金,貝州司法參軍。 列 貞元十四年登進士第, 第 百 + 唐 衢 李 授校書郎。 翻 三遷至京兆府司錄參軍。 翺幼勤於儒學,博雅好古,爲文 四二〇五 元和初, 轉國子博

士、史館修撰。

祠、蒸、嘗、臘,凡五享。天寶末,玄宗令尙食每月朔望具常饌,令宮闈令上食於太廟,後遂 十四年,太常丞王涇上疏請去太廟朔望上食,詔百官議。議者以開元禮,太廟每歲酌、

爲常。由是朔望不視朝,比之大祠。|翺奏議曰:

皆一代名臣,窮極經史,豈不見國語、禮記有日祭月祭之詞乎?斯足以明矣。 祭月祭,旣已行於陵寢矣,故太廟之中,每歲五饗六告而已。不然者,房玄齡、魏徵輩 於園陵,而上食焉。國家因之而不改。,貞觀、開元禮並無宗廟日祭月祭之禮,蓋以日 皆託古聖賢之名,以信其語,故所記各不同也。 古者廟有寢而不墓祭,秦、漢始建寢廟 雜而用之。蓋遭秦火,詩、書、禮經燼滅,編殘簡缺,漢乃求之。先儒穿鑿,各伸已見,

以禮爲重,不以其生存所嗜爲獻,蓋明非食味也。然則薦常饌於太廟,無乃與芰爲比 漢之權制,乃食味之道也。今朔望上食於太廟,豈非用常褻味而貴多品乎?且非禮所 必以芰。」及祭薦芰,其子違命去芰而用羊饋籩豆脯醢,君子是之。言事祖考之義,當 謂「至敬不饗味而貴氣臭」之義也。 傳稱:屈到嗜芰,有疾,召其宗老而屬之曰:「祭我 伏以太廟之饗,箋豆牲牢,三代之通禮,是貴誠之義也。園陵之奠,改用常饌,秦、

罔極。 樂爲大,故下百僚,可得詳議。臣等以爲貞觀、開元禮幷無太廟上食之文,以禮斷情, 禮 帝臣某,謹遣太尉臣名,敢昭告于高祖神堯皇帝、祖妣太穆皇后竇氏。 時惟孟春,永懷 乎?且非三代聖王之所行也。況祭器不陳俎豆,祭官不命三公,執事者唯宮闈令與宗 爲萬代法。 罷之可也。至若陵寢上食,採國語、禮記日祭月祭之詞,因案、漢之制,修而存之,以廣 不供其事,國有常刑。」凡陪享之官,散齋四日,致齋三日,然後可以爲祭也。宗廟之 祝辭也。前享七日質明,太尉誓百官於尚書省曰:「某月某日時享于太廟,各揚其職。 正 孝道可也。 卿 「非敢擅議,雖有知者,其誰敢言? 故六十餘年,行之不廢。 今聖朝以弓矢旣櫜,禮 而已。謂之上食也,安得以爲祭乎?且時享于太廟,有司攝事,祝文曰:「孝曾孫皇 謹以一元大武、柔毛剛鬣、明粢茒萁、嘉蔬嘉薦醴齊,敬脩時享,以申追慕。」此 與其瀆禮越古,貴因循而憚改作,猶天地之相遠也。 如此,則經義可據,故事不遺。大禮旣明,永息異論,可以繼二帝三王,而

知禮者是之,事竟不行。

實,奏狀曰:「臣謬得秉筆史館,以記注爲職。夫勸善懲惡,正言直筆,紀聖朝功德,述忠賢 事業,載姦臣醜行,以傳無窮者,史官之任也。凡人事迹,非大善大惡,則衆人無由得知,舊 翔性剛急,論議無所避。 執政雖重其學, 而惡其激訐, 故久次不遷。 鰯以史官記事不

依此 尋權 直;段秀實但記其倒用司農印以追逆兵,以象笏擊朱泚,足以爲忠烈。若考功視行狀,不 遷、雄之列,務於華而忘其實,溺於文而棄其理。故爲文則失六經之古風,紀事則非史遷之 例皆訪於人,又取行狀諡議,以爲依據。今之作行狀者,多是其門生故吏,莫不虛加仁義禮 智,妄言忠肅惠和。 知職方員外郎。十五年六月,授考功員外郎,並兼史職 者不得受。依此則考功下太常,牒史館,然後定諡。伏乞以臣此奏下考功。」從之。 臣今請作行狀者,但指事實,直載事功。假如作魏徵傳,但記其諫諍之辭,足以爲正 此不唯其處心不實,苟欲虛美於受恩之地耳。蓋爲文者,又非游、夏、

滿百日,有司準例停官,逢吉奏授廬州刺史。 |大和初,入朝爲諫議大夫,尋以本官知制誥。 如志,鬱鬱不樂,因入中書謁宰相,面數李逢吉之過失,逢吉不之校。劚心不自安,乃請告。 刺 史。 翺 俄而景儉復為諫議大夫,翺亦入爲禮部郎中。劉自負辭藝,以爲合知制誥,以久未 與李景儉友善。初,景儉拜諫議大夫,舉劉自代。至是,景儉貶黜,七月出翺爲朗州

三年二月,拜中書舍人。

使。七年,改授潭州刺史、湖南觀察使。八年,徵爲刑部侍郎。 謬舉,左授少府少監。 俄出為鄭州刺史。 初,諫議大夫栢耆將使滄州軍前宣論,劉嘗贊成此行。 五年, 出爲桂州刺史、 栢耆尋以擅入滄州得罪, 九年,轉戶部侍郞。七月, 御史中丞,充桂管都防禦 鄹坐

宗實錄 以 著述,而風望峻整,爲時輩推重。 部員外郎、史館修撰。與韋處厚、韋表微、路隨、沈傳師同修憲宗實錄。 燳 由 轉 貶江陵府戶曹參軍。 庫部)破淮西策干宰相武元衡,元衡不用。以籍舊從事,令召表訊之,籍因與表狎。 是知名。 ,亦當以君命升。假榮偷獎,非所願也。」後考滿,連辟藩府,入爲侍御史,轉著作鄓,遷駕 宇文籍字夏龜。 郎中。 ,遷監察御史。 登進士第,宰相武元衡出鎭西蜀,奏爲從事。以咸陽尉直史館,與韓愈同修順 大和中,遷諫議大夫,專掌史筆,罷知制誥。籍性簡澹寡合,耽玩經史,精於 父滔,官卑。少好學,尤通春秋。 至任,節度使孫簡知重之,欲令兼幕府職事。籍辭曰:「籍以君命譴 王承宗叛,詔捕其弟駙馬都尉承系,其賓客中有爲誤識者。又蘇表 大和二年正月卒, 時年五十九, 贈工部侍郎。 竇羣自處士徵爲右拾遺,表籍自代, 俄以本官知制誥, 元衡怒,坐

子臨,大中初登進士第。

進士第,又登宏辭科。 |佐幕,典記室,尤加禮異。 劉 禹錫字夢得,彭城人。 禹錫精於古文,善五言詩,今體文章復多才麗。 從佑入朝,爲監察御史。 祖雲,父激,仕歷州縣令佐, 與吏部郎中章執誼相善。 世以儒學稱。 從事 禹錫貞元九年擢 准 南節度使杜

不從。 指名,道路以目,時號二王、劉、柳。 順宗卽位,久疾不任政事,禁中文誥,皆出於叔文,引禹錫及柳宗元入禁中,與之圖議,言無 卽 武元衡,時武元衡爲御史中丞,乃左授右庶子。侍御史竇羣奏禹錫挾邪亂政 日罷官。 貞元末,王叔文於東宮用事,後輩務進,多附麗之,禹錫尤爲叔文知獎,以宰相器待之。 轉屯田員外郎、判度支鹽鐵案,兼崇陵使判官。 韓鼻憑藉貴門,不附叔文黨,出爲湖南觀察使。 頗怙威權, 中傷端士。 既任喜怒凌人,京師人士不敢 ,不宜在朝,羣 宗元素不悦

禹錫或從事於其間, 叔文敗, 禹錫 坐貶連州刺史,在道,貶朗州 在朗州十年,唯以文章吟詠,陶冶情性。 乃依騷人之作,爲新辭以敎巫祝。 司馬。 地居西南夷,土風僻陋,舉目殊俗,無可 蠻俗好巫, 每淫 故武陵谿洞間夷歌,率多禹錫之辭 一祠鼓舞, 必歌俚辭。

才,欲洗滌痕累,漸序用之。 初 禹錫、宗元等八人犯衆怒, 會程异復掌轉運,有詔以韓皐及禹錫等爲遠郡刺史曰。 憲宗亦怒, 故再貶。 制有「逢恩不原」之令。 然執政惜其 屬武

也。

元 衡 在 中書,諫官十餘 人論 列,言不可 復 用 而 止。

莫 器 能 荆 放 贖 同 堪 州 臣 耶? 列, 不宜 ,有拘囚之思。 禹 矧 錫 密啓廷 華 不然, 於善地,多徙 積歲在湘 人 士族,而 何袁公 諍 雖古哲人不及, 託 澧 必 諷 五 間 致 言明楚獄 谿 禽鳥,寄辭草樹, 醜地,然後快意 鬱悒不 不 毛之鄉。 怡, 丽 而 燕翼 鍾 因讀張 今讀其文章 祉 哉 無 四 鬱然與騷 葉。 似,終爲餒魂。 ! 九齡文集, 議者以曲江 以是相較 人同 ·,自內職 風。嗟夫,身出 乃敍其意 〉,神可 爲良臣 牧始安 豈忮心失恕,陰 誣 , 曰:「世 ()有瘴 乎? 識 胡 於 雛 遐 癘 稱 有 曲江 之歎 謪 陬, 反相 最 爲相 大 失意 自 雖 羞 退 與 相 建 而 美 凡 7 不

貽親之憂。 播 譏 別,臣恐傷陛下 刺 州 連刺數郡 「臊所言, ,執政 西南 元 和 極遠, 十年 不悅,復出爲播州 今禹錫 ٠, 是責 孝理之風。 猿狖所居, 自武陵召還 人子之事 所坐,更合重於他 伏請 人迹罕至。 字相 刺 然終 史。 屈 復欲置之郞署。 法 不 詔 欲傷其所親之心。」乃改授連州 人,卿豈 稍移 下 禹錫、 -, 近處。」憲宗 誠 史中丞裴度奏曰: 可以 合得罪, 此 時 論 禹錫 之? 曰:「夫爲人子,每事 然其老母必去不得, 作遊玄都觀詠 」度無以對。 劉 禹 錫 刺 有 史。 日 看花君子 良 4,年 尤須謹慎,常 則 去京師 與 八 帝改容 十餘。 此子 又 爲 + 丽 語 餘 恐 死

大和二 年 , 自 和 州 刺 史徵還, 拜 主客郞中。 禹錫銜前事未已,復作遊玄都觀詩序曰: 年

列

傳

第

百

+

劉

禹

錫

刺史,就賜金紫。 賢院學士。 出牧,于今十有四年,得爲主客郞中。 而裴度稍知之。一大和中,度在中書,欲令知制誥,執政又聞詩序,滋不悅,累轉禮部郎中、集 因再題二十八字,以俟後遊。」其前篇有「玄都觀裏桃千樹,總是劉郎去後栽」之句, 居十年,召還京師,人人皆言有道士手植紅桃滿 「予貞元二十一年爲尙書屯田員外郞,時此觀中未有花木,是歲出牧連州, 種桃道士今何在,前度劉郞又到來」之句,人嘉其才而薄其行。 度罷 秩滿入朝,授汝州 知政事,禹錫求分司東都。 刺史,遷太子賓客,分司東都。 重遊茲觀,蕩然無復一樹,唯冤葵燕麥,動搖於春風 終以恃才褊心,不得久處朝列。六月,授蘇州 觀,如爍晨霞,遂有詩以志一時之事。 馬錫甚怒武元衡、李逢吉 尋貶朗州 後篇有 旋又 司馬

詩而 作則文成。一二年來,日尋筆硯, 在人口。 寫二本, 應者聲同,交爭者力敵。一往一復,欲罷不能。 一百三十八首。其餘乘興仗醉,率然口 [序之日:「彭城劉夢得,詩豪者也。 禹錫晚年與少傅白居易友善,詩筆文章,時無在其右者。常與禹錫唱和往來,因集其 一付龜兒,一授夢得 嘗戲微之云:『僕興足下二十年來爲文友詩敵,幸也,亦不幸也。 小男崙郎 同和贈答,不覺滋多。 ,各令收藏 其鋒森然,少敢當者。予不量力,往往犯之。夫合 [號者不在此數。 由是每制一篇,先於視草,視竟則興作,興 ", 附兩 家文集。予頃與元微之唱和頗多,或 因命小 大和三年春以前,紙墨所存者,凡 姪龜兒編錄 吟詠情性,播揚 ,勒成兩軸。

於詩。 藏而已! 過,病樹前頭萬木春』之句之類,眞謂神妙矣。 獨 名聲,其適遺形,其樂忘老,幸也。 送於吳、越間,此亦不幸也。 若妙與神,則吾豈敢?如夢得『雪裏高山頭白早,海中仙果子生遲』,『沉舟側畔千帆 」其爲名流許與如此。 今垂老復遇夢得,非重不幸耶?』夢得夢得,文之神妙,莫先 夢得嘗爲西塞懷古、金陵五題等詩,江南文士稱爲佳作,雖 然江南士女語才子者,多云元、白,以子之故,使僕不得 在在處處, 應有靈物護持,豈止兩家子弟祕

一年七月卒,時年七十一,贈戶部尙書。 開成 子承雍,登進士第,亦有才藻。 初,復爲太子賓客分司,俄授同州刺史。 秩滿,檢校禮部尙書、太子賓客分司。

會

名位不達,公卿大僚多與之交。

璨若珠貝。 太常博士,終侍御史。 柳宗元字子厚,河東人。後魏侍中濟陰公之系孫。 當時流輩咸推之。 宗元少聰警絕衆,尤精西漢詩騷。 登進士第,應舉宏辭,授校書郎、藍田尉。 貞元十九年,爲監 曾伯祖奭、高宗朝宰相〔三〕。父鎮, 下筆構思,與古爲侔。精裁密緻

祭御

史。

在道 書禮 ,再貶永州司馬。旣罹竄逐,涉履蠻瘴,崎嶇堙厄,蘊騷人之鬱悼,寫情敍事,動必以文。 部員外郎。 順宗 節位 ,王叔文、章執誼用事,尤奇待宗元。 叔文欲大用之,會居位不久,叔文敗,與同輩七人俱貶。 與監察呂温 密引禁中,與之圖事。 宗元爲邵州 刺 轉尙

爲騷文十數篇,覽之者爲之悽惻

吾於禹錫爲執友,胡忍見其若是?」即草章奏,請以柳州授禹錫, 「禹錫有母年高,今爲郡蠻方,西南絕域,往復萬里,如何與母偕行。如母子異方,便爲永訣。 元和 十年,例移爲柳州刺史。 時朗州司馬劉禹錫得播州刺史,制書下,宗元謂所親曰: 自往播州。 會裴度亦奏其

事,禹錫終易連州。

名動於時, 其父母。 周七,纔三四歲。 柳州土俗,以男女質錢,過期則沒入錢主,宗元革其鄉法。其已沒者,仍出私錢贖之,歸 江嶺間為進士者,不遠數千里皆隨宗元師法,凡經其門,必爲名 時號柳州云。 觀察使裴行立爲營護其喪及妻子還於京師,時人義之。 有文集四十卷。 元和 十四年十月五 日卒, 時年四十七。子周六、 士。 著述之盛,

章辭字踐之。 祖召卿、洛陽丞。 父翃,官至侍御史。 辭少以兩經擢第,判入等,爲祕書

藍田 戸部 顯要 省校書郎。 令入 郞 `,素知辭有文學理行,亟稱薦之。 中、 拜 兼御 侍御史,以事累出爲朗州 貞元末,東都留守韋夏卿辟爲從事。後累佐使府,皆以參畫稱職。元和九年,自 ,乃以辭與李翺 史中丞,充鹽鐵副使, 刺史,再貶江州司馬。 轉吏部郎中。 擢爲戶部員外, 文宗卽位,韋處厚執政,且以澄汰浮華、 轉刑 部郎中,充京西北 長慶初,韋處厚、路隨以公望居 和糴使。

常侍。 刺 疏 史、御史中丞、湖南觀察使。 達自用, 辭 素 無淸藻, 不事檢操。 文筆不過中才, 然處事端實, 處厚以激時用,頗不厭公論,辭亦倦於潤色,苦求外任,乃出爲潭州 在鎭二年,吏民稱治。 游官無黨。與李翺特相善,俱擅文學高名。 大和四年卒, 時年五十八, 贈右散騎

登用藝實

(為 事

同拜中書舍人。

公,於陵遲之末,遑遑仁義, 謹 比 一,呢 事 ',誠一代之宏才。 史臣 比小人,自致流離,遂隳素業。 日:貞元、大和之間,以文學聳動搢紳之伍者,宗元、禹錫而已。 如俾之詠歌帝載,黼藻王言,足以平揖古賢,氣吞時輩。 有志於持世範,欲以人文化成,而道未果也。 故君子羣而不黨, 戒懼愼獨, 正爲此也。 其巧麗淵博、屬辭 至若抑楊、墨,排 韓、李二文 丽 蹈道

列

傳

百

一 十

章

辭

校 勘

記

書卷 百百 六十

釋、老,雖於道未弘,亦端士之用心也。

贊曰:天地經綸,無出斯文。 愈、 翱揮翰,語切典墳。 犧雞斷尾,害馬敗羣。 僻塗自噬,

劉、柳諸君。

校勘記

(二) 先王之法服 「服」字各本原作「行」,據韓昌黎集卷三九、通鑑卷二四〇改。

(三)韓皐 校勘記卷五三謂考韓臯傳無此事,並引沈炳震說:「皐」字誤,或當作「泰」,或作「曄」。

高宗朝宰相 「高宗」,各本原作「高祖」。本書卷七七柳亨傳載,柳奭至永徽三年,始爲中書令。

新書卷七三上宰相世系表云:「奭字子燕、相高宗。」據改。

舊唐書卷一百六十一

列傳第一百一十一

李光進 楊元卿 子延宗 弟光顔 劉悟 子從諫 烏重胤 王沛 孫稹 子逢 劉沔 李珙 董重質

葛旃,殺僕固瑒而事河東節度使辛雲京。光進兄弟少依葛旃,因家于太原。 李光進,本河曲部落稽阿跌之族也。父良臣,襲雞田州刺史,隸朔方軍。光進姊適舍利

太保。 以軍討大同、橫野、淸夷、范陽及河北殘寇,用光進爲都知兵馬使。 累有戰功。 初,進封武威郡王。大曆四年,檢校戶部尙書,知省事。 光進勇毅果敢,其武藝兵略次于葛旃。 是歲多十月,葬母於京城之南原,將相致祭者凡四十四幄,窮極奢靡,城內士庶,觀 至德中,授代州刺史,封范陽郡公,食邑二百戶。上元初,郭子儀爲朔方節度, 肅宗自靈武觀兵,光進從郭子儀破賊,收兩京, 未幾,又轉檢校刑部尙書、兼太子 尋遷渭北節度使。 永泰

傳第一百一十一 李光進

列

è

者如绪公。

爲大大夫,光顏爲小大夫。 職,無所不歷,中丞、大夫悉 異。 節, 功。 八年, 克著茂勳 六年,拜銀青光祿大夫、檢校工部尚書,充單于大都護、振武 元 和 四年 遷 靈武節度使。 -,王承宗反(三),范希朝引師救易定,表光進爲步都虞侯,戰於木刀溝,光進 賜姓李氏。 十年七月卒。 曾兼帶。 其弟光顏除洺州 光進嘗從馬燧救臨洺, 先是救易定之師,光進、光顏皆在其行,故軍 刺史, 充本州團 戰洹水, 一練使。 收河中, 節度使。 兄弟恩澤同時, 皆有功。 韶以光進 前後 中呼光進 軍 人 夙 皆數 中之 有 誠

事。 日:「新婦逮 母卒,光進始娶。 光進 兄弟少以孝睦推於軍中。 事母,嘗命以主家,不可改也。」因相持泣良久,乃如初。 光顔 (使其妻奉管籥、家籍、財物,歸于其姒。 及居母喪,三年不歸寢室。 光顏先娶妻, 光進命反之,且謂 卒時年六十五,贈 其母委以家 尚書 光顏

左

僕射。

是稍稍知名。 長,從河東軍 光颜 與兄光進以葛旃善騎射,兄弟自幼皆師之,葛旃獨許光顏之勇健,己不能逮。 爲裨將 自憲宗元和已來,歷授代、洛二州刺史、兼御史大夫。九年,將討准、蔡,九月, ,討李懷光、 楊惠琳皆有功。 後隨 高崇文平蜀 ,搴旗斬將,出入如神,由 及

遷 陳 州 刺 史,充忠 武 軍 都 知 兵 馬 使。 踰 月, 遷 忠武軍節 度使、檢校 工部 尚書。

如蝟。 數千人。 自 水 知義,終不辱命。 1毁其 抗 會 洄 (栅之左 其子攬光 朝 曲 廷 捷聲至京 徵天下兵, 明年 右 顏 ,出騎以 至是,果立功焉 五 師,人人相賀。 馬鞅,止其深 一月, 環中、 突之。 破元濟之師 蔡 而 光顔 入,光顔 討 時伐蔡之師,大小凡十餘鎭,自裴度使還,唯奏光顏 吳元 將數騎 於 時 舉刃叱之,乃退。 濟, 曲 冒堅而 詔 初,賊衆晨壓光顏之壘而 光颜 衝之,出入者數四,賊衆盡 以 本 窜 於是人爭奮 獨當 面 躍 光顏 陣,光顔 「

賊乃大潰 於是引兵臨澱 識 不得出 矢集於身 勇而 死 者 乃

罪, 光顔 使景 溵 弘 但 光顔 橋 令諸 一年,光顔 令 是歲 忠 違令,取穎及朝隱將戮之。 賊之堡也 卽 信至, 軍齊攻賊城, 以其襲賊有 往釋 十一月, 連 穎 知其情, 乘其 敗元濟之衆,拔賊 及朝隱 光顏 功,亦 無備,使田 賊又徑攻烏 又與懷汝節度烏重胤同破元濟之衆於小溵河, 乃矯詔、 可宥之。 弘及光顏迭以表論 令所 穎 題及朝隱 重胤 凌 、宋朝隱襲 軍有三令五 雲棚 在械 之壘。 繁之。 憲宗 勇而 而 重胤禦之,中數 大悅, 一中,宜 材,軍 取之, 乃平其城 憲宗 走馬 謂 入見, 捨 中皆惋惜之。 賜其 弘 此以 使日:「 告捷者奴婢銀 具以本· 收來效。 槍 塹, 穎等違都統令, 馳請 末聞 由 光顏畏弘 〕及以韶 救於 是 平其 克救 錦。 憲宗 光颜 栅。 重 進位 諭 不 ·敢留。 胤 赦忠信矯詔 弘 初, 固當處死。 光顔 檢校尙 弘 都 韓 不悅。 統韓 會中 以 弘 以 小

左僕射

戈,列于門內,光顏受降,乃入羅城,其城自壞五十餘步。 時當以城降。」光顏從之,賊果敗走。於是昌齡執印,帥吏列于門外,懷金與諸將素服倒 州,如不屈而降,則家盡屠矣。請來攻城,我則舉烽求救。救兵將至,官軍逆擊之必敗,此 昌齡母素誠其子令降,昌齡因此勸懷金歸款于光顏,且曰:「城中之人,父母妻子皆質于蔡 顏許之,而收郾城。 千匹,器甲三萬聯,皆畫雷公符,仍書云:「速破城北軍。」尋而郾城守將鄧懷金請以城降,光 十二年四月,光顏敗元濟之衆三萬于郾城,其將張伯良奔于蔡州,殺其賊什二三,獲馬 初,鄧懷金以官軍圍靑陵城,絕其歸路,懷金懼,謀於郾城令董昌齡。

|颜受國家恩深,誓不與逆賊同生日月下。 今戰卒數萬,皆背妻子,蹈白刃,光顏奈何以女色 焉。」詰朝,光顏乃大宴軍士,三軍咸集,命使者進妓。妓至則容止端麗,殆非人間所有,一座 萬,命使者送遺光顏,冀一見悅惑而怠於軍政也。使者卽齎書先造光顏壘曰:「本使令公德 遂舉大梁城求得一美婦人,教以歌舞絃管六博之藝,飾之以珠翠金玉衣服之具,計費數百 公私愛,憂公暴露,欲進一妓,以慰公征役之思,謹以候命。」光顏曰:「今日已暮,明旦納 時韓弘爲汴帥,驕矜倔強,常倚賊勢索朝廷姑息,惡光顏力戰,陰圖撓屈,計無所施。 光顏乃於座上謂來使曰:「令公憐光顏離家室久,捨美妓見贈,誠有以荷德也。

席 爲 樂? 上 而 迴 言訖 謂 使 ,涕泣嗚咽。 者日 「爲光顔 堂下兵士數萬, 多謝令公。 光顔 皆感激流涕。 事君許國之心,死 乃厚以縑帛酬其來使,俾領其妓自 無貮矣! 自 此 兵衆之心,

彌加激勵。

蔡州 萬餘 幾陷 。 戰 於前 矣。 布 人,皆解甲投戈 ,拔之,獲元濟。 及 裴 以却 文 是月, 先扼其溝 度 之。 至行營,率賓從於方城沱口觀板築, 賊 時光顔 知 中歸 講命。 光颜 董 重 路, 預 質棄洄 勇冠諸將, 慮其來,先使田布以二百騎伏於溝 賊平 賊多棄騎越溝, 一,加 曲 檢 軍,入城降懲。 乃悉其 \\ 校司 空。 相牽 衆出當光顏 五溝賊遽至, 上墜壓而 光顔 知之, 之師。 死者千餘人。 中, 注弩挺刃, 躍馬入賊營,大呼以降,賊衆 時李愬乘其 出賊 不意交擊之, 是日微光顔之教,度 勢將及度, 、無備,急引兵襲 度方獲 光顔 決

朝廷 十三年春 東 討 李 命中官宴光顔於居第, 師道,授光顏 義 成 軍節度使。 賜芻米二十餘車。 至鎭, 尋赴行營。 憲宗又御麟德殿召對,賜金帶錦 數旬之內,再敗賊軍於濮

陽,殺戮數千人,進軍深入。

貪猥侵撓党項羌, 勾當修築鹽州 + 四年 西蕃 城使, 乃引吐蕃 入寇,移授邠寧節度使。 仍許以陳許六千人隨赴邪寧。 入寇。 及蕃軍攻涇州 時鹽州爲吐蕃所毀,命李文悅爲刺史,令光顏 邊將郝玼 是歲, 吐蕃侵涇原。 血戰始退(三)。 自田縉鎭夏州 初, 光顏聞賊攻 以

涇州 辺 此, 此 料 何 兵 人 赴 也 救 」憤聲恟恟不可 喧然日:「人給五十千而不識戰陣,彼何人也 遏。 光顏素得士心,曲 爲陳說大義 ! 常額衣資不得而 言發涕流,三 一軍感之, 前蹈

亦泣

一下,乃欣然即

路,擊賊退之。

長慶 |寺, 平 以 |宗 營諸軍節度 即位 章 光顏昔鎭陳許 穆宗御通化門臨送之,賜錦綵、銀器、良馬、玉帶等物。二年,討王廷凑,命光顏 卽前 以其鄰賊之郡,可便飛輓。 初 事 穆宗即位 . 正 遷鳳翔節度使,依前檢校司空、同中書門下 功悉棄,乃懇辭兼鎭。 穆宗以光顏功冠諸將, 拜 使。 司 一,就加特進,仍與一子四品正 徒。 光顏旣受命而 ,頗得土心,將討鎭、冀, 行,懸軍討賊,艱於饋運,朝廷又以滄、景、德、棣等州 尋以疾作,表祈歸鎮。 光顔 故召赴闕 以 ,朝廷制置乖方, 故有此拜。 員官。 讌賜 優給。 **尋韶赴闕,賜開化里第,進加同中書門下** · 平章 赴鎭 朝廷果討賊無功而赦廷湊。 賊帥連結, 未可朝夕平定, 事。 已而 日, 帶平 歲末,復授許州節度使。 宰相 -章復鎭 百僚以 故事 所以報 送別 兼 四年 勳 深州 於章 事若 俾之 臣 朝廷 一,做 也。 差 兼 敬

υĝ 廢朝三日, 汴州 河 東 李介逐其帥叛, 節 度使, 贈太尉 進階開 ",諡曰忠。 詔 府儀 光顔 同三司, 率陳許之師討之。 仍於正 |衙受册司徒兼侍中。 營于尉氏,俄而誅於。 二年九月卒,年六十 遷太原 尹、

時神策行營吐突承璀與從史軍相近,承璀與重胤謀,縛從史於帳下。 於樹,鬱食至死,將絕猶呼其夫曰:「善事烏僕射。」其得人心如此 至元濟誅。 重胤壓境,仍割汝州隸河陽。自王師討淮西三年,重胤與李光顏掎角相應,大小百餘戰,以 無敢動者。 重胤,潞州牙將也。元和中,王承宗叛,王師加討。 就加檢校尚書右僕射,轉司空。蔡將有李端者,過數河降重胤。 憲宗賞其功,授潞府左司馬,遷懷州刺史,兼充河陽三城節度使。會討准、蔡,用 路帥盧從史雖出軍 是日,重胤戒嚴 其妻爲賊束縛 ,而密與 賊通 潞 軍

略可見。 法制修立,各歸名分。 威福故也。 思明之姦,豈能據一州爲叛哉?所以河朔六十年能拒朝命者,祇以奪刺史、縣令之職 又景州本是弓高縣,請却廢爲縣,歸化縣本是草市,請廢縣依舊屬德州。」韶並從之。 元和十三年,代鄭權爲橫海軍節度使。 蓋刺史失其職,反使鎭將領兵事。 臣所管德、棣、景三州,已舉公牒,各還刺史職事訖,應在州兵, 若刺史各得職分,又有鎭兵,則節將雖有 既至鎮,上言曰:「臣以河朔能拒朝命者, 並令刺史收管。 豫山 ,自作

及屯軍深州, 列 一百 一十 一 重胤以朝廷制置失宜,賊方憑凌,未可輕進,觀望累月。 鳥 胤 王 帲 穆宗急於誅叛

蓋望不勞師而底定。制出旬日,重胤卒,贈太尉。 命,欲以重臣代,乃移鎭兗海,加太子太師、平章事,俾兼領滄景節度(1),仍舊割齊州隸之, 天平軍節度、軍曹濮等州觀察等使。 **遂以杜叔良代之,以重胤檢校司徒,兼興元尹,充山南西道節度使。** 李同捷據滄州,請襲父位,朝廷不從。 召至京師,復以本官爲 議者慮狡童拒

僚,禮分同至,當時名士,咸願依之。身歿之日,軍士二十餘人,皆割股肉以爲祭酹,雖古之 名將,無以加焉 重胤出自行間,及爲長帥,赤心奉上。能與下同甘苦,所至立功,未嘗矜伐。 而善待賓

子漢弘嗣,起復授左領軍衞將軍。 漢弘上表乞終服紀,文宗嘉韶從之。 服闋,方授官。

加等。 昌裔總統其軍,賜沛手詔,令護稅之子赴上都。 謀,密告監軍,因盡擒其黨於伏匿之所。監軍范日用以其事聞,德宗乃以陳許行軍司馬 及脫卒,子壻田偁迫脅脫子,欲邀襲位,懼監軍使不順其事,將結謀伏兵以圖之。 王沛,許州人。年十八,有勇決。 但昌裔所奏,祇請加監察御史,朕意殊爲不足。 許州節度使上官稅奇其才,以女妻之,署爲牙門將。 既至,召見,德宗謂之曰:「據卿忠義,寵宜 卿速歸,便宣付昌裔,更令奏來。」遂 沛竊知其 劉

馹 騎而還,未至 一許州,拜開府儀同三司、兼御史中丞,依前本職

賊喉而 將 鄧懷 連 吳元 破蔡寇。 成城。 金 率衆 濟反, 自是 面縛而降。 頻韶 李光 進 河陽、宣武、太原、魏博等軍繼渡,掎角進攻郾城。 顏 軍 受命攻討, 蔡賊平,沛隨李光顏 諸將觀望,無敢先渡澱河。 奇沛節概, 入朝, 署行 營兵馬使, 光顏具陳沛功,加御史大夫。 沛率兵五千,夜渡溵河合流口 別統勁兵屯于近郊。 | 沛先結 **壘與賊對,賊** 及軍 徑扼

校右散 期 退 吐蕃。 年大理 旣 騎常侍,遷兗海沂密節度、觀察等使。此邦新造,人情獷鶩,沛明申法令,選蒐軍政, 還 鎭 以 明年, 功加寧州刺史,遷陳州。 ,光顏受詔討 改檢校工部尙書, | 郷窓。 及李師道 充忠武軍節度、陳許察觀察等使。卒于鎭,贈右僕射。 李介反,韶沛兼忠武節度副使,率師討次。 一誅,詔分許州兵戍于哪,以沛爲都將, 救 |外平,加檢 鹽州

子逢。

之,逢 劉沔破迴紇于天德。 屯翼城,代田令昭。 逢 日:「健兒向前冒白刃,若無功而賞,其如冒刃者何?」王宰攻劉稹,逢領陳許七千人 少沉勇,從父征伐有功,爲忠武都知兵馬使。 賊平, 性果決,用法嚴。 檢校左散騎常侍。 其時有二千人不上陣,官賜賞給,逢皆 累遷至忠武軍節度、陳許觀察等使。 大和中,入宿衞,歷諸衞將軍。從石雄 **元與。**

第一百一十一 王沛 李珙 李祐

列

傳

詣澤潞謁李抱眞,異之,將選爲衙門將,旋以酒酣使氣,復欲棄之。 都將王虔休謂抱眞曰: 李珙,山東甲姓,代修婚姻。至珙,不好讀書,唯以弓馬爲務。長六尺餘,氣貌魁岸。嘗

然朝廷以與從史厚善,竟出爲北邊一校。元和十年,征淮西,重胤懇表爲諸道行營都虞侯, <u></u>珙初不知,將救從史。聞重胤受朝旨,乃觀望不進,重胤以此德之。 後領河陽,乃置於麾下。 詔特從之,俄以母憂去職。服闋,除右武衞上將軍。長慶四年八月本,年六十四,廢朝一日。 「李珙,奇士也,若不能用,不如殺之,無爲他人所得。」 抱眞死,虔休爲帥,乃依虔休,累爲昭義大將。吐突承璀之擒盧從史,烏重胤實預其謀,

憚之。

元和十二年,爲李愬所擒。 往往帳中密語,達曙不寐。人有耳屬於外者,但屢聞「祛感泣聲。而軍中以前時爲「祛殺傷者 多,營壘諸卒會議,皆恨不殺酤。 李祐,本蔡州牙將。事吳元濟,驍勇善戰。自王師討准西,祐爲行營將,每抗官軍,皆

以 憲宗特恕,遂遣祐賜愬。愬大喜,即以三千精兵付之。祐所言,無有所疑,竟以祐破蔡,擒元濟。 功授神武 將軍,遷金吾將軍、檢校左散騎常侍、夏州 刺史、御史大夫、夏綏銀宥節 度使。

李同 捷,遷檢校戶部尚書、滄州刺史、滄德景節度使。 寶曆初,入爲右 大和三年五月卒。

金吾大將軍。

尋以

吐蕃入寇,出爲涇州

刺史、涇原節度使。

大和初,計

郾城 降,請免之,且乞於本軍驅 慨然以單騎 在察,愬乃安卹之,仍使其子持書禮以召重質。重質見其子,知城已陷,及元濟囚窘之狀,乃 又爲謀主,領 ,元濟乃悉發左右及守城之卒,委重質而拒度。 董 重質,本准 歸鄉, 大軍當王師,連歲不拔,皆重質之謀也。 西牙將,吳少誠之子壻也。 白衣叩伏,愬揖登階,以賓禮與之食。 使。 於是,貶春州 司 性勇悍, 藏軍機, 善用兵。 戸參軍。 時李愬乘虛入蔡,旣擒元濟,重質之家 元和十二年,宰相裴度督兵淮西,至 憲宗欲殺之,愬奏許以不死而來 及元濟拒命,重質

西川 知 軍 事 行營節度 明 年,轉太子少詹事,委武寧軍收管驅使,仍加金紫。 兼 御史中丞。 使、檢校左散 仍賜金帛, 騎常侍。 與有功者等。 大和四年, 又轉夏綏銀宥節度使。 尋授鹽州刺史,又遷左右神策及諸道劍南 十五年,徵入,授左神武軍將軍 五年, 就加檢校工

列

儜

第

百

+

鳌 重

質

樼

元 卿

部尙書。 重質訓兵立法,羌戎畏服。 八年八月卒,贈尙書右僕射。

李吉甫深加慰納,自是一歲或再隨奏至京師。 見,署以劇縣,旋辟爲從事,奏授試大理評事。 冠,尙漂蕩江巓之表,縱遊放言,人謂之狂生。 楊元卿,祖子華,德州安陵縣丞。父寓,申州鍾山縣令。 時吳少誠專蔡州,朝廷姑息之。 元卿每與少陽言,諭以大義,乃爲凶黨所構, 亦事少陽,後奏轉監察裏行。 元卿少孤, 慷慨有才略。及 因上奏,宰相 元卿白衣謁

賴節度判官蘇肇保持,故免。 元卿潛奉朝廷,內耗少陽之事。

奏,潛請詔諸道拘留使者。及元濟覺,元卿妻陳氏幷四男並爲元濟所殺, 矣。元卿願將留後表上聞,朝廷安得不從哉?」元濟許之,元卿卽日離蔡,以賊勢盈虛: 府中有無,元卿熟知之,曷若散聘諸道,卑辭厚禮,以丈人行呼羣帥,庶幾一助,而諸將大獲 及少陽死,其子元濟繼立,元卿說曰:「先尙書性吝,諸將皆飢寒。 韶授元卿岳王府司馬, 尋遷太子僕射。 今須布惠以自固也。 同圬一射垛。蘇 條

愬會議,於唐州東境選要便處,權置行蔡州。 肇以保持元卿,亦同日被害。 元和十三年,授蔡州刺史、兼御史中丞。 未行,改授光祿少卿。 如百姓官健有歸順者,便準敕優恤,必令全 初,朝廷比令元卿與李

安,則 卿 活。 功 成 奏曰:「淮西甚有寶貨及犀帶,臣知之,往取必得。」上曰:「殷本討賊,爲人除害,今賊平人 旣 在 我求之得矣。 而 日 召見, 暮,如更分土地與元卿, 元卿遽奏請借度支錢, 寶貨犀帶,非所求也, 即恐相侵 及言事頗多不合旨。 勿復此言。」是月,詔授左金吾衞將軍。 生事, 故罷前命 而改授焉。 宰相裴度亦以諸將討賊三年, 是歲,旣平淮 未幾,改

汾州

刺史,復徵爲左金吾衞

將

軍

玉

等使。 是歲 帶, 營田 太子太保。 至好聚斂,善結交,涇人得情,亦由 奏置屯田五千頃 旋授檢校 成 ,改授汴宋亳觀祭等使。 長 (慶初, ()復加: 大和 五年, 是歲八月卒,廢朝 使號。 易置鎖 左散騎常侍、 就加檢校 每屯築牆高數仞, 居六年,涇人論奏,爲立德政碑,移授懷州刺史,充河陽三城節度觀察 魏守臣, 涇州 司空,進階光祿大夫, 三日 凡所廢置 元卿詣宰相深陳利害, 丼具表其事。後穆宗感悟, 刺 1,贈司 此 史、 也。 鍵閉牢密, 涇原渭節 度觀察等使, 「,皆有弘益, 韶並從之。 徒。 元卿始以毀家効順,累授方鎭。 以其營田 卒然寇至,盡可保守。 納粟二十萬石,以裨經費故也。 兼充四鎮 年七十,寢疾,歸洛陽,韶授 北庭行軍。 加檢校工部尙書。 然性險巧,所 賜白 元卿乃

誅 之。 子 延宗,開成中爲磁州 刺 史,坐謀逐河陽節度使以自立,爲其黨所告,臺司推鞫得實,

列 傳 百 + 協 元 卿 劉

悟

劉悟, 正臣之孫也。 正臣本名客奴。 天寶末, **豫山叛,平盧軍節度使柳知晦受賊僞**

署(語),客奴時職居牙門,襲殺知晦,馳章以聞,授平盧軍節度使,賜名正臣。

師古,師古奇而免之,因令管壯士,將後軍,累署衙門右職,奏授淄青節度都知兵馬使、兼監 亡歸李師古。 悟少有勇力,叔逸準爲汴帥,積緡錢數百萬於洛中,悟輒破扃鐍, 始亦未甚知,後因擊毬馳突,衝師古馬仆,師古怒,將斬之。悟猛以氣語押觸 悉盜用之。旣而懼,

祭御史。

出戰必敗,不出則死。 進,馳使召之。 擢 立斬其使,以兵取軍,圍其內城,兼以火攻其門。 如殺其來使,整戈以取|鄆,立大功,轉危亡爲富貴耶! 「奉命殺悟以代悟。」都虞候卽時先還,悟劫之得其實,乃召諸將興謀曰:「魏博田弘正兵強, 拜悟檢校工部尙書、兼御史大夫、義成軍節度使,封彭城郡王,仍賜實封五百戶,錢二萬 元和末,憲宗旣平淮西,下詔誅師道,師道遣悟將兵拒魏博軍,而數促悟戰。 悟度使來必殺己,乃僞疾不出,令都虞候往迎之。 使者亦果以誠告其人云: 今天子所誅者,司空一人而已,悟與公等皆爲所驅迫,使就其死。 不數刻,擒師道幷男二人,並斬其首以獻。 」衆咸曰:「善,唯都將所命! 悟未及 何

貫,莊、宅各一區。 十五年正月入覲,又加檢校兵部尚書,餘如故。

其 路 往奏章論事,辭旨不遜。 矣。」軍衆因亂,悟不止之,乃擒承偕至牙門,殺其二僕,欲丼害承偕,悟救之獲免。朝廷不 下大臣議。 獲已,貶承偕。 下亂法,悟 度, 拜檢 事 慶元年,幽州大將朱克融叛,囚其帥張弘靖,朝廷求名將以鎭漁陽,乃加悟檢校司空、平章 一、充盧 一曲爲 校司徒,兼太子太傅,依前平章事。 龍軍節度使。 郊即位 奏請。 不能平。 僕射李絳以澤潞內地,與三鎭事理不同,不可許。 自是悟頗縱恣,欲効河朔三鎮。 以恩例遷檢校尙書右僕射。 異日有中使至,承偕宴之,請悟,悟欲往。 悟以幽州方亂,未克進討,請授之節鉞,徐圖之,乃復以悟爲澤潞節 寶曆元年九月病卒,贈太尉。 時監軍劉承偕頗恃恩權,常對衆辱悟,又縱其 是歲 朝廷失意不逞之徒,多投寄潞州以求援。往 十月,移鎭澤潞,旋以本官兼平章事。 遺表請以其子從諫繼纘戎事。 左右皆曰:「往則必爲其困辱 宰相李逢吉、中尉王守澄受 敬宗

節度等使。 夫, 充昭義節度副 從諫自將作監主簿,起復雲壓將軍,守金吾衞大將軍同正、檢校左散騎常侍、兼御史大 文宗即 大使,知節度觀察等留後。 位,進檢校司空。 六年十二月入觀,七年春歸藩,加同中書門下平章事。 二年,加金吾上將軍、檢校工部尚書,充昭義

列

九年 間,旣死非其罪, 是時中官頗橫,天子不能制,朝臣日憂陷族,賴從諫論列而鄭覃、李石方能粗秉朝政。 李訓 事 敗 從諫素德涯之私恩公,心頗不平,四上章請涯等罪名,仇士良輩深憚之。 宰相王涯等四人被禍。 時涯兼掌邦計,雖不與李訓同謀,然不自異於其

恃。 若含垢於一時,終取笑於千古。 時屬蕭本得爲外戚,來自左軍,臺司旣不敢研窮,聖意遂勒還鄉里。自茲議論,轉益沸騰。 弘 皆言蕭弘是眞,蕭本是僞。 潞府飛章論之曰:「臣聞造僞以亂眞者,匹夫知之尙不可,況天下皆知乎?執疏以爲親者, 見金吾將軍蕭本稱是太后親弟,受此官榮。 皇帝陛 在匹夫之家尙不可,況處大國之朝乎?臣受國恩深,奉公心切,知有此失,安敢不言?伏唯 之志,士良怒,遣人上書論洪非太后之親,又以蕭本者爲太后弟。 投臣當道,求臣上聞,自言:比者福建觀察使唐扶及監軍劉行立具審根源,已曾論奏。其 亦令潛問 伏以名居國舅,位列朝班 先是有蕭洪者,詐稱太后弟,因仇士良保任,許之厚賂。 下仁及萬方,孝敦九族,而推心無黨,唯理是求。 左軍,権論 大體,而士良推至公之道,發不黨之言。 臣傍聽衆論,偏祭羣情,咸思發明,以正名分。今年二月,其蕭 ,而眞僞不分,中外所恥。切慮皇太后受此罔惑,已有恩情, 伏乞追蕭弘赴闕,與蕭本對推,細詰根源,必辨眞僞。」詔令 今喧然國都,迨聞藩府, 自上及下, 異口同音, **微臣所以不避直言,切論深事。 伏** 及洪累授方鎮,納路不滿士良 蓋蕭本自度孤危,妄有憑 從諫深知內宮之故,乃自

4

三司使推按。 帝以二蕭雖詐,託名太后之宗,不欲誅之,俱流嶺表。 從諫進位檢校

會昌三年卒。

隨護喪歸洛,以聽朝旨。

複竞叛。

德裕用中丞李回奉使河朔,說令三鎭加兵討緝, **輝官,命徐許滑孟魏鎭幽抖八鎭之師,四面進攻。** 大將郭誼等匿喪,用其姪旗權領軍務。時宰相李德裕用事,素惡從諫之姦回, 四年,郭誼斬頹,傳首京師 乃削奪 奏請劉

能已也。」諸婦亦泣下,故潞將叛志益堅。 斶死,裴亦以此極刑。 曰:「新婦各與汝夫文字,勿忘先相公之拔擢,莫効李丕背恩,走投國家。 從諫妻裴氏。初,頹拒命,裴氏召集大將妻同宴,以酒爲壽,泣下不能已。 **뛚族屬昆仲九人,皆誅。** 子母為託,故悲不 諸婦 **清**命, | 裴

洒聽銳善騎射,每與騾軍接戰,必冒刃陷堅,俘馘而還,故忠武一軍,破賊第一。准、蔡平,隨 光顏入朝,憲宗留宿衞,歷三將軍。 蔡將有董重質者,守洄曲,其部下乘驟卽戰,號「騾子軍」,最爲勁悍,官軍常警備之。 劉沔,許州牙將也。少事李光顏, 歷鹽州刺史、天德軍防禦使,在西北邊累立奇効。 爲帳中親將。 元和末,光顏討吳元濟,常用沔爲前

河西党項羌叛,沔以天德之師屢誅其酋渠, 移授振武節度使,檢校右散騎常

傳第

協力 統部飢, 三千騎, 單于大都 控扼諸戎,乃移沔河東節度使、檢校尙書左僕射、太原尹、北京留守。 《招撫迴鶻,竟破虜寇,迎公主還宮。 以功進位檢校司空,尋改滑州刺史、 徑至銀、夏討襲,大破之,俘獲萬計,告捷而還。以功加檢校戶部尙書。 烏介可汗奉太和公主至漢南求食(t)。過杷頭峯, 犯雲、朔、北川。 護。 開成中,党項雜虜大擾河西,沔率吐渾、契苾、沙陀三部落等諸族萬人、馬 韶與幽州張仲 朝廷以太原 。會昌初, 義成軍節 武 度 迴

州 仲武不協,方徵兵幽州,乃移沔爲鄭滑節度使,進位檢校司徒。 節 度李彦佐等,充潞府西南面招撫使,遂復授沔太原節度,充潞府北面招討使。 四 年,潞帥劉從諫卒,子稹匿喪,擅主留務,要求旌鉞。武宗怒,命忠武節度使王宰、徐 既而以疾求歸洛陽,授太子 | 沔 典 張

四。 五年,李德裕出鎭,罷沔爲太子太保。 此 而還。」旣行,炯然有雙光在前。 **瞥**傷重臥草中,月黑不知歸路,昏然而睡,夢人授之雙燭,曰:「子方大貴,此行 初,沔爲忠武小校,從李光顏討淮西,爲捉生將。 明年,以太子太保致仕卒。 自後破虜危難, 前後遇賊血戰, 每行常有此光。 鋒 及罷鎭後,雙光息。 刃 ?所傷, 幾死 無 患 者數 可

師 軍。 ,授壁州 欲逐之而立 自智 石 雄 興 刺史。 徐州 以兵臨 雄。 牙校也。 智興尋殺雄之素相善諸將士百餘 賊境,率先收棣州 智興以軍 王 智興之討李同捷, 一在賊境 雄先驅 懼其 變生, 渡河,前, 以雄爲右 因其 人, 無 仍奏雄搖動 立 廂捉 堅 一功, 陣。 生兵 請授 徐人伏雄 〈馬使。 軍情, 郡刺 之撫 勇敢 請行 史。 善善 待, 誅 朝 戰, 戮。 悪 廷 徴 氣 智 興之 赴 凌三

宗 以 智興故,未甚提擢,而 大和 中 河西党項擾亂,選求武士,乃召還, 李紳、李德裕以崔羣舊將,素嘉之。 隸振武劉沔軍 爲裨將,累立 破羌之功。 文

雅

知

其能,惜之,乃長流白州。

邑 今觀其所爲,氣凌我輩。 **沔以太原之師屯於雲州** 類 亦無患也。」雄受教,自選勁騎 健,乘其不 華人服 徑趨烏 會昌 飾。 初 介之牙。 意,徑趨虜帳,彼以疾雷之勢,不暇 迴鶻寇天德,昭命劉沔爲招撫迴鶻使。 雄令諜者訊 時虜帳逼 若稟朝旨,或恐依違。 沔謂雄曰:「點虜離散,不足驅除。 之:「此何大人?」虜曰:「此公主帳也。」雌喻其人曰:「國家兵馬 振武,雄 ,得沙陀李國 旣 入城,登堞視其衆寡 昌 收枝梧, 三部落,兼契苾拓拔雜虜三千騎,月暗夜發馬 我輩 三年,迴鶻 必棄公主亡竄。 捍邊,但能除患 ,見氊車數十,從者皆衣朱碧, 國家以公主之故, 大掠雲、朔北邊,牙 ,專之可也。 事 荷不捷,吾自繼進 不欲急攻。 公可選驍 於五

列

傳

介牙帳。 欲取 及大 斬首萬級, ·可汗。 鼓,夜穴城爲十餘門。 炬火燭天,**鼓**譟動地,可汗惶駭莫測,率騎而奔。 雌率勁騎追至殺胡山,急擊之, 生擒五千,羊馬車帳皆委之而去。遂迎公主還太原。以功加檢校左散騎常侍、 公主至此,家國也,須謀歸路,俟兵合時不得動帳幕。」雌乃大率城內牛馬雜畜 遲明,城上立旗幟炬火,乃於諸門縱其牛畜, 鼓譟從之, 直犯鳥

分, 餘並分給,以此軍士感義,皆思奮發。 雄沉勇徇義,臨財甚廉。 每破賊立功,朝廷特有賜與,皆不入私室,置於軍門,首取一 累遷檢校左僕射、河中尹、河中晉絳節度使。

豐州

刺史、兼御史大夫、天德防禦等使。

以 市,謂人曰:「雄七千人至矣。」劉從諫捕而誅之。及稹危蹙,大將郭誼密殼請斬隨歸朝,軍 嶺 以 中疑其詐。 率先破賊, |狂人之言,詔雄以七千兵受降。 雄即徑馳潞州降誼,盡擒其黨與。 賊平,進加檢校司空。 ,破賊五砦,斬獲千計。 晉州刺 俄 而 史李丕爲副。時王宰在萬善棚, 昭義劉從諫卒,其子概擅主軍務,朝議問罪,令徐帥李彦佐爲潞府西南面招撫使, 智興之子,於雄不足,雄以轅門子弟善禮之。然討潞之役,雄有始卒之功,宰心 不旬日,王宰收天井關,何弘敬、王元逵亦收磁洺等郡。先是潞州狂人折腰於 雄倡言曰:「賊頹之叛、郭誼爲謀主。 武宗聞捷大悅,謂侍臣曰:「今之義而有勇,罕有雌之比者。」雌旣 劉沔在石會,相顧未進。雌受代之翌日, 今請斬旗,即誼自謀,又何疑焉?」武宗亦 越鳥

惡之。 及李德裕罷相,字黨排擯雄、罷鎮。旣而聞德裕貶,發疾而

効也。 乎! 邀纘襲,至於赤族,報亦晚耶!雌、沔負羽邊城,聲馳沙漠,奉迎貴主,摧破昆戎,不亦壯 僚壻,李祐之執賊渠,皆因事立功,轉禍爲福,智則智矣,仁者不爲。而劉悟自恃太尤,世 而阿跌昆仲,稟氣陰山,率多令範,讓家權於主婦,拒美妓於姦臣,章武恢復之功,義師之 雄能感於知己,不爲無義,美哉 史臣曰:古所謂名將者,不必蒙輪拔距之材,拉虎批熊之力,要當以義終始,好謀而成。 重胤忠於事上,仁於撫下,淮、蔡之役,勳亞光顏,殿邦之臣也,不可多得。 王沛之擒 !

贊曰:淮、郿砥平,義將輸誠。 二凶受縛,亦其同惡。毀義棄忠, 必殄爾宗。 孰稱善

校勘記

列傳第

百一

+

校勘記

將?

劉沔、石雄。

肅宗自靈武觀兵 …… 觀者如堵 七年,其不及從郭子儀 破賊也明矣。 殿本考證葉酉說:「按肅宗去憲宗,閱世者五, 此乃光酮弟光進事,錯簡於此。」今考本書卷一一〇字光酮 光進薨于元和

四二三七

傳,此處敍事與光弼弟光進事多合,葉說或是。

王承宗反 「反」字各本原無,校勘記卷五 四說:「閣本『宗』下有『反』字。 考證云"刊本脫『反』

字,據新唐書帝紀增。」據補。

3 郝玼 「玼」字各本原作「玭」,據本書卷一五二級班傳改。

乃移鎮兗海加太子太師平章事俾兼領滄景節度 冊府卷一二○作「遂命同捷移鎮克海,以重胤

羣帥中齒輩舊老,加太子太師、平章事,俾兼統滄景。」此處史文當有脫誤。

柳知晦 本書卷一四五劉全諒傳作「呂知晦」。

從諫素德涯之私恩 「從諫」,各本原作「悟」,據冊府卷四〇六改。

(七) 漠南 各本原作「漢南」,據冊府卷三八五改。

舊唐書卷一百六十二

列傳第一百一十二

潘 孟陽 高霞寓 李翛 王 高 逐 瑀 曹華 崔戎 章綬 陸亘 鄭 張正甫 權 盧 士玫 子毅夫 毅夬

子禪

議 鄓 潘孟陽,禮部侍郎炎之子也。 孟陽母,劉晏女也,公卿多父友及外祖賓從,故得薦用,累至兵部郎中。 孟陽以父蔭進,登博學宏辭科,累遷殿中侍御史,降爲司

望, 歷鎭 |貞 八內禪 財 罷爲 府 賦 德宗末, 王紹以恩倖, 數稱孟陽之材, 因擢授權知戶部侍郎, 年未四十。 ,王叔文誅,杜佑始專判度支,請孟陽代叔文爲副。 仍加鹽鐵轉運副使,且祭東南鎭之政理。 但務遊賞,與婦女爲夜飲。 大理 卿。 三年, 出為 華州刺 至鹽鐵轉運院,廣納財賄,補吏職 史,遷梓州刺史、劍南東川節度使。 時孟陽以氣豪權重,領 時憲宗新卽位 呵 Ę 與武元衡有舊, ,乃命孟陽巡江淮 行從三四百 順宗即位,永 及歸,大失人 所

列

第

百

_ + =

潘

盂

刄

李

四二三九

與孟陽不協,議以營田非便,持之不下,孟陽忿憾形於言。二人俱請對,上怒不許,乃罷孟 衡作相,復召爲戶部侍郎、判度支,兼京北五城營田使,以和糴使韓重華爲副。 太府卿王遂

陽爲左散騎常侍。明年,復拜戶部侍郎。

所計算。 問之,左右以孟陽對,孟陽懼而罷工作。性喜宴,公卿朝士多興之遊,時指怒者不一。俄以 已。」其爲人主所薄如此! 慰使,左司郎中鄭敬奉使,辭,上誠之曰:「朕宮中用度,一匹已上皆有簿籍,唯賑衈貧民,無 風緩不能行,改左散騎常侍。一元和十年八月卒,贈兵部尚書。憲宗每事求理,常發江淮宣 孟陽氣尙豪俊,不拘小節。居第頗極華峻,憲宗微行至樂遊原,見其宏敞,工猶未已, 卿經明行修,今登車傳命,宜體吾懷,勿學潘孟陽,奉使所至,但務酣飲、遊山寺而

絳州 民蒞事,粗有政能。 刺史。 李翛,不知何許人。起於寒賤,以莊憲皇后妹壻,元和已來驟階仕進。以恩澤至坊州、 無他才,性纖巧承迎。 上以爲才,召拜司農卿,遷京兆尹。 常飾廚傳以奉往來中使及禁軍中尉賓客,以求善譽。治

十年,莊憲太后崩,翛爲山陵橋道置頓使。 恃能惜費,每事減損。 靈駕至灞橋頓,從官

謁 刺 進奉,不之責 軸折,山陵使李逢吉令御 欲壞城之東北塘,以出 從,令深鑿軌道以 士,多遭 多不得食。 史、浙 m 卒。 西 一譖毁,義士爲之側 觀察使,令設法鳩聚財貨。 及至渭城 ,但罰俸而已。 通 靈 北門, 駕。 靈駕,中人皆不 史封其車軸,自陵還, 目。 門壞。 掘土旣深,旁柱皆懸,因 逢吉極言其罪 時宿師! 先是, 於野 可, 淮西用兵,頗賴其賦。 橋道 乃停駕, `,饋運 ,乃削銀 奏請免脩官。 司請改造渭城 不 集。浙 青階。 徹去壞門土木而 而 頓 壞,所不及輼輬車 西 翌日 重鎭 北門, 十四四 上以用兵務集 , 復賜金紫。 年, 號爲殷阜,乃以脩爲 計錢三萬 後行。 以病求還京師 者數 **像** 財 自此 賦 步 **翛以勞費不** 以 而 誣 翛 奏 朝 未 潤 輼 廷 前 端 州 後 輬 初

章行素、柳季常 軍使,言營田 鄧 丞 呂元 州 刺 王遂,宰相方慶之孫也。 史。 膺執奏曰:「途以 以曉達錢穀,入爲太府卿。 非便,與孟陽會議相 請課料於兩池務, 補 更犯 以更能聞於時, 尤長於興 贓 非,各求 屬 法當從坐。 遂罷務, 潘 請對。 孟 陽 季常等為 判度支, 其除官制云『淸能業官』 上怒, 吏所誣,各答四十。 與遂 俱不 利 見, 私 銳於操下, 法頗嚴 憾, 出遂爲 互 有 柳 爭 據 論 州 遂犯狀, 遂柳 刺 遂爲 酷。 史。 州 制出 不宜 遂親 累 四 遷 北 左 吏 供 至

列

儜

第

百

+

王

充淄青行營諸軍糧料使。 穀吏以集財賦 清字 柳州 ,知遂強幹,乃用爲宜州刺史、宜歙觀察使。淮、蔡平,王 大郡,出守爲優。 以光祿職當祠祭,改檢校左散騎常侍、兼御史大夫。 謹封還制書。」上令喩之,方行。 數年,用兵淮西,天子藉錢 師東討,召拜光祿卿

曹華 所據十二州爲三鎭, 乘人心怨怒,十四年七月,遂方宴集,弁譟集其徒,害遂於席,判官張實、李甫等同遇害。 州民吏,久染汚俗,率多獷戾,而逐數因公事訾詈將卒曰「反虜」,將卒不勝其 代遂 初,師之出也, 至鎭 **~**,盡 擒亂黨王弁等誅之。 歲計兵食三百萬石 乃以遂爲沂州刺史、沂兗海等州觀察使。 及鄆賊誅,遂進羨餘 百萬,上以爲能。 遂性狷忿,不存大體。 忿。 牙將王弁 時分師道 而

遂旣死,監軍使封其杖進呈,上令出示於朝 遂器用不弘,僻於聚斂,而非兼撫之才,但峻威刑,以繩亂俗。 ,以誠廉使。 其所製笞杖,率踰常制。

襄城 濟叛,朝廷命河陽帥烏重胤討賊。 成將 ,宋州楚丘人,仕宜武軍爲牙校。 蔡賊攻襄城, 華屢敗之, 德宗特 賜旗 甲。 重胤請華爲懷汝節度行營副使。 貞元末, 吳少誠叛, 元和 九年,以 本軍 功授寧州 以華 驍 前後數十戰,大破 果有智算,用爲 刺 史, 未 行 而

之曰:「吾受命廉問,奉聖旨,以鄆州將士分割三處,有道途轉徙之勞。 今有頒給,北州兵稍 州刺史、沂海兗觀察使。華至鎭,視事三日,宴將吏,伏甲士千人於幕下。羣校旣集,華喩 三鎭。 百人,立斬于庭,血流成渠。是日,門屛之間,有赤霧高丈餘,久之方散。自是海、沂之人, 卒曰:「天子深知鄆人之勞,然前害主帥者,不能免罪。」甲士自幕中出,周環之,凡1鄆一千二 厚口。鄆州士卒處右,州兵處左,冀易以區別。」分定,並令州兵出外。 補之軍卒,分據要路。其後,賊至皆擊敗之,鄆人不敢北顧。及李師道誅,分所管十二州爲 王遂爲沂兗海觀祭使,褊刻不能取衆,爲牙將王弁所害,朝廷遂授華左散騎常侍、沂 既出闔門,乃謂鄆

俎豆之容,春秋釋奠於孔子廟,立學講經,儒冠四集。出家財贍給,俾成名入仕,其往者如 年,人俗頑驚,不知禮敎。華令將吏曰:「鄒、魯儒者之鄉,不宜忘於禮義。」乃躬禮儒士 華惡沂之地褊,請移理於兗,許之。初,李正己盜有靑、鄆十二州,傳襲四世,垂五十

重足股慄,無敢爲盜者。

度(三),賜之節鉞。 及鎭州軍亂, 李齐叛於大梁,華不俟命赴討。於方遣兵三千人取宋州,華逆擊敗之。由 殺田弘正,華表請以本軍進討,就加檢校工部尚書,升兗海爲武寧節

傳第一百一十二 曹華 章綬

列

以河朔拒命,移華爲滑州刺史、義成

軍節度使。長慶三年七月,卒於鎭,時年六十九。

之以誠信,人以爲難。贈司空。 **華雖出自戎行,而動必由禮,尤重士大夫,未嘗以富貴驕人,下迨僕豫走使之徒,必待**

入侍,道綬語,憲宗不悅,謂侍臣曰:「凡侍讀者,當以經義輔導太子,納之軌物,而綬語及 此,予何望耶?」乃罷侍讀,出爲虔州刺史。 合全書。』」上益嘉太子之賢,賜綬錦綵。綬無威儀,時以人間鄙說戲言以取悅太子。 太子因 曰:「太子學書,至『依』字,輒去旁『人』。臣問之,太子云:『君父以此字可天下奏事,臣子不 好戲,綬講書之隙,頗以嘲誚悅之。嘗密齎家所造食,入宮餉太子。憲宗嘗召對,綬奏 屯田郎中。元和十年,改職方郎中,充太子諸王侍讀,再遷諫議大夫。 服乘驢赴奉天。于頔鎭襄陽,辟爲賓佐。嘗因言政,面刺頔之縱恣。入朝爲工部員外,轉 章綬字子章,京兆人。少有至性,喪父,刺血寫佛經。初爲長安縣尉,遭朱泚之亂,變 時穆宗在東宮,方幼

穆宗卽位,以師友之恩,召爲尚書右丞,兼集賢院學士,甚承恩顧,出入禁中。 殿以七

Á

江宴, 月六 不 敢 日 綬請 是穆宗 議。 與集賢學士別爲一 久之, 宰臣 載誕節,請以是日百官詣光順門賀太后,然後上皇帝壽。 奏 古無生 會,從之。 日稱賀 (之儀,其 長慶元年三月,轉禮 事終寢。 綬在集賢, 部尙書,判集賢院 遇重陽,賜宰臣 時政道 類解 車 百官曲 ,敕出

苟有 災以 卒能 德 知 變已變之災,享自致之福 帝嘗問:「禳災祈 ,當因以致譴,非祈 也。 漢文帝除祕配,每於祠祭,盡敬而 福 其 可 釀之道也。」時人主失德,授因以諷 ,著於史傳, 必乎?」授對曰:「昔宋景公以一善言而法星退之三舍, 其理甚明。 已,言無 所祈,以明福 如 失德以祈災消 之。 不可以求致也。 媚 神 以 祈 福 而 此 一,神 君 禳

當。 又訴家 博 士權 貧,請賜錢二 年十月,檢校戶部尚書、興元尹 二年八月卒, 安請諡爲「繆」,竟不施行。 百萬 贈尙 書右僕射, 又 面乞授子元弼 博 ア、山南 士劉端夫請諡爲「通」,殿中侍御史孟琯上言以爲非 官 西道 上 節 皆 度使。 可之。 辭 綬御 日, 請門戟十二, 事 無術 泊臨 自將赴鎭 戎鎭 庶政

軍 情 必變, 鄭 權 以權 祭陽開封 寬 厚容衆, 人也。 俾主留務。 登進 士第 及昌符上路, 釋褐涇原從事。 兵果亂,權 節度使劉昌符 挺 身入 白 病亟 刃中,抗辭喩以逆 〔三〕,請 入覲 度

列

倳

順, 李遜爲襄州刺史、山南東道節度使。 授官爵。自試衞佐擢授行軍司馬、御史中丞,入朝爲倉部郎中,累遷至河南尹。十一年,代 因殺其首亂者數人,三軍畏伏。 十二年,轉華州刺史、潼關防禦、鎭國軍使。十三年, 德宗聞而嘉之。時天子厭兵,藩鎭將吏得軍情者,多超

遷德州刺史、德棣滄景節度使。

降民。 宗奭方奔歸京師。 州兵留己,上言懼亂,未敢離郡,乃以烏重胤鎭橫海,代權歸朝。 會天德軍使上章論宗奭之冤,爲權誣奏,權降授原王傅,尋遷右金吾衞大將軍,充左街使。 時朝廷用兵討李師道,權以德、棣之兵臨境。奏於平原、安德二縣之間置歸化縣,以集 穆宗卽位,改左散騎常侍,充入迴鶻告哀使。憚其遠役,辭以足疾,不獲免 滄州刺史李宗奭與權不協,每事多違,不稟節制。 韶以悖慢之罪,斬於獨柳之下。其弟宗爽,長流汀州。 權奏之,上令中使追之。 滄州將吏懼,共逐宗奭 授權邠寧節度。 ,肩輿而行。 宗奭諷

權 器度魁偉,有辭辯。旣至虜廷,與虜主爭論曲直,言辭激壯,可汗深敬異之。

鎭守。 長 慶元年使還,出爲河南尹,入拜工部侍郎,遷本曹尙書。以家人數多,俸入不足,求爲 旬月,檢校右僕射、廣州 刺史、嶺南節度使。 初權出鎮,有中人之助,南海多珍貨,權

頗

積聚以遺之,大爲朝士所嗤。

四年十月卒。

總 職 願 轉 釋兵柄 盧 郞 中、 玫 入朝, 京兆 Ш 東 請用 少尹 右族,以文儒進。 張弘靖代己,復請 奉 憲宗 園 寢, 性端 刑 析瀛 簡 厚,與物 事 集,時論 莫 無競 兩 州 推 , (四),雅 用土致爲帥 其 有 才 有令聞。 權 知 京兆 朝 始爲 廷一皆從之。 尹 吏部員外郎 事 會幽 州 2 稱

遂授檢校右常侍,充瀛、莫兩州都防禦觀察使。

賓客,留司 政及從事皆被拘執, 者累月。 不足抗凶逆, 無 何,幽 竟以官軍 洛中,旋除虢州刺 州 卽 亂,害賓佐,繫弘靖,取裨將朱克融領 日 除士政檢校工部 ·救之不至,又瀛莫之卒親愛多在幽州 送幽州, 史,復爲賓客。 囚於賓館。 尚書,充瀛莫節度使。 及朝廷 寶曆元年七月卒,贈工 有克融 軍務,遺兵襲瀛、莫。 之罪, ,遂爲其下陰導克融之兵以潰。 士政 士政方得歸東洛。 亦罄家財 一部尚 書。 助軍 朝廷慮防禦之名 甪 堅 尋 7拜太子 拒 叛 徒 士

赴 在 鎭 長 武 韓 全義 城。 全義,出自行間, 貞元 貪 而 無 十三年,爲神策行營節度、長 勇、短 少從禁軍, 於撫御。 制 事竇文場。 未下,軍 武 中 及文場爲中尉,用全義爲帳 知之,相 城使,代 韓潭爲 與謀曰:「夏州 夏綏銀 沙 宥 一磧之地,無 節度,韶以 中偏將,典禁兵 耕蠶 長武 兵 生

列

傳

第

百

+

盧

士

致

韓

全

義

四二四七

等。

賴

都

虞候

高崇文誅其

亂首而

止之,全義方

獲赴

鎭

盛 夏 移 徙 吾所 不 能。」是夜, 戍卒鼓譟爲亂, 全義 踰 城而 死, 殺其親 將王栖巖、趙虔曜

滑將 良等保澱水縣。 之進 以 人十 長,能以 家恩貸。 未交,諸軍 四 告 歸本 面 監 時 數 退 明 行營招 昂 鍞 不 年 軍 紛然 巧 由 臣 , 侫 吳少誠 大潰 願 泂 唯 伏恐 主 討使,仍以 求 陽 陳許 爭論莫決。 財賄結中貴 將。 昭洗 將權文度、河中將郭湘等誅之, 爲賊 須開 賊距 十五 拒命,詔徵 將 孟元陽、 一般水五六里而 所 生路。」上然之。 陳許 德宗召大臣議,宰相 乘,全義退保五樓 年多,王 察賊聞之,屢求決戰。 人,以被薦用。 節度使上官稅副之。 十七鎭之師討之。 神策將蘇光榮等數千人守澱水。 師 爲賊 軍 ٠, 又 所敗于小溵河。 〈得監 全義懼其凌突,退保陳州。 及師臨 () 賊對 買耽 軍 由是軍情 時軍無統帥, 壘 等奏,即 賊境,又制 日「昨全義 十六 諸鎭 相望。 年 之師,皆取全義節度。 ·五月, 下 **德宗以文場素待全義** 稍 潰兵未集,乃與監軍賈英秀、 制洗 在監軍 固。 五 一樓退軍 兵無多少, 遇賊於溵水 少誠 全義 滌,加其 - , 每議兵出 誘潞州 其汴宋、 知 ·,賊不追 王 爵秩。 師 皆以內官監之,師 南廣利城。 無能 大將夏侯仲宣、 全義將 ,一帳之中,中 河北之軍 襲者 乃用爲蔡州 爲 1,應望 ,致書幣 略 賈 非所 旗 國 鼓 或

足疾 不任謁 十七七 年 全義 見。 自陳州 全義 司 馬崔放入對,德宗勞問 班 師,而 中人 、掩其 敗 迹 一、上待之如初。 放引過,言招撫無功。 全義武臣,不達 德宗曰:「全義爲招 朝儀 託

藩 賚 討 頗 常常 使,招得吳少誠歸國,其功大矣。 厚。 惡 其事。 自 還 至辭,都 及即位 不 全義懼 謁 見而 ,求入覲,詔以太子太保致仕。 去。 何必殺人乃爲功耶 議者以隳敗法制, !」旋命還鎮, 從古 其年七月卒。 還, 未 如貞元之甚。 令中使就第賜宴, 憲宗在 錫

以 旣 使。 授 拜 元 表 身冤。 承宗 小 彭 兼 中 其門閭 ·勝,又 州 霞寓 御 元 高 徒步 和 叉 刺 史大夫,從崇文將兵擊 坐貶 雖 十年, 史, 寓 造長 加左 進 鄕 稱 ,范陽人。 尋繼 至文城栅。 里 歸 勇敢,素昧機略, 《武城使高崇文,待以循子之分,擢授軍 散 稱 朝 州 騎常侍。 美其 崇文爲長武 廷討吳元濟, 刺 史。 祖仙,父栖鶴,皆以孝聞。凡五 事 賊軍僞 0 後以 明年 [[] [] [] 劉闢, 城使, 恩例, 至於統制 敗而 以霞寓宿將, 改豐州 少讀左氏春秋及孫、吳兵法, 退, 封感義郡王。 連戰皆克,下鹿 徴爲 尤尤 震寓 刺 右衞 史、三城 非 逐之不已, 乃析山 所長。 大將軍。 都 元 南 ·職,累奏憲宗,甚 画 代同爨。 及 和 頭城,降李文悅 東道爲兩鎮, 達所部,乃率 五年 練防禦使,六遷 因爲伏兵所掩, 十三年, -,以左 好大言, 德宗朝 出為振 威 兵 以 衞 仇良輔。 見委信。 霞寓 趣蕭陂 將 頗以 至檢校 采訪使洪經綸 王師 武節度使,入爲左 軍 隨 節 爲唐鄧隋節度 大 吐突承 I 概自許。 置 卿, 霞寓 與賊決戰。 元 部 平 和 尙 ·, 以 初 璀擊 奏旌 書。 沼韶 僅 功 貞

武 衞大將 寶曆二年,疽發首,不能理事,求歸闕下。 軍 長慶元年,授邪寧節度使。 三年,就加檢校右僕射。 其夏,授右金吾衞大將軍、檢校司徒,途次 四年,加檢校司空,又加

奉天而卒,年五十五,贈太保。

罷,霞寓頗懷憂恐,捨私第爲佛寺, 非斥朝列,侮慢憭屬,鄙辭俚語,日聞於時。 霞寓卒伍常材,始因宦官進用,遂階節將。 上言請額爲「懷恩」,用資聖福,大率姦妄兇狡如此。 位望既高,言多不遜。 朝廷知之,欲議移

資於人,得鎭之後,則膏血疲民以償之。及1萬之拜,以內外公議,搢紳相慶曰:「韋公作相, 節制之除拜,多出禁軍中尉。 未聞,陳許表至,果請瑀爲帥,乃授檢校左散騎常侍、許州刺史、忠武節度使。 之。宰相裴度、韋處厚議瑀深沉方雅,曾刺陳、蔡,人懷良政,又熟忠武軍情,欲請用瑀。 太僕卿。 高瑀 大和初,忠武節度使王沛卒,物議以陳許軍四征有功,必自擇帥,或以禁軍之將得 ,

渤海蓨人。

少好論兵,釋褐右金吾胄曹,累辟諸府從事,歷陳、蔡二郡刺史,入爲 凡命一帥,必廣輸重路。 禁軍將校當爲帥者,自無家財,必取 自大曆已來,

儧

帥鮮矣!

列傳第一百一十二 崔戎 韓亘 張正前

求分司 性 徐泗王智興之後, 里,蓄洩旣均,人無饑 寬和 三年, ,有體量,爲官雖無赫赫之譽,所至皆理,尤得士心,論者美之。 拜太子少傅。 就加檢校工部尙書。 軍士 年。 其月, 騙 恣, 加檢校右僕射。 復授檢校右僕射、 宜得雄帥鎭 比年水旱, 之,乃以太府卿崔珙代瑀,徵爲刑部 六年,移授徐州 人民薦饑。 陳許蔡節 | 稱召集州民,繞郭立堤塘一 度使。八年六月卒, 刺 史、武寧軍 節度等使。 尙書。 贈司空。 議 百 以 者以 八十 湙 瑀

御史, 原楡 |海 五月卒,贈禮部尙書。 撫,兼再定征稅,廢置得所,公私便之。 太原,署爲參謀。 沂密 次尉。 崔戎字可大。 累拜吏部郎中,遷諫議大夫。 都團練觀察等使。 時王承宗據鎭州 高伯祖玄暐, 將行, 神龍初有大功,封博陵郡王。 州人戀惜遮道, · 数 (哥),度請戌單車往諭之,承宗感泣受教。 入爲殿中侍 **尋爲劍南東、西兩川宜慰使。** 還,拜給 調判入等,授藍田主簿,爲藩鎭名公交辟。 事中, 至有解鞾斷瞪者。 駁奏爲當時所稱。 祖嬰,郢州刺史。父貞固 西州承蠻寇之後,戎旣宜 理克一年, 改華州 刺史,遷兗 大和八年 裴度領

移宣 字、華原縣尉。 戶 注,眞亦欲 其事,凡吉凶大儀,禮官不能達,率訪眞,眞亦賴是須要姑息。 、部鄓中、秘書少監、太常少卿, 一歙觀察使,加御史大夫。 陸亘字景山, 念預,亘笞之,由是禮儀不專於胥吏。 應制舉,授萬年縣丞。 吳郡人。 祖元明, 大和八年九月卒,年七十一,贈禮部尚書。 歷刺兗、蔡、虢、蘇四 睦州 自京兆府兵曹參軍 司馬。 父持詮,惠陵臺令。 自虞部員外郎出爲鄧州 那, 遷越州刺史、浙東團練觀祭等使, 拜太常 元和七年,册皇太子,將撰儀 博士。 亘以書判授集賢殿正 寺有禮生孟眞 刺史。 其後 入爲 人人於

降, 壖,常陷寇境,集官吏廩祿之半,以代常賦,因循相踵,吏返爲倖。 能 制 增給其俸,人皆賴之。 亘 遂爲一州之弊,宜有處分。」因詔天下兵分屯屬郡者,隸于刺史。 強明嚴毅,所至稱理。 初赴兗州, 延英面奏曰:「凡節度使握兵分屯屬郡者,刺史不 **亘按舉贓罪,表請郡守以** 越之永嘉郡,城于海

正甫登進 張 Ē 士第,從樊澤爲襄陽從事,累轉監察御史。 甫字踐方,南陽 人。會祖 大禮,坊州 刺史。 于頔代澤,辟留正甫。 祖紹貞,尚書右丞。 父泚,蘇州 正甫堅辭之,遂 司馬。

事 事 誣 奏貶郴州 轉 遷 I F 部 部 尙 息 長 書。 中, 史。 改 五年, 後由邕府徵拜殿中侍御史, 河 南 檢校兵部 尹 曲 尙 書右丞 尚書、 太子詹事 爲同 州 遷戶部員外郎, 刺 0 史, 明年, 入 拜左散騎常侍、集賢殿 以吏部 轉司封員外、 尚書 致 仕。 兼侍御史知雜 正甫仁 學 士 判院 而 端

爲 相 知 汝州 名。 次登科。 毅 夫 刺 登 史。 大和 進 士第。 一毅夫位至戶部侍郎、弘文館 中,文章之盛, 初 Ē 甫 兄式, 世共稱之。 大曆中 學士判院事 進 元夫, 土 一登第, 大和 繼之以正甫,式子元夫、傑夫、徵夫 o 初兵部郎中、 諸羣從登第者數人,而毅夫子禕最 知制 語,遷中書舍人,出 叉

亮

粒官清強

居外

任,所至

稱

理。

大和

八年

·九月卒,年八

、十三,累贈太師。

子毅夫

宗 巢 劉 左 南 、還京 犯京 鄴 散 皆辟爲賓佐。 子覃, 騎 禕 常侍, 字冠章, 微 師 ,從僖宗幸蜀, 當巢 拜 禮 轉吏部 部尚 寇 釋褐汴州從事、戶部判官, 入爲監 時 避禍 書、 侍 郎, 太常卿,充禮儀使,遷兵部尚書。禪苦心爲文,老而 拜工部侍郎, 察御史, 於 歷刑 金吾將軍張直方之第,被害。 遷左 幣、兵部尚書。 刾 補闕。乾符 戶 ,部事 入爲藍田尉、集賢校理。 0 從昭宗在華,爲韓建所構,貶衡州司馬。 单, 奉使江淮還,爲當塗者不協,改太子賓客、 韶入翰林爲學士,累官至中書舍人。 僖宗還京,而惡覃者以 趙隱鎭浙西, 益壯。爲刑 託附逆黨 劉 鄴鎭淮 部 昭 黄

五三

列

傳

第

百

+

張

亦贈官。 死不以義,下三司詳罪。 其行義始終,皆如此類。 **韓上章申理** ·,言覃父子倂命於賊廷,豈附逆耶? 其家竟獲洗 雪,覃

宜乎? 懼 耶 ! 史臣曰: 全義官 朝無責帥之刑,蓋自恥 由妄進 孟陽、王遂儒雅之曹,才有可稱, ,霞寓位以卒升,勇毅不足以啓行, 也。 權、 瑀長者,末塗喪眞,雖牽於食貧,純則僞矣。 竟以財媚時君, 謀慮不足以應變, 陷爲俗吏。 敗亡之辱,不亦 蹈道之論,可不

元和復興。 贊曰:蘊仁則哲,蘊利 · 則狂。 **搢紳之胤,勿效潘、王。** 全義逃責,貞元失策。 霞寓薄刑,

校勘記

北州 曹華治 兵稍厚 所 在沂州 「北」字各本原作「此」,通鑑卷二四一作「天子以鄆人有遷徙之勞,特加優 剛州 不得稱「此州」。 冊府卷四○一 作「北 州, 以 鄆州 於沂海兗爲北,是也 給。 時

據改。

3 升克海爲武寧節度 新書卷六五方鎮表云:長慶元年「升沂海觀察使爲節度使,徙治兗州」。 未

劉昌符 本書卷一五二劉昌傳、新書卷一七〇劉昌傳均作「劉昌」。

與物無競 「無競」二字各本原無,據冊府卷八四四補。

E

時王承宗據鎮州叛 校勘記卷五四引張宗泰說:上文云「裴度領太原」,以本紀及各傳考之,度

領太原時據鎮州叛者乃王廷湊、非王承宗、承宗乃廷湊之誤。下文「承宗感泣受教」、「承宗」亦

當作「廷湊」。

唐書卷一百六十三

列傳第一百一十三

孟簡 胡証 証子溵 湘 崔元略 子鉉 鉉子沆 元略弟元受 元式 元儒

杜元穎 崔弘禮 李虞仲 王質 盧簡辭 兄簡 能 弟弘

正

簡求 簡能子知猷 簡求子嗣業 汝弼

伯芻、工部侍郎歸登、右補闕蕭俛等,同就醴泉佛寺翻譯大乘本生心地觀經,簡最擅其理。 官至倉部員外郎。 尋遷 孟簡字幾道,平昌人。天后時同州刺史詵之孫。 司封郎中。 戶部侍郎王叔文竊政,簡爲子司, 元和四年,超拜諫議大夫,知匭事。簡明於內典,六年,韶與給事中劉 多不附之,叔文惡之雖甚,亦不至擯 工詩有名。 擢進士第, 登宏辭科,

金紫光祿大夫。 王承宗叛,詔以吐突承璀爲招討使,簡抗疏論之,坐語訐,出爲常州刺史。 簡始到郡,開古孟瀆,長四十一里,灌溉沃壤四千餘頃,爲康使舉其課績 八年,就加

列 百一十 Ξ 孟 簡

四二五七

是有就加之命。 李遜抑遏士族、恣縱編戶之後,及簡爲政,一皆反之,而農估多受其弊,當時以爲兩未可也。 十二年,入爲戶部侍郎。 是歲,徵拜爲給事中。 十三年,代崔元略爲御史中丞,仍兼戶部侍郎。 九年,出爲越州刺史、兼御史中丞、浙東觀察使。 是歲,出爲襄州刺 承

史、山南東道節度使。

簡贓狀。 月卒。 位,貶吉州司馬員外置同正員。初,簡在襄陽,以腹心吏陸翰知上都進奏,委以關通中貴。 翰持簡陰事,漸不可制,簡怒,追至州,以土囊殺之,且欲滅口。翰子弟詣闕,進狀 充本縣令。臺司奏有虧刑典,罰一月俸。 元年大赦,量移陸州刺史。二年,移常州刺史。 十四年,敕於穀城縣置羣牧,命曰臨漢監,令簡充使。 御史臺按驗,獲簡賂吐突承璀錢帛等共計七千餘貫匹,事狀明白,故再貶之。長慶 是歲,改授太子賓客,分司東都。 三年,入爲太子賓客,分司東都。 簡奏請均州鄖鄉縣鎭遏使趙潔 十五年,穆宗即 訴冤,且告

圖之教,爲儒曹所誚。 簡 性俊拔尚義,早歲交友先殁者,視其孤, 每厚於周卹,議者以爲有前輩風。 然溺於浮

中。 順 河 請 中 為掌 從 田 胡 弘正 証 事 字取中 書 自殿 以 記 魏博 檢 中侍 河東 校 內 屬 祠 御 部 史拜 請除 員 父暉 外郎。 韶 副 州 貢 刺 伯父 乃兼 元 史 和) 政, 以 匹 御 母 年 史 登進士第。 年 ٠, 介水 高 由 侍 不 元 可 御 魏博節 適遠 史 証,貞元中繼登科,咸寧王渾 歷 ,改授太子舍人。 左 度 司 員 副 外郎、 使, 175 兼 長 左庶子。 安 襄陽 〈縣令、 節 瑊 戶 度 遷 部 使 辟 郞

將 帥 九 非 1 統 四 年 年 馭 以 之才 ,充京西、京北巡 党項寇邊,以証 ٠, 邊 事 曠廢, 朝 邊 有安邊才略,乃授單于 使、訪 廷 故 特 其利害以聞 用 証 以鎭。 十三年 都護、 、徴爲 御史大夫、 金吾大將軍 振武軍 体,依 節度使。 前 兼 御 史 前

任

諫

議

大

受省費,以絕鬻官之門。 境, 又欲以王 有行 長慶 人私觀 元年, 姬 疾 驅徑路。 之禮, 太和 公主 官不能給 証抗志不拔,守漢儀 行及漢· 出 降 迴紇 ,召富家子 南, 虜騎繼 韶以本官檢校工部尚書充 納貲於使者而 至, ,黜夷法 狼心犬態, ,竟不辱君 命之官。 日 命。 千 和 及証 狀, 親使。 使還, 欲 將 以戎服變革 舊制, 拜 工部侍 首 誧 以 釐 使 車 儉 出

以 判 疾 度 上表 支,上表乞免,願效藩 敬宗卽位 水還京師 之初 ,檢校戶 是歲 服 + 别 月 尙書,守京兆 卒于 二年,檢校兵部 嶺南, 時年 尹。數 七十 尙書 月 ,遷左散 廣 廢朝 州 刺 史 騎常侍。 日 、充嶺 贈 左僕 南 寶曆 節 射。 度使。 杒, 拜戶 大和 部份

徇。時澱弟湘爲太原從事,忽白晝見綠衣人無首,血流被地,入于室,湘惡之。翌日,澱凶 問至,而湘獲免。 利其財,稱証子澱匿鰊,乃破其家。一日之內,家財並盡。軍人執澱入左軍,仇士良命斬之以 起第,連亙閭巷。 嶺麦奇貨,道途不絕,京邑推爲富家。 証素與賈餗善, 及李訓事敗,禁軍 廣州有海舶之利,貨貝狎至。証善蓄積,務華侈,厚自奉養,童奴數百,於京城修行里

月,眞拜京兆尹。明年,改左散騎常侍。 李夷簡自西川徵拜御史大夫,乃命元略留司東臺。尋除京兆少尹,知府事,仍加金紫。數 和八年,拜殿中侍御史。十二年,遷刑部郎中、知臺雜事,擢拜御史中丞。元和十三年,以 崔元略,博陵人。祖渾之。 父儆,貞元中官至尚書左丞。 元略舉進士,歷佐使府。 元

命使党項,意宰臣以私憾排斥,頗出怨言。宰相崔植奏曰:「比以聖意切在安撫党項,乃差 己,卽不肯行。須有薄懲,以肅在位,請出爲黔中觀察使。」初,崔植任吏部郞中,元略任刑 元略往使,受命之後,苦不樂行,言辭之間,頗乖去就。 豈有身忝重恩,不思報效,苟非便 穆宗即位,命元略使党項宣撫,辭疾不行,出爲黔南觀察使、兼御史中丞。初,元略受

於党 彈之。 部 郞 中 項 知 時二人 元 雜。 略意植 八皆進擬 時中丞改京兆尹,物議以植有風憲之望。 之見排, 爲中丞 辭 疾 中旨果授元 不行, 被譴 略 Щ 植 踰 深銜 年, 轉鄂州 之。 元略因入閣, 及植 刺 史、 爲 相 鄂岳 妄稱植 元 都 略 以左 車 練觀 失儀, 散 察使。 騎 常侍使 命御 史

慶

回

年

入爲

大

理

卿

|楚自 彈 匠 爲 職 彰 版 史 止 破 橋 不不 勃 於 蕭 圖 雖 奚恤 一之拜 爲京兆尹 用,計贓二萬 道使,造東渭 削 澈 敬 驚特 謂 而 宗 彈 兼 遽 詔 人言 ,出於宣 大 刨 劾 出宸 進之恩; 遷 位 夫。 一顯要。 , 有 有覬覦 衷, 復爲京兆 初 韶 然元略終不能 一千七 橋 授。 恩延望外。 刑部郎中趙元亮、大理正 衆口 元略 時,被本 元略 相位之意。 畤 相 亦上 諫官 争, 百 有 九貫。 非, 宰相望,及是事 典鄭位、判官鄭復 尋兼御史大夫。 章 有 處南宮之重位 乃致因 逃 自辨, 疏 父 敕云:「元略 元略方在次對, 指言內常侍崔潭 事潭峻之名。 且曰:「一昨府 望 元從質、侍御史温造 以悞徵畿甸經赦免放緡錢萬 虚 不能 列左戶之清班 益 減。 長 寶曆二年四月, 又多遊裝度門, :檢下, 物價 縣條疏 峻方有 寶 層元 擅估給用,不還人工價直 有涉慢官,罰一月俸料。」時 權寵 一,豈臣 年,遷戶部 臺 司 ,元略以 充三司 舉劾, 雇虛 栖楚恐礙己,以計摧之, 京兆府以元略前 侍 **豈非公選**? 覆 ,敢自干冒。天心 諸父 孤立 鄓。 理 七千貫, 。元略有 無黨,謗言 事之,故 議者 ,率斂工 卿 以元 任 爲侍御 中助, 能 劉 雖 尹 栖 日 所 稱 盆 被 略

乃按舉山陵時錢物以污之。

等防禦使。是歲,又遷滑州刺史、義成軍節度使。十二月卒,廢朝三日,贈尙書左僕射。 大和三年, 轉戶部尙書。四年, 判度支。五年, 檢校吏部尙書。 出爲東都留守、畿汝

子鉉

者榮之。 督長史,進封魏國公、淮南節度使。 千戶。七年,以館中學士崔豫、薛逢等撰續會要四十卷,獻之。九年,檢校司徒、揚州大都 遷金紫光祿大夫,守左僕射、門下侍郎、太淸宮使、弘文館大學士、博陵縣開國公,食邑至二 緊開國子,食邑五百戶。大中三年,召拜御史大夫,尋加正議大夫、中書侍郎、同平章事。累 **德裕所嫉,罷相,爲陝虢觀察使、檢校刑部尚書。 宣宗卽位,遷檢校兵部尚書、河中尹、博陵** 郎,知制誥,召入翰林,充學士。 累遷戶部侍郎承旨。 會昌末,以本官同平章事。 **鉉字台碩,登進士第,三辟諸侯府,荆南、西蜀掌書記。** 宣宗於太液亭賦詩宴餞,有「七載秉鈞調四序」之句,儒 會昌初,入爲左拾遺,再遷員外 爲同列李

度,聞徐州軍至湖南,盡率州兵,點募丁壯,分扼江、湘要害,欲盡擒之。徐寇聞之,踰嶺自 咸通初,移鎭襄州。咸通八年,徐州戍將龐勛自桂管擅還,道途剽掠。鉉時爲荆南節

西、淮右北渡、朝議壯之。 卒於江陵。 子沆、汀、潭、沂。

據,從駕不及而卒。 人,尋遷禮部 **沆**, 登進 侍 土第,官至員外郞,知制誥, 郎,典貢舉。 沂後官亦隆顯。 選名士十數 人,多至卿相。 拜中書舍人。 坐事貶循州 乾符末、 ·,本官同平章事。 司戶。 乾符初, 遇 京國 復拜舍 盗

原尹、北都留守、河東節度使。 罪,除名賜死。元受從坐,皆逐嶺表,竟坎壤不達而卒。子鈞、鉶、鎌相繼登進士第,辟諸侯府。 營糧料使。 元式, 元儒 元式子鐟, 仕至京兆尹。 元略弟元受、元式、元儒。 ",元和 會昌三年檢校左散騎常侍、河中尹、河中晉絳觀察使。 元受與韋帖、薛巽、王湘等皆爲臯謨判官 五年登進士第。 六年,入爲刑部尙書。 元受登進士第, 高陵尉, 直史館。 ,分督供饋。 宣宗朝領度支,以本官同平章事 既罷兵,或以鼻謨隱沒贓 元和初, 四 年, 檢校禮部尚書、太 于皐謨爲河北

杜元 列 穎 萊公如 晦裔孫也。 父佐官卑。 元額, 貞元末進士登第, 再辟使府。 元和中為

袋,轉司勳員外郎,知制誥。穆宗卽位,召對思政殿,賜金紫,超拜中書舍人。其年冬,拜戶 闕至侍郎,不周歲居輔相之地。辭臣速達,未有如元穎之比也。 部侍郞承旨。長慶元年三月,以本官同平章事,加上柱國、建安男。 左拾遺、右補闕,召入翰林,充學士。手筆敏速,憲宗稱之。吳元濟平,以書韶之勤,賜緋魚 元穎自穆宗登極,自補

聲,累年不息。蠻首領蹇顚遣人上表曰:「蠻軍比修職貢,遽敢侵邊?但杜元穎不恤三軍, 境,放爾哭別鄉國。」數萬士女,一時慟哭,風日爲之慘悽。哭已,赴水而死者千餘,怨毒之 <u>剑禦之而退。時元穎幾陷,賴郭釗擊敗其衆,方還。蠻驅蜀人至大渡河,謂之曰:「此南吾</u> 六年,卒於貶所。 誅虐帥也。誅之不遂,無以慰蜀士之心,願陛下誅之。」監軍小使張士謙至,備言元穎之咎, 令入蠻疆作賊,移文報彼,都不見信,故蜀部軍人,繼爲鄉導,蓋蜀人怨苦之深,祈我此行, 固牙城而已。 流聞于朝。大和三年,南韶蠻攻陷戎、嶲等州,徑犯成都。 元穎求蜀中珍異玩好之具,貢奉相繼,以固恩寵。以故箕斂刻削,工作無虛日,軍民嗟怨, 三年多,帶平章事出鎭蜀川,穆宗御安福門臨餞。 司馬,判官崔璜連州司馬,紇干泉郢州長史,盧丼唐州司馬,皆以佐元穎無狀也。 蟹兵大掠蜀城玉帛、子女、工巧之具而去。是時蠻三道而來,東道攻梓州,郭 臨終,上表乞贈官,贈湖州刺史。 昭愍卽位,童心多僻,務爲奢侈,而 兵及城下, 一無備擬, 方率左右

崔 弘 禮 字從周 博陵 北 齊懷遠之七代孫。 祖育、常州江陰令。 父学, 湖州 長城令。

弘 禮 風 貌 魁 偉 · 、磊落· 有大志。 舉 進 一士,累佐藩府,官至侍 御史。

充魏 東 固 東都 反 博節度副使,歷鄭州 元和 側之徒, ,卒亦無患。 中, 呂元膺爲東都留守,以弘禮爲從事。 爲之影援, 累除 汾州、 東結 刺 史。 李師道謀襲東洛,以脅朝廷。 棣州 刺 史。 會田 弘正 時准西吳少陽 一請入覲 弘禮爲元膺籌畫 請副使, 初死,吳元濟阻兵拒 乃授弘禮衞 部 分兵衆,以 州 命,山 刺

華州 秦渠 副 史大夫、東都畿 使。 刺 下 長 未及境 慶 闢荒田 史。 元 年 會 劉總 天平 三百頃 汝都防禦副 幽、鎮兵亂,改爲絳州 軍節度使烏 入覲,張弘靖移鎮范陽,復加弘禮檢校左散騎常侍,充幽州盧龍軍節 ,歲收粟二萬斛 使。 重胤卒, | 字 , 刺 韶皆從之。 遷河陽節 史。 朝廷難其人,復以弘禮爲天平軍節度使,仍詔卽 明年 度使。 汴州 以疾連表請代, 李介反,急韶追 整練 文 才 矛 , 數歲, 頗壯 弘禮爲 一戎備。 拜檢校戶部尙書、 河南 又上言請於 尹 ノ、兼 日 御 度

乘遞赴鎮。

列

傳第一百一十三 崔弘禮 李虞仲

歷踐藩鎭。

文宗即位,就加檢校左僕射。 理鄭三載,改授東都留守,仍遷刑部尙書。 韶赴闕,以疾

未至。大和四年十月,復除留守。 。是歲十二月卒,年六十四,贈司空。

所居無可尙之績,雖繕完有素,然善治生蓄積,物議少之。 弘禮少時,專以倜儻意氣自任,通涉兵書,留心軍旅之要,用此累更選用,

爲韻。」端卽襞牋而獻曰:「方塘似鏡草芊芊,初月如鉤未上弦。新開金埒教調馬,舊賜銅山 練。曖因拜官,會十子曰:「詩先成者賞。」時端先獻,警句云:「薰香荀令偏憐小,傅粉何郎不 許鑄錢。」曖日:「此愈工也。」起等始服。端自校書郎移疾江南,授杭州司馬而卒。 解愁。」主即以百縑賞之。錢起日:「李校書誠有才,此篇宿構也。願賦一韻正之,請以起姓 才思,尤喜詩人,而端等十人,多在曖之門下。每宴集賦詩,公主坐視簾中,詩之美者,賞百 盧綸等文詠唱和,馳名都下,號「大曆十才子」。時郭尙父少子曖尙代宗女昇平公主,賢明有 李虞仲字見之,趙郡人。祖震,大理丞。父端,登進士第,工詩。大曆中,與韓翃、錢起、

士,遷兵部員外、司勳郎中。寶曆中,考制策甚精,轉兵部郎中,知制誥,拜中書舍人。大和四 **虞仲亦工詩。** 元和初,登進士第,又以制策登科,授弘文校書。從事荆南,入爲太常博

爲兵部侍郎,尋改吏部。開成元年四月卒,時年六十五。 學,達而不矜,士友重之。 年,出爲華州刺史、兼御史大夫。入拜左散騎常侍, 兼秘書監。 虞仲簡澹寡欲,立性方雅,奕代文 八年,轉尙書右丞。 九年,

長丞。 **充興元節度副使。入爲戶部郞中,遷諫議大夫。** 兼監察御史。入朝爲殿中,遷侍御史、戶部員外郎。 講赴鄉舉。元和六年,登進士甲科。釋褐嶺南管記,歷佐淮蔡、許昌、梓潼、興元四府,累奏 之才,取名位如俯拾地芥耳,安自苦於關茸者乎?揚名顯親,非耕稼可致也。」質乃白於母, 以養母,專以講學爲事,門人受業者大集其門。年甫強仕,不求聞達,親友規之曰:「以華卿 福祚生勉,登進士第,制策登科,位終寶鼎令。勉生怡,終渝州司戶。 王質字華卿,太原祁人。五代祖通字仲淹,隋末大儒,號文中子。 質則潛之第五子。少負志操,以家世官卑,思立名於世,以大其門。 爲舊府延薦,檢校司封郎中,賜金紫, 通生福祚,終上蔡主 寓居壽春,躬耕 怡生潛,揚州

外推,申錫方從輕典。質爲中人側目,執政出爲號州刺史。 列 第一 百一 + = Ŧ. 質 虚 簡 辭 四二大七

大和中,王守澄構陷宰相宋申錫,文宗怒,欲加極法。

質射策時,深爲李吉甫所器,

及

質與常侍崔玄亮雨泣切諫,請付

德裕爲相,甚禮之,事必咨決,尋召爲給事中、河南尹。 八年,爲宣州刺史、兼御史中丞、宣 在政三年,開成元年十二月,無疾暴卒,時年六十八,贈左散騎常侍,諡曰

質淸廉方雅,爲政有聲。雖權臣待之厚,而行已有素,不涉朋比之議。 在宣城辟崔珦、

劉蕡、裴夷直、趙哲爲從事,皆一代名流。視其所與,人士重之。子曰慶存。

甥也, **縉得罪,坐累。久之,調陝府戶曹、河南密縣令。建中初,爲昭應令。朱泚之亂,咸寧王渾** 地於鄱陽,與郡人吉中孚爲林泉之友。大曆初,還京師,宰相王縉奏爲集賢學士、秘書省校 郎。 侍郎,典邦賦,薦綸于朝。會丁家艱,而中孚卒。 盧簡辭字子策, 范陽人,後徙家于瀟。 祖翰。 父綸,天寶末舉進士,遇亂不第,奉親避 數稱給之才,德宗召之內殿,令和御製詩,超拜戶部郎中。方欲委之掌誥,居無何, 王縉兄弟有詩名於世,縉旣官重,凡所延辟,皆辭人名士,以綸能詩,禮待逾厚。 太府卿章渠牟得幸於德宗,綸卽渠牟之 貞元中,吉中孚爲翰林學士、戶 會

ø

公凋落,綸嘗爲懷舊詩五十韻,敘其事曰:「吾與吉侍郎中孚、 大曆中,詩人李端、錢起、韓翃輩能爲五 ||言詩,而辭情捷麗,||編作尤工。 司空 郎中曙、 至貞元末 苗員外

問侍臣曰:「盧綸集幾卷? 我懷袖盈。 餘,雅韻與琴淸。鬱鬱松帶雪,蕭蕭鴻入冥。 侍御。」其歷言諸子云:「侍郞文章宗,傑出准、楚靈。 沉下泉。傷悼之際,暢當博士追感前事,賦詩五十韻見寄。輒有所酬,以申悲舊,兼寄夏侯 簡能、侍御史簡辭是也。」 長裾,總轡奉和鈴。 九醞貯彌潔,三花寒轉馨。 瀝瓊英。 補闕思沖融,巾拂藝亦精。 讀罷涕交頤, 共賦瑤臺雪,同觀金谷笙。 即遣中使詣其家, 有子弟否?」李德裕對曰:「編有四男, 願言躋百齡。」編之才思,皆此 校書才智雄,舉世一娉婷。 彩蝶戲芳圃,瑞雲滋翠屏。 令進文集。 員外眞貴儒,弱冠被華纓。 倚天方比劍,沉水忽 掌賦若吹籟, 賭墅鬼神變, 類也。 簡能盡以所集五百篇上獻 拾遺 文宗好文, 皆登進士第 司言如建瓴。 如瓶。 屬辭鸞 興難侔,逸調 月香 稱、榮耀 君持玉 尤重 鳳驚。 飄桂 綸 郞 今員外郎 實 盤珠,寫 曠無程 中善慶 差肩 乳溜 優韶 嘗 曳 審

歷朝簿 簡辭,元和六年登第,三辟諸侯府。 靡不 ·經懷。 寶曆中,故京兆尹黎幹男煟詣臺治父葉縣舊業,臺 長慶末,入朝爲監察,轉侍御史。文雅之餘,尤精法 司莫知本末。

百姓。 書、許州刺史、御史大夫、忠武軍節度使,遷檢校刑部尚書、襄州刺史、山南東道節度使,卒。 僕卿出爲衢州刺史。 見之曰:「此宮中所無,而盧昂爲吏可知也」」專轉考功員外郎,轉郎中。 田產分給百姓,將及百年,而煟恃中助而冒論耶!」 簡辭曰:「幹坐魚朝恩黨誅,田產籍沒。 簡辭兄簡能。 叉福 建鹽鐵院官盧昂坐贓三十萬,簡辭按之,於其家得金牀、瑟瑟枕大如斗。 會昌中,入爲刑部侍郎,轉戶部。 大曆已來,多少赦令,豈有雪朝恩、黎幹節文。況其 乃移汝州刺史裴通,準大曆元年敕給 大中初,轉兵部侍郎、檢校工部尚 大和中,坐事自太 昭愍

佐。 充鳳翔節度判官。 簡能 簡能 與蕭倪弟傑、錢起子可復,皆爲訓所選,從注。 字子拙,登第後再辟藩府,入爲監察御史。 時鄭注得幸,李訓與之謀誅宦官,俾注鎭鳳翔,仍妙選當時才俊以爲賓 大和九年,由駕部員外檢校司封郞中, 及訓敗、注誅、簡能、蕭傑等四人皆

侍御史。 簡辭弟弘正、簡求。 大和中,華州刺史宇文鼎、戶部員外盧允中坐贓,弘正按之。 文宗怒,將殺鼎, 弘正字子強,元和末登進士第, 累辟使府掌書記。 入朝爲監察御

(j

監

軍使所害。

弘正 奏曰:「鼎壓持綱憲,繩糾之官,今爲近輔刺史, 以贓污聞, 死固常典。 但取受之首,罪

允 中,監司之責,鼎當連坐。」文宗釋之,鼎方減等。 一遷兵部 郞 中、 給事 中。

攸宜。」 郡。 以依違。」上曰:「然,誰可任者?」李德裕曰:「給事中盧弘正嘗爲昭義判官,性又通敏, 部 侍 宰臣奏議曰:「山東三郡以賊楫 會昌末, 郞 即命爲邢洺磁團練觀察留後。 王師討劉韻。 時韶河北三帥收山東 未誅, 未行而凝誅,乃令弘正銜 宜且立留後。 州 郡, 俄 如弘敬、元逵有所陳請, m 何弘敬 命宣諭 、王元逵得邢、洺、 河北三鎮。 則朝 使還,拜 , 推 磁三 廷 難

之。 受代, 正令判官司空興至池務檢察, 騙 息,有銀刀都尤勞姑息,前後屢逐主 大中初 檢校戶部尚書,出爲徐州 軍 旒 無 譁。 轉戶部侍鄓,充鹽鐵轉運使。 鎭 徐四年,遷檢校兵部尚書、汴州刺史、宣武軍節度、宋亳潁觀察等使,卒 刺史、武寧軍節度使、徐泗濠觀祭等使。 特立新法,仍奏興爲兩池使。 帥。 前是,安邑、解縣兩池鹽法積弊,課 弘正 在鎭期年,皆去其首惡,喻之忠義。 三年 」, 課 入加倍, 徐方自智興之後,軍 入不 其法至今賴 充。 訖 於 弘

簡求 字子臧 長 (慶元 年登進士第, 釋褐江西王仲舒從事。 又從元稹爲浙東、江夏二府

水為 郎。 原,復奏爲記室。 忠武節度副 會昌末,討劉馥,韶以許帥李彦佐爲招討使。 裴度鎭 襄陽, 使知節度事、本道供軍使。 入爲殿中,賜緋。 保釐洛都, 皆辟爲賓佐, 牛僧孺鎭襄漢,辟爲觀察判官。 入為吏部員外,轉本司郎中,求為蘇 奏殿中侍御史。 朝廷以簡求累佐使府,達於機略,乃以簡 入朝, 入爲水部、戶部二 拜監察。 州 裴度鎭 刺 一員外

校刑 軍、 出鎮 充河東節度觀察等使。 涇州 十 一 部尙書、鳳翔 時 罷簡求爲左庶 僧辭鎭漢南,弘正爲侍郎,領使務,昆仲皆居顯列, 年,遷檢校工部尙書、定州刺史、御史大夫、義武軍節度、北平 刺史、涇原渭武節度押蕃落等使、檢校左散騎常侍、上柱國、范陽縣男、食邑三百 尹 子分司。 鳳翔隴西節度觀察等使。 數年,出爲壽州刺史。 十四年八月,代襲休爲太原尹、北都留守, 九年,党項叛,以簡求爲四鎮 時人榮之。 旣而宰執不協,弘正 軍等使。十三年,檢 北庭

歲時行樂,子弟侍側,公卿在席,詩酒賞詠,竟日忘歸,如是者累年。 質之子弟,然爲盜不息。 鄙晏然。 欣然聽 簡求辭翰縱橫 命。 太原軍素管退渾、契茲、沙陀三部落, 咸通 初,以疾辭,表章瀝懇, ,長於應 簡求開懷撫待,接以恩信,所質子弟,一切遣之。 |變,所歷四鎭,皆控邊陲,屬雜虜寇邊,因之移授,所至撫御,邊 制以太子太師 或無納 致仕, 不至, 多爲邊患。 還於東都。 五年十月卒,時年七十 都城有園林別墅, 前政或要之詛 故五部之人(己)

卿,工 魚、改 位 室。 檢校司空,卒於華下。 偽署,乃避地 金州。 亦至丞郎。 入拜左拾遺, 簡能子知猷。 一部、戶部尙書,復領太常卿。昭宗在華下,加檢校右僕射,守太子少師。進位太子太師 、東部郞中、太常少卿。 改右 知猷登進士第,釋褐祕書省正字。 駕還,徵拜工部侍郎,轉戶部,判史館,遷尙書右丞、兵部侍郎。歷太常 知猷器度長厚,文辭美麗。 補闕、 出爲商州刺史。徵拜給事中, 史館修撰, 轉員外郎。 尤工書,落簡措翰,人爭模做。 出爲饒州刺史。入拜兵部郎中, 宰臣蕭鄴鎭江陵、成都, 轉中書舍人。 僖宗幸山南,襄王 辟爲兩 子文度, 賜緋 府記

子虔權,有俊才,進士登第。 簡辭無子,以簡求子貽殷、玄禧入繼。貽殷終光祿少卿。 所著文筆,爲時所稱。 位終祕書監。 玄禧登進士第,終國子博士。

館、 左拾遺、右補闕。 簡 王鐸徵兵收兩京,辟爲都統判官、檢校禮部郎中,卒。 嗣業進士登第,累辟使府。廣明初,以長安尉直昭文

汝弼登進士第, 累遷至 + = 祠部員外郎、 校 勘 知制誥, 記 從昭宗遷洛。 屬柳璨黨附賊臣, 誣陷士

第

百一

盧

館 辭

壁。汝弼復爲亞帥,每亭中宴集, |用奏爲節度副使,累奏戶部侍郎。 族,汝弼懼,移疾退居,客遊上黨。 **六卿方鎭相繼,而未有居輔相者。** ,未嘗居賓位,西向俛首而已,人士嘉之。盧氏兩世貴盛, 至中興,嗣業子文紀,仕至尙書中書侍郎、平章事。 太原使府有龍泉亭,簡求節制時手書詩一章,在亭之西 遇潞府爲太原所攻,節度使丁會歸降,從會至太原,李克

門,非德積慶鍾,安能及此?辭人之後,不亦休哉! 而父事宦者,何所逃譏?以端、綸之才,任不踰元士,而盧簡辭之昆仲,雲摶水擊,鬱爲鼎 難知也。二崖以綱憲相傾,元穎以獻奇取媚,雖遭時多僻,位至鼎司,言之正人,亦孔之醜, 史臣曰:孟襄陽之淸節,胡廣州之堅正,卒以結權倖而敗,積貨賄而亡。人如面焉,固

贊曰:君子喻義,小人近利。 **孟譴胡亡,家財掃地。** 聲勢相傾,崖、杜醜名。 端、編諸

校勘記

子,奕葉光榮。

(二) 五部 冊府卷三九七同。 校勘記卷五四引張宗泰說:「五」當作「三」。

售唐書卷一百六十四

列傳第一百一十四

王 播 子式 弟炎 起 起子龜 龜子薨 炎子鐸 李絳 絳子璋 頊

楊於陵子景復嗣復紹復師復

課,爲畿邑之最。 特恩頗横,嘗遇播於途,不避。 故事,尹避臺官。 播移文詆之,實怒,後奏播爲三原令,欲挫 良方正制科,授集賢校理,再遷監察御史,轉殿中,歷侍御史。 播受命,趨府謁謝,盡府縣之儀。 王播字明敭。 實以其人有政術,甚禮重之,頻薦之于上。 會祖雖,嘉州司馬。 及臨所部,政理修明, 祖昇,咸陽令。父恕,揚府參軍。播擢進士第,登賢 **德宗奇之,將不次拔用,** 恃勢豪門,未嘗貸法。 歲終考 貞元末,倖臣李實爲京兆尹 會母

順宗即位, 除駕部郎中,改長安令。 歲中,遷工部郎中,知臺雜,刺舉綱憲,爲人所稱。

第

百

-+

四

王

播

四二七五

轉考功郎中,出爲號州刺史。李巽領鹽鐵,奏爲副使、兵部郎中。

卒,出入不得持戎具,諸王駙馬權豪之家,不得於畿內按試鷹犬畋獵之具。 韶從之,自是姦 時禁軍諸鎭布列畿內,軍人出入,屬鞬佩劍,往往盜發,難以擒姦。 元和五年,代李夷簡爲御史中丞。振舉朝章,百職修舉。十月,代許孟容爲京兆尹。 而播奏請畿內軍鎭將

條繁雜。播備舉前後格條,置之座右,凡有詳決,疾速如神。當時屬僚,歎服不暇。 播長於吏術,雖案牘鞅掌,剖析如流,黠吏詆欺,無不彰敗。 時天下多故,法寺議讞,科 盜弭息。六年三月,轉刑部侍郎,充諸道鹽鐵轉運使。

領使,奏之爲副。當王師討吳元濟,令异乘傳往江淮,賦興大集,以至賊平,深有力焉。及 皇甫鎛用事,恐播大用,乃請以使務命程异領之,播守本官而已。十三年,檢校戶部尙書、 十年四月,改禮部尙書,領使如故。先是,李巽以程异爲江淮院官,异又通泉貨,及播

成都尹、劍南西川節度使。

原入覲,朝野物論,言度不宜居外。明年三月,留度復知政事,以播代度爲淮南節度使、檢 鹽擢居輔弼,專以承迎爲事,而安危啓沃,不措一言。 時河北復叛,朝廷用兵。 會裴度自太 轉運等使。十月,兼中書侍郎、平章事,領使如故。長慶中,內外權臣,率多假借。 穆宗卽位,皇甫鎛貶,播累表求還京師。長慶元年七月,徵還,拜刑部尚書,復領鹽鐵 播因銅

校右僕射,領使如故。 ,人相啖食,課最不充,設法掊斂,比屋嗟怨。 仍請攜鹽鐵印赴鎮,上都院印,請別給賜,從之。 播至淮南,屬歲旱

是, 斂,以事月進,名爲羨餘,其實正額,務希獎擢,不恤人言。 讓、薛廷老等,請開延英面奏播之姦邪,交結寵倖,復求大用。 利 諫議大夫 權 物議紛然不息。明年正月,播復領鹽鐵轉運使。 ,廣求珍異,令腹心吏內結守澄,以爲之助。守澄乘閒啓奏,言播有才,上於延英言之。 敬宗卽位,就加銀靑光祿大夫、檢校司空,罷鹽鐵轉運使。 時中尉王守澄用事,播自落 獨孤朗、張仲方,起居郎孔敏行、柳公權、宋申錫,補闕章仁實、劉敦儒,拾遺李景 播旣得舊職,乃於銅鹽之內,巧爲賦 天子沖幼,不能用其言。自

自備,而漕運不阻。後政賴之。 智寺橋通舊官河,開鑿稍深,舟航易濟,所開長一十九里,其工役料度,不破省錢,當使方圓 時揚州城內官河水淺,遇旱卽滯漕船,乃奏自城南閶門西七里港開河向東,屈曲取禪

正月,患喉腫暴卒,時年七十二。廢朝三日,贈太尉。 十萬匹。六月,拜尙書左僕射、同平章事,領使如故。 文宗卽位,就加檢校司徒。 大和元年五月,自淮南入覲,進大小銀盌三千四百枚、綾絹 二年,進封太原公、太淸宮使。 四

播出自單門,以文辭自立,踐昇華顯,鬱有能名。 列 第一百一十 四 王 播 而隨勢沉浮,不存土行,姦邪進取,君

子恥 之。 然天性勤於吏事 ,使務塡委,胥吏盈廷取決,簿書堆案盈几, 他人若不堪勝,而播

用此爲適。 播子式,弟炎、起。

李吉甫鎭 |炎,貞元十五年登進士第,累官至太常博士,早世。 起字舉之,貞元十四年擢進士第,釋褐集賢校理,登制策直言極諫科,授藍田 (淮南,以監察充掌書記。 入朝爲殿中, 遷起居郞、 子鐸、鐐。 司勳員外郎、 直史館。

尉。

宰相

元和

四年

,以比部郎中知制誥。

穆宗卽位,拜中書舍人。

放牓。 科。 易覆試,覆落者多。 勢門子弟,交相酬酢, 及起考貢士,奏當司所選進士,據所考雜文,先送中書,令宰臣閱視 長慶元年,遷禮部侍郞。 從之。議者以爲起雖避是非,失貢職也,故出爲河南尹。 徽貶官,起遂代徽爲禮部侍郎,掌貢二年,得士尤精。 寒門俊造,十棄六七。及元稹、李紳在翰林,深怒其事 其年,錢徽掌貢士,爲朝臣請託,人以爲濫。 入爲吏部侍郎 可否,然後下當司 先是,貢舉猥濫 韶起與同職白居 故有覆試之

,出爲陝虢觀察使、兼御史大夫。 遷戶部尙書、判度支。 文宗卽位,加集賢學士、判院事。 以西北邊備,歲有和市以給軍,勞人饋輓,奏於靈武、邪寧起營 四年,入拜尙書左丞。 以兄播爲僕射輔政,不欲典選部,改兵部侍郎。 居播之喪,號毀過禮, 友悌 大和

田。 六年,檢校吏部尚書、河中尹、河中晉絳節度使。時屬蝗旱,粟價暴踊,豪門閉糴,以邀

善價。起嚴誠儲蓄之家,出粟於市,隱者致之於法,由是民獲濟焉。

就加銀青光祿大夫。時李訓用事 政撓法,塘堰缺壞。 七年,入爲兵部尚書。八年,檢校右僕射、襄州刺史,充山南東道節度。江、漢水田,前 起下車,命從事李業行屬郡,檢視而補繕,特爲水法,民無凶年。 九年, ,,訓卽起貢舉門生也,欲援起爲相。八月,詔拜兵部侍郎,

恪太子登儲,欲令儒者授經,乃兼太子侍讀,判太常卿,充禮儀詳定使,創造禮神九玉,奏 學,雖官位崇重,躭玩無斁,夙夜孜孜,殆忘寢食,書無不覽,經目靡遺。 轉兵部尙書。 以莊 判戶部事。其多,訓敗,起以儒素長者,人不以爲累,但罷判戶部事。 文宗好文, 尤尙古學。 鄭覃長於經義,起長於博治, **俱引翰林**, 講論經史。起僻於嗜

議日

天」,「兩圭有邸以祀地」,「圭璧以祀日月星辰」。凡此九器,皆祀神之玉也。又云:「以禋 黃琮禮地,青珪禮東方,赤璋禮南方,白琥禮西方,黑璜禮北方。」又云:「四圭有邸以祀 祀祀昊天上帝。」鄭玄云:「禋,煙也,爲玉幣,祭訖燔之而升煙,以報陽也。」今與開元 **義同,此則焚玉之驗也。** 邦國之禮,祀爲大事;珪壁之議,經有前規。謹按周禮:「天地四方,以蒼璧禮天, 又周禮「掌國之玉鎭大寶器,若大祭,旣事而藏之」,此則收玉

列傳

之證也。 神者,訖事却收。祀神者,與牲俱燎。」則靈恩之義,合于禮經。 梁代崔靈恩撰三禮義宗云:「凡祭天神,各有二玉,一以禮神,一則燔之。 臣等請下有司,精求良玉,創造蒼璧、黃琮等九 今國家郊天祀地,祀神

器,祭訖則藏之。其燎玉卽依常制。

之玉常用,守經據古,禮神之玉則無。

從之。爲太子廣五運圖及文場秀句等獻之。 三年,以本官充翰林侍講學士。 莊恪太子薨,

韶起爲哀册文,辭情婉麗。

添給。起富於文學,而理家無法,俸料入門,即爲僕妾所有。帝以師友之恩,特加周給,議 四年,遷太子少師,判兵部事,侍講如故。 以其家貧,特詔每月割仙韶院月料錢三百千

者以與伶官分給,可爲恥之。

起與山陵使知其謀,密奏,皆伏誅。 武宗卽位,八月,充山陵鹵簿使。 。尋檢校左僕射、東都留守,判東都尙書省事。 樞密使劉弘逸、薛季稜懼誅,欲因山陵兵士謀廢立。

知貢舉。起前後四典貢部,所選皆當代辭藝之士,有名於時,人皆賞其精鑒徇公也。 會昌元年,徵拜吏部尙書,判太常卿事。三年,權知禮部貢舉。 明年,正拜左僕射,復 其年

秋,出爲興元尹,兼同平章事,充山南西道節度使行〕。 **耆老,宰相無內外,股有闕政,飛表以聞。」宴賜頗厚。** 赴鎭日,延英辭,帝謂之曰:「卿國之 在鎭二年,以老疾求代,不許。 大中

寫宣 元年,卒于鎭,時年八十八。 一十卷。 起侍講時,或僻字疑事,令中使口宣,即以膀子對,故名曰寫宣。 廢朝三日,贈太尉,諡曰文懿。 文集一百二十卷,五緯圖十卷, 子龜

闕徵, 兄弟 喜懼之年, 於漢陽之龍山立隱舍,每浮舟 目爲「郎君谷」。及起保釐東周,龜於龍門西谷構松齋,棲息往來, 目爲半隱亭。 謝,陳情曰:「臣才疏散,無用於時,加以疾病所嬰,不任祿仕。 同居,斯爲宏敞。 龜 遷侍御 字大年,性簡澹蕭灑,不樂仕進,少以詩酒琴書自適,不從科試。 闞於供侍。 史、尚書郎 及從父起在河中,於中條山谷中起草堂,與山人道士遊,朔望一還府第,後人 龜意 乞罷今職, 在人外,倦接朋游 而往,其閑 以奉晨昏。」上優詔許之。明年,丁父憂。服闋,以右補 逸如此。 ,乃於永達里園林深僻處創 武宗知之,以左拾遺徵,久之,方至殿廷 臣父年將九十,作鎭遠藩 放懷事外。 書齋 京城光福里第,起 起鎭興元,又 吟嘯 其閒,

不能制 欲 及 興鎮 在禁掖, 大中末, 河 中 龜 改太常少卿, 因 ٠, 出 又奏爲副使。 事 爲宣歙 發 ,答死以 團練觀察副使,賜緋。 **尋檢校右散騎常侍、** 入爲兵 徇 ,人皆畏威自效。 部 1.郎中, 賜 同州 入爲祠部郎中、史館修撰。 金紫, + 四年,轉越州刺史、御史大夫、浙東團練 刺 史。 尋知制誥。 牙將白約者,甚狡蠹 咸通末,以弟鐸在中書,不 前從崔璵貳宣歙 ,前後防禦使

第一百一十四 王播

列

傳

觀察 使。 先是 ,龜兄式撫臨 此郡, 有惠 政, 聞龜復至,舞抃迎之。 屬徐、泗之亂, 江淮盗起,

山越亂,攻郡,爲賊所害,贈工部尚書。子薨。

從僖宗幸山南,拜右司員外郎,卒。 皆辟爲從事。 養苦學, 善屬文。 蕭遘作相, 以季父作相, 奏授藍田 尉 子權,中興仕至兵部尙 避嫌不就 直 史館,一 科試。 遷左拾遺、右 乾符 書。 初,崔瑾康祭湖南,崔涓鎭江陵 I補闕, 中丞盧涯 奏爲侍御史。

攻會稽 所 刀等七軍,除方平定,天子嘉之。 劾 ,出爲江陵 式以門蔭,累遷 ,式討平之。 少尹 式有威略。 監察御 大中後 史,轉殿中,亦巧宦。 ,踐更省署。 三年,徐州 後累歷方任 威通 銀 字, 卒。 刀軍 初 大和中,依倚鄭注,謁王守澄 為浙 叛 八以武為 東 觀察使。 徐州節度使。 草賊 仇甫據明州 式 至鎮 ,爲中丞歸 、盡誅 叛 來 銀

支遷 部、吏部尚書。 知 制 禮部尙書。 誥 鐸 ,拜中書舍人。 字昭範。 僖宗即位, 十二年, 會昌 初進士第, 五年 以本官同平 加右僕射。 ,轉體部 兩辟使府。 侍 章 郞 保衡得罪 事 , 典 貢士 大中初,入爲監察御史。 時宰相韋保衡以拔擢之恩,事鐸尤謹 兩歲 以鐸檢校右僕射,出爲汴州 ,時稱得人。 七年 咸通 以 戶 初, 刺史、宣武軍 部侍郎、 由駕部 「累棄 判 郎中 刑 度

節度使。

以鐸守司徒、門下侍郎、同平章事,兼江陵尹、荆南節度使,充諸道行營兵馬都統。鐸至鎭 守, 曰:「臣忝宰執之長,在朝不足分陛下之憂。 田 令孜素聞鐸名, 宋威破賊失策。 鐸 有經世大志, 乃復召鐸,拜右僕射、門下侍郎、同平章事。 以安邦爲己任,士友推之。 朝議統率, 宰相盧攜稱高駢累立戰功, 臣願自率諸軍,盪滌羣盜。」朝議然之。 乾符二年,河南、江左相繼寇盜結集,內官 宜付軍柄,物議未允。 四 年, 賊陷江陵,楊知温失 鐸廷奏 五年,

明初,賊自嶺 使。 綏懷流散,完葺軍戎,期年之間,武備嚴整。 會襄陽之師。 係甲兵五萬,皆爲賊所殺, 時黃巢在嶺南,鐸悉以精甲付係,令分兵扼嶺路。 時兗州節度使李係者,西平王晟之孫,以其家世將才,奏用爲都統都押衙,棄湘南團 南寇湖南諸郡,係守城自固,不敢出戰。 江陵竟陷於賊。 天子不之責。 投屍於江。 鐸聞係敗,令部將董漢宏守江陵, 罷相,守太子太師。 賊編木爲栰,沿湘而下,急攻潭州,陷 係無將略,微有口才、軍政不理。廣 宰相盧攜用事,竟以淮南 自率兵萬餘

高 財代鐸為都 統

年,畋病歸行在,朝議復以 其 年 秋, **賊焚剽淮南**, |鐸爲侍中、滑州刺史、義成軍節度使(三), 高駢挫敗。 及賊陷兩京,盧攜得罪,天子用鄭畋爲兵馬都 充諸道行營都統,

列 儜 第 百 + 20 王 播

統。

明

軍、山南、東蜀之師三萬,營於盩厔東,進屯靈感寺。

'n, 收華州 伐高 |鐸之忠義,則 附。 東 觀 下 其年 察使崔璆、尚讓爲宰相,傳僞命。 賊之號令,東西不過岐、華,南北止及山、河。 明 年 ,承制爵賞以聞。 秋, 春 四月,敗賊於良田坡,遂收京城。 克、鄆、徐、許、鄭、滑、邢、 土運之隆替,未可 賊將朱温 降,收同州。 是時 國命危若綴旒,天子播越蠻陬,大事去矣。 知也。 十一月,贼華州戍卒七千來奔。三年二月,沙陀軍至, 、寧、鳳翔十鎭之師大集關內。 天下藩帥,多持兩端。 封鐸晉國公。鐸加中書令,以收城諸將,量其功 而勁卒驍將, 既聞鐸傳檄四方,諸侯翻然景 日馳突於國門,羣賊由是離 時賊已僭名號,以前浙 若非鄭畋之奮發,

賞罰 兗州 之功,尤忌儒 溥舉兵徐方,請 由己。 王敬 自巢、讓之亂,關東方鎭牙將,皆逐主帥,自號藩臣。 武據青州 既逐賊出 臣立事,故有時溥之授。 身先討賊,乃授溥都統之命。 ,周岌據許州,王重榮據河中,諸葛爽據河陽,皆自擅一藩,職貢不入, 關,尤恃功伐,朝廷姑息不暇。巢賊出關東,與蔡帥秦宗權合縱。 十軍軍容使田令孜以內官楊復光有監護用師 時溥據徐州 ,朱瑄據鄆州,朱瑾據 時

忠於己有恩,倚爲藩蔽。 初 鐸出 軍,兼鄭滑節度使,以便供饋。 初, 全忠辭禮恭順,旣而全忠軍旅稍集,其意漸倨。 至是,罷鐸都統之權,令仗節 歸藩。 鐸知不可依 鐸以朱全

表求還朝。

樂彥貞。鐸受命赴鎭,至魏州旬日,彥貞迎謁,宴勞甚至。鐸以上台元老,功蓋羣后,行則 人,伏於潭南之高雞泊。及鐸行李至,皆爲所掠,鐸與賓客十餘人,皆遇害。時光啓四年十 肩輿,妓女夾侍,賓僚服御,盡美一時。 | 彥貞子| 從訓,兇戾無行,竊所慕之,令| 甘陵州卒數百 其年多,僖宗自蜀將還,乃以鐸爲滄景節度使。 時楊全政在滄州,聞鐸之來,訴於魏州

|鐸弟鐐,累官至汝州刺史。 |王仙芝陷郡城,被害。 二月也(三)。

|絳舉進士,登宏辭科,授祕書省校書郎。秩滿,補渭南尉。||貞元末,拜監察御史。|元和二 年,以本官充翰林學士。未幾,改尙書主客員外郞。踰年,轉司勳員外郞。五年,遷本司郞 李絳字深之,趙郡贊皇人也。曾祖貞簡。 祖剛,官終宰邑。父元善, 襄州錄事參軍。

中、知制誥。皆不離內職,孜孜以匡諫爲己任。

狡叛戾, 僭侈誅求, 刻剝六州之人, 積成一道之苦。 憲宗卽位,叛臣李錡阻兵於浙右。錡旣誅,朝廷將輦其所沒家財,絳上言曰:「李錡兇 聖恩本以叛亂致討,蘇息一方。今輦運

列傳第一百一十四 李鋒

錢帛 ,播聞四海,非所謂式遏亂略,惠綏困窮。 伏望天慈,並賜本道,代貧下戶今年租稅,則

萬姓欣戴,四海歌詠矣。」憲宗嘉之。

時中官吐突承璀自藩邸承恩寵,爲神策護軍中尉,乃於安國佛寺建立聖政碑,大興功

作,仍請翰林爲其文。絳上言曰:

伐之功,紀巡幸之跡,適足爲百王所笑,萬代所譏,至今稱爲失道亡國之主,豈可擬議 安國寺,不得不敍載遊觀崇飾之事 源請立紀聖功碑,陛下詳盡事宜, **薨、舜、禹、陽、文、武方駕而行,又安得追秦皇暴虐不經之事而自損聖政?近者,閻巨** 於此?陛下嗣高祖、太宗之業,舉貞觀、開元之政,思理不遑食,從諫如順流,固可與 禹、湯、文、武,並無建碑之事。至秦始皇荒逸之君,煩酷之政,然後有罘、嶧之碑,揚誅 德,碑表而贊皇猷?若可敍述,是有分限,虧損盛德,豈謂敷揚至道哉?故自薨、舜、 易稱:大人者與天地合德,與日月合明。 執契垂拱,勵精求理,豈可以文字而盡聖 陛下布惟新之政,剗積習之弊,四海延頸,日望德音。今忽立聖政碑,示天下以不 其碑,伏乞聖恩特令寢罷。 ,述遊觀且乖理要,敍崇飾又匪政經,固非哲王所宜 皆不允許。 今忽令立此,與前事頗乖。況此碑旣在

憲宗深然之,其碑遂止。

之地 也。 太過 切 隙,祇是威 誠奏論,旁忤倖臣 改容慰喻之曰:「卿盡節於股,人所難言者,卿悉言之,使股聞所不聞, 他 耶? 絳 豈 後因浴堂北廊奏對,極論中官縱恣、方鎮進獻之事 日 可 一絳前 南 見事 福 面 太盛 ,亦須 虧 論 「,上犯聖旨, 以此 聖德,致損淸時 ,上損聖朝,臣所以不敢不論耳。 不已,日:「臣所諫論 (如此) 一。」絳拜恩而退。 而惜身不言,仰屋竊歎,是臣負陛下也。 獲罪, 是陛 ,於臣無利, 遽宣宰臣,令與改官,乃授中書舍人,依前翰林學 下負臣也。 ,是國家之利。 使臣緘默,非社稷之福也。」憲宗見其誠 ,憲宗怒,厲聲曰:「卿所論奏,何 且臣與中官,素不相識, 陛下不以臣愚 **真忠正誠節之臣** 若不顧患禍。盡 ,使處腹心 又無嫌

寬宥。 日、「戶 有詢 所規諫,故與吉甫不協。 日 1,降制 益嘉其直。 訪 前 部 及鎭州 後 ,多協事 ,以絳 比有進獻,至卿獨無,何也?」終曰:「將戶部錢獻入內藏,是用物以結私恩。」上 朝臣 . 裴武、柳公綽、白居易等,或爲姦人所排陷,特加貶黜,絳每以密疏申論,皆獲 爲中書侍 節度使王士眞死, 機。 吐突承璀恩寵莫二,是歲,將用絳爲宰相,前一日,出承璀爲淮南監軍。 六年,猶以中人之故,罷學士,守戶部侍郎,判本司事。 郞、同中書門下平章事。 時議者以吉甫通於承璀,故絳尤惡之。絳性剛計,每與吉甫爭論, 朝廷將用兵討除, 絳深陳以爲未可。 同列李吉甫便僻,善逢迎上意,絳梗直 絳旣盡心匡益 嘗因次對,憲宗 , 帝 包

翌

日,面

賜金紫,帝親爲絳擇良笏賜之。

列

人多直絳。 憲宗察絳忠正自立,故絳論奏,多所亢從。

愚婦假時日鬼神者,欲利欺詐,參之見聞,用以刺射小近之事,神而異之。 協則行之。末俗浮僞,幸以徼福。正行慮危,邪謀覬安,遲疑昏惑,謂小數能決之。而愚夫 「臣聞古先哲王畏天命,示不敢專,邦有大事可疑者,故先謀於卿士庶人,次決於卜筮,俱 上嘗謂絳曰:「卜筮之事,習者罕精,或中或否。近日風俗, 尤更崇尙, 何也?」對曰: 近者,風俗近巫,

此誠弊俗。聖旨所及,實辨邪源。但存而不論,弊斯息矣。」 他日延英,上曰:「朕讀玄宗實錄,見開元致理,天寶兆亂。 事出一朝,治亂相反,何

也?」絳對曰:

至今兵宿兩河,西疆削盡,甿戶凋耗,府藏空虛,皆因天寶喪亂,以至於此。 隙,遂至兩都覆敗,四海沸騰,乘輿播遷,幾至難復。 蓋小人啓導,縱逸生驕之致也。 不聞直言。嗜慾轉熾,國用不足,姦臣說以興利,武夫說以開邊。天下騷動,姦盜乘 謐。 開元二十年以後,李林甫、楊國忠相繼用事,專引柔佞之人,分居要劇,苟媚于上, 理之初,亦勵精聽納,故當時名賢在位,左右前後,皆尙忠正。是以君臣交泰,內外寧 知人事之艱難。 臣聞理生於危心,亂生於肆志。玄宗自天后朝出居藩邸,嘗蒞官守,接時賢於外, 臨御之初,任姚崇、宋璟,二人皆忠鲠上才,動以致主爲心。 安危理亂, 明皇乘思

實繫時主所行。陛下思廣天聰,親覽國史,垂意精賾,鑒于化源,實天下幸甚

以致康寧。 對曰:「行事過差,聖哲皆所不免,故天子致諍臣以匡其失。故主心理於中,臣論正於外,制 卿等,所冀直言。各宜盡心無隱,以匡不逮。無以護失爲慮也!」 良爲此也。 理於未亂,銷患於未萌。主或過舉,則諫以正之,故上下同體,猶手足之於心膂,交相爲用 上又曰:「凡人行事,常患不通於理,已然之失,追悔誠難。 此亦常理,非難奠之事。 臣等備位,無所發明,但陛下不廢獨言,則端士賢臣,必當自效。」帝曰:「朕擢用 但矜得護失,常情所蔽。古人貴改過不吝,從善如流 古人處此,復有道否?」終

其秋,魏博節度使田季安死,其子懷諫幼弱,軍中立其大將田興,使主軍事,興卒以六

州之地歸命。其經始營創,皆絳之謀也。

難 王各與一人。伊不 緣丹王已下四人,院中都無侍者,股令於樂工中及閭里有情願者,厚其錢帛,祇 損聖德,須有論諫。」或曰:「此嗜欲間事,自有諫官論列。」|絳曰:「相公居常病諫官論事 事 ,非卿盡忠於股,何以及此?股都不知向外事,此是敎坊罪過,不渝股意,以至於此。股 事即推與諫官可乎?」乃極言論奏。 時教坊忽稱密旨,取良家士女及衣冠別第妓人,京師囂然。|絳謂同列曰:「此事大虧 會股意,便如此生事。股已令科罰,其所取人,並已放歸。 翌日延英,憲宗舉手謂絳曰:「昨見卿狀所論採擇 若非卿言,跃 取 四人,四 丁, 此

列傳

第

寧知此過?」

河中觀察使。 戶 部尙書, 年,封高邑縣男。 出爲華州刺史。 河中舊爲節制, 絳以足疾,拜章求免。 未幾, 皇甫鎛惡絳,祇以觀察命之。 入爲兵部尙書。 九年,罷知政事 丁母憂。 十四四 十五年,餺得罪, ,授禮部尙書。 年, 檢校吏部尚書, **絳**復爲兵部 十年, 檢校

留守。 爲兵部尙書。 穆宗卽位,改御史大夫。 二年正月, 長慶元年,轉吏部尙書。 檢校本官、兗州刺史、兗海節度觀察等使。 穆宗亟於畋遊行幸,絳於延英切諫,帝不能用。 是歲,加檢校尚書右僕射,判東都尚書省事,充東都 三年,復爲東都留守。 絳以疾辭, 四年 ,

就加檢校司空。

詣闕 l古、王守澄已受從諫賂,俱請以 新使已到,所謂「疾雷不及掩耳」。潞州 論 實 、曆初,入爲尙書左僕射。 絳密奏請速除近澤潞四面將帥 從諫留後 二年九月,昭義節度使劉悟卒,遺表請以子從諫嗣襲,將吏 軍 ,不能用絳言。 心,自有 一人,以充節度,令倍程赴鎭,使從諫未及拒命, 所繫。 從諫無位,何名主張。 時宰相李逢

嘗與御史中丞王璠相遇於道〔€〕,膰不爲之避,絳奏論事體,敕命兩省詳議,咸以絳論奏是**。** |絳以直道進退,聞望傾於 時。 然剛腸嫉惡 ,賢不肖太分,以此爲非正之徒所忌。 又

吉佑 瑶惡絳,乃罷絳僕射,改授太子少師,分司東都。

爲亂 蠻寇 死焉。 所害,時年六十七。 定,募卒悉令罷歸 會宴,不及設備。 怏怏而退。監軍使楊 ,以逞 文宗即位 ,韶徵赴援。 私 憾。 ,徵爲太常卿。 募卒因監軍之言,怒氣益甚,乃譟聚趨府,劫庫兵以入使衙。 聞亂北走登陴,衙將王景延力戰以禦之。兵折矢窮,景延死,絳乃爲 |絳初登陴,左右請||絳縋城,可以避免,絳不從,乃井從事趙存約、薛齊俱 叔元貪財怙寵,怨絳不奉己,乃因募卒賞薄,衆辭之際,以言激之,欲其 四年二月十日,絳晨興視事,召募卒,以詔旨喩而遣之,仍給以廩麥, 絳於本道募兵千人赴蜀,及中路,蠻軍已退,所募皆還。 。二年,檢校司空,出爲興元尹、山南西道節度使。 **絳**方與賓 興元兵額素 三年多,南 亂兵

仗鉞宣 淸直。 横罹不幸之酷。 部 夫、檢校司空,兼興元尹、御史大夫、上柱國、趙郡開國公、食邑二千戶李絳,神授聰明,天賦 ,俾遂便安。 文宗聞奏震悼,下制曰:「朝有正人,時稱令德,入參廟算,出總師干。 抱仁義以希前哲, 風 聯居樂土,乘軒鳴玉,嘗極清班。 而變 殄瘁興歎, 起不圖,禍生無兆。 立標準以程後來。 **搢紳所同。** 故山南西道節度、管內觀察處置等使、銀靑光祿大 殲良之働,聞計增傷。 抑揚時情, 先聲而物議皆歸,不約而羣情自許。 坐致台輔。 是極哀榮,用優典禮 佐我烈祖, 格于皇天。 方當寵任之臣, 漢中名

四二九二

正秩,品數甚崇,式表異恩,以攄沉痛。 可贈司徒。 仍令所司,擇日備禮册命。」賻布帛三千

段、米粟二百石。子璋、頃。

璋,登進士第。盧鈞鎭太原,辟爲從事。 大中末,入朝爲監察,轉侍御史。 出刺兩郡,

終宣歙觀察使。子德林。

吾閱人多矣,無如楊主簿者。」後竟以女妻之。秩滿,爲鄂岳、江西二府從事至,累官至侍 陵, 滉性剛嚴, 少所接與。及於陵以屬吏謁謝, 滉甚奇之, 謂其妻柳氏曰: 「夫人常擇佳壻, 奉先尉。父太淸,宋州單父尉。於陵,天寶末家寄河朔。 及長,客於江南。好學,有奇志。弱冠舉進士,釋褐爲潤州句容主簿。時韓滉節制金 楊於陵字達夫,弘農人。漢太尉震之第五子奉之後。 祿山亂, 其父歿於賊, 於陵始六 曾祖珪,爲辰州掾曹。 祖冠俗,

郎,歷考功、吏部三員外,判南曹。時宰相有密親調集,文書不如式,於陵駁之,大協物論 幸方熾,不欲進取,乃卜築於建昌,以讀書山水爲樂。 韓滉自江南入朝,總將相財賦之任,頗承顧遇,權傾中外。 滉歿,貞元八年,始入朝,爲膳部員外 於陵自江西府罷,以婦翁權

孟容改太常少卿, 之,拜中書舍人。 遷右司 先是,禁軍影占編 國 軍等使。 郎中, 未幾, 復轉 戶 時李實爲京兆尹 吏部郎中,改京兆 於陵爲秘書少監。 遷浙 ,無以 江 東道都團 區 别。 自於陵請致挾名,每五丁者,得兩丁入軍 , 少尹 練觀察等使。 恃承恩寵 貞元末, 出爲絳州 實輩敗、遷於陵 於陵 政聲流聞, 與給事 刺 史。 中許 德宗雅聞 為華州 入拜戶部侍郎 孟 容 其名 俱 刺 不 史,充潼 附 將辭赴 ,復改 四丁、三丁者, 協 爲 關防禦、鎖 京兆 實 郡,詔留 (媒孽

振悍戾貪 裴垍爲於陵 元和初,以考策升直言極諫牛僧孺 一态,干撓軍政,於陵奉公潔己,遂振 申理 ,憲宗感悟。 五年,入爲吏部侍郎。 等, 爲執政所怒,出爲嶺南節度使。 無能奈何,乃以飛語上 遂振 終自得罪 聞 憲宗驚惑,賴 會監軍使許遂 宰相

各以條限。

由是京師豪強,復知所畏。

再遷戶部

侍

郎

題、屯田 置官 深朽 非次置官 人校能否,元和 斷,吏緣爲姦 不便。」宰執以已置躓等,祇令考科目選人, 於陵爲吏部,凡四周歲,監察姦吏,調補平允,當時稱之。 員外張仲素、太學博士陸亘等爲之。 ,不知曹內公事。 初罷之。 ,奏換大曆七年至貞元二十年甲庫曆,令本司 七年,更部尚書鄭餘慶以疾請告,乃復置考判官,以 考官祇論 判之能否,不計關 於陵 其餘 自東都 常調,委本司 員 了; 本 來, 司祇計 言曰:「本司 初, 吏部試判, 別差考判官三 郎官監換 自考。 員闕 引考判, 幾何, 於陵 兵部員外郎章 又以甲曆年 定其留放。 自當公心。

列

時推西用兵,於陵用所親爲唐鄧供軍使,節度使高霞寓以供軍有闕,移牒度支,於陵不爲之 於陵爲桂陽郡守,量移原王傅。復遷戶部侍郎,知吏部選事。會誅李師道,分其地爲三鎭, 易,其闕如舊。 朝廷思有所制置,以於陵兼御史大夫,充淄、青十二州宣慰使,還奏合旨。 九年,妖人楊叔高 霞寓軍屢有摧敗,詔書督責之,乃奏以度支饋運不繼。憲宗怒,十一年, 貶 自廣州來干於陵,請爲己輔,於陵執奏殺之。 改兵部侍郎、判度支。

年,授檢校右僕射、兼太子太傅。 穆宗卽位,遷戶部尙書。長慶初,拜太常卿,充東都留守。年高,拜章辭位。 旋以左僕射致仕,詔給全俸,懇讓不受。 寶曆二

操守,時人皆仰其風德。 於陵器度弘雅,進止有常。居朝三十餘年,踐更中外,始終不失其正。 大和四年十月卒, 年七十八, 册贈司空, 諡貞孝。 居官奉職,亦善 子四人:景復、

嗣復、紹復、師復。

嗣復自有傳。 景復位終同州刺史。 紹復進士擢第,弘辭登科,位終中書舍人。 師復位

終大理卿。

47

拾遺。

子拙、 大中後, 振等。 楊氏諸子登進士第者十人:嗣復子授、技、拭、撝,紹復子擢、拯、據、揆, 擢終給事中。 拯司封員外郎。 據右補闕。揆左諫議大夫。 拙左庶子。 振左

府,嘉言啓沃,不以身爲。糜軀將壇,沒有餘裕。 翼,凌厲亨衢,仗鉞秉衡,扶持衰運。天胡罰善,遇盜而殂,悲哉!李趙公頡頏禁林,訏謨相 史臣曰:王氏二英,播、起位崇將相,善始令終。而炎薄祐短齡,美鍾於鐸,而能驤首矯 楊僕射避婦翁之當軸,疏驕尹之怙權,守

道居貞,壽考終吉,行已始卒,人以爲難。美哉!

贊曰:王氏儒宗,一門三相。趙公排擯,言猶鯁亮。 干將雖折,不改其剛。 楊君之德,

韶、夏洋洋。

校勘記

(1) 山南西道 各本原作「山南東道」,新書卷一六七王播傳作「山南西道」,按王起爲興元尹,當在

山南西道,新書是,據改。

- 〔三〕義成軍 「成」字各本原作「武」,據新書卷一八五王鐸傳改。
- (三) 光啓四年 通鑑卷二五六作「中和四年」。
- 列 第一百一十四 各本原作「王播」。按此處史文所述,係王璠事,今據本書卷一六九王璠傳改。 校 勘 記 四二九五

舊唐書卷一百六十五

列傳第一百一十五

子華子公度 章夏卿 王正雅 族孫凝 崔玄亮 温造 柳公綽 子仲郢 子璋 郭承嘏 孫璧 殷侑 玭 孫盈孫 弟公權 伯父子華 徐晦

部侍郎,轉京兆尹、太子賓客,檢校工部尙書、東都留守,遷太子少保。卒時年六十四,贈左 所著史論,薦之于朝,遂爲門人。改蘇州刺史。貞元末,徐州張建封卒,初授夏卿徐州行 中選赤畿令,改奉天縣令。以課最第一,轉長安令。改吏部員外郎,轉本司郎中, 興弟正卿俱應制舉,同時策入高等,授高陵主簿。 司馬,尋授徐泗濠節度使。 出爲常州刺史。夏卿深於儒術,所至招禮通經之士。時處土竇羣寓於郡界,夏卿以其 章夏卿字雲客,杜陵人。父迢,檢校都官郎中、嶺南節度行軍司馬。 夏卿未至,建封子愔爲軍人立爲留後,因授旄鉞。 累遷刑部員外郎。時久旱蝗,韶於郎官 夏卿苦學,大曆中 徴夏卿 拜給 為東

列

第

一 百 一 十

五

窜夏

卿

王

Œ

雅

四二九七

僕射。

其所與游辟之賓佐,皆一時名士。 了,其後多至卿相,世謂之知人**。** 夏卿 有風韻,善談讌,與人同處終年,而喜愠不形於色。 爲政務通適,不喜改作。 始在東都,傾心辟士,頗得才 撫孤侄,恩踰己子,早有時稱。

郎崔邠 號爲難 就 中人爲監軍,怙權干政,正雅不能堪,乃謝病免。 **鯁直名於當代,卒諡曰忠惠。** 縣宣賜。 王正 甚知之,累從職使府。 理 雅字光識,其先太原人二。東都留守翙之子。 ,正雅抑強扶弱,政甚有聲。 遷戶部郎中,尋加知臺雜事,再遷太常少卿,出爲汝州刺史,充本州防禦使。 元和十一年,拜監察御史,三遷爲萬年縣令。當穆宗時,京邑 正雅少時,以孝行修謹聞。 會柳公綽爲京兆尹,上前褒稱,穆宗命以緋衣銀章, 伯父翊,代宗朝御史大夫,以貞亮 元和初,舉進士,登甲科,禮部侍

,別具狀聞。 宰相重臣,無敢顯言其事者。唯正雅與京兆尹崔琯上疏曰, 入 爲大理卿。 由是獄情稍緩,申錫止於貶官,中外翕然推重之。 會宋申錫事起,獄自內出,卒無證驗。 是時王守澄之威權,鄭注之寵勢, 請出造事者, 大和五年十一月卒,贈左 **一付外考驗其**

ij

凝。 正雅從弟重,翊之子也,位止河東令。

重子衆仲,

登進士第,

累官衡州刺史。

衆仲子

年,檢校右散騎常侍、潭州刺史、湖南團練觀察使。入爲兵部侍郎,領鹽鐵轉運使。又以不奉 權倖,改秘書監。出爲河南尹、檢校禮部尙書、宣州刺史、宣歙觀察使。 侍郎徵。 遷中書舍人。時政不協,出爲同州刺史,賜金紫。暮年,移疾華州敷水別墅。 郎,歷禮部、兵部、考功三員外,遷司封郎中、長安令。中丞鄭處誨奏知臺雜,換考功郎中, **鄂縣尉、集賢校理,遷監察御史,轉殿中。宰相崔鉉出鎭揚州,奏爲節度副使。** 文士所稱。再登進士甲科。崔璪領鹽鐵,辟爲巡官。歷佐梓潼、宣獻使幕。宰相崔龜從奏爲 凝字致平,少孤, |凝性堅正,頁闥取士,拔其寒俊,而權豪請託不行,爲其所怒,出爲||商州 宰相鄭肅之甥,少依舅氏。 年十五,兩經擢第。 嘗著京城六崗銘,爲 凝咸通中兩佐宣城 踰年 入為起居 刺 、以禮部 史。 明

犯令,凝卽斬之以徇,命別將鳥穎代儔赴援,竟解歷陽之圍。 踰歲,黃巢自嶺麦北歸,大掠淮南,攻圍和州。 列 第 百 + 五 王 IE 雅 柳 公 綽 凝令牙將樊儔率師據采石以援之。 賊怒,引衆攻宣城。 四二九九 大將王涓

使幕,備究人之利病,滌除積弊,民俗阜康

年夏, 家族。 請出 位 梯衝之具,急攻數月,禦備力殫,吏民請曰:「賊之凶勢不可當,願尙書歸款退之,懼覆尙書 意請 一終兵部侍郎。 行 軍逆戰 。」凝曰:「人皆有族,予豈獨全?誓與此城同存亡也。」旣而賊退去,時乾符五 `疾甚,有大星墜於正寢。八月卒于郡,時年五十八。無子,以弟子饑爲嗣。 饑兄與, ,凝卽閱集丁壯,分守要害,登陴設備,涓果戰死。 ,凝曰:「賊忿恚而來,宜持重待之。彼衆我寡,萬一不捷,則州城危矣!」涓銳 賊乘勝而來,則守有備矣。 賊爲 年也。 其

聰敏。 年 ,復應制舉,再登賢良方正科,時年二十一。制出,授渭南尉。 柳 年十八,應制舉,登賢良方正、直言極諫科,授祕書省校書郎,貞元元年也。 公綽字起之,京兆華原人也。祖正禮,邠州士曹參軍。父子温,丹州刺史。 公綽幼 貞元四

官,尤相善。 多,薦授開州刺史,入爲侍御史,再遷吏部員 有書千卷, 公綽性謹 不 讀非聖之書。爲文不尙浮靡。 先度入爲吏部郎中,度以詩餞別,有「兩人同日事征西,今日君先捧紫泥」之 重 一,動循禮法。 屬歲飢,其家雖給,而每飯不過一器。歲稔復初。 了外郎。 慈隰觀察使姚齊梧奏爲判官,得殿中侍御史。 武元衡罷相鎭西蜀,與裴度俱爲元衡判 家甚貧,

ı.

•

元和初,憲宗頗出遊畋,銳意用兵,公綽欲因事諷諫,五年十一月,獻太醫箴一篇,其辭

官、羣藝有署。臣司太醫,敢告諸御。 先。心靜樂行,體和道全,然後能德施萬物,以享億年。聖人在上,各有攸處。庶政有 巧必喪眞,智必誘情,去彼煩慮,在此誠明。醫之上者,理於未然,患居慮後,防處事 養其外,前修所忌。聖心非之,孰敢違之。人乘氣生,嗜欲以萌,氣離有患,氣凝則成。 惑,孰能移之?畋遊恣樂,流情蕩志,馳騁勞形,咤叱傷氣。惟天之重,從禽爲累。不 息;衣服所以稱德也,侈則生慢。 唯過與侈,心必隨之,氣與心流,疾亦伺之。 聖心不 矣,氛蒙晦之。謂地厚矣,横流潰之。聖德超邁,萬方賴之。飮食所以資身也,過則生 奔射猶敗,氣行無間,隙不在大。睿聖之姿,清明絕俗,心正無邪,志高寡欲。謂天高 光以新。寒暑滿天地之間,狹肌膚於外;好愛溢耳目之前,誘心知於內。淸潔爲隄, 天布寒暑,不私於人。品類旣一,崇高以均。惟謹好愛,能保其身。淸淨無瑕,輝

憲宗深嘉之。翌日,降中使獎勞之日:「卿所獻之文云:『氣行無間,隙不在大。』何憂朕之深 也?」踰月,拜御史中丞。

列

兼御史中丞,充湖南觀察使。湖南地氣卑濕,公綽以母在京師,不可迎侍,致書宰相,乞分 司洛陽,以便奉養,久不許。八年,移爲鄂州刺史、鄂岳觀察使,乃迎母至江夏。 公綽素與裴垍厚,李吉甫出鎭淮南,深怨垍。六年,吉甫復輔政,以公綽爲潭州刺史、

輩知家事,何以報効?」故鄂人戰每克捷。 疾病、養生、送死,必厚廩給之。軍士之妻冶容不謹者,沉之于江。行卒相感曰:「中丞爲我 兵馬都虞侯,三牒授之。乃選卒六千屬聽, 戒其部校曰:「行營之事, 一決都將。」聽感恩畏 抵安州,李聽以廉使之禮事之。公綽謂之曰:「公所以屬鞬負弩者,豈非爲兵事耶?若去戎 威,如出麾下。其知權制變,甚爲當時所稱。鄂軍旣在行營,公綽時令左右省問其家。 且署職名,以兵法從事矣。」聽曰:「唯公所命。」即署聽爲鄂岳都知兵馬使、中軍先鋒、行營 容,被公服,兩郡守耳,何所統攝乎?以公名家曉兵,若吾不足以指麾,則當赴闕。 不然,吾 公綽曰:「朝廷以吾儒生不知兵耶?」即日上奏,願自征行,許之。公綽自鄂濟涓江〔三〕,直 九年,吳元濟據蔡州叛,王師討伐,韶公綽以鄂岳兵五千隸安州刺史李聽,率赴行營。

罷使,復爲京兆尹、兼御史大夫。 十四年,起爲刑部侍郎,領鹽鐵轉運使。 十一年,入爲給事中。李師道歸朝,遺公綽往鄆州宜論。 轉兵部侍郎、兼御史大夫,領使如故。 使還,拜京兆尹,以母憂免。 長慶元年,

馬。 兵 三十匹, 使命繁倂 衣 時 冠 河朔復叛,朝廷用 衣黃綠者不下十 士 庶 館 驚擾怨嗟,遠近喧騰, 遞 置乏, 兵,補授行營諸 鞍 匹、 馬 五 多闕 匹。 驛吏不 叉 行李將絕。 へ 敕 使 行 將, 得視券牒 朝令 李 少改, 入數 伏望聖慈 隨 驛騎 都 口 無 卽 相望。 限 聊 供。 約。 爲 定限。」乃下 驒 其衣 公綽 馬 旣 維紫 奏曰:「自幽、 盡 乘馬者二十、 遂奪路 中書條 鎭 人鞍 疏 用

賜 遺其子達情,言不能接見。 ,宜力疾公見。 年 九 月 遷 御 安有臥令子弟傳言 史大夫。 公綽謂其子曰:「聖上以公官重, 韓弘 病,自河中入朝。 耶? 」弘懼,挾扶而 以以 出,人皆聳 守 令百 司徒、中書令, 司省 然。 問 異 詔 禮 百僚問疾 也。 如 拜 弘

數。

自是·

更不

·告勞。

以言直爲北司所

惡

尋

轉吏部

侍

郎

自防 在; 郵 廷 合候 也 **吏犯法**, 」竟以 姦 不 公綽遽謂 至。」公綽曰:「安有良馬害人乎?」 吏壞法,法亡。 改尙 一戎容見。 一喊 軍 吏自以漢上 賄 書左丞 「惜哉 有道 舞文。 誅舞文者。」公綽馬害圉 又拜 地高 + 獻 至 縣令以公綽守法 檢校戶部尙書、 於鄂,禮太過。 丹藥, 藥來於賊臣之境, 試之有驗, 亟命殺之。 襄 公綽日:「奇章才離台席,方鎭 人,命斬之。 ,必殺贓 州 問所從來, 雖驗何益 刺 史、 牛僧孺 吏。 Ш 南 ! 日:「鍊此丹於薊門。 獄具, 賓客進言曰:「可惜 東道 罷相鎭江夏, 公綽 」乃沉之于江,而 節度使。 判之日:「贓 行部 重宰 逐道 具 吏犯 良馬,圉 相 至躓縣 時 (、戎容, 是尊 於 朝 法 鄧

列

縣人鄭懷政病狂,妄稱天子,公綽捕而殺之。

公綽議曰:「尊殿卑非鬭,且其子在,以妻而戮其母,非敎也。」竟減死。 詔諸鎭皆稟邪寧節度使制置。三年,入爲刑部尙書,京兆人有姑鞭婦致死者,府斷以償死。 敬宗 所部有神策諸鎮,屯列要地,承前不受節度使制置,遂致北虜深入。公綽上疏論之,因 即位,加檢校左僕射。寶曆元年,入爲刑部尙書。二年,授邠州刺史、邠寧慶節度

梁國夫人對酒食問遺之。沙陀感之,深得其效。 直抵雲、朔塞下,治廢栅十一所,募兵三千付之,留屯塞上,以禦匈奴。 其妻母來太原者,請 而還,不敢侵犯。壓北有沙陀部落,自九姓、六州皆畏避之。公綽至鎮,召其酋朱耶執宜, 好之意。暢感義出涕,徐驅道中,不妄馳獵。及至,闢牙門,令譯引謁,宴以常禮。 外,懼其襲奪。太原故事,出兵迎之(日)。暢及界上,公綽使牙將祖孝恭單馬勞問,待以修 將軍李暢以馬萬匹來市,託云入貢。所經州府,守帥假之禮分,嚴其兵備。留館則戒卒於 大和四年,復檢校左僕射、太原尹、北都留守、河東節度觀察等使。 是歲,北虜遣梅祿 及市馬

非薛氏所生。外兄薛宮早卒,一女孤,配張毅夫,資遺甚於己子。性端介寡合,與錢徽、蔣 公綽天資仁孝,初丁母崔夫人之喪,三年不沐浴。事繼親薛氏三十年,姻戚不知公綽 六年,以病求代。三月,授兵部尙書,徵還京師。四月卒,贈太子太保,諡曰成。

、杜元 公綽將 穎、薛存誠文雅相知, 赴 襄陽, 首辟之, 朗竟爲名相。 交情款密。 凡六開府幕, 盧簡辭、 崔爽、 得人尤盛 夏侯孜、 韋長、 錢徽掌貢之年,鄭朗覆 李續、 李拭 至公

吏

部

侍郎

,與舅左丞崔從同省,

人士榮之。

子仲郢,弟公權

仲野 所庇 奏。 章。 令 ; 御 史。 有父 仲野 帝 臣 聖 決杖 明 富 遂 雖 至微 在 平 風 字論蒙, 詔 配流。 縣 京兆府行決,不用監之,然朝廷嘉其守法。 上,當官無壞法之臣。 動修 人李秀才 豈敢 右補闕 禮法 元和 曠職? ,籍在 十三年進士擢第, 蔣係 僧 孺 其秀才未敢行決, 禁軍,誣鄉 歎曰:「非積習名教 上 疏 今秀才犯殺人之科,愚臣備監決之任,此賊不 論之, 人斫父墓柏,射殺之,法司 釋褐秘書省校書郎。 不省。 望別降敕處分。」乃詔御史蕭傑監之, 仲郢 ,安能及此! 執奏曰:「聖王作憲, 入 牛僧孺鎮江 為監察御 以專殺論。 夏, 史。 殺 人有 文宗 死, 辟爲 五. 年 傑又執 是亂 必 以 從事 死之 中 遷侍 典

員, 額 人皆危懼。 外官員, 時議1 會昌 爲 中 恢。 仲郢曰:「諸 德 ,三遷吏部郎中,李德裕 裕 遷 知 諫議 其 無 挒 大 私 夫。 每 多申闕 益 重之。 五. 年, 頗知之。 淮南奏吳湘獄 何 武宗築望仙 煩牒耶? 武宗 臺, 有韶減冗官 倖門 御史崔元藻覆按得罪,仲郢上 仲郢累疏切諫,帝召諭之曰:「聊因舊 頓 塞。 ,吏部條疏 仲野 條 理 旬 **一、欲牒天下州** 百, 減一千二百 疏 理之, 府取

列

歐母,詡爲禁軍小校,仲郢不俟奏下,杖殺。爲北司所譖,改右散騎常侍,權知吏部尙書銓 趾 加 如奇章門館。」德裕不以爲嫌。 增 新字,仲郢止之,唯淮南 '葦,愧卿忠言。」 德裕奏爲京兆尹,謝日,言曰:「下官不期太尉恩獎及此,仰報厚德,敢不 加新 時廢浮圖法,以銅像鑄錢。 字,後竟爲僧人取之爲像設鐘磬。 仲郢爲京畿鑄錢使,錢工欲於模 統 干 泉 訴 表 (甥 劉

同列有疑仲郢與墀善,左授祕書監。數月,復出爲河南尹。以寬惠爲政,言事者以爲不類 理,甚獎之,俄而爆入輔政,遷爲河南尹。莅事踰月,召拜戶部侍郎。居無何,爆罷知政事。 京兆之政。仲郢曰:「輦轂之下,彈壓爲先; 郡邑之治,惠養爲本。 宣宗卽位,德裕罷相,出仲郢爲鄭州刺史。 周墀自江西移鎭滑臺,過鄭,觀其境內大 何取類耶?」

州刺 初, 之曰:「刺史科小罪誡人,但本非死刑,雖未出辜,其實病死。」罰方义百直, 郎。入朝未謝,改兵部侍郎,充諸道鹽鐵轉運使。大中十二年,罷使,守刑部尙書。 如之何。忡郢因事決殺,部內肅然,不俟行法而自理。在鎭五年,美績流聞,徵爲吏部侍 轉兵部,加金紫光祿大夫、河東男、食邑三百戶。俄出爲興元尹、山南 史盧方乂以輕罪決部民,數日而斃,其妻列訴,又旁引他吏,械繫滿獄。 大中年,轉梓州刺史、劍南東川節度使。 孔目吏邊章簡者,以貨交近倖,前後廉使無 西道節 繫者皆釋,郡人 仲野 度使。 召其妻謂 咸通 鳳

深感之。 射、東都留守。盜發先人墓,棄官歸華原。除華州刺史,不拜。 因決贓吏過當,以太子賓客分司東都。 踰年,爲魏州刺史。 數月,以本官爲鄆州刺史、 數月, 檢校尚書左僕

天平軍節度觀察等使,授節鉞於華原別墅,卒於鎮

下,不復集,家人以爲候,唯除天平,烏不集。 初,仲郢自拜諫議後,每遷官,羣烏大集於昇平里第,廷樹戟架皆滿,凡五日而散。

裕兄子從質爲推官,知蘇州院事,令以祿利贍南宅。 家已空,遂絕蒸嘗,誠增痛惻。」綯深感歎,尋與從質正員官。 自明,其要云:「任安不去,常自愧於昔人,吳詠自裁,亦何施於今日。李太尉受責旣久,其 仲郢嚴禮法,重氣義。嘗感李德裕之知,大中朝,李氏無祿仕者。 令狐 **絢**爲宰相,頗不悅。 仲郢領鹽鐵時,取德 仲郢 近與絢書

氏自備。 退公布卷,不捨晝夜。 仲郢以禮法自持,私居未嘗不拱手,內齋未嘗不束帶。 又精釋典,瑜伽、智度大論皆再鈔,自餘佛書,多手記要義。 九經、三史一鈔、魏、晉已來南北 史再鈔,手鈔分門三十卷,號柳 三爲大鎭,廢無名馬,衣不薰 小楷精謹 無無 一字肆

撰尚書二十四司箴,韓愈、柳宗元深賞之。有文集二十卷。子珪、麈、玭

珪字鎭方,大中五年登進士第,累辟使府,早卒。

|鏖,|大中九年登進士第。 文格高雅。 **嘗爲馬嵬詩**, 詩人韓琮、李商隱嘉之。 馬植鎭陳

傳第一百一十五 柳公綽

列

而去。 許,辟爲掌書記,又從植汴州。 桂府尋亂,入爲右補闕。 李瓚鎮柱管,奏爲觀察判官。 僖宗幸圖,召充翰林學士,累遷諫議大夫,充職 軍政不愜, 壁極言不納,拂衣

辨析,亦不及此。」尋出廣州節度副使。明年,黃巢陷廣州,郡人鄧承勳以 爲副使。入爲刑部員外。湜爲亂將所逐,貶高要尉,玭三上疏申理。 出鎭澤潞,奏爲節度副使。入爲殿中侍御史。 爲起居郞。 玭 應兩經舉,釋褐秘書正字。又書判拔萃,高湜辟爲度支推官。 賊陷長安,爲刃所傷,出奔行在,歷諫議給事中,位至御史大夫。 李蔚鎭襄陽, 辟爲掌書記。 提見疏本數曰:「我自 踰年,拜右補闕。 小舟載玭脫禍。 **是再鎭澤潞**, 復 湜 召

玭嘗著書誠其子弟曰:

實藝懿行,人未必信,纖瑕微累,十手爭指矣。所以承世胄者,修己不得不懇,爲學不 不急賢」。亦由農夫鹵莽 得不堅。 生可以苟取名位,死何以見祖先於地下?不可恃者,門高則自驕,族盛則人之所嫉。 夫門地高者,可畏不可恃。 可畏者,立身行己,一事有墜先訓,則罪大於他人。 夫人生世,以無能望他人用,以無善望他人愛,用愛無狀,則曰「我不遇時,時 而種,而怨天澤之不潤,雖欲弗餒,其可得乎!

4

予幼聞先訓,講論家法。 立身以孝悌爲基, 以恭默爲本, 以畏怯爲務, 以勤儉爲

子孫 易黎甿之膏血;榎楚雖用,不可恣褊狹之胸襟。憂與福不偕,潔與富不並。比見門家 省事,而後可以言守法,守法而後可以言養人。直不近禍,康不沽名。廩祿雖微,不可 法,以交結爲末事,以氣義爲凶人。 肥家以忍順,保交以簡敬。 百行備,疑身之未周, 三緘 處己,和柔保身,以遠悔尤;及其衰也,但有暗劣,莫知所宗。此際幾微,非賢不 ,其先正直當官,耿介特立,不畏強禦;

及其衰也,唯好犯上,更無他能。 密,慮言之或失。廣記如不及,求名如儻來。去各與驕,庶幾減過。莅官則潔己 如其先

寡知 要,一資半級,雖或得之,衆怒羣猜,鮮有存者。茲五不是,甚於痤疽。痤疽則砭石可 苟利於己,不恤人言。 其二,不知儒術,不悅古道,懵前經而不恥,論當世而解願,身旣 瘳,五失則巫醫莫及。 前賢炯戒,方册具存,近代覆車,聞見相接。 嗜麯糵,以銜杯爲高致,以勤事爲俗流,習之易荒,覺已難悔。其五,急於名宦,暱近權 之,聞人之惡揚之,浸漬頗僻,銷刻德義,簪裾徒在,廝養何殊。其四,崇好慢遊,躭 ,惡人有學。其三,勝己者厭之,佞已者悅之,唯樂戲譚,莫思古道,聞人之善嫉 夫壞名災己,辱先喪家。其失尤大者五,宜深誌之。其一,自求安逸,靡甘澹泊,

夫中人已下,修辭力學者,則躁進患失,思展其用,審命知退者,則業荒文蕪,

列

不足採。唯上智則研其慮,博其聞,堅其習,精其業,用之則行,捨之則藏。 荷異於斯,

豈爲君子?

初公綽理家甚嚴,子弟克稟誠訓,言家法者,世稱柳氏云。

之,乞換一散秩。」乃遷右司郎中,累換司封、兵部二郎中、弘文館學士。 盡善,對曰:「用筆在心,心正則筆正。」上改容,知其筆諫也。歷穆、敬、文三朝,侍書中禁。 鎭夏州,辟爲掌書記。穆宗卽位,入奏事,帝召見,謂公權曰:「我於佛寺見卿筆蹟,思之久 公綽在太原,致書于宰相李宗閔云:「家弟苦心辭藝,先朝以侍書見用,頗偕工祝,心實恥 矣。」卽日拜右拾遺,充翰林侍書學士,遷右補闕、司封員外郞。穆宗政僻,嘗問公權筆何 公權字誠懸。幼嗜學,十二能爲辭賦。 元和初,進士擢第,釋褐秘書省校書郎。 李聽

有一喜事,邊上衣賜,久不及時,今年二月給春衣訖。」公權前奉賀,上曰:「單賀未了,卿可 賀我以詩。」宮人迫其口進,公權應聲曰:「去歲雖無戰,今年未得歸。 燭見跋,語猶未盡,不欲取燭,宮人以蠟淚揉紙繼之。 從幸未央宮苑中,駐輦謂公權曰:「我 文宗思之,復召侍書,遷諫議大夫。俄改中書舍人,充翰林書韶學士。 皇恩何以報, 春日得 每浴堂召對,繼

春衣。」上悅,激賞久之。

唯公權無言,帝留而問之,對曰:「人主當進賢良,退不肖,納諫諍,明賞罰。 小節耳。」時周墀同對,爲之股慄,公權辭氣不可奪。 帝謂之曰:「極知舍人不合作諫議,以 便殿對六學士,上語及漢文恭儉,帝舉袂曰:「此澣濯者三矣。」學士皆贊詠帝之儉德, 服澣濯之衣,乃

卿言事有諍臣風彩,却授卿諫議大夫。」翌日降制,以諫議知制誥,學士如故。

除授邪寧,物議頗有臧否。」帝曰:「畋是尙父之從子,太皇太后之季父,在官無過。 宮,致此除拜,此信乎?」帝曰:「二女入宮參太后,非獻也。」 公權曰:「瓜李之嫌,何以戶 將授|邪寧小鎭,何事議論耶?」|公權日:「以|畋勳德,除鎭攸宜。 人情論議者,言|畋進二女入 益,皆此類也。 開成三年,轉工部侍郞,充職。 嘗入對,上謂曰:「近日外議如何?」 |公權對曰:「自郭畋 因引王珪諫太宗出廬江王妃故事,帝卽令南內使張日華送二女還皎。 公權忠言匡 自金吾大

傳,改少師,居三品、二品班三十年。六年卒,贈太子太師,時年八十八。 國、河東郡開國公、食邑二千戶。復爲左常侍、國子祭酒。 李德裕素待公權厚,及爲珙奏薦,頗不悅,左授太子詹事,改賓客。累遷金紫光祿大夫、上柱 累遷學士承旨。 武宗卽位,罷內職,授右散騎常侍。宰相崔珙用爲集賢學士、判院事。 歷工部尙書。 咸通初,改太子少

公權初學王書,遍閱近代筆法,體勢勁媚,自成一家。 當時公卿大臣家碑板,不得公權

長。」公權續曰:「薰風 王、歐、虞、褚、陸之體,尤爲得意。 手筆者,人以爲不孝。 「辭淸意足,不可多得。」乃令公權題於殿壁,字方圓五寸,帝視之歎曰:「鍾、汪復生,無以加 (自南來,殿閣生微凉。] 時丁、袁 外夷入貢,皆別署貨貝,日此購柳書。 文宗夏日與學士聯句。 五 學士皆屬繼,帝獨諷 帝日: 上都西明寺金剛經碑備有鍾、 「人皆苦炎熱, 公權兩 我愛夏日 句,日:

過筆。 狀,勿拘眞行,帝尤奇惜之。 学文得家法」; 大中初,轉少師,中謝,宣宗召昇殿,御前書三紙,軍容使西門季玄捧硯,樞密使崔巨源 紙眞書十字, 紙草書八字, 曰「衞夫人傳筆法於王右軍」; 日 「謂語助者焉哉乎也」。賜錦綵、瓶盤等銀器,仍令自書謝 紙行書十一字, 日「永禪師眞草千

化耳。」 奏樂。 州 別貯酒器杯盂 黑硯 公權志耽書學,不能治生,爲勳戚家碑板,問遺歲時鉅萬,多爲主藏豎海鷗、龍安所竊。 次之。 常云:「聞樂令人驕怠故也。」 不復更言。 尤精左氏傳、國語、尚書、毛詩、莊子。 一箭, 所寶唯筆硯 緘縢 如故,其器皆亡。 圖畫,自局鐍之。 訊海鷗,乃曰:「不測其亡。」公權哂曰:「銀杯羽 常評硯,以青州石末爲第 每說一義,必誦數紙。 一,言墨易冷,絳 性曉音律,不好

نېن

公綽伯父子華,永泰初,爲嚴武西蜀判官,奏爲成都令。累遷池州刺史,入爲昭應令,知

不能 府 死 東 日 及。 十三縣捕賊, ,預爲墓誌。 興吾門者,此 有 尋檢校金部郞中、修葺華淸宮使。 知 兒 人之明,公綽生三日, 也。」因以起之爲公綽字。 視之, 謂其弟子温曰:「保惜此兒,福祚吾兄弟 子華二子:公器、公度。 元載欲用爲京兆尹,未拜而卒。 自 知 ائن

海常温耳! 公度善攝生 位位 止 ,年八十餘,步履輕便。或祈其術, 一光祿 少卿 曰:「吾初無術,但未嘗以元氣佐喜怒,氣

公器子遵,遵子璨,璨仕至宰相,自有傳。

密、湖、 夫,中謝日 道術,不樂趨競,久遊江 崔玄亮字晦叔, 山東磁州人也。 曹三郡刺史。 ,面賜金紫。 每一 湖。 朝廷推其名望 遷秩 至元和 ,謙讓輒 初 玄亮貞元十一年登進士第,從事諸侯府。 ,遷右散騎常侍 形 因 於色。 知已 薦達入朝。 大和初, 入爲太常少卿。 再遷監察御 史,轉侍御史。 四年,一 性雅淡,好 拜諫議: 出

對 殺之,未可也; ,與文宗往 來年,宰相宋申錫爲鄭注所構,獄自內起,京師震懼。 復 數 卿 百 大夫皆日殺之,未可也; 文宗初不省其諫,欲置申錫於法,玄亮泣奏曰:「孟軻有言:衆人皆 天下皆曰殺之,然後察之,方置於法。 玄亮首率諫官十四人,詣延英請 今至聖

列傳

第

百

+

五

崔玄

亮

温

造

其所請,乃授檢校左散騎常侍、虢州刺史。是歲七月,卒於郡所,中外無不歎惜 之代,殺一凡庶,尙須合於典法,況無辜殺一宰相乎?臣爲陛下惜天下法,實不爲申錫也。」 言訖,俯伏嗚咽,文宗爲之感悟,玄亮由此名重於朝。 七年,以疾求爲外任,宰相以弘農便

始玄亮登第,弟純亮、寅亮相次升進士科,藩府辟召,而玄亮最達。 玄亮孫貽孫,位至

侍郎。

所親曰:「此可人也。」徙家從之。建封動靜咨詢,而不敢螺以職任。及建封授節彭門,造歸 節概,少所降志,隱居王屋,以漁釣逍遙爲事。 下邳,有高天下之心。 建封恐一旦失造,乃以兄女妻之。 温造字簡興,河內人。祖景倩,南鄭令。父輔國,太常丞。 壽州刺史張建封聞風致書幣招延,造欣然謂 造幼嗜學,不喜試更,自負

後,邀求節鉞。 特達識略之士往喻之。建封乃強署造節度參謀,使于幽州。 「濟僻在遐裔,不知天子神聖,大臣忠藎。 時李希烈方悖,侵寇藩隣,屢陷郡邑。天下城鎭恃兵者,從而動搖,多逐主帥,自立 德宗患之,以范陽劉濟方輸忠款,但未能盡達朝廷倚賴之意,乃密韶建封選 願得率先諸侯,效以死節。」造還,建封以其名上 造與語未訖,濟俯伏流涕曰:

聞。 德宗 愛其才 ', 召 至京師 謂 之日:「卿誰家子? 年復幾 何? 造 對 日:「臣五代祖

 $\overline{\mathcal{H}}$ 代 祖 李 勣 臣 犬馬之年三 + 有二 0 德宗 奇之, 欲 用 爲 諫官 ,以語 泄 寢。

長 慶 元 年 授京兆 府司錄參軍 0 奉 使 河 朔 稱 旨 遷殿 中侍 御 史

ġ,

賜 受 總 道 克 F 福 ,喻以 融 緋 書 憲 輸 總 逐 魚 不 職 忠 旣 俯 袋 弘 絕 m 軍 望 雖 伏 及 幽 期 書 輕 充 州 流 鎭州 約 事 詔 太原 事 汗 劉 以 重 便 總請 :,若 皆 ,恐辱 蕃 殺 行 稱 期,即 小未 鎭 兵 田 以 州 弘 加 所 虚 國 於頸矣。 IE 继 瘖 命 股 部 州宣 之深 朝 默不 九 無 廷 州 能 用兵, 報。 意 諭 聽 及造 渝 使。 朝 旨。 旨 卿 以 乃 使還 帝 造 識 卿 穆宗 先令造銜 素能 初 機 日:「我 至 知 總 選 一范陽 變, 辦 遂 移家入覲, 미 事 使 命 在 往 了,爲股 者, 河 東宮時 劉 喩 東、 我懷 總 或 此 具 魏 薦 行。 、秦鞬 博、 朝 聞 造 無 廷遂以 劉總請覲 澤潞、 造對 多讓 郊迎 帝 召 也。」 横 張 而 乃宜 海 謂之曰:「肸 及 臣 弘靖代之。 乃 聖旨 深冀、易定 拜 我 府 起 卽 縣 示 居舍人, 位 吏, 以禍 以 及 比 朱 年 劉 初

股 九 躑 冠 + 於 七 俄 流 外 里 面 溉 廊 坐 賏 祐 田 諫 私 臣 謂 議 千頃 阻 大 而 夫 不行。 郡 李 景儉 X 獲 夜踰蔡州 李 利 史館 站 乃名爲 自 飲 夏州 城檎 酒 景儉 入拜 右 吳元濟, 史 **、醉謁** 金吾 渠。 () 違制 丞 未嘗 居 相 QU 年 **Н** 心動, 進 ·, 召 馬 造爲朗州 拜 今日 百 侍 御 五 膽 史,請 + 刺 匹, 史。 温 復 造 在 置 御 正 任 史。 彈 衙 開 彈 事 後 吁 朱 祐 渠 口

五

列

畏哉!」遷左司郞中,再知雜事。 尋拜御史中丞。

坊, 今乃遠至兩坊, 謂之『籠街喝道』。但以崇高自大, 不思僭擬之嫌。 造蔑朝廷典禮,凌陛下侍臣,恣行胸臆,曾無畏忌。凡事有小而關分理者,不可失也。分理 其兩巡使崔蠡、姚合火滅方到,請別議責罰。」敕曰:「事出非常,臺有囚繫,官曹警備,亦爲 中尉、樞密,皆環立於日華門外,令神策兵士救之,晡後稍息。是日,唯臺官不到,造奏曰: 典。」敕曰:「憲官之職,在指佞觸邪,不在行李自大;侍臣之職,在獻可替否,不在道路相 逢, 造又捉其從人。當時緣不上聞, 所以暴犯益甚。臣聞元和、長慶中, 中丞行李不過半 決脊十下,左拾遺舒元褒等上疏論之曰:「國朝故事,供奉官街中,除宰相外,無所迴避。 温 周慮,即合待罪朝堂,候取進止。量罰自許,事涉乖儀。温造、姚合、崔蠡各罰一月俸料。」 法更壞法,何以持繩?前時中書舍人李虞仲與造相逢,造乃曳去引馬。 知制誥崔咸與造相 「昨宮中遺火,緣臺有繫囚,恐緣爲姦,追集人吏隄防,所以至朝堂在後,臣請自罰三十直。 一失。亂由之生。遺、補官秩雖卑,陛下侍臣也,中丞雖高,法吏也。侍臣見淩,是不廣敬, 造性剛褊,人或激觸,不顧貴勢,以氣凌藉。嘗遇左補闕李虞於街,怒其不避,捕祗承人 大和二年十一月,宮中昭德寺火。寺在宣政殿東隔垣,火勢將及,宰臣、兩省、京兆尹 並列通班,合知名分,如聞喧競,亦已再三,旣招人言,甚損朝體。 其臺官與供奉官同 若不糾繩, 實虧

æ

步 近 道 餘人杖殺 日巳來 聽先後 然造之舉奏, 應合導從官 而行,道途卽祗揖而過,其參從人則各隨本官之後,少相辟避, 南曹吏李竇等六人刑於都 無 所 一,事 吐茹。 力 多者 朝廷 有 街衢之中, 喪不 市 以 遷尙書右丞,加大中大夫, 禮 行李 で配 不以類者, 太過。 自 了 今後 悉劾之。 傳 呼前 封祁縣開 獲僞官王果等 勿言衝突。 後 不得 國 過三百 丸 叉聞 賜 金

紫。

德彝 臣及 用兵勞費 南 西道 、邻陽 興元 四 年 節 ·,興元 度使。 ,造奏日:「臣計諸道 都 諸 將劉 軍 軍亂 相 造辭 續而 士 和 ,殺節度使李絳,文宗以造氣豪嫉惡,乃授檢校右散騎常侍、 赴鎮 等,咸令稟造之命。 至 臣 以興元兆亂之狀奏之, 用此足矣。」乃授造手 征蠻之兵已迴,俟臣 詔 行程至 文宗 四 通 盡悟其 | 褒縣,望賜臣 ,神策行營將董重質、河中 根本,許以便 .密韶,使受約 宜 從 興元 事。 都將温 東。 尹、山 比 慮

車置 未 張丕、李少直各諭 兵周環之,造曰:「吾 至者,因 宴 造 ,所司 行至褒城 令昇酒 供帳 巡 於廳 其旨。 會興元 欲 事 問 新軍 造 暨發褒城,以八百人爲衙隊,五 都將衞志忠征蠻 及 酒 曰:「此隘狹, 去住之意。 匝 未至者皆至, 不足以變士 一迴,謁見,造即留以自 印 悉前,舊軍 牙兵圍之亦合, 一卒,移之牙門。」坐定,將卒羅拜 無得錯雜。」勞問旣 百 人為前軍 衞,密與志忠謀, 坐卒未悟, 席上有先覺者 ·,入府分守諸門。 畢,傳言令 叉召 坐,有 志 亞將 造 忠

列

儜

於江。以功就加檢校禮部尙書。 元在座,遽起求哀,擁造靴以請命,遣兵衞出之,以俟朝旨。 敕旨配流康州。 其親刃絳者斬 呼曰「殺」、圍兵齊奮,其賊首教練使丘鑄等丼官健千人,皆斬首於地,血流四注。監軍楊叔 揮令起,造傳言叱之,因帖息不敢動。即召坐卒,詰以殺絳之狀。 百斷,號令者斬三斷,餘並斬首。內一百首祭李絳,三十首祭王景延、趙存約等,並投屍 志忠、張丕夾階立, 拔劍

五年四月,入爲兵部侍郎,以耳疾求退。七月,檢校戶部尚書、東都留守,判東都尙書

省事、東畿汝防禦使。

卒,時年七十,贈右僕射。 有文集八十卷。 造於晚年積聚財貨,一無散施,時頗譏之。 子璋 文宗嘗聞其事,會造入對言之,乃詔封雞翁山爲侯。九年五月,轉禮部尙書。其年六月病 大夫。造初赴鎮漢中,遇大雨,平地水深尺餘,乃禱雞翁山祈晴,俄而疾風驅雲,即時開霽。 古秦渠枋口堰,役工四萬,溉濟源、河內、温、武陟四縣田五千餘頃。七年十一月,入爲御史 造至洛中,九月,制改授河陽懷節度觀察等使。造以河內膏腴,民戶凋瘵,奏開浚懷州

驕橫。 障以廕入仕,累佐使府,歷三郡刺史。

咸通末,爲徐泗節度使,徐州牙卒曰銀刀軍,頗 **璋至,誅其惡者五百餘人,自是軍中畏法。入爲京兆尹,持法太深,豪右一皆屛迹。**

ď

帝怒,貶璋振州 同昌公主薨,懿宗怒,殺醫官,其家屬宗枝下獄者三百人。 司馬。 制出,璋歎曰:「生不逢時,死何足惜?」是夜自縊而卒。 璋上疏切諫,以爲刑法太深,

方、兵部二員外,兵部郞中。 年,即好筆硯。 太僕卿,承嘏論 辟使幕。 郭 承嘏字復卿。 歷渭南尉。 比及成童,能通五經。 諫激切,注甚懼之。 入朝爲監察御史,遷起居舍人。丁內艱,以孝聞,終喪爲侍御史, 曾祖尙父汾陽王。 大和六年,拜諫議大夫。 本官知匭院事。 元和四年,禮部侍郎張弘靖知其才,擢升進士第,累 祖晞, 諸衞將軍。父鈞。 九年,轉給事中。 頻上疏,言時政得失。文宗以鄭注爲 承嘏生而秀異,乳保之 職

推擇。」文宗謂宰臣曰:「承嘏久在黃扉,欲優其祿俸,暫令廉問近關。 中 盧載 開 封還詔書,奏曰:「承嘏自居此官,繼有封駁,能奉其職,宜在瑣闥。 成元年,出爲華州刺史、兼御史中丞。 韶下,兩省迭詣中書,求承嘏出麾之由。 而諫列拜章,惜其稱 牧守之才,易爲 給

職,甚美事也。」乃復爲給事中。

承嘏 論之日:「宰相 文宗以淮南諸道累歲大旱,租賦不登,國用多闕。及是,以度支、戶部分命宰臣鎮之。 者 ,上調陰陽 ,下安黎庶,致君薨、舜,致時淸平。 俾之閱簿書, 算緡帛,

列傳第一百一十五 郭承嘏 殷佑

之流,無不痛惜。 非所宜也。」帝深嘉之,遷刑部侍郎。 未及大用,以二年二月卒。 贈吏部尙書。 承嘏身殁之後,家無餘財,喪祭所費,皆親友共給而後具,搢紳 時因朔望,以刑法官得對,文宗從容顧問,恩禮 甚厚。

答拜。 侑 爲 計費 拜虞部員外郎。王承宗拒命,遣侑銜命招諭之。 是漢家子壻,欲坐受使臣拜,是可汗失禮,非使臣之倨也。」可汗憚其言,卒不敢逼。 貞元末,以五經登第,精於歷代沿革禮。 元和中,累爲太常博士。 時迴紇 遷悄諫議大夫。凡朝廷之得失,悉以陳論,前後上八十四章,以言激切,出爲桂管觀 五百萬緡。 殷侑,陳郡人。父懌。侑爲兒童時,勵志力學,不問家人資產。 **脩堅立不動,宣諭畢,可汗責其倨,宣言欲留而不遣。** 作謹重,有節概,臨事俊辯。旣至虜庭,可汗初待漢使,盛陳兵甲,欲臣漢使而 朝廷方用兵伐叛,費用百端,欲緩其期,乃命宗正少卿李孝誠奉使宣諭,以 承宗尋稟朝旨,獻德、棣二州,遣二子入 行者皆懼,侑謂虜使日 及長,通經,以講習自 請 和親、 [:「可汗 使還, 朝廷

寶曆元年,檢校右散騎常侍、洪州刺史,轉江西觀察使。 所至以潔廉著稱。 入爲衞尉 dÇ.

容,專討同捷。 其疏末云:「伏願以宗社安危爲大計,以善師攻心爲神武,以含垢安人爲遠 銳於破賊,宰臣莫敢異議,獨怕以廷湊再亂河朔,方徇招懷,雖附兇徒,未甚彰露,宜且含 文宗初即位,滄州李同捷叛,而王廷湊助逆,欲加兵鎭州,韶五品已上都省集議。 時上

於度支。惟一歲而賦入自贍其半,二歲而給用悉周,請罷度支給賜。 絹五萬匹,買牛以給之。數年之後,戶口滋饒,倉廩盈積,人皆忘亡。 之後,滿目荆榛,遺骸蔽野,寂無人煙。 圖,以網漏吞舟爲至誠。」文宗雖不納,深所嘉之。 郭之內。 悦,上表請立德政碑。以功加檢校吏部尙書。 脩以郭下清池縣在子城北,非便,奏移於南 士卒同勞苦。周歲之後,流民襁負而歸。 滄景平,以侑嘗爲滄州行軍司馬,大和四年,加檢校工部尚書、滄齊德觀察使。 時大兵 俯不以妻子之官,始至,空城而已。 俯攻苦食淡,與 |作上表請借耕牛三萬,以給流民,乃詔度支賜綾 初州兵三萬, 悉取給 而勸課多方,民吏胥

貫緡尺帛,不入王府。 侑以軍賦有餘,賦不上供,非法也,乃上表起大和七年,請歲供兩稅、 権酒等錢十五萬貫、粟五萬石。 濮觀察等使。 六年,入爲刑部尙書,尋復檢校吏部尙書、鄲州刺史、兼御史大夫,充天平軍節度、鄲曹 自元和末,收復師道十二州爲三鎮。 韶曰:「鄆、曹、濮等州,元和已來,地本殷實,自分三道,十 朝廷務安反側, 征賦所入, 盡留贍軍,

列傳第

章,良用嘉敷!」尋就加檢校右僕射。 九年,御史大夫温造劾侑不由制旨,增監軍俸入,賦 周歲,已致阜安。而又體國輸忠,率先入貢,成三軍奉上之志,陳一境樂輸之心。尋有表 五餘年,雖頒詔書,竟未入賦。殷侑承兵戈之後,當歉旱之餘,勤力奉公,謹身守法。 纔及

斂於人。上不問,以庾承宣代還。

處絞刑。」疏奏,元武依刑部奏,決六十,流貿州。乃授惟刑部尚書。八月,檢校右僕射,復爲 受,準律,枉法十五匹已上絞。 律疏云:卽以贓致罪,頻犯者並累科。 據元武所犯,令當入 決杖配流。獄未決,惟奏曰:「法官不習法律,三犯不同,卽坐其所重。 元武所犯,皆枉法取 天平軍節度使。上以温造所奏深文故也。 二十匹。大理寺斷三犯俱發,以重者論,祇以中私馬爲重,止令削三任官。 其年,濮州錄事參軍崔元武,於五縣人吏率斂及縣官料錢,以私馬擡估納官,計絹一百 而刑部覆奏,令

金十斤。其年七月,檢校左僕射,出爲襄州刺史、山南東道節度使。二年三月,以病求代, 月,卒于鎮,時年七十二,贈司空。惟以通經入仕,觀風撫俗,所莅有聲。 以太子賓客分司東都。十一月,復檢校右僕射,出爲忠武節度、陳許蔡觀察等使。三年七 宜在朝之耆德,新進小生,無宜輕用。 帝深嘉之,賜錦綵三百匹。 及中謝,又令中使就第賜 開成元年,復召爲刑部尙書。時初經李訓之亂,上問惟治安之術。惟極言委任責成, 而晚年急於大用,

Ę

稍通權倖,物望減於往時。子图。

羽 大和 五年登進士第,藩府辟召,不至通顯。 子盈孫。

復別有· 廟 室法物神主,本司載行,至鄂縣並被盜剽奪。 成都還。 日:「太廟十一室,并祧廟八室,及三太后三室,因光啓元年十二月二十五日車駕出宮,其緣 大殿二十二間,功績至大,計料支費不少,兼宗廟制度,損益重難,今未審依元料修奉,爲 盈孫,乾符末爲成都掾。 ·商量。」 三年二月,駐蹕鳳翔。 |敕付禮院詳議 駕在西川,用爲太常博士,禮學有祖風。 時宗廟爲賊所焚,車駕至京,告享無所。 皇帝還宮,合先製造。」宰相鄭延昌奏曰:「太 光啓二年多,隨駕自 四月,盈孫謂宰執

帑藏方: 宗廟之儀,以俟 室淺深之規,階陛等級之差,棟字崇低之則,前古所謂奢不能侈,儉不能踰者也。今以朝廷 歷代參詳 別 時博· 有參詳。 虚 一,費用 ,皆符典經,難議損益。 士四人,杜用勵在利州,崔澄在河中, 、廟成 謹按至德二年,以太廟方修,新作神主,於長安殿安置,便行饗告之禮,如同 稍廣,須資變禮,將務從宜,固不可易前聖之規模,狹大朝之制度,當憑典 ,方爲遷祔。 當時議論,無所是非。 謹按舊制,十一室,二十三間,十一架。 封舜卿在巴南,獨盈孫獻議曰:「太廟制度, 竊知今者京城除大內正衙外,別無 垣墉廣袤之度,堂

列傳

第

百

十五五

殷

侑

晦

殿宇。 室。 請接續廳之兩頭,成十一室至,薦饗之。三太后廟,即於監內西南,別取屋宇三間,且充廟 候太廟修奉畢日,別議遷祔。」敕旨依奏。其神主、法物、樂懸,皆盈孫奏重修製,知禮 伏聞先有詔旨,且以少府監大廳權充太廟。伏緣十一室於五間之中,陳設隘狹, 伏

者稱爲博洽。

嘉其所守,轉秘書少監,卒。 以皇帝陛下,承天御歷,聖祚中興,祗見宗祧,克陳大禮,皆稟高祖、太宗之成制,必循虞、 據,粗可行之。臣忝禮司,合具陳奏。」時中貴皆如宰相大臣朝服,故盈孫論之。帝雖不從, 夏、商、周之舊經。 「臣昨赴齊宮,見中尉、樞密內臣,皆具朝服。臣尋前代及國朝典令,無內官朝服製度。 龍紀元年十一月, 昭宗郊祀圓丘, 兩中尉楊復恭及兩樞密, 皆請朝服。 軒冕服章, 式瓊彝憲。 若內官要衣朝服, 令依所守官本品之服。 盈孫上疏曰: 事 伏

晦日:「今日送臨賀,誠爲厚矣,無乃爲累乎!」晦日:「晦自布衣受楊公之眷,方茲流播,爭 親無敢祖送者,獨晦送至藍田,與憑言別。 徐晦,進士擢第,登直言極諫制科,授機陽尉,皆自楊憑所薦。 時故相權德興與憑交分最深, 知晦之行, 及憑得罪,貶臨賀尉,交 因謂

et p

忍無言 稱之於朝。 而 別? 不數日, 如他 日相公爲姦邪所譖,失意於外,晦安得與相公輕別?」德輿嘉其眞懇,大 御 史中丞李夷簡請爲監察, 晦白 夷簡曰:「生平不踐公門,公何取信而

見獎拔?」夷簡日:「聞君送楊臨賀 不不 顧犯難,肯負國 乎?」由是知名。

1

子賓客 二年, 禮部尙書致仕。 歷殿中侍御史、尚書郎,出爲晉州 入爲工部侍郎, 1,分司 東都。 開成三年三月卒,贈兵部尙書。 晦性強直,不隨世態,當官守正,唯嗜酒太過,晚年喪明,乃至沉廢。 出為同州 刺史、 刺 兼御史中丞。 史。 入拜中書舍人。 大和四年,徵拜兵部侍郎。 寶曆元年,出爲福建觀察使。 五年,爲太

以

齡,其旨遠也。 事 位 史臣曰:温、柳二公,以文行飾躬,砥礪名節,當官守法,侃侃有大臣之節,而竟不登三 止 正 徐、郭讜 卿。 **偉、催名士,薦賢致主,綽有古風。** 所以知公輔之量 言 ,鬱爲佳士。 一,以和爲貴。 如數君者,實爲令人。 漢武帝畏汲黯而相孫弘,太宗重魏徵而委玄 殷司空治民,斯爲循吏,而忠規壯節,至

贊日 …柳氏禮法,公忠節槪。搏擊爲優,彌綸則隘。夏卿獎拔,晦叔匡將。 徐、郭之議、金

玉鏘鏘

列

校勘記

(1) 其先太原人 (人)字各本原作「尹」、廿二史考異卷六〇:「尹當作人,不連下讀。」 冷鈔卷二一

六王正雅傳亦作「人」,據改。

(三) 崔琯 各本原作「崔綰」,據冊府卷六一七、本書卷一七七崔典傳改。

(三) 潰江 各本原作「湘江」,據御覽卷二七七改。

(1) 出兵迎之 「迎」字各本原作「送」,據冊府卷四二二改。

(至)成十一室 「十一」原作「一十」,冊府卷五九三作「建成十一間」,考本傳上文,當以「十一」爲是,

據改。

4

舊唐 書卷一百六十六

列傳第一百一十六

元稹 魔殿附 白居易 弟行簡 敏中附

元稹字微之,河南人。後魏昭成皇帝,稱十代祖也。兵部尚書、昌平公巖,六代祖也。 曾

祖 延景,岐州參軍。 祖悱,南頓丞。父寬,比部郎中、舒王府長史,以稱貴,贈左僕射。

文。 十五兩經擢第。二十四調判入第四等,授秘書省校書郎。二十八應制舉才識兼茂、明 個八歲喪父。其母鄭夫人,賢明婦人也,家貧,爲個自授書,教之書學。
個九歲能屬

於體用科,登第者十八人,顧爲第一,元和元年四月也。制下,除右拾遺。 1種性鋒銳,見事風生。 旣居諫垣,不欲碌碌自滯,事無不言,卽日上疏論諫職。

時王叔文、王伾以猥褻待詔,蒙幸太子,永貞之際,大撓朝政。是以訓導太子宮官,宜選正

又以前

人,乃獻教本書日:

列傳第一百一十六 元稹

四三二七

得習操斷擊搏之書,居不得近容順陰邪之黨,游不得縱追禽逐獸之樂,玩不得有遐異 右,伯禽魯而太公齊,快其藴,則興禮樂而朝諸侯,措刑罰而美敎化。敎之至也(1), 所蘊矣。物之性亦然,是以魚得水而游,馬逸駕而走,鳥得風而翔,火得薪而熾,此皆物 積懼也, 諂之者有以辨焉。 人之情, 莫不欲耀其所能而黨其所近, 苟將得志, 則必快其 則彼忠直道德之言,固吾之所習聞也,陳之者有以諭焉;彼庸佞違道之說,固吾之所 僻絕之珍。凡此數者,非謂備之於前而不爲也,亦將不得見之矣。及其長而爲君也, 之游,禮、樂、詩、書爲之習,目不得閱淫豔妖誘之色,耳不得聞優笑凌亂之音,口不 周、召則義聞,豈可謂天聰明哉?然而克終于道者,得不謂敎之然耶?俾伯禽、唐叔與 君,仁且久者,敎之然也。」誠哉是言。且夫周成王,人之中才也,近管、際則讒入,有 之快其所蘊也。今夫成王所蘊道德也,所近聖賢也。是以舉其近, 血氣旣定,遊習旣成,雖有放心快己之事日陳于前,固不能奪已成之習、已定之心矣。 子之深旨也。然而事有萬萬於此者,臣敢冒昧殊死而言之。臣聞諸賈生曰:「三代之 臣伏見陛下降明詔,修廢學,增胄子,選司成。大哉堯之爲君,伯夷典禮,夔敎胄 則周公左而召公

可不謂信然哉!

4

及夫寮則不然。滅先王之學,日將以愚天下;黜師保之位,日將以明君臣。 胡亥

術, 能分獸畜矣。 之生也,詩、書不得聞,聖賢不得近。彼趙高者,詐宦之戮人也,而傅之以殘忍戕賊之 且日恣睢天下以爲貴,莫見其面以爲尊。是以天下之人人未盡愚,而胡亥固已不 冤死,無所自明,而况于疏遠之臣庶乎?若然,則溱之亡有以致之也。 趙高之威懾天下,而胡亥固已自幽於深宮矣。彼李斯,秦之寵丞相也。

因 讒

邪心。 自貴始。 才可以冤禍亂,哀、平之閒,則不能虞篡弒矣。 漢高 是後有國之君,議教化者,莫不以興廉舉孝、設學崇儒爲意,曾不知教化之不行 略其貴者,教其賤者,無乃鄰於倒置乎? 承之以兵革,漢文守之以廉謹,卒不能蘇復大訓。是以景、武、昭、宜,天資甚 然而惠帝廢易之際,猶賴羽翼以勝

之後 宮僚, 保安之職,終不能吐扶衞之一辭,而令醫匠安金藏剖腹以明之,豈不大哀也耶? 至母后臨朝 而名高盛古,豈一日二日而致是乎?游習之漸也。」貞觀已還,師傅皆宰相兼領,其餘 ,雖遊宴飲食之間,若十八人者,實在其中。 洎我太宗文皇帝之在藩邸,以至於爲太子也,選知道德者十八人與之遊習。 卽位 亦甚重焉。 ,鄭棄王室。 馬周 以位高恨不得爲司議郎,此其驗也。|文皇之後,漸疏賤之。用 當中、睿二聖勤勞之際,雖有骨鯁敢言之士,旣不得在調護 師資保傅之官,非疾廢眊聵不任事者爲之,卽休戎罷帥不 上失無不言,下情無不達,不四三年

兵

興

已來,茲弊尤甚。

才,而又生於深宮優笑之間,無周、召保助之教,則將不能知喜怒哀樂之所自矣,况稼 僚之外,往往以沉滯僻老之儒,充侍直、侍讀之選,而又疏棄斥逐之,越月踰時,不得召 不知書者爲之師乎?疏冗散賤不適用者爲之友乎?此何不及上古之甚也!近制,宮 者,循求明哲慈惠之師以敎之,直諒多聞之友以成之,豈天下之元良,而可以疾廢眊聵 穡艱難乎? 省耳。臣獨以爲於列聖之謀則可也,計傳後嗣則不可。脫或萬代之後,若有周成之中 德,以舜繼堯,傳陛下十一聖矣,莫不生而神明,長而仁聖,以是爲屑屑習儀者故不之 見,彼又安能傅成道德而保養其身躬哉?臣以爲積此弊者,豈不以皇天眷佑,祚我唐 知書者處之。至于友諭贊議之徒,疏冗散賤之甚者,縉紳恥由之。夫以匹士之愛其子

德要道以成之,徹膳記過以**警之。血**氣未定,則去禽色之娛以就學,聖質已備,則資 之。更相進見,日就月將。因令皇太子聚諸生,定齒胄講業之儀,行嚴師問道之禮,至 匹其盛哉?而又俾則百王,莫不幼同師,長同術,識君道之素定,知天倫之自然,然後 遊習之善以弘德。此所謂「一人元良,萬方以貞」之化也。豈直修廢學,選司成,而足倫 之功,念文皇游習之漸,選重師保,愼擇宮僚,皆用博厚弘深之儒,而又明達機務者爲 今陛下以上聖之資,肇臨海內,是天下之人傾耳注心之日。特願陛下思成王訓導

4

維城、犬牙盤石之勢也,又豈與夫魏、晉以降,囚賤其兄弟而自翦其本枝者同年而語 選用賢良,樹爲藩屏。 出則有晉、鄭、魯、衞之盛,入則有東牟、朱虛之強,蓋所謂宗子

哉 ?

憲宗覽之甚悅。

令停務。旣飛表聞奏,罰式一月俸,仍召緝還京。宿敷水驛,內官劉士元後至,爭廳, 士元 使韓阜封杖決湖州安吉令孫獬,四日內死。徐州監軍使孟昇卒,節度使王紹傳送昇喪柩還 京行,給券乘驛,仍於郵舍安喪柩。櫃並劾奏以法。河南尹房式爲不法事,櫃欲追攝,擅 山甫等吏民八十八戶田宅一百一十一、奴婢二十七人、草千五百束、錢七千貫。時礪已 憂,服除,拜監察御史。四年,奉使東蜀,劾奏故劍南東川節度使嚴礪違制擅賦,又籍沒塗 死,七州刺史皆責罰。稹雖舉職,而執政有與礪厚者惡之。使還,令分務東臺。浙西 又論西北邊事,皆朝政之大者,憲宗召對,問方略。爲執政所忌,出爲河南縣尉。 執政以積少年後輩,務作威福 觀察 日日

稱元、白焉。 旗聰警絕人,年少有才名,與太原白居易友善。 工爲詩,善狀詠風態物色,當時言詩者 自衣冠士子,至閭閻下俚,悉傳諷之,號爲「元和體」。旣以俊爽不容於朝,流放

穙

貶爲江陵府士曹參軍

贈答, 荆蠻 一者僅 凡所爲詩 + 年。 俄 有自三十、五十韻 而 白 居易亦貶江州 乃至 司 馬, 百 [韻者 **種量移通州** 江 南人士, 司馬。 傳道 雖 諷 通、江 誦, 一懸邈, 流聞闕下 而二人來往 - , 里巷相

傳,爲之紙貴。 十四四 年,自虢州 觀其 長 流離放逐之意 史徵還,爲膳部員外郎。 ,靡不悽惋。 宰相令狐楚一代文宗,雅知旗之辭學,謂旗

「嘗覽足下製作,所恨不多,遲之久矣。 請出其所 有 ,以豁予懷。」履 因獻其文,自敍曰:

詩句,昨又面奉教約,令獻舊文。 爲文字有聞於人矣。 稹 初 不 好文,徒以仕無他歧,強由科試。 曾不 -知好事 者抉擿 及 有罪譴棄之後,自以爲廢滯潦倒,不復 塵瀆尊 重。 竊 承相公特於廊廟間道履

戰汗煉踊

「慚黍

無地

唯杯酒· 新 陷 餘首。 流俗 進 |種 小 光景 其間 生 自 御 , 不 常欲得思深語近,韻 間,屢爲小碎篇章 .史府謫官,於今十餘年矣,閑誕無事 感物寓 知天下文有宗主,妄相放效,而又從而失之, 意 ,可備矇瞽之風者有之。 ,以自吟暢。 律調新,屬對無差,而 然以爲律體卑庳,格力不 辭直氣粗,罪尤是懼,固不敢陳露於人。 ,遂專力於詩章。 風情宛然,而病未能也。 遂至於支離 日 揚, 益月滋,有詩句千 褊淺之辭, 苟無姿態,則 江 湖 間 多

積 與同門生白居易友善。 居易雅能詩,就中愛驅駕文字,窮極聲韻,或爲千言,或 نېا

爲

元

和

詩

體

五 蓋欲以難相 百言律詩 挑 ,以相投寄。小生自審不能過之,往往戲排舊韻,別創新辭,名爲次韻 自爾江湖間爲詩者, 復相放效, 力或不足, 則至於願 倒語 重複首 相酬

尾,韻同意等,不異前篇,亦目爲元和詩體。

記憶 覽,知小生於章句中欒櫨榱桷之材,盡曾量度,則十餘年之邅迴,不爲無用矣。 體 歌詩一百首, ,累旬已來,寶慮糞土之牆,庇之以大廈,使不復破壞,永爲板築者之誤。 而司文者考變雅之由,往往歸咎於膬。 百韻至兩韻律詩 一百首,爲五卷, 嘗以爲雕蟲小事,不足以自明。 奉啓跪陳。 或希構廈之餘 始聞相公 輒 賜觀 寫 古

|楚深稱賞,以爲今代之|鮑、謝也。

是極 度使裴度三上疏,言韻與弘簡爲刎頸之交,謀亂朝政,言甚激訐。 郎中、知制誥。 朝,出頹連昌宮辭等百餘篇奏御,穆宗大悅,問頹安在,對曰:「今爲南宮散 旨學士。 元才子。 承恩顧。 穆宗皇帝在東宮,有妃嬪左右嘗誦稹歌詩以爲樂曲者,知稹所爲,嘗稱其善,宮中呼爲 中人以潭峻之故,爭與耀交,而知樞 荆南監軍崔潭峻甚禮接頹,不以掾吏遇之,常徵其詩什諷誦之。 嘗爲長慶宮辭數十百篇,京師競相傳唱。 朝廷以書命不由相府,甚鄙之,然辭誥所出,敻然與古爲侔,遂盛傳於代,由 密魏 弘簡 尤與頹相善,穆宗愈深 居無何,召入翰林,爲中書舍人、承 穆宗顧 中外人情,乃罷緝 郎。」即 長慶初,潭峻 知 重。河東節 日轉祠 部

列

內職、授工部侍郎。上恩顧未衰、長慶二年、拜平章事。詔下之日、朝野無不輕笑之。

乃出 **顧與裝度有隙,乃告度云:「于方爲稹所使,欲結客王昭等刺度。」度隱而不發。 及神策軍中 顧以天子非次拔擢,欲有所立以報上。有和王傅于方者,故司空順之子,干進於膩,言有奇** 尉奏于方之事,乃詔三司使韓臯等訊讀,而害裴事無驗,而前事盡露,遂俱罷뛚、度平章事, 士王昭、王友明二人,嘗客於燕、趙間,頗與賊黨通熟,可以反間而出元翼,仍自以家財資其 ,仍賂兵、吏部令史爲出告身二十通,以便宜給賜,頹皆然之。 有李賞者,知于方之謀,以 [稱爲同州刺史,度守僕射。諫官上疏,言責度太重,稱太輕,上心憐稱,止削長春宮使。 時王廷湊、朱克融連兵圍牛元翼於深州,朝廷俱赦其罪,賜節鉞,令罷兵,俱不奉詔。

臣 臣櫃辜負聖明,辱累恩獎,便合自求死所,豈謂尙忝官榮?臣櫃死罪。 .八歲喪父,家貧無業。母兄乞丐,以供資養。 衣不布體,食不充腸。 幼學之年,

書郎。年二十八,蒙制舉首選,授左拾遺。始自爲學,至於升朝,無朋友爲臣吹噓,無 授。年十有五,得明經出身,由是苦心爲文,夙夜強學。年二十四,登吏部乙科,授校 不蒙師訓。因感鄰里兒稚有父兄爲開學校,涕咽發憤,願知詩、書。慈母哀臣,親爲敎

繩,復爲宰相怒臣不 先皇帝 親 戚爲臣援庇。 召 問問 於延英。 莫非苦己,實不因人,獨立性成,遂無交結。 ·庇親黨,因以他事貶臣江陵判司。 旋爲宰相所憎,出臣 河南縣 尉。 及爲監察御史,又不規避 廢棄十年,分死溝瀆 任拾遺日,屢陳時政,蒙 ,專心糾

藝, 懷他意 朝時 便擬 亦至矣。 罪,寵獎踰深,召臣 衷獨 臣 言 一,愚 忝有肺 朱書授臣制誥, 舉人,任卿相者,半是臣同諫院時拾遺、補闕。 殺 斷 元 臣 了,乞臣 和 ?不料姦 身謝責,豈料聖慈尙 恨不 肝, 然臣 十四年,憲宗皇帝開釋有罪, 此官。 身先士卒。 豊 並 .益遭誹謗,日夜憂危,唯陛下聖鑒昭臨,彌加保任,竟排羣議,擢授台司。 人疑臣殺害裴度,妄有告論,塵瀆聖聰,愧羞天地。 尋常宰相?况當行營退散之後, 面授舍人,遣充承旨翰林學士,金章紫服,光飾陋軀,人生之榮,臣 若遺他 延英召臣賜緋。 所問于方計策,遣王友明等救解深州,蓋欲上副聖情,豈是別 人商量,乍可與臣遠處方鎮,豈肯遣臣俯近闕廷。 加,薄貶同州。 宰相惡臣不出其門,由是百萬侵毀。 ,始授臣膳部員外郞。 雖違咫尺之間,不遠郊圻之境,伏料必是宸 ,牛元翼未出之間,每聞陛下軫念之 愚臣旣不料陛下天聽過卑,知臣 與臣 同省署者,多是臣登 臣本待辨明一了 陛下祭臣無 演

離 京 國 所 目 恨今月三日 斷 魂銷。 ,倘蒙召對 每 至五更朝謁之時,實制淚不已。臣若餘生未死,他時萬一歸還, 延英。 此時不解泣血,仰辭天顏,乃至今日竄逐。

M

列

不敢 更望得見天 顏 但得 再聞京城鐘鼓之音,臣雖黃土覆面,無恨九泉。 臣無任自恨

自慚,攀戀聖慈之至。

積, 疾, 者 四 |積 當 時文士 七人。 年 酬 營護喪事。 一日而 -正月, 唱最 大和 在 郡 然以積素無檢操,人情不厭服。 多,至今稱蘭亭絕唱。 初,就加檢校禮部尚書。 ,而鏡湖、秦望之遊,月三四焉。 二年,改授越州刺史、兼御史大夫、浙東觀察使。 卒于鎮,時年五 檢校戶部尚書,兼鄂州刺史、御史大夫、武昌軍節度使。 所著詩賦、詔册、銘誄、論議等雜文一百卷,號曰元氏長慶集。 十三,贈尙書右僕射。 **뛚旣放意娛遊,稍不修邊幅,以瀆貨聞於時。** 三年九月,入爲尙書左丞。 而 會宰相王播倉卒而卒,積 諷詠詩什,動盈 有子日道護,時年三歲。 會稽山水奇秀,履所辟幕職,皆 卷帙。 振 舉紀綱,出郞官頗乖公議 副 大爲路歧, 五年七月二十二日暴 使竇鞏,海 **積仲兄司農** 凡在越 又著古今刑 經營相位。 內 詩 八年。 名 少卿 與與

頹長慶末因編删其文稿,自敘曰:

政

書三百卷,號類集,並行於代。

ďζ

惑,存之則事分著,去之則是非冺。 上,臣專之則譽歸於下。 劉秩云制 不 可削臼。 荷而 予以爲有可得而削之者,貢謀猷,持嗜慾,君有之則譽歸于 存之,其攘 苟而削之,其過也,非道也。 也, 非道也。 經制度, 明利害, 區邪正,

奉,由 萬。 所承迎,雖不敢盡廢詔 史,使東川。 相 曲 道上語。 朝廷異之,奪七刺 元和初, 是獻教本書、諫職、論事等表 謹以元和 章武 上頗悟, 皇帝新即 史料,悉以所籍 赦書,劾節度使嚴礪籍塗山甫等八十八家,過賦梓、遂之民數百 召見問狀。 因命當得所籍者皆入資。 位, 臣下未有 十數通, 宰相大惡之,不一月, 歸於人。 以言刮視聽者。 仍爲裴度、李正辭、韋熏 會潘 **資過其稱,推薪盜賦無不爲,仍爲**礪 孟陽代礪爲節度使,貪過礪, 出爲 予時始以對詔在拾遺 河南尉。 訟所言當 後累歲, 行, 且有 補御 中 而 ·供 宰

密狀不當得醜

諡。

予自·

東川還,朋礪者潛切齒矣。

逾歲 監徐使死 詐諼 千, 家逃 傳。 數 + 授於人以八百 事 而 奴爲養子 事 浙 無何,分蒞東都臺。天子久不在都,都下多不法者。 臺 發 ,或移或奏,皆止之。 西 於軍 一府不得而知之者,予因飛奏絕百司 觀察使封杖決安吉令至死; 奏攝之。 , ,徐帥郵傳其柩 田 季安盜娶洛陽衣冠女; 前 所喑嗚者叫噪。 朝廷饋東師 貞元已來 , 柩至洛, 其下歐詬主郵吏, 河南 ,不慣用文法,內外寵臣皆喑嗚。 主計者誤命牛車四千三百乘飛芻越太行。 宰相素以劾叛官事相銜,乘是黜予江陵 尹誣 汴州沒入死商錢且千萬; 專禁錮 奏書生尹太階請死之; 河南 予命吏徙柩於外,不得復乘 百司皆牢獄,有栽接吏械人 以尉叛官、予劾之、忤宰相旨。 飛龍 滑州 會 河 使誘 南 賦 掾 於民 尹 趙寔 類是 以

十年,始爲膳部員外郎。

外郎牛僧孺,予亦在請中,上然之。不十數日次用爲給、舍,他忿恨者日夜構飛語,予 矣。不累月,上盡得所構者,雖不能暴揚之,遂果初意,卒用予與髮俱爲宰相。復有購 | 裴奏至, 驗之皆失實。 上以 裴方握兵,不欲校曲直,出予爲工部侍郎,而相裴之期亦衰 奏及進見,皆言天下事,外間不知,多臆度。 陛下益憐其不漏禁中語,召入禁林,且欲 懼罪,比上書自明。上憐之,三召與語。語及兵賦洎西北邊事,因命經紀之。是後書 狂民告予借客刺裴者,鞫之復無狀,然而|裴與予以故俱罷免。 亟用爲宰相。是時裴度在太原,亦有宰相望,巧者謀欲俱廢之,乃以予所無構於裴。 穆宗初,宰相更相用事,丞相段公一日獨得對,因請亟用兵部郎中薛存慶、考功員

之禮,因亦附於件目。始敎本書至於爲人雜奏,二十有七軸,凡二百二十有七奏。終 帝之器使也。至于陳暢辨謗之章,去之則無以自明於朋友矣。其餘郡縣之奏請,賀慶 造次顚沛之中,前後列上兵賦邊防之狀,可得而存者一百一十五。苟而削之,是傷先 是之甚者。是以心腹腎腸,糜費於扶衞危亡之不暇,又惡暇經紀陛下之所付哉!然而 殁吾世,貽之子孫式,所以明經制之難行,而銷毀之易至也。 始元和十五年八月得見上,至是未二歲,僭忝恩寵,無是之速者;遭罹謗咎,亦無

其自敍如此,欲知其作者之意,備於此篇。

槇文友與白居易最善。 後進之士,最重龐嚴,言其文體類己,保薦之。

÷,

紳頗知之。 諫科,策入三等,冠制科之首。 龐嚴者, 明年二月,召入翰林爲學士,轉左補闕,再遷駕部郞中、知制誥。 壽春人。父景昭。 是月,拜左拾遺。 嚴元和中登進士第,長慶元年應制舉賢良方正、能直言極 聰敏絕人,文章峭麗。 翰林學士元稹、李 嚴與右拾遺蔣

防俱爲頹、紳保薦,至諫官內職。

乎 中。 賀逢吉,唯右拾遺吳思不賀。逢吉怒,改爲殿中侍御史,充入蕃告哀使。 中于敖素與嚴善,制旣下,敖封還, ! .」及覆制出, 四年,昭愍卽位,李紳爲宰相李逢吉所排,貶端州司馬。嚴坐累,出爲江州刺史。 乃知敖駁制書貶嚴太輕,中外無不嗤謂,以爲口實。 時人凛然相顧曰:「于給事犯宰相怒而爲知己,不亦危 初李紳謫官,朝官皆 嚴復入為庫部郎 給

對策,大行於時,登科者有 甲等制科之首。 大和二年二月,上試制舉人,命嚴與左散騎常侍馮宿、太常少卿賈餗爲試官,以裴休爲 有應直言極諫舉 i請以 身名授蕡者。 人劉蕡,條對激切,凡數千言,不中選,人咸以爲屈。 其所 嚴再遷太常少卿。 五年,權 知京兆尹,以強幹

四三三九

傳

第

百

十六

元

稚

白居

E

不避權豪稱,然無士君子之檢操,貪勢嗜利。 因醉而卒。

蝗至||季庚,世敦儒業,皆以明經出身。 因授朝散大夫、大理少卿、徐州別駕, 初爲彭城令。 志善,尚衣奉御。 冢焉,遂移籍同州。 白居易字樂天,太原人。 時李正己據河南十餘州叛。正己宗人洧爲徐州刺史,季庚說洧以彭門歸國, 志善生温, 至温徙於下邽,今爲下邽 北齊五兵尙書建之仍孫。建生士通,皇朝利州都督。 檢校都官郞中。 季庚生居易。 賜緋魚袋,兼徐泗觀祭判官。 人焉。 温生鳇,歷酸棗、鞏二縣令。 初,建立功於高齊,賜田於韓城,子孫 歷衢州、襄州別駕。 **蝗生季庚**,建中 士通生 自

浮薄, 年四月,憲宗策試制舉人,應才識兼茂、明於體用科,策入第四等,授整屋縣尉、集賢校理 元 十四年,始以進士就試,禮部侍郎高郢擢升甲科,吏部判入等,授祕書省校書郎。元和元 居易幼聰慧絕人,襟懷宏放。年十五六時,袖文一編,投著作與吳人顧況。況能文,而性 後進文章無可意者。覽居易文,不覺迎門禮遇曰:「吾謂斯文遂絕,復得吾子矣。」貞

時之病,補政之缺,而士君子多之,而往往流聞禁中。 居易文辭富豔,尤精於詩筆。 自讎校至結綬畿甸,所著歌詩數十百篇,皆意存諷賦,箴 章武皇帝納諫思理,渴聞讜言,二年

بنهاء

十一月,召入翰林爲學士。三年五月,拜左拾遺。 居易自以逢好文之主,非次拔擢,欲以生

平所貯,仰酬恩造。 拜命之日,獻疏言事曰:

諫。朝廷得失無不察,天下利病無不言。此國朝置拾遺之本意也。由是而言,豈小臣 者,使下不忍負心,上不忍負恩也。夫位不足惜,恩不忍負,然後能有闕必規,有違必 大凡人之情,位高則惜其位,身貴則愛其身;惜位則偷合而不言,愛身則苟容而不諫, 於時、不合於道者,小則上封,大則廷諍。其選甚重,其秩甚卑,所以然者,抑有由也。 此必然之理也。故拾遺之置,所以卑其秩者,使位未足惜,身未足愛也;所以重其選 再瀆宸嚴,伏惟重賜詳覽。 臣謹按於典,左右拾遺,掌供奉諷諫,凡發令舉事,有不便 愚劣暗懦所宜居之哉? 蒙恩授臣左拾遺,依前翰林學士,已與崔羣同狀陳謝。但言忝冒,未吐衷誠。今

不遑安,唯思粉身以答殊寵,但未獲粉身之所耳。 塵曠漸深,憂愧彌劇。未申微劾,又擢淸班。臣所以授官已來僅經十日,食不知味,寢 不先預,每慶賜無不先霑,中廏之馬代其勞,內廚之膳給其食。朝慚夕惕,已逾半年, 況臣本鄉校豎儒,府縣走吏,委心泥滓,絕望煙霄。豈意聖慈,擢居近職,每宴飮無

列傳第一百一十六 今陛下肇臨皇極,初受鴻名,夙夜憂勤,以求致理。 白 居島 每施一政、舉一 四三四 事,無不合於

潛獻所別 天鑒 下豈不欲知之乎? 道、便於時者。 深察赤誠 聞 ,但在聖心裁斷而已。 萬 一事有不便於時者,陛下豈不欲聞之乎?萬一政有不合於道者,陛 倘陛下言動之際,詔令之間, 臣又職在禁中,不同外司,欲竭愚誠,合先陳露。 伏希 小有闕遺, 稍關 **没損益,臣必密陳所見,**

林 學士李絳、崔羣上前面論履無罪,居易累疏切諫曰: 居易與河南元稹相善,同年登制舉,交情隆厚。 **旗自監察御史謫爲江陵府士曹掾,翰**

得 肯為 恐元 是朝廷親情。 者?元稹 知 陛下嫉 稹 臣 .昨緣元稹左降,頻已奏聞。 此 左降已後,凡在位者,每欲舉職,必先以稱爲誠,無人肯爲陛下當官守法,無人 其不 (守官正直,人所共知。 惡鱦愆。 可者 人誰無私,因以挾恨,或假公議,將報私嫌,遂使誣謗之聲,上聞天聽。臣 也。 內外權貴親黨,縱有大過大罪者,必相容隱而已,陛下從此無由 自授御史已來,舉奏不避權勢,祇如奏李佐公等事,多 臣內察事情,外聽衆議,元稹左降有不可者三。何

旋 至於爭廳事理,已具前狀奏陳。 又 左 昨 元稹 降。 所 雖 引前 追 一勘房式之事,心雖徇公,事稍過當。 事以爲責辭,然外議喧喧,皆以爲頹與中使劉士元爭廳,因此獲罪。 況聞士元蹋破驛門,奪將鞍馬,仍索弓箭,嚇辱朝官, 既從重罰,足以懲違,況經謝恩,

ιĘ

聖德。臣恐從今已後,中官出使,縱暴益甚,朝官受辱,必不敢言,縱有被凌辱毆打者, 承前已來,未有此事。 亦以元稹爲戒,但吞聲而已。陛下從此無由得聞。此其不可二也。 今中官有罪,未聞處置;御史無過,却先貶官。 遠近聞知,實損

法之事。此其不可者三也。 李錡果反,至今天下爲之痛心。臣恐元稹貶官,方鎭有過,無人敢言,陛下無由得知不 時有崔善貞者,告李錡必反,德宗不信,送與李錡,錡掘坑熾火,燒殺善貞。 守官。今貶爲江陵判司,卽是送與方鎭,從此方便報怨,朝廷何由得知?臣伏聞德宗 將封杖打殺縣令。如此之事,前後甚多,屬朝廷法行,悉有懲罰。計天下方鎭,皆怒元稹 奏王紹違法給券,令監軍押柩及家口入驛;又奏裴玢違敕徵百姓草;又奏韓皐使軍 臣又訪聞元稹自去年已來,舉奏嚴礪在東川日枉法,沒入平人資產八十餘家,又 曾未數年,

誠 以所損者深,所關者大,以此思慮,敢不極言。 若無此三不可,假如朝廷悞左降一御史,蓋是小事,臣安敢煩瀆聖聽,至于再三。

疏入不報。

賜殿材成其正室,尤與諸家第宅不同。 又溫青節度使李師道進絹,爲魏徵子孫贖宅,居易諫曰:「徵是陛下先朝宰相,太宗嘗 子孫典貼,其錢不多,自可官中爲之收贖,而令師道

舊

掠美,事實非宜。」憲宗深然之。

民財,以市恩澤,不可使四方之人謂陛下得王鍔進奉,而與之宰相,深無 王承宗拒命,上令神策中尉吐突承璀爲招討使,諫官上章者十七八,居易 上又欲加河 東王鍔平章事 ,居易諫曰:「宰相是陛下輔臣,非賢良不可當此位。 益於聖朝。 面論 少乃 新歸情 | 鍔 誅 剝 止 切

至。 不避死亡之誅,事無巨細必言者,蓋酬陛下特力拔擢耳,非輕言也。 悅,謂李絳曰:「白居易小子,是股拔擢致名位,而無禮於股,股實難奈。」絳對曰:「居易所以 宜阻居易言。」上曰:「卿言是也。」由是多見聽納 旣而又請罷 河北用兵,凡數千百言,皆人之難言者,上多聽納。 陛下欲開諫靜之路,不 唯諫承璀事切,上頗不

公輔例。」於是,除京兆府戶曹參軍。 來。」居易奏曰:「臣聞姜公輔爲內職,求爲京府判司,爲奉親也。臣有老母,家貧養薄,乞如 五年,當改官,上謂崔羣曰:「居易官卑俸薄,拘於資地,不能超等,其官可聽自便奏 六年四月, 丁母陳夫人之喪, 退居下邽。 九年冬,入

諫職,不當先諫官言事。 而 居易作賞花及新井詩,甚傷名教,不宜置彼周行。 十年七月,盜殺宰相武元衡, 會有素惡居易者,掎摭居易, 居易首上疏論其冤,急請捕賊以雪國恥。 執政方惡其言事, 言浮華無行, 其母因看花墮井而死, 奏貶爲江表刺史。 宰相以宮官非

r.

朝,授太子左贊善大夫。

韶出,中書舍人王涯上疏論之,言居易所犯狀迹,不宜治郡,追詔授江州司馬。

山 勝 遠、宗、雷之迹,爲人外之交。每相攜遊詠,躋危登險,極林泉之幽邃。 道 幾欲忘 遺愛寺, ,流水周於舍下,飛泉落於簷間,紅榴白蓮,羅生池砌。」居易與湊、滿、朗、晦四禪師, 絕第一。 居易儒學之外,尤通釋典,常以忘懷處順爲事,都不以遷謫介意。 其形骸。 愛不能捨,因立草堂。前有喬松十數株,修竹千餘竿, **嘗與人書言之曰:「予去年秋始遊廬山,** 或經時不歸,或踰月而返,郡守以朝貴遇之,不之責。 到東 西二林間香鑪峯下,見雲木泉石。 青蘿爲牆援, 在湓城、立隱舍於廬 至於翛然順適之際, 白石爲橋 追永、

元稹 在 通州,篇詠贈答往來,不以數千里爲遠。 **嘗與楓書,因論作文之大旨日:**

樂合而 就六經三 幽 莫切乎聲,莫深乎義。 易入;類舉則情見,情見則感易交。 因其言,經之以六義; 及鬼神,羣分而 夫文尙矣, 三才各有文。天之文三光首之, 地之文五材首之, 人之文六經首之**。** 言,詩又首之。何者?聖人感人心而天下和平。感人心者,莫先乎情,莫始乎言, 百志熙。 二帝三王所以直道而行、垂拱而理者,揭此以爲大柄,決此以爲大竇 氣同,形異而情一,未有聲入而不應、情交而不感者。聖人知其然, 緣其聲,緯之以五音。 詩者:根情,苗言,華聲,實義。 於是乎孕大含深,貫微洞密,上下通而二氣泰,憂 音有韻,義有類。 韻協則言順,言順則聲 上自賢聖,下至愚騃,微及豚魚,

列

第

六

白 居

也。 言者無罪,聞者作誡,言者聞者莫不兩盡其心焉。 故聞 「元首明,股肱良」之歌,則知虞道昌矣。 聞五子洛汭之歌,則知夏政荒矣。

蓋寡。 此。 弟;「采采芣苡」,美草以樂有子也。皆興發於此而義歸於彼。反是者,可乎哉 「北風其涼」,假風以刺威虐;「雨雪霏霏」,因雪以愍征役;「棠棣之華」,感華以諷兄 及他耳。然去詩未遠,梗槪尙存。故興離別則引雙鳧一鴈爲喻,諷君子小人則引香草 各繫其志,發而爲文。故河梁之句,止於傷別,澤畔之吟,歸于怨思。 動,救失之道缺。于時六義始刓矣。國風變爲騷辭,五言始於蘇、李。 「餘霞散成綺,澄江淨如練」,「歸花先委露,別葉乍辭風」之什,麗則麗矣,吾不知其所諷 風雪、弄花草而已。噫!風雪花草之物,三百篇中豈捨之乎?顧所用何如耳。設如 惡鳥爲比。雖義類不具,猶得風人之什二三焉。于時六義始缺矣。晉、宋已還,得者 故僕所謂嘲 如梁鴻五噫之例者,百無一二。于時六義寖微矣。陵夷至于梁、陳間,率不過嘲 消周 衰秦興,採詩官廢,上不以詩補祭時政,下不以歌洩導人情。 用至於諂成之風 以康樂之奧博,多溺於山水,以淵明之高古,偏放於田園。江、鮑之流,又狹於 風雪、弄花草而已。于時六義盡去矣。 彷徨抑鬱,不暇 詩騷皆不遇者,

唐興二百年,其間詩人不可勝數。 所可舉者,陳子昂有感遇詩二十首,鮑防感興

瞬

焉。 不量才力,欲扶起之。嗟乎!事有大謬者,又不可一二而言,然亦不能不粗陳於左右。 亦不過十三四。杜尚如此,況不迨杜者乎?僕常痛詩道崩壞,忽忽憤發,或廢食輟寢, 無一焉。 十五篇。 然撮其新安、石壕、潼關吏、蘆子關、花門之章,「朱門酒肉臭,路有凍死骨」之句, 杜詩最多,可傳者千餘首。 又詩之豪者,世稱李、杜。 |李之作,才矣奇矣,人不迨矣。索其風雅比興, 至於貫穿古今,覼縷格律,盡工盡善,又過於李

之所致。 已來, 革不豐盈,未老而齒髮早衰白,瞀然如飛蠅垂珠在眸子中者,動以萬數,蓋以苦學力文 已默識。 及五六歲,便學爲詩,九歲語識聲韻至。 僕始生六七月時,乳母抱弄於書屏下,有指「之」字「無」字示僕者,僕口未能言,心 **畫課賦,夜課書,間又課詩,不遑寢息矣。以至于口舌成瘡,手肘成胝,旣壯而膚** 後有問此二字者, 雖百十其試而指之不差。則知僕宿習之緣, 十五六,始知有進士,苦節讀書。二十 已在文字中

校書郞時,已盈三四百首。或出示交友如足下輩,見皆謂之工,其實未窺作者之域耳。 自登朝 合爲時 又自悲家貧多故,年二十七,方從鄉賦。旣第之後,雖專於科試,亦不廢詩。及授 一而著,歌詩合爲事而作。 來 ,年齒漸長,閱事漸多,每與人言,多詢時務,每讀書史,多求理道,始知文章 是時皇帝初卽位,宰府有正人,屢降璽書,訪人急病。

責;下以復吾平生之志。 豈圖志未就而悔已生,言未聞而謗已成矣。 僕當此日,擢在翰林,身是諫官,月請諫紙。啓奏之間,有可以救濟人病,裨補時闕, 而難於指言者,輒詠歌之,欲稍稍進聞於上。上以廣宸聽,副憂勤,次以酬恩獎,塞言

呼!豈六義四始之風,天將破壞,不可支持耶?抑又不知天意不欲使下人病苦聞于上 耶?不然,何有志於詩者不利若此之甚也! 孥,皆以我爲非也。其不我非者,舉世不過三兩人。有鄧魴者,見僕詩而喜,無何魴 與者,號爲沽譽,號爲詆訐,號爲訕謗。苟相與者,則如牛僧孺之誠焉。乃至骨肉妻 則執政柄者扼腕矣。聞宿紫閣村詩,則握軍要者切齒矣。大率如此,不可徧舉。不相 面脈脈,盡不悅矣。聞秦中吟,則權豪貴近者相目而變色矣。聞登樂遊園寄足下詩, 有唐衢者,見僕詩而泣,未幾而衢死。其餘卽足下,足下又十年來困躓若此。 又請爲左右終言之。凡聞僕賀雨詩,衆口籍籍,以爲非宜矣。聞僕哭孔戡詩,衆

清貫,出交賢俊,入侍冕旒。始得名於文章,終得罪於文章,亦其宜也。 之舊,策蹇步於利足之途,張空拳於戰文之場。十年之間,三登科第,名落衆耳,迹升 羣居之歡者,一無通曉,卽其愚拙可知矣。 初應進士時,中朝無總麻之親,達官無半面 然僕又自思關東一男子耳。除讀書屬文外,其他懵然無知,乃至書畫棋博可以接

指 之戲,不足爲多,然今時俗所重,正在此耳。雖前賢如淵、雲者,前輩如李、杜者,亦未 行舟之中,往往有題僕詩者;士庶、僧徒、孀婦、處女之口,每有詠僕詩者。此誠雕篆 館柱間有題僕詩者。何人哉?又昨過漢南日,適遇主人集衆娛樂他賓,諸妓見僕來, 大誇曰:「我誦得白學士長恨歌,豈同他哉?」由是增價。又足下書云:到通州日,見江 能忘情於其間。 而相顧曰:此是秦中吟、長恨歌主耳。自長安抵江西三四千里,凡鄉校、佛寺、逆旅、 人口中。僕愿然自愧,不之信也。及再來長安,又聞有軍使高霞寓者,欲聘倡妓,妓 日 者聞親友間說,禮、吏部舉選人,多以僕私試賦判爲準的。其餘詩句,亦往往

微之,微之! 勿念我哉! 杜甫,各授一拾遺,而屯剝至死。」孟浩然輩不及一命,窮悴終身。近日孟郊六十,終試 之富貴,使已爲造物者,肯兼與之乎?今之屯窮,理固然也。況詩人多蹇,如陳子昂、 品至第五,月俸四五萬,寒有衣,饑有食,給身之外,施及家人。亦可謂不負白氏子矣。 協律;張籍五十,未離一太祝。彼何人哉!況僕之才又不迨彼。今雖謫佐遠郡,而官 古人云:「名者公器,不可多取。」僕是何者,竊時之名已多。旣竊時名,又欲竊時

列 僕數月來,檢討囊帙中,得新舊詩,各以類分,分爲卷目。 自拾遺來,凡所遇所感,

句、絕句,自百韻至兩韻者四百餘首,謂之雜律詩。凡爲十五卷,約八百首。異時相 牽於外,情理動於內,隨感遇而形於歎詠者一百首,謂之感傷詩。又有五言、七言、長 見,當盡致於執事。 關於美刺興 又或退公,或臥病閑居,知足保和,吟玩性情者一百首,謂之閑適詩。 比者,又自武德至元和,因事立題,題爲新樂府者,共一百五十首,謂之諷 又有事物

未能删去。他時有爲我編集斯文者,略之可也。 笑一吟,率然成章,非平生所尙者,但以親朋合散之際,取其釋恨佐歡,今銓次之間, 適詩,獨善之義也。故覽僕詩者,知僕之道焉。其餘雜律詩,或誘於一時一物,發於一 霧豹,爲冥鴻,寂兮寥兮,奉身而退。 進退出處,何往而不自得哉? 故僕志在兼濟,行 守者道,所待者時。時之來也,爲雲龍,爲風鵬,勃然突然,陳力以出,時之不來也,爲 在獨善,奉而始終之則爲道,言而發明之則爲詩。謂之諷諭詩,兼濟之志也;謂之閑 |微之!古人云:「窮則獨善其身,達則兼濟天下。」僕雖不肖,常師此語。 大丈夫所

之?然當蘇州在時,人亦未甚愛重,必待身後,人始貴之。今僕之詩,人所愛者,悉不 行,才麗之外,頗近興諷,其五言詩,又高雅閑澹,自成一家之體,今之秉筆者誰能及 | 微之! 夫貴耳賤目,榮古陋今,人之大情也。僕不能遠徵古舊,如近歲韋蘇州歌

年後,安知復無如足下者出,而知愛我詩哉?故自八九年來,與足下小通則以詩相戒, 過雜律詩與長恨歌已下耳。時之所重,僕之所輕。至於諷諭者,意激而言質,閒適 小 , 窮則以詩相勉,案居則以詩相慰,同處則以詩相娛。 ,思澹而辭迂。 以質合迂,宜人之不愛也。 今所愛者,並世而生,獨足下耳。 知吾罪吾,率以詩也。 然百千

美景 輕 無以加於此焉,又非仙而何?懺之,懺之!此吾所以與足下外形骸、脫蹤迹、傲軒鼎、 我者以爲詩魔。 國 里 人寰者,又以此也。 ,或花時宴罷,或月夜酒酣,一詠一吟,不覺老之將至,雖驂鸞鶴、遊蓬瀛者之適, 如今年春遊城南時,與足下馬上相戲,因各誦新豔小律,不雜他篇,自皇子陂歸昭 迭吟遞唱,不絕聲者二十里餘。 樊、李在傍,無所措口。 何則?勞心靈,役聲氣,連朝接夕,不自知其苦,非魔而何?偶同人當 知我者以爲詩仙,不知

白往還集」。衆君子得擬議於此者,莫不踊躍欣喜,以爲盛事。 嗟乎! 府,李二十新歌行,盧、楊二祕書律詩,竇七、元八絕句,博搜精掇,編而次之,號爲「元 轉,不數月而僕又繼行,心期索然,何日成就?又可爲之太息矣。 當此之時,足下興有餘力,且欲與僕悉索還往中詩,取其尤長者,如張十八古樂 言未終而足下左

僕常語足下,凡人爲文,私於自是,不忍於割截,或失於繁多。其間妍媸,益又自

列

ー 十 六

白居易

下,爲文尤患其多。己尙病,況他人乎?今且各纂詩筆,粗爲卷第,待與足下相見日, 必待交友有公鑒無姑息者,討論而削奪之,然後繁簡當否,得其中矣。況僕與足

銓 次。勿以繁雜爲倦,且以代一夕之話言也。 潯陽臘月,江風苦寒,歲暮鮮歡,夜長少睡。 引筆鋪紙,悄然燈前,有念則書,言無 我心哉!

居易自敍如此,文士以爲信然。

蓮,香色豔膩皆同,獨房蘂有異〔8〕。四月初始開,自開迨謝,僅二十日。元和十四年夏,命 之。若離本枝,一日而色變,二日而香變,三日而味變,四五日外,色香味盡去矣。」「木蓮大 蒲萄,核如枇杷,殼如紅繒,膜如紫綃,瓤肉瑩白如雪,漿液甘酸如醴酪。 狀曰:「荔枝生巴、峽間,形圓如帷蓋。葉如桂,冬青,華如橘,春榮,實如丹,夏熟。朵如 者高四五丈,巴民呼爲黃心樹,經冬不凋。身如靑楊,有白文。葉如桂,厚大無脊。 |夷陵三日。時季弟行簡從行,三人於||峽州西二十里||黃牛峽口石洞中,置酒賦詩,戀戀不能 南賓郡當峽路之深險處也,花木多奇,居易在郡,爲木蓮荔枝圖,寄朝中親友,各記其 十三年多,量移忠州刺史。自潯陽浮江上峽。十四年三月,元稹會居易於峽口,停舟 大略如此,其實過 花如

ιÇ

道 土 毌丘 元志寫之。 惜其遐僻 因以三絕賦之。」有「天教拋擲在深山」之句, 威傳於都下,

好事者喧然模寫。

時元 部侍郎錢徽 稹 其年多,召還京師,拜司門員外郎。 亦徵還爲尙書郎、 陳岵爲考策官。 下及第人鄭朗等一十四人。 凡朝廷文字之職,無不首居其選,然多爲排擯 知制 誥, 同在綸閣。 十月,轉中書舍人。 明年,轉主客郞中、知制誥, 長慶元年三月,受韶 十一月,穆宗親試制舉人,又 與中書舍人王起覆試禮 加朝散大夫,始著緋。 ,不得用其才。

越鄰 寶曆中, 用, 澄、道士趙常盈對御講 二年正月 乃求外任。 境, 時 天子荒縱不法, 篇詠往· 復出爲蘇州刺 ,轉刑部侍郎,封晉陽縣男,食邑三百戶。 來, 七月, 不間旬狹。 除杭 論於鱗德殿。 史。 執政非其人, 州 文宗卽位, 刺史。 嘗會于境上, 制御 居易 俄 徴拜 而 元稹 論難 乖方, 、秘書監 數日而 海 維 起 罷相,自馮翊 河朔復亂。 三年,稱病東歸,求爲分司官,尋除太子 ,辭辨泉注 别。 賜金紫。 秩滿 轉浙 居易累上疏論 九月上誕節, ,上疑宿構 除太子左庶子,分司東都。 東觀察使。 ,深嗟挹之。 其事, 天子不能 召居易與僧惟 交契素深,杭 大和

兼濟生眾 居易 靈 初對策高第,擢 蓄意 未 果 望 風 入翰林,蒙英主特達顧遇,頗欲奮厲効報, 爲當路者所擠, 流徙江湖。 四五 年間, 幾淪 荷致 蠻瘴 身於訏謨之地 自 是宦情衰 則

四三五三

列

易愈不自安,懼以黨人見斥,乃求致身散地,冀於遠害。凡所居官,未嘗終秩,率以病免,固 排陷,朝升暮黜,天子亦無如之何。楊穎士、楊虞卿與宗閔善,居易妻,穎士從父妹也。 落,無意於出處,唯以逍遙自得,吟詠情性爲事。 大和已後,李宗閔、李德裕朋黨事起,是非

求分務,識者多之。五年,除河南尹。七年,復授太子賓客分司。

家妓樊素、蠻子者,能歌善舞。居易旣以尹正罷歸,每獨酌賦詠於舟中,因爲池上篇曰: 曰:「雖有子弟,無書不能訓也」,乃作池北書庫。又曰:「雖有賓朋,無琴酒不能娛也」, 樹橋道間之。 初樂天旣爲主,喜且曰:「雖有池臺,無粟不能守也」,乃作池東粟廩。 初,居易罷杭州,歸洛陽。於履道里得故散騎常侍楊憑宅,竹木池館, 第,即白氏叟樂天退老之地。地方十七畝,屋室三之一,水五之一,竹九之一,而島 東都風土水木之勝在東南偏,東南之勝在履道里,里之勝在西北隅,西閈北垣第 有林泉之致。 叉

味甚佳;博陵崔晦叔與琴,韻甚淸;蜀客姜發授秋思,聲甚澹;弘農楊貞一與靑石 時,有粟千斛,書一車,洎臧獲之習管磬絃歌者指百以歸。 刺史時,得太湖石五、白蓮、折腰菱、青板舫以歸,又作中高橋,通三島逕。 罷刑部侍郎 樂天罷杭州刺史,得天竺石一、華亭鶴二以歸。始作西平橋,開環池路。 先是潁川陳孝仙與醸酒法, 罷蘇州

ďζ

乃作池西琴亭,加石樽焉。

三,方長平滑,可以坐臥。

中島亭,合奏霓裳散序,聲隨風飄,或凝或散,悠揚於竹煙波月之際者久之。 之夕,拂楊石,舉陳酒,援崔琴,彈秋思,頹然自適,不知其他。 而 人所與,洎吾不才身,今率爲池中物。 樂天陶然石上矣。睡起偶詠,非詩非賦,阿龜握筆,因題石間。 大和三年夏,樂天始得請爲太子賓客,分秩於洛下,息躬於池上。凡三任所得,四 每至池風春,池月秋,水香蓮開之旦,露清鶴 酒酣琴罷,又命樂童登 視其粗成韻章,命爲 曲未竟, 唳

池上篇云:

息肩。 所好, 閒。 外無求焉。 十畝之宅,五畝之園,有水一池,有竹千竿。 盡在我前。 有堂有亭,有橋 如鳥擇木, 姑務巢安; 時引一杯,或吟一篇。 有船,有書有酒, 如蛙 一作坎,不知海寬。靈鵲怪石,紫菱白蓮,皆吾 有歌有絃。有叟在中, 白鬚颯然, 識分知足, 妻孥熙熙,雞犬閑閑。優哉游哉,吾將老乎其 勿謂土狹,勿謂地偏,足以容膝,足以

又効陶潛 五 柳先生傳,作醉吟先生傳以自況。 文章曠達,皆此類也。

不拜。 尋授太子少 末,李訓構禍,衣冠塗地,士林傷感,居易愈無宦情。開成元年,除同州刺史,辭疾 /傅,進封 馮翊縣開國侯。四年多,得風病,伏枕者累月,乃放諸妓女樊、蠻

列傳第一百一十六 白居島

四三五五

外形骸而內忘憂患,先禪觀而後順醫治。旬月以還,厥疾少間,杜門高枕,澹然安閑。吟詠 不支。蓋老病相乘,有時而至耳。予栖心釋梵,浪迹佬、莊,因疾觀身,果有所得。 等,仍自爲墓志,病中吟詠不輟。 自言曰:「予年六十有八,始患風痺之疾,體癏首胘,左足 何則?

鳩杖,自稱香山居士。大中元年卒,時年七十六,贈尚書右僕射。 興來,亦不能遏,遂爲病中詩十五篇以自證。」 會昌中,請罷太子少傅,以刑部尙書致仕。與香山僧如滿結香火社,每肩興往來,白衣 有文集七十五卷,經史

事類三十卷,並行於世。 長慶末,浙東觀察使元稹,爲居易集序曰: 遠、玄珠、斬白蛇等賦洎百節判,新進士競相傳於京師。 數十章,指言天下事,時人比之風、騷焉 禮部侍郎高郢始用經藝爲進退,樂天一舉擢上第。明年,中拔萃甲科,由是性習相近 聲韻,十五志辭賦,二十七舉進士。」貞元末,進士尙馳競,不尙文,就中六籍尤擯落。 稱旨,又登甲科。未幾,選入翰林,掌制誥。 樂天始未言,試指「之」「無」字能不悞。始旣言,讀書勤敏,與他兒異。五六歲識 比比上書言得失,因爲賀雨詩、秦中吟等 會憲宗皇帝策召天下士,對詔

韻律體及雜體,前後數十詩。是後各佐江、通,復相酬寄。巴、蜀、江、楚間洎長安中少 予始與樂天同祕書,前後多以詩章相贈答。予譴掾江陵,樂天猶在翰林,寄予百 ď

不道。 皆對曰:「先生教我樂天、徼之詩。」固亦不知予爲徼之也。又雞林賈人求市頗切,自 苟求自售,雜亂間廁,無可奈何。 能 年,遞相仿效, 云:「本國宰相,每以一金換一篇,甚僞者,宰相輒能辨別之。」自篇章已來,未有如是流 知者。 其繕寫模勒,衒賣於市井,或因之以交酒茗者,處處皆是。其甚有至盜竊名姓, 然而二十年間,禁省觀寺、郵候牆壁之上無不書,王公妾婦、牛童馬走之口無 競作新辭,自謂爲元和詩,而樂天秦中吟、賀雨諷諭閑適等篇,時人罕 予嘗於平水市中,見村校諸童,競習歌詠,召而問之,

纘,成五十卷,凡二千二百五十一首。 改元,長慶訖於是矣,因號白氏長慶集。 長慶四年,樂天自杭州刺史以右庶子召還,予時刺會稽,因得盡徵其文,手自排 前輩多以前集、中集爲名,予以爲陛下明年當

傳之廣者。

之類長於當,碑記敍事制誥長於實,啓奏表狀長於直,書檄辭册剖判長於盡。總而言 遺,感傷之詩長於切,五字律詩百言而上長於贍,五字七字百言而下長於情,賦贊箴誠 之,不亦多乎哉 大凡人之文,各有所長,樂天長可以爲多矣。 夫諷諭之詩長於激,**閉**適之詩長於

人以爲輝序盡其能事

列傳第一百一十六 白居島

子,以其姪孫嗣。遺命不歸下邽,可葬於香山如滿師塔之側,家人從命而葬焉。 居易嘗寫其文集,送江州東西二林寺、洛城香山聖善等寺,如佛書雜傳例流行之。 無

習,以至成名。當時友悌,無以比焉。 行簡按覆之,不實,志懼,自刺死。 拾遺,累遷司門員外郎、主客郞中。 辭賦尤稱精密,文士皆師法之。居易友愛過人,兄弟相待如賓客,行簡子龜兒,多自敎 府罷,歸潯陽。居易授江州司馬,從兄之郡。十五年,居易入朝爲尚書郎,行簡亦授左 行簡字知退。貞元末,登進士第,授秘書省校書郎。 長慶末,振武奏水運營田使賀拔志言營田數過實,詔令 行簡寶曆二年多病卒,有文集二十卷。行簡文筆有兄 元和中,盧坦鎮東蜀,辟爲掌書

爲諸兄之所訓厲。長慶初,登進士第,佐李聽,歷河東、鄭滑、邠寧三府節度掌書記,試大理 敏中字用晦,居易從父弟也。 大和七年,丁母憂,退居下邽。 祖鳞,位終揚府錄事參軍。父季康,溧陽令。敏中少孤, 會昌初,爲殿中侍御史,分司東都,尋除戶部員外郎,

Q.

武宗皇帝素聞居易之名,及卽位,欲徵用之,宰相李德裕言居易衰病不任朝謁,

旨。 校 制 夫、太清宮使、太原郡開 從 加 侍 司 置 弟 無一言伸理 一等使。 中。 會昌 敏中辭 徒、 平章事、江 七年, 一年罷! 藝類 同平 居易 相,爲河中尹 物論 進位 章 陵 事 卽 尹 罪之。 特進、成都 **`**`\ 國公、 荆南 兼 日 刑 知 食邑二千戶。 節度使。 五 部 制誥,召 河中晉絳節度使。 年, 尙 尹 書、集賢 ノ、劍南 罷相, 入翰 懿宗 檢校司空,出爲那州 西川 林 史館 卽位 及李德裕再貶嶺南, 充學士 節 大 微 度 累遷 學 副 士。 拜 ,遷中書舍人。 大使、 中書令。太子太師致仕卒。 司 宣宗郎: 徒、門下 知節 刺 位 史、州寧節 敏中 度 ·侍郎、平章事 , 等事 累至 加右 居 匹 兵部侍 僕 輔之首, + 度、 射、 復 招撫 金紫 年二月 郎 (輔政。) 党項 學士 光 雷 同 祿 檢 都 毁 大 承

逃季 組 句。 成 班 爭 緒 務 而 者 咸 史臣 之詆 欲 耀 蓋 雕 錙 蟲 以 寡 曰:舉才 珠 ,類七子者幾 鉄 罕 訶 璣 採葛,糠粃 孰望 趨 璐 選 函 子选· 士之法,尚矣。 臺 丈,矯首皆希於屈 一構 懷沙 何? 之稱 而 間 之金 賞? ,較麗藻於碧雞,鬭新奇於白 至潘、陸情致之文,鮑、 迨今千載,不乏辭人,統 碧。 自漢策賢良,隋加詩賦,罷 (宋) 或 初開文館 , 駕肩 並擬 於[風 高宗禮茂才,虞、許擅 謝清便之作,迨於除、庾,踵 論六義 {騷 鳳 中正之法,委銓舉之司。 暨編 或侔箴闞 之源,較其三 之簡牘 之篇,或效補亡之 價於前、蘇、李馳 播 一變之體 在管絃, | 增華 未 由 如

記

聲於後。或位昇台鼎,學際天人,潤色之文,咸布編集。然而向古者傷於太僻,徇華者或至 盂之小說。就文觀行,居易爲優,放心於自得之場,置器於必安之地,優游卒歲,不亦賢乎。 樂天而已。臣觀元之制策,白之奏議,極文章之靈奧,盡治亂之根荄。非徒謠頌之片言,盤 元、白之盛也。 昔建安才子,始定霸於曹、劉;永明辭宗,先讓功於沈、謝。元和主盟,微之、 不經,龌龊者局於宮商,放縱者流於鄭、衞。 若品調律度,揚搉古今,賢不肖皆賞其文,未如 贊曰:文章新體,建安、永明。沈、謝旣往,元、白挺生。但留金石,長有茲英。不習孫、

校勘記

奥,焉知用兵?

- (1) 教之至也 「教」字各本原無,據元氏長慶集卷二九補。
- (三) 王紹 各本原作「王沼」,據本書卷一二三王紹傳、新書卷一七四元稱傳改。
- (三) 劉秩 各本原作「劉歆」,據元氏長慶集卷三二、冊府卷七七〇改
- (1) 授於人以八百 「百」字各本原作「伯」,據元氏長慶集卷三二改。
- 金 諳識聲韻 「諳」字各本原作「暗」,據白氏長慶集卷二八改。
- (代) 獨房蕊有異 各本原作「房獨蕊有異」,據白氏長慶集卷一八改。

舊唐書卷一百六十七

ψ

列傳第一百一十七

趙宗儒 竇易直 李逢吉 段文昌 子成式 宋中錫 李程

時父驊祕書少監,與父並命,出於一日,當時榮之。建中四年, 授弘文館校書郎。滿歲,又以書判入高等,補陸渾主簿。數月, 居父憂,免喪,授司門、司勳二員外郎。 趙宗儒字秉文。 八代祖彤,仕後魏爲征南將軍。 父驊, 爲秘書少監。 徵拜右拾遺, 充翰林學士。 轉屯田員外郎,內職 宗儒舉進士,初 如故。

御史杜倫,各以過黜之。尚書左丞裴郁、御史中丞盧紹比皆考中上,宗儒貶之中中。又祕書 入中中。 少監鄭雲達考其同官孫昌裔入上下,宗儒復入中上。凡考之中上者,不過五十人,餘多減 貞元六年,領考功事,定百吏考績,黜陟公當,無所畏避。右司郎中獨孤良器、殿中侍 德宗聞而善之,遷考功郎中。丁母憂,終喪,授吏部郎中。 十一年,遷給事中。

列傳

第

百

一十七

趙宗

儒

庶子。 二年 ,與諫議大夫崔損同日以本官同中書門下平章事,俱賜紫金魚袋。 十四年,罷相,爲右

卿閉 宗 關 六年,故有 儒端居守道,勤奉朝請而已,德宗聞而嘉之。二十年,遷吏部侍郎,召見勞之曰:「知 此 拜。 曩者與先臣並命,倘念之耶?」宗儒因俯伏流涕。 德宗崩,順宗命

爲

德宗哀册文,辭頗悽惋

爲兵 入爲 夫、

膏絡

感際節度觀察等使。

赴鎭後、

擅用供軍錢八千餘貫、

坐罰一月俸。 散 冗 充山 (食之戍二千人。六年,又入爲刑部尙書。八年, 部尙書。 禮部、戶部二尙書,尋檢校吏部尙書,守江陵尹、兼御史大夫、荆南節度營田 元 和 南西道節度觀察等使。九年,召拜御史大夫,俄遷檢校右僕射、河中尹 初, 檢校禮部尚書,判東都尚書省事、兼御史大夫,充東都留守、畿汝都防禦使。 九月,改太子少傅,權知吏部尚書銓事。 轉檢校吏部尚書、興元 十四年九月,拜吏部尚書。 十一年七月,入 尹、 /、兼御史大 觀察等使。 兼御

就試。 **設**,本在親臨,南省試人,亦非舊典。 敕 一比者先朝徵集應制人等,已及時限,恐皆來自遠方,難於久住,酌宜審事,遂委有 穆宗即位 如聞 所集之人多已分散,須知審的,然後裁定,宜令所司 ,以初釋服, 令尚書省官試先朝所徵集應制舉人, 宗儒奏曰:「準今月十五 今覃恩旣畢,庶政惟新。況山陵日近,公務繁迫,待問 商量聞奏者。 伏 以 制 司 定日 科 所 日

瞬

之士,就試非多。臣等商量,恐須權罷。」從之。復拜太子少傅,判太常卿事

作,幼君荒誕,伶官縱肆,中人掌敎坊者移牒取之。宗儒不敢違,以狀白宰相。 在有司執守,不合關白。以宗儒怯不任事,改太子少師 長慶元年二月,檢校右僕射,守太常卿。太常有師子樂,備五方之色,非會朝聘享不 宰相以爲事

之。五年,宋申錫被誣,上召師保已下議其刑,上以宗儒高年,宣令不拜。尋拜疏請老。六 任,八領選部,略於儀矩,切於治生,時論以此少之。 年,韶以司空致仕。是歲九月卒,年八十七,廢朝,册贈司徒。宗儒以文學進,前後三鎭方 子太傅。|文宗召見,諮以理道,對曰:「澆、舜之化,慈儉而已。 寶曆元年,遷太子太保。昭愍晏駕二,爲大明宮留守。 願陛下守而勿失。」文宗嘉納 大和四年,拜檢校司空、兼太

書省校書郎,再以判入等,授藍田尉。累歷右司、兵部、吏部三郎中。元和六年,遷御史中書省校書郎,再以判入等,授藍田尉。累歷右司、兵部、吏部三郎中。元和六年,遷御史中 丞,謝日,賜緋魚袋。八年,改給事中。九月,出爲陝虢都防禦觀察使,仍賜紫。入爲京兆 萬年尉韓晤姦贓事發,易直令曹官韋正晤訊之,得贓三十萬。 寶易直字宗玄,京兆人。祖元昌,彭州九隴縣令。父彧,廬州刺史。 易直舉明經,爲祕 上意其未盡,詔重鞫,坐

等使。

臧三百 萬 ,貶易直 金州 刺史,正晤長流昭州。 十三年六月,遷宣州刺史、宣歙池都團練觀察

倒戈 將王 篡取國淸而出之,因欲 「賞給無名,却恐生患。」乃已。 擊亂黨,並擒之。 國淸指以爲賞,激諷州兵謀亂。 長慶二年七月,汴州將李齐逐其帥李愿,易直聞之, 大剽。 國淸等三百餘人,皆斬之。 易直登樓謂將吏曰:「能誅爲亂者,每獲一人,賞十萬。」衆喜, 軍士已聞之。 先事有告者,乃收國淸下獄。 時江、准旱,水淺 欲出官物以賞軍。 轉轉 運司錢帛委積不 其黨數千,大呼入獄中, 或謂易直 能漕

以本 卒, 太常 二年 贈 ·官同平章事, 卿 ÷ 九月,以李德裕代還,爲吏部侍郎。 司徒,諡 月罷 事 相 十一月, 日恭惠 ,檢校左僕射、平章事、襄州刺史、山南東道 判使如故。 檢校司空、鳳翔尹、鳳翔隴節度使。 改門下侍郎,封晉陽郡公。 十一月,改戶部,兼御史大夫,判度支。 節度使(il)。五年,入爲左僕射,判 六年, 以疾求還京師。 寶曆元年七月,罷判度支。 四年 七年四月 五. 大和 月,

易直 黨, 凡於公舉 一時爲御史中丞,奏駁餘慶所議。 易直自入仕十年餘,常居散秩,不應請辟,及居方任,亦以公廉聞。在相位,未嘗論 即無所避。 然元 和中,吏部尙書鄭餘慶議僕射上日儀制,不與隔品官亢禮。 及易直爲左僕射(三)、却行隔品致敬之禮、時論非之。 用親

ıĘ.

列傳第一百一十七 李逄吉

賜緋。 授振武節度掌書記。入朝爲左拾遺、左補闕,改侍御史,充入吐蕃册命副使、工部員外郎, 員外郎李巨並爲太子諸王侍讀。九年,改中書舍人。十一年二月,權知禮部貢舉、騎都尉, 又充入南詔副使。元和四年,使還,拜祠部郎中,轉右司。六年,遷給事中。 李逢吉字虚舟,隴西人。貞觀中學士李玄道會孫。祖顏,父歸期。逢吉登進士第,釋褐 四月,加朝議大夫、門下侍郎、同平章事,賜金紫;其貢院事,仍委禮部尚書王播署 七年,與司勳

欲爲元稹刺裴度。 及捕于方,鞫之無狀,稹、度俱罷相位,逢吉代度爲門下侍郎平章事。 自 在太原時,嘗上表論觸姦邪。及同居相位,逢吉以爲勢必相傾,乃遣人告和王傅于方結客, 道節度使。逢吉於帝有侍讀之恩,遣人密結倖臣,求還京師。長慶二年三月,召爲兵部尙 學士,罷逢吉政事,出爲劍南東川節度使、檢校兵部尙書。穆宗卽位,移襄州刺史、山南東 之,由是相惡。及度親征,學士令狐楚爲度制辭,言不合旨,楚與逢吉相善,帝皆黜之,罷楚 時裴度亦自太原入朝。以度招懷河朔功,復留度,與工部侍郎元稹相次拜平章事。 逢吉天與姦回,妬賢傷善。 時用兵討准、蔡,憲宗以兵機委裴度,逢吉慮其成功,密沮

徐州 言度 是爱以恩澤結朝臣之不逞者,造作謗言,百端中傷裴度。 爲逢吉排斥,而度於國有功,不宜擯棄,故得以僕射在朝。 ,李介據汴州,國威不振,天下延頸俟度再秉國鈞,以攘暴亂。及爲逢吉嫁禍,奪其權, 屬時君荒淫,政出羣小,而度竟逐外藩 賴學士李紳、韋處厚等顯於上前, 時已失河朔,而王智興擅據

御 遜 史大夫,放臺參。 喧論於朝。 學 士李紳 有寵,逢吉惡之,乃除爲中丞,又欲出於外,乃以吏部侍郎韓愈爲京兆尹,兼 逢吉乃罷愈爲兵部侍郎,紳爲江西觀察使。紳中謝日,帝留而不遣。 以紳褊直,必與愈爭。及制出,紳果移牒往來,愈性木強,遂至語辭不

四海爲之側目,朝士上疏論列者十餘人。

胳 號「八關十六子」。又新等八人居要劇,而胥附者又八人,有求於逢吉者,必先經此八人納 馬。 譎 日:「陛 多端,守澄見之甚悅。 朝士代逢吉鳴吠者,張又新、李續之、張權興、劉栖楚、李虞、程昔範、姜洽、李仲言,時 翼城人鄭注以醫藥得幸於中尉王守澄,逢吉令其從子仲言賂注,求結於守澄。 下得爲太子,逢吉之力也,是時,杜元穎、李紳堅請立深王爲太子。」乃貶紳端州 如意者。 逢吉尋封凉國公,邑千戶,兼右僕射。 自是,逢吉有助,事無違者。一敬宗初卽位,年方童丱,守澄從容奏 仲言辯 司

初 度連上章請入覲。 昭愍卽位,左右屢言裴度之賢,曾立大勳,帝甚嘉之。因中使往興元,卽令問訊。 逢吉之黨坐不安席, 如失攢身,乃相與爲謀,欲沮其來。 張權興撰 寶曆

ď

|昭事 仍叔 | 彙流傷州, 李渉流康州, 李虞自拾遺爲河南士曹。 冤死 爲 李涉、 |准 昭 因 逢吉冀法司 言。 非 『自求』,僕當字足下爲『利見』。」文字往來,其間甚密。及裴度求覲,無計沮之,卽令訐武 酒 相見,逢吉厚相結託,自是疑怨之言稍息。 衣小兒」之謠,傳於閭巷。 ,以暴揚其迹。 旣 與京師人劉審、張 程之族, 甘心。 金吾兵曹茅彙者, 時獎用之,累奏爲刺史。 不能沮,又令衞尉卿劉 鞫昭行止,則顯裝度任用,以沮入朝之行。 誣人以自免,予不爲也。」及昭下獄, 知武昭鬱鬱恨不得官, 再榮旣告,李仲言誠彙曰:「言武昭與李程同謀則活,否則爾死。」彙曰: 少騰說刺逢吉之言。 於京師 遵古從人安再榮告武昭謀害逢吉。 言度相有天分,應謠識,而韋處厚於上前解析,言權輿所撰之 及度被斥,昭以門吏久不見用, 貴遊間以氣俠相許,二人出入程及逢吉之門。 仍叔謂昭曰:「程欲與公官,但逢吉阻之。」昭愈憤怒, 審以昭言告張權興, 逢吉待茅彙尤厚, 嘗與彙書云: 「足下當字僕 逢吉之醜迹皆彰。 敬宗待裴度益厚,乃自漢中召還,復知政 逢吉又與同列李程 客 乃聞于逢吉, 武昭者,有才力, 于京師,途窮 昭死,仲言流象州,茅 不協。 水部郎中李 即令茅彙召 頗有怨言。 太學博士 裴度破

和二年,改汴州刺史、宣武軍節度使。 逢吉檢校司空、平章事、襄州 刺史、山南東道節度使,仍請張又新、李續之爲多佐。 五 一年八月,入爲太子太師、東都留守、東畿汝防禦使,

列

第一百一十

七

李

湰

吉

段

文

昌

任朝謁,即以司徒致仕。九年正月卒,時年七十八。贈太尉,諡曰成。 加開府儀同三司。八年,李訓用事。三月,徵拜左僕射,兼守司徒。時逢吉已老,病足,不

誇,循州刺史,贈左僕射。 文昌家于荆州,倜儻有氣義,節度使裴胄知之而不能用。 韋鼻在 蜀,表授校書郎。李吉甫刺忠州,文昌嘗以文干之。及吉甫居相位,與裴垍同加獎擢,授 登封尉、集賢校理。俄拜監察御史,遷左補闕,改祠部員外郎。元和十一年,守本官,充翰 林學士。 段文昌字墨卿,西河人。高祖志玄,陪葬昭陵,圖形凌煙閣。祖德皎,贈給事中。父

「文昌志尙不修,不可擢居近密。」至是貫之罷相,李逢吉乃用文昌爲學士,轉祠部郎中,賜 依前充職。十四年,加知制誥。十五年,穆宗卽位,正拜中書舍人,尋拜中書侍郎、平章 文昌,武元衡之子壻也。元衡與宰相韋貫之不協,憲宗欲召文昌爲學士,貫之奏曰:

di.

昌素洽蜀人之情,至是以寬政爲治,嚴靜有斷,蠻夷畏服。二年,雲南入寇,黔中觀察使崔 長慶 元年,拜章請退。朝廷以文昌少在西蜀,韶授西川節度使、同中書門下平章事。文

邢部尚書,轉兵部,兼判左丞事。

文宗卽位,遷御史大夫,尋檢校尙書右僕射、揚州大都督府長史、同平章事、淮南節度

使。大和四年,移鎭荆南。

文昌於荆、蜀皆有先祖故第,至是贖爲浮圖祠。 又以先人墳墓在荆州, 別營居第以置

祖禰影堂,歲時伏臘,良辰美景享薦之。徹祭,卽以音聲歌舞繼之,如事生者 · , 搢紳非焉

太尉。有文集三十卷。 六年,復爲劍南 西川節度。九年三月,賜春衣中使至,受宣畢,無疾而卒,年六十三,贈

文昌布素之時,所向不偶。 及其達也,揚歷顯重,出入將相,洎二十年。 其服飾玩好、

歌童妓女,苟悅於心,無所愛惜,乃至奢侈過度,物議貶之。子成式。

鄎。 咸通初,出爲江州刺史。 成式字柯古,以蔭入官,爲秘書省校書郎。 解印,寓居襄陽,以閑放自適。 研精苦學,祕閣書籍,披閱皆遍。 家多書史,用以自娛,尤深於 累遷尙書

佛書。所著酉陽雜俎傳於時。

韋貫之罷相,出湖南,辟爲從事。其後累佐使府。 宋申錫字慶臣。 祖素,父叔夜。 申錫少孤貧,有文學。 長慶初,拜監察御史。二年,遷起居舍 登進士第,釋褐祕書省校書郎。

寶曆二年,轉禮部員外郎,尋充翰林侍講學士。

扇。 人,復爲翰林學士。 及申錫被用,時論以爲激勸。文宗卽位,拜戶部郎中、知制誥。大和二年,正拜中書舍 申錫始自策名,及在朝行,淸愼介潔,不趨黨與。當長慶、寶曆之間,時風囂薄,朋比大

王守澄所奏,得本軍虞候豆盧著狀,告宋申錫與潭王謀反,隨等相顧愕然。 章事。中錫素能謹直,寵遇超輩,時情大爲屬望。 及到中書,剖斷循常〔8〕,望實頗不相副 舊,跋扈尤甚。有鄭注者,依恃守澄爲姦利,出入禁軍,賣官販權,中外咸扼腕視之。文宗雅 無可奈何,令與外廷朝臣謀去之,且約命爲宰相,申錫頓首謝之。未幾,拜左丞,踰月,加平 知之,不能堪。申錫時居內廷,文宗察其忠厚,可任以事。嘗因召對,與申錫從容言及守澄 云:「所召無|宋申錫。」|申錫始知被罪,望延英以笏叩頭而退。|隨等至,文宗以神策軍中尉 大和五年,忽降中人召宰相入赴延英。 初,文宗常患中人權柄太盛,自元和、寶曆比致宮禁之禍。及王守澄之領禁兵,恃其宿 路隨、李宗閱、牛僧孺等既至中書東門,中人 初,守澄於浴堂

家人買子緣信等。 又於十六宅及市肆追捕胥吏,以成其獄。 文宗又召師保、僕射、尚書丞 以 郎、常侍、給事、諫議、舍人、御史中丞、京兆尹、大理卿,同於中書及集賢院參驗其事 馬存亮同入,諍於文宗曰:「謀反者適宋申錫耳, 爲 鄭注所構告于文宗,守澄卽時於市肆追捕,又將以二百騎就靖恭里屠申錫之家。會內官 何不召南司會議。今卒然如此,京師企足

皆伏玉階下奏以申錫獄付外,請不於禁中訊鞫。文宗曰:「吾已謀於公卿大僚,卿等且出。」 質、補闕盧鈞舒元褒羅泰蔣係裴休竇宗直韋温、拾遺李羣韋端符丁居晦袁都等一十四人, 玄亮固言,援引今古,辭理懇切。 翌日,開延英,召宰臣及議事官,帝自詢問。左常侍崔玄亮、給事中李固言、諫議大夫王 玄亮泣涕久之,文宗意稍解,貶申錫爲右庶子,潭王爲巢

縣公。再貶申錫爲開州司馬。

其事。 詐,乃罷申錫爲庶子。 時京城恟恟,衆庶譁言,以爲宰相眞連十宅謀反,百僚震駭。 居一二 日,方審其詐。諫官伏閣懇論,文宗震怒,叱諫官令出者數四。 初, 僕射竇易直曰:「人臣無將,將而必誅。」聞者愕然。 潭王凑,文宗之愛弟也,賢而有人望。 豆盧著者,職屬禁軍,與注親表。文宗不省其 申錫旣得密旨,乃除王璠爲京兆尹,以密旨喻之。璠不能謀,而注與守澄知之,潛爲 唯京兆尹崔琯、大理卿王正雅連 時中外屬望大僚三數人廷辯

列

百一十七

宋申

李程

<u></u>
翕然推重。初議申錫抵死,顧物論不可,又將投於嶺表,文宗終悟外廷之言,乃有開州之命。 上疏請出內獄,且曰:「王師文未獲,卽獄未具,請出豆盧著與申錫同付外廷勘。」當時人情 初,申錫旣被罪,怡然不以爲意,自中書歸私第,止於外廳,素服以俟命。其妻出謂之

鋤去姦亂,反爲所羅織,夫人祭申錫豈反者乎?」因相與泣下。 曰:「公爲宰相,人臣位極於此,何負天子反乎?」申錫曰:「吾自書生被厚恩,擢相位,不能

罪,爲有司驗劾,多獲其四方受領所還問遺之狀,朝野爲之歎息。 且與貞元時甚相背矣。申錫至此,約身謹潔,尤以公廉爲己任,四方問遺,悉無所受。旣被 申錫自居內廷,及爲宰相,以時風侈靡,居要位者尤納賄賂,遂成風俗,不暇更方遠害,

章事、上柱國,賜紫,兼贈兵部尙書。仍以其子愼微爲城固縣尉。 宜許其歸葬鄉里,以示寬恩。」開成元年九月,詔復申錫正議大夫、尚書左丞、同中書門下平 七年七月,卒於開州。韶曰:「申錫雖不能周愼,自抵憲章,聞其亡歿遐荒,良用悲惻。

十年,入朝爲監察御史。其年秋,召充翰林學士。順宗卽位,爲王叔文所排,罷學士。三遷 李程字表臣,隴西人。父鸛伯。程,貞元十二年進士擢第,又登宏辭科,累辟使府。二

爲 爲 十三年四月, 淮 員外郎。元和中,出爲劍南西川節度行軍司馬。 西 都統 , 韶程銜命宣論。 拜禮部侍郎。六月,出爲哪州刺史、哪岳觀察使。入爲吏部侍郎,封渭源男, 明年,拜中書舍人,權知京兆尹事。十二年,權知禮部貢舉。 十年,入爲兵部與中,尋知制誥。

.邑三百戶。|敬宗卽位之五月,以本官同平章事

校尙書左僕射、平章事、河中尹、河中晉絳節度使。 年(禹),罷相,檢校兵部尙書、同平章事、太原尹、北京留守、河東節度使。 大和四年三月,檢 數陳經義。 敬宗沖幼,好治宮室,畋遊無度,欲於宮中營新殿,程諫曰:「自古聖帝明王,以恭儉化 陛下在諒闇之中,不宜興作,願以瓦木迴奉園陵。」上欣然從之。程又奏請置侍講學 程辯給多智算, 能移人主之意,尋加中書侍郎,進封彭原郡公。 寶曆二

同。 令文,已經施行,不合更改。 宜準大和四年十一月六日敕處分。」 所據。」時中丞李漢以爲受四品已下拜太重。敕曰:「僕射上儀,近已詳定。所緣拜禮,皆約 受拜,王涯、竇易直已行之於前。今御史臺云:已聞奏,太常寺定取十五日上。臣進退未知 六年, 在元和、長慶中,僕射數人上日,不受四品已下官拜。近日再定儀注,四品已下官悉許 就加檢校司空。七月, 徵爲左僕射, 中謝日奏曰:「臣所忝官上禮, 前後儀注不

|程藝學優深,然性放蕩,不修儀檢,滑稽好戲,而居師長之地,物議輕之。 七年六月,檢 第一百一十七 李 程 校 勘 記

年五月,復入爲右僕射,兼判太常卿事。十一月,兼判吏部尙書銓事。 校司空、汴州刺史、宣武軍節度使。九年, 徒,出爲襄州刺史、山南東道節度使。卒,有司諡曰繆。子廓 復爲河中晉絳節度使 就加檢校司徒。 二年三月, 檢校司 開成元

鄭進士登第,以詩名聞於時。 |大中末,累官至潁州刺史,再爲觀察使。 鄭子書,亦登進

士第。

古起徒步而至鼎司,欺蔽幼君,依憑內豎,蛇虺其腹,毒害正人,而不與李訓同誅,天道福淫 史臣曰:宗儒、易直,以寬柔養望,坐致公台,與時沉浮,壽考終吉,可謂能奉身矣。 申錫小器大謀,貶死爲幸。程不持士範,歿獲醜名。君子操修,豈宜容易?

諧,于道難周。 贊曰:趙、竇優柔,坐享公侯。 蝮蛇野葛,逢吉之流。 **豈無** 人?主輔謨猷。 程、錫弼

æ

校勘記

(二) 昭愍 各本原作「昭肅」,廿二史考異卷六〇:「『昭肅』當作『昭愍』,敬宗諡也。」據改。

列 傳 百 _ + 七 校 勘

記

四三七五

3 山南東道 「東」字各本原作「西」。 前既云其爲襄州刺史,襄州爲山南東道治所,新書卷一五二

愛易直傳、合鈔卷二一八**愛**易直傳正作山南東道。今改。

3 左僕射 「左」字各本原作「右」,據本卷上文及合鈔卷二一八鐘易直傳改。

剖斷循常 「剖」字各本原作「割」,據冊府卷六七〇改。

寶曆 各本原作「寶應」,據冊府卷三二二改。

ģ,

舊唐書卷 一百六十八

列傳第一百一十八

章溫 蕭祐附 獨孤郁 弟朗 錢徽 子可復 高釴 弟銖

鑡

馮宿 弟定審 封敖

不拜。 免喪, 成,經喜曰:「此無愧也。」調授咸陽尉。 入爲監察御史,以父在田里, 入高等,在羣士之上,得非交結權幸而致耶?」令設席於庭,自出判目試兩節。 太常寺奉禮郎。以書判拔萃,調補祕書省校書郎。 時經致仕田園,聞温登第,愕然曰:「判 弟貫之,憲宗朝宰相,自有傳。 章温字弘育,京兆人。 久之爲右補闕, 忠鯁救時。 換著作郎,一謝卽還。侍省父疾,温侍醫藥,衣不解帶,垂二十年。 祖肇,吏部侍郎。父綬,德宗朝翰林學士,以散騎常侍致仕。 温七歲時,日念毛詩一卷。年十一歲,應兩經舉登第。 宋申錫被誣,温倡言曰:「宋公履行有素,身居台輔,不當 憲府禮拘, 難於省謁, 父憂,毀瘠踰制。 温命筆即 釋褐

四三七七

列

百一

十 八

軍

盈

列伏閣切爭之,由是知名。

有此,是姦人陷害也。吾輩諫官,豈避一時之雷電,而致聖君賢相蒙蔽惑之咎耶?」因率同

然廢職,以宗廟之重,爲陛下所私,羣官有司,便同委棄。此臣竊爲聖朝惜此事也。 誠。宜黜慢官,以懲不恪之罪,擇可任者,責以繕完之功。此則事歸于正,吏舉其職也。而 修。」上乃止內使。 廟,皆書史策,苟非舊典,不可率然。伏乞更下詔書,得委所司營繕,則制度不紊,官業交 聖思不勞口,百職無曠。今慢官不恪,止于罰俸,宗廟所切,便委內臣。是許百司之官,公聖思不勞口,百職無曠。今慢官不恪,止于罰俸,宗廟所切,便委內臣。是許百司之官,公 事存典故,國有經費,而最重者,奉宗廟也。伏以太廟當修,詔下踰月,有司弛墮,曾不加 之。温上疏曰:「臣聞吏舉其職,國家所以治;事歸於正,朝廷所以尊。夫設制度,立官司, 大和五年,太廟第四、第六室缺漏,上怒,罰宗正卿李銳、將作王堪,乃詔中使鳩工補葺 事關宗

末事。今歲三川水災,江淮旱歉,恐非崇飾徽稱之時。」帝深嘉之,乃止。改侍御史。 羣臣上尊號,温上疏曰:「德如三皇止稱皇,功如五帝止稱帝。 徽號之來,乃聖王之

拒則生患。

温曰:「擇禍莫若輕。

拒之止於遠貶,從之有不測之禍。」

鄭注誅,轉考功員外 君子也。」鄭注鎭鳳翔,自知不爲所齒,求德門弟子爲參佐,請温爲副使。或以爲理不可拒, 李德裕作相,遷禮部員外郎。或以温厚於牛僧孺,言於德裕,德裕曰:「此人堅正 中立,

尋知制誥,召入翰林爲學士。 以父職禁廷,憂畏成病,遺誠不令居禁職,懇辭不拜。

莊恪得罪,召百僚渝之,温曰:「太子年幼,陛下訓之不早,到此非獨太子之過。」遷尚書 ,雞鳴時問安西宮。」太子幼,不能行其言。稱疾,上不悅,改太常少卿。未幾,拜給事 王晏平爲靈武,刻削軍士,贓罪發,帝以智興之故,滅死,貶官。溫三封詔書,文宗深獎 俄兼太子侍讀,每晨至少陽院,午見莊恪太子。温曰:「殿下盛年,宜早起,學周文王爲

清流。 郎中。 馬,温從容白德裕日:「李漢不爲相公所知,昨以不孝之罪絀免,乞加按問。」德裕日:「親情 不入淸流,孰爲陛下當煩劇者?此衰晉之風也。」上素重温,亦不奪其操,出爲陝虢觀察使。 選,不可以賞能吏。」上令中使宜諭,言勗能官,且放入省。温堅執不奉韶,乃改勗檢校禮部 崔珙奏加酬獎,乃令權知職方員外郎。 温居綱轄,首糾其事,出文規爲安州刺史。鹽鐵判官姚勗知河陰院,嘗雪冤獄,鹽鐵使 武宗卽位,李德裕用事,召拜吏部侍郎,欲引以爲相。時李漢以家行不謹,貶汾州司 吏部員外郎張文規父弘靖, 長慶初在幽州爲朱克融所囚, 文規不時省赴, 人士喧然罪 然姚勗士行無玷,梁公元崇之孫,自殿中判鹽鐵案,陛下奬之,宜也。若人有吏能, 翌日,帝謂楊嗣復曰:「韋温不放姚勗入省,有故事否?」嗣復對曰:「韋温志在銓擇 制出,令勗上省,温執奏日:「國朝已來,郎官最爲淸

列 傳 第 百 + 八 章 溫

耶?」温曰:「雖非親昵,久相知耳。」德裕不悅。 居無何,出温爲宣歙觀察使,辟鄭處誨爲觀

察判官,德裕愈不悅。池州人訟郡守,温按之無狀,杖殺之。

一人續至曰:『彼墳至大,功須萬日。』遂不涉而寤。 計今萬日矣,與公訣矣。」明日卒,贈工 明年,瘍生於首,謂愛壻張復魯曰:「予任校書郎時,夢二黃衣人齎符來追,及隡,將渡,

禍。 耶! 多疏簡,唯與常侍蕭祐善。 部尚書、諡日孝。 温無子,女適薛蒙,善著文,續曹大家汝訓十二章,士族傳寫,行于時。 」初温以楊、李與德裕交怨,及居位,温勸楊、李徵用德裕,釋憾解愠,二人不能用,故及 温在朝時,與李珏、楊嗣復周旋。及楊、李禍作,歎曰:「楊三、李七若取我語,豈至是 温剛腸寡合,人

進御, 善鼓琴賦詩,書畫盡妙,遊心林壑,嘯詠終日,而名人高士,多與之遊。給事中韋温尤重之, 刺史、御史中丞、桂管防禦觀察使。 郞 蕭祐者,蘭陵人。少孤貧, 優韶嘉之,授兵部郎中。 **祐博雅好古,尤喜圖畫。** 耿介苦學,事親以孝聞。自處士徵拜左拾遺,累遷至考功 出爲虢州刺史,入爲太常少卿,轉諫議大夫。踰月爲桂州 前代鍾、汪遺法、蕭、張筆勢、編序眞僞,爲二十卷、元和末 大和二年八月, 卒于官, 贈右散騎常侍。 祐 開 澹 貞 退 ,

所賞 獨孤郁,河南人。父及,天寶末與李華、蕭穎士等齊名,善爲文,所著仙掌銘,大爲時流 位終常州刺史。 郁,貞元十四年登進士第,文學有父風,尤爲舍人權德輿所稱,以子

妻之。貞元末,爲監察御史。

拾遺, 拜左 補闕,郁與同列,論之曰:「從郁是宰臣佑之子,父居宰執,從郁不宜居諫列。」乃改爲左 元和初, 又論曰:「補闕之與拾遺,資品雖殊,同是諫官,若時政或有得失,不可令子論父。」 應制舉才證兼茂、 明於體用, 策入第四等, 拜左拾遺。太子司議郎杜從郁

從郁竟改他官。

五年, 館事,預修德宗實錄。 德輿乃有此佳壻。」因詔宰相於士族之家選尙公主者。遷郁考功員外郎,充史館修撰、 匹 兼 年 九年,以疾辭內職。 史館修撰。 ,轉右補闕,又與同列拜章論中官吐突承璀不宜爲河北招討使,乃改招撫宣慰使。 尋召充翰林學士, 遷起居郞。 七年,以本官復知制誥。八年,轉駕部郎中。 十一月,改秘書少監,卒。 權德興作相,郁以婦公辭內職,憲宗曰: 其年十月,復召爲翰林 判

列傳第一百一十八 獨孤郁 錢歡

五年, 語辭侵侮,朗坐同飲,出爲漳州刺史。入爲左司員外郎,遷諫議大夫。 郁弟朗,嘗居諫官,請罷淮西用兵,不協旨,貶興元戶曹。 入爲監察御史,轉殿中。 十 兼充史館修撰,遷都官員外郎。長慶初,諫議大夫李景儉於史館飲酒,憑醉謁宰相, 揚州節度使王播罷

即稱執法不稱,乞罷中丞,敬宗令中使諭之,不允其讓。 文宗卽位,改工部侍郎。 其年十月,高少逸入閤失儀,朗不彈奏,宰相銜阻崔冕事,左授少逸贊善大夫,朗亦罰俸。 八月,出爲福州刺史、御史中丞、福建觀察使。是月赴官,暴卒於路,贈右散騎常侍。 由憲長而除,皆丞相之僚舊也,敕命雖行,則拒而不納,冕竟改太常博士,居中分司東臺。 **劾之,左授司議郎。憲府故事,三院御史由大夫、中丞自辟,請命于朝。時崔冕、鄭居中不** 兼鹽鐵使,行路於中人,求復領銅鹽,朗上章論之。 郁子庠,亦登進士第。大中後,官達,亦至侍郎。 寶曆元年十一月,拜御史中丞。二年六月,賜金紫之服。侍御史李道樞乘醉謁朗,朗 大和元年

錢徽字蔚章,吳郡人(三)。父起,天寶十年登進士第。 起能五言詩。 初從鄉薦、寄家江

即以 湖, |嫋、||李端輩十人,俱以能詩,出入貴遊之門,時號「十才子」,形於圖畫。 |起位終尙書郞。 無所見 嘗於客舍月夜獨吟,遽聞人吟於庭曰:·「曲終人不見,江上數峯青。」起愕然,攝衣視之, 鬼謠 一矣,以爲鬼怪,而志其一十字。 十字爲落句,暐深嘉之,稱爲絕唱。 起就試之年,李暐所試湘靈鼓瑟詩題中有「青」字,起 是歲登第,釋褐秘書省校書郎。 大曆中,與韓

年 年 轉祠 部郎中、 貞元 師 討 准 . 初進士擢第,從事 西、韶朝臣 知制誥。 議兵,徽上疏言用兵累歲,供饋力殫,宜罷淮西之征,憲宗不悅, 八年,改司封郎中、賜緋魚袋,內職如故。 水戎幕。 元和初入朝, 三遷祠部員外郎, 九年,拜中書舍人。十 召充翰林學士。

,守本官。

赴鎭 楊汝士 渾之求: 侍 靇 士李 郎楊憑兄弟以文學知名, 徽學士之職),辭日 長 神亦託舉子周漢賓於徽。及牓出,渾之、漢賓皆不中選。李宗閔與元稹素相厚善。 與徽有舊, 進,盡以家藏書畫獻文昌,求致進士第。文昌將發,面託錢黴,繼以私書保薦。 慶元年,爲禮部侍郎。 道譴逐久之,及得還朝,大改前志,由逕以徼進達,宗閔亦急於進取,二人遂有嫌隙。 內殿 面 是歲,宗閔子壻蘇巢及汝士季弟殷士俱及第。故文昌、李紳大怒。文昌 奏,言黴所放進 家多書畫,鍾、汪、張、鄭之蹟在書斷、畫品者,兼而有之。 時宰相段文昌出鎭蜀川,文昌好學,尤喜圖書古畫。 士鄭朗等十四人,皆子弟藝薄,不當在選中。穆宗以其事 故刑部 初

訪於學士元稹、李紳,二人對與文昌同。遂命中書舍人王起、主客郞中知制誥白居易,於子

亭重試,內出題目孤竹管賦、鳥散餘花落詩,而十人不中選。 詔日:

試,意在精覈藝能,不於異書之中,固求深僻題目,貴令所試成就,以觀學藝淺深。 | 誤特賜及第, 黨,謂之關節,干撓主司。每歲策名,無不先定,永言敗俗,深用興懷。鄭朗等昨令重 寧撫,式示殊恩,特掩爾瑕,庶明予志。<u>孔温業、趙存約、竇洵直所試粗通,與及第,</u>裴 比令宣示錢徽,庶其深自懷愧,誠宜盡棄,以警將來。但以四海無虞,人心方泰,用弘 竹管是祭天之樂,出於周禮正經,閱其呈試之文,都不知其本事,辭律鄙淺,蕪累亦多。 國家設文學之科,本求才實,苟容僥倖,則異至公。訪聞近日浮薄之徒,扇爲朋 鄭朗等十人並落下。 自今後禮部舉人,宜準開元二十五年敕,及第訖, 孤

所試雜文幷策,送中書門下詳覆。

可以 尋貶||徽爲 私 書相證耶?」令子弟焚之,人士稱懺長者。 江州 刺史,中書舍人李宗閱劍州刺史,右補闕楊汝士開江令。 初議貶徽,宗閔、汝

旣而穆宗知其朋比之端,乃下詔曰:

昔者,卿大夫相與讓於朝,士庶人相與讓於列,周成王刑措不用,漢文帝恥言人

過 之非,律有匿名之禁,皆以防三至之毁,重兩造之明。 自 非責實循名,不能彰善癉惡,故孝宣必有告訐及下,光武不以單辭遽行。 ,眞理古也,殷甚慕焉。 中代已還,爭端斯起,掩抑其言則專蔽,誘掖其說則侵誣。 是以爵人於朝則皆勸,刑人於市 語稱訓上

則皆懼,罪有歸而賞當事也。

恪 非,備顧問者互有憎愛。 之請,蓋發其陰私;公論不容之誅,是生於朋黨。擢一官,則曰恩皆自我;黜一職,則 琢磨之益,多銷鑠浸潤之讒。進則諛言諂笑以相求,退則羣居州處以相議。 俗化益訛。 流官, 事 出他門。 末代偷巧,內荏外剛。卿大夫無進思盡忠之誠,多退有後言之謗;士庶人無切磋 而日務從簡易;提紀綱者不以準繩檢下,而日密奏風聞。 禍發齒牙,言生枝葉,率是道也, 殷甚憫焉。 比周之迹已彰,尙矜介特;由徑之蹤盡露,自謂貞方。居省寺者不以勤 苟非|秦鏡照膽,|堯羊觸邪,時君聽之,安可不惑。 參斷一謬, 獻章疏者更相是 留中不出

權,見侵於下輩;大則樞機之重,旁撓於薄徒。尙念因而化之,亦冀去其尤者。 臣懼其寖染,未克澄淸。 之以德,不欲驅之以刑。然而信有未孚,理有未至,曾無恥格,益用雕刓。小則綜覈之 我 國家貞觀、開元,同符三代,風俗歸厚,禮讓皆行。 備引祖宗之書,願垂勸誠之詔,遂伸告論,頗用殷勤。各當自 兵興已來,人散久矣,始欲導 而宰

列

省厥躬,與我同底于道

元稹之辭也。 制出、朋比之徒、如撻於市、咸睚眦於紳、旗。

二月,復授華州刺史。二年秋,以疾辭位,授吏部尙書致仕。三年三月卒,時年七十五。子 徽明年遷華州刺史、潼關防禦、鎭國軍等使。文宗卽位,徵拜尚書左丞。大和元年十

可復、可及,皆登進士第。

軍使所害。

校兵部郎中、兼御史中丞,充鳳翔節度副使。其年十一月,李訓敗,鄭注誅,可復爲鳳翔監 可復累官至禮部郞中。 大和九年,鄭注出鎭鳳翔,李訓選名家子以爲賓佐,授可復檢

等,補秘書省校書郞。累遷至右補闕,充史館修撰。十四年,上疏請不以內官爲京西北和 高釴字翹之。祖鄭賓,宋州寧陵令。父去疾,攝監察御史。武,元和初進士及第,判入

ıÇ. 糴使。十五年,轉起居與,依前充職。 釴 孤貞無黨,而能累陳時政得失。長慶元年,穆宗憐之,面賜緋於思政殿,仍命以本官

充翰林學士。二年,遷兵部員外郎,依前充職。四年四月,禁中有張韶之變,敬宗幸左軍。

列傳第一百一十八 高釴

八年六月卒,贈兵部尙書,遺命薄葬。 部侍郎。四年多,遷吏部侍郎。銓綜之司,官業振舉。七年,出爲同州刺史、兼御史中丞。 是夜、武從帝宿於左軍。 也。帝深納其言,又賜錦綵五十匹。寶曆二年三月,罷學士,守本官。大和三年七月,授刑 月,正拜中書舍人,充職如故。 翌日賊平,賞從臣,賜武錦綵七十匹,轉戶部郎中、知制誥。十二 。謝恩於思政殿,因諫敬宗,以求理莫若躬親, 武少時孤貧、潔己力行、與弟趺、踏皆以檢靜自立、致 用示憂勤之旨

位崇顯,居家友睦,爲搢紳所重

訓、注竊權,惡銖不附已,五月,出爲越州刺史、御史中丞、浙東觀察使。 聞于外。餘等犯難論諍,冀上省悟。旣奉宣傳,相顧失色,以其危亡可翹足而待也。 用也。」是歲,先旱後水,京師穀價騰踊,彗星爲變,舉選皆停,人情雜然流議,鄭注姦謀,日 伏閣論曰:「仲言素行纖邪,若聽用,必亂國經。」上令中使宣諭曰:「**朕要仲言講書**,非有聽 年,拜給事中。七年,爲外官監考使。八年十月,文宗用國子助敎李仲言爲侍講,餘 校左散騎常侍,尋入爲刑部侍郎。四年七月,出爲河南尹。 ,元和六年登進士第。 穆宗卽位,入朝爲監察御史,累遷員外郎、吏部郎中。 會昌末,爲吏部侍郎。 開成三年,就加檢 來陳官 大和 明年,

抑豪華,擢孤進,至今稱之。尋轉吏部侍郎。其年九月,出爲鄂州刺史、御史大夫、鄂岳觀 官途填委,要窒其源,宜改每年限放三十人,如不登其數,亦聽。」然聲選擢雖多,頗得實才, 部三年,每歲登第者四十人。三年牓出後,敕曰:「進士每歲四十人,其數過多,則乖精選。 石曰:「古人因事爲文,今人以文害事,懲弊抑末,實在盛時。」乃以贈爲禮部侍郞。 知禮部貢舉。開成元年春,試畢,進呈及第人名,文宗謂侍臣曰:「從前文格非佳,昨出進士 祭使,卒。 士,仰副聖旨。」帝又曰:「近日諸侯章奏,語太浮華,有乖典實,宜罰掌書記,以誠其流。」|李 題目,是朕出之,所試似勝去年。」鄭覃曰:「陛下改詩賦格調,以正頹俗,然高鍇亦能勵精選 人以爲公。六年二月,自司勳郎中轉諫議大夫。七年,遷中書舍人。九年十月,以本官權 齊之等十八人。膀出之後,語辭紛競,監察御史姚中立以聞,韶鍇審定,乃升李景、王淑等, 鍇 ,元和九年登進士第,升宏辭科,累遷吏部員外。 大和三年,準敕試別頭進士明經鄭 凡掌貢

中書舍人,咸通 三年,遷禮部侍郎,選士得人。出爲潞州大都督府長史、昭義節度、澤潞觀察等使,卒。 武子湜、
,

婚子湘、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、

、 年,改諫議大夫。坐宰相劉瞻親厚,貶高州 司馬。 湘自員外與知制語,正拜 乾符初,復爲中書舍人。

襲取。 宿登進士第 子之迫脅,使得束身自歸,則公於朝廷有靖亂之功,於張氏有繼絕之德矣。」」武俊大悅,卽以 廷,外則境土侵逼於強寇。 孤危若此,公安得坐視哉! 誠能奏天子,念先僕射之忠勳,捨其 爲兄弟,欲同力驅 馮宿,東陽人。 明歲隨 文子華 廬祖墓, 時王武俊且觀其釁,愔恐懼,計無所出,宿乃以檄書招師古而說武俊曰:「張公與君 、,徐州節度張建封辟爲掌書記。 兩河歸天子,衆所知也。 '今張公歿,幼子爲亂兵所脅,內則誠款隔絕於朝 後建封卒,其子愔爲軍士所立, 有靈芝白兔之祥。 宿昆弟二人, 皆幼有文學。 李師古欲乘喪

勞,乃加之美諡。 表聞。 事莫能知,請依前書上考,諫官御史亦請仍舊,並書中上考。 五年,權判考功。 淮西平,拜比部郎中。 **徵爲太常博士。王士眞死,以其子承宗不順,不加諡。** 宿以嘗從建封,不樂與其子處,乃從浙東觀察使買全府辟。 由是朝廷賜愔節鉞,仍贈建封司徒。 轉虞部、都官二員外郞。 宿以宰臣及三品已下官(三),故事內校考別封以進, 會韓愈論佛骨,時宰疑宿草疏,出爲數州 元和十二年,從裴度東征,爲彰義軍節度判官。 宿以爲懷柔之義, 不可遺其忠 、刺史。 愔恨其去己,奏貶泉州司 翰林學士職居內署 入爲刑部郎中。

轉太常 韶授 金魚袋,往總留務。 襄州節度使。 長 慶 少卿。 元 年 敬宗即位,宿常導引乘興,出爲華州 , 以 本官知制誥。 元翼未出深州, 監軍使周進榮不遵詔命, 二年,轉兵部郎中,依前充職。 爲庭湊所圍。 宿以狀聞 二年,以宿檢校右庶子、兼御 刺史。 以父名拜章乞罷,改左散騎常侍, 元翼旣至, 牛元翼以 宿歸朝,拜中書舍人, 深州 史中丞 不從王庭凑, 一,賜紫

兼集賢殿學士,充考制策官。

清顯 郎,修格後敕三十卷,遷兵部侍郎。 所捕者傲睨於文壽之側,宿知而掩之,杖死。 十二月卒,廢朝,贈吏部尙書,諡曰懿。 大和二年,拜河南尹。 時洛苑使姚文壽縱部下侵欺百姓,吏不敢捕。 九年,出爲劍南 有文集四十卷。子圖、陶、韜,三人皆登進士,揚歷 大和 東川 四 年, 節度使,檢校禮部尙書。 入爲工部侍郞。 六年 日,遇大會,嘗 ·, 遷 開成 刑 部 元 年 侍

遺,頓深以爲恨。 定不留而 馮 宿弟定字介夫,儀貌壯偉,與宿俱有文學,而定過之。 于頔 去。 頔 牧姑蘇也 慚, 權德興掌貢士,擢居上第,後於潤州佐薛苹幕,得校書郎,尋爲鄂縣尉 答軍 一、定寓焉,頔 吏, 馳載錢 友於布衣間。 五 十萬,及境謝之。 後頔帥 襄陽, 定飯逆旅 貞元中皆舉進士,時人比之漢朝 定乘驢詣 復書 責以貴傲而返其 軍 門,更不時白

定先時居父憂,因號毀得肺病,趨府或不及時,大學士疑其恃才簡怠, 乃奪其

職、俾爲大理評事。登朝爲太常博士、轉祠部員外郎。

公議不可,宜停見任。」尋除國子司業、河南少尹。 又皆公用。然長吏之體,頗涉無儀,刑賞或乖,宴遊不節。 用,詔監察御史李顧行鞫之。獄具上聞,制曰:「馮定經使臣推問,無入己贓私,所告罰錢, 寶曆二年,出爲郢州刺史。 長壽縣尉馬洪沼告定強奪人妻,及將闕官職田祿栗入己費 緣經恩赦,難更科書,猶持郡符,

吟定送客西江詩。吟罷益喜,因錫禁中瑞錦,仍令大錄所著古體詩以獻。 以雲韶樂和之。舞曲成,定總樂工閱於庭,定立於其間。文宗以其端凝若植,問其姓氏,翰 林學士李珏對曰:「此馮定也。」文宗喜,問曰:「豈非能爲古章句者耶?」乃召升階,文宗自 知匭事 大和九年八月,爲太常少卿。文宗每聽樂,鄙鄭、衞聲,詔奉常習開元中霓裳羽衣舞, 尋遷諫議大夫、

府,不合於都省禮上。」乃詔於本司上事,人推美之。四年,遷衞尉卿。 太子詹事。三年,宰臣鄭覃拜太子太師,欲於尚書省上事。定奏曰:「據六典,太師居詹事 衞 『在殿門,定抗疏論罷,人情危之。 又請許左右史隨宰臣入延英記事,宰臣不樂。 二年,改 是歲,李訓事敗伏誅,衣冠橫罹其禍,中外危疑。及改元御殿,中尉仇士良請用神策仗 是歲 **)上章請老,詔**

封敷

以左散騎常侍致仕。會昌六年,改工部尙書而卒。

番也 先 見其國人寫定商山記於屏障。 長慶中, 源寂使新羅國, 見其國人傳寫諷念定所爲黑水碑、畫鶴記。 其文名馳於戎夷如此。 子袞、顓、軒、巖四人,皆進 章休符之使 西

登第。

咸通中,歷任臺省。宿從弟審、寬。

開成 通中,卒於秘書監。 孔子碑,睿宗篆額,加「大周」兩字,蓋武后時篆也。 三年,遷諫議大夫。四年九月,出爲桂州刺史、桂管觀察使。 審父子郁。 審,貞元十二年登進士第,累辟使府。 審弟寬,子鹹,皆進士擢第,知名於時。 審請琢去僞號,復「大唐」字,從之。 入爲監察御史,累遷至兵部郎中。 入爲國子祭酒。 國子監有 |威

府。 大和中,入朝爲右拾遺。 封敖字碩夫,其先渤海蓨人。祖希奭,父諒,官卑。 會昌初,以員外與知制誥,召入翰林爲學士,拜中書舍人。 敖,元和十年登進士第,累辟諸侯

爾體 敖構思敏速,語近而理勝,不務奇澀,武宗深重之。 痛在股躬。」帝覽而善之,賜之宮錦。 李德裕在相位,定策破迴鶻,誅劉旗, 嘗草賜陣傷邊將詔,警句云:「傷居 議兵之

有「遏 際,同列或有不可之言,唯德裕籌計指畫,竟立奇功,武宗賞之,封衞國公,守太尉。其制語 言不他惑。」制出,敖往慶之,德裕口誦此數句,撫敖曰:「陸生有言,所恨文不迨意。 如卿此 一横議於風波,定奇謀於掌握。逆稱盜兵,壺關畫鎖,造膝嘉話,開懷靜思,意皆我同,

語,秉筆者不易措言。」座中解其所賜玉帶以遺敖,深禮重之。

|宗卽位,遷禮部侍郎。|大中二年,典貢部,多擢文士。轉吏部侍郎、渤海男、食邑七百戶。 四年,出爲興元尹、御史大夫、山南西道節度使,歷左散騎常侍。 |青節度使,入爲戶部尙書,卒。 然敖不持士範,人重其才而輕其所爲,德裕不能大用之。德裕罷相,敖亦罷內職。 十一年,拜太常卿,出爲淄

子彥卿望卿、從子特卿,皆進士及第,咸通後,歷位淸顯。

長者。「郁、朗襟概,鬱有世風。三高並秀於一時, 潤色之能,封無與讓,壽考垂慶,儒何負哉 史臣曰:章公鯁亮,守官犯而得禮。蕭子恬於吏隱,抑亦名賢。 二馮爭驅於千里,咸以摛英掞藻,華國揚 蔚章操韻非高,而從容

贊曰:伏蒲進諫,染翰爲文。 列 傳第一百一十八 封 敖 獨孤、韋氏,志在匡君。 校 勘 配 馮、高諸子, 綺繡繽紛。 四三九三 禁垣擅

美,渤海凌雲。

校勘記

(1) 聖思不勞 「思」字各本原作「恩」,據唐會要卷一八、冊府卷五三三改。

[11] 吳郡人 廿二史考異卷六〇云:「當作吳興人。」按新書卷二〇三盧編傅謂錢起吳興人,徽當亦

是吳興。

(三) 宿以宰臣及三品已下官 册府卷六三六同。唐會要卷八一「已下官」作「已上官」。

舊 書卷一百六十九

in

列傳第一百一十九

李訓 鄭注 王涯 王璠 賈餗 舒元典 郭行餘

羅立言 李孝本

李程,及武昭事發,訓坐長流嶺麦,會赦得還。丁母憂,居洛中。 捷,善揣人意。寶曆中,從父逢吉爲宰相,以訓陰險善計事,愈親厚之。 李訓,肅宗時宰相揆之族孫也。始名仲言。進士擢第。 形貌魁梧, 初與茅彙等欲中傷 神情灑落,辭敏智

中,帝令訓戎服,號王山人,與注入內。帝見其指趣,甚奇之。及訓釋服,在京師。 悅,乘間薦于中尉王守澄,乃以注之藥術,訓之易道,合薦于文宗。守澄以訓緩粗,難入禁 自言與鄭注善,逢吉以爲然,遺訓金帛珍寶數百萬,令持入長安,以路注。 時逢吉爲留守,思復爲宰相,且深怨襲度,居常憤鬱不樂。訓揣知其意,卽以奇計動 大和八年, 注得路

甚

四三九五

列

傳

第一百一十九

李 訓

聞知

,不宜令侍宸扆,終不聽。

入 院 自 流 日, 人補 賜宴,宣法曲弟子二十人就院奏法 加 門 .) 教 召入 、內殿, 面賜緋魚。 曲以寵之。 其年十月,遷國子周易博士,充翰林侍講學士。 兩省諫官伏閣切諫,言訓: 姦邪,海內

兵部 慮,乃疏易義五條,示於百辟,有能出訓之意者賞之,蓋欲知上以師 遂以眞誠謀於訓、注。 謀之不臧,幾成反噬,自是巷伯尤 假, 在翰林, ,心不堪之。 一三五日 郎中、知 文宗性守正嫉惡,以宦 解易之際,或語及巷伯事 制 一入翰林 思欲芟落本根,以雪讎恥,九重深處,難與將相明言。 誥 ,充翰林學士。 自是二人寵幸,言無不從,而深秘之謀,往往流聞於外。 一者權寵太過,繼爲禍胎,元和末弒逆之徒尙在左右,雖外示優 九月, 」, 則 横。 再三憤激,以 因鄭注得幸守澄,俾之援訓,冀黄門之不疑也。 遷禮部侍郎、同平章事,仍賜金紫之服。 動上心。 以其言論縱橫 友寵之。 九年七月,改 前與侍講宋申錫謀, ,謂其必能 上慮中人猜 韶以平章 成事 訓旣

訓愈承恩顧,每別殿奏對,他宰相莫不順成其言,黃門禁軍迎拜戢斂。 腕, 時爲 訓 作威作福 旣 襄陽監軍 秉權 衡, 即謀 ,乃召自漢南,至靑泥驛 訓旣作相,以守澄爲六軍十二衞觀軍容使,罷其禁旅之權,尋賜酖殺之。 誅內豎。 中官陳弘慶者二了,自元和末負弑逆之名,忠義之士無不扼 ,遺人封杖決殺。 王守澄自長慶已來知 訓本以纖達,門庭趨 樞密, 典

附之士,率皆狂怪險異之流,時亦能取正人偉望,以鎭人心。天下之人,有冀訓以致太平

者,不獨人主惑其言。

郎中知雜李孝本權知中丞事,皆訓之親厚者。冀王璠、郭行餘未赴鎭間,廣令召募豪俠及 誅內豎,卽兼圖注。約以其年十一月誅中官,須假兵力,乃以大理卿郭行餘爲邪寧節度使, 戶部尙書王璠爲太原節度使,京兆少尹羅立言權知大尹事,太府卿韓約爲金吾街使,刑部 金吾臺府之從者,俾集其事。 訓雖爲鄭注引用,及祿位俱大,勢不兩立,託以中外應赴之謀,出注爲鳳翔節度使。,俟

露,臣已進狀訖。」乃蹈舞再拜,宰相百官相次稱賀。李訓奏曰:「甘露降祥,俯在宮禁。 陛 言。言出,四方必稱賀也。」上曰:「韓約妄耶?」乃令左右軍中尉、樞密內臣往視之。 下宜親幸左仗觀之。」班退,上乘軟舁出紫宸門,由含元殿東階升殿,宰相侍臣分立於副 `文武兩班,列於殿前。上令宰相兩省官先往視之`旣還`日:「臣等恐非眞甘露,不敢輕 是月二十一日,帝御紫宸。班定,韓約不報平安,奏曰:「金吾左仗院石榴樹,夜來有甘

下有兵聲,驚恐走出,闍者欲扃鎖之,爲中人所叱,執關而不能下。內官迴奏,韓約氣懾汗 健,皆執兵在丹鳳門外,訓已令召之,唯蹯從兵入,邪寧兵竟不至。 旣去,訓召王璠、郭行餘曰:「來受敕旨!」璠恐悚不能前,行餘獨拜殿下。 中尉、樞密至左仗,聞幕

門,帝瞋! 流, 迎帝 萬歲者數四。 本率臺中從人自 訓 攀 ?中書會食,聞難出走,諸司從吏死者六七百人。 不能 ,呼曰:「陛下不得入內。」金吾衞士數十人,隨訓而入。 訓殿上呼曰:「金吾衞士上殿來,護乘輿者, 目叱訓,內官郄志榮奮拳擊其胸 舉首。 須臾,內官率禁兵五百人,露刃出閤門,遇人卽殺。宰相王涯、賈餗、舒元輿 中官謂之曰:「將軍何及此耶?」又奏曰:「事急矣,請陛下入內。」卽舉軟輿 西來,共四百餘人,上殿縱擊,內官死傷者數十人。 ,訓卽僵仆於地。 ,人賞百千。」內官決殿後罘罳,舉興疾趨, 帝入東上閤門,門卽闔,內官呼 羅立言率府中從人自東來,李孝 訓時愈急,邐池入宜政

明池 其髮匿之,從者止之,乃趨 取。」乃斬訓 ,訓恐入軍別受搒掠 是 日 訓中拳 ,持首 而行。 前 仆, 訓弟仲景、再從弟戶部員外郎元皐,皆伏法。 ,乃謂兵士曰:「所在有兵,得我者卽富貴,不如持我首行,**免被奪** 知事不濟,乃單騎走入終南山,投寺僧宗密。 鳳翔、欲依鄭注。 出 山,爲盩厔鎭將宗楚所得,械送京師。 訓與宗密素善、欲剃 至昆

訓 年深 仇 士良以宗密 ,亦知反叛。 容李訓, 然本師教法,遇苦卽救,不愛身命,死固甘心。」中尉魚弘志嘉之,奏釋 造人 縛 入左軍,責以不告之罪。 將殺之,宗密怡然日:「貧僧識

其罪。

絳州 翼城人, 始以藥術游長安權豪之門。 本姓魚,冒姓鄭氏,故時號魚鄭, 注用

事時,人目之爲「水族」。

晚。 監軍,守澄初有難色。 嘗不中其意。 從懲移鎭徐州,又爲職事,軍政可否,懲與之參決。 患注白于煦,憋曰:「彼雖如此,實奇才也。 官,齒於賓席。 翌日,守澄謂愬曰:「誠如公言,實奇士也。」自是出入守澄之門,都無限隔。 元和十三年,李愬爲襄陽節度使,注往依之, 然挾邪任數,專作威福,軍府患之。時王守澄監徐軍,深怒注。 及延坐與語,機辯縱衡,盡中其意,遂延于內室,促膝投分,恨相見之 將軍試與之語,苟不如旨,去未爲晚。」懲卽令謁 愬得其藥力, 因厚遇之, 署爲節度衙推。 注詭辯陰狡,善探人意旨,與愬籌謀,未 日,以軍情 愬署爲巡

讒邪姦巧之徒附之以圖進取; 衞佐、評事、御史,又檢校庫部郎中,爲昭義節度副使。 及守澄入知樞密,當長慶、寶曆之際,國政多專於守澄。 數年之後, 達僚權臣, 爭凑其門。累從山東、京西諸 既以陰事誣陷宋申錫,守道正人,始 注畫伏夜動,交通路遺,初則 軍,歷

大和七年, 列 傳 第 罷邪寧行軍司馬,入京師,御史李款閤內彈之日:「鄭注內通敕使,外結朝 百 + 九 鄭 注 四三九九

側

目焉

官,兩地往來,卜射財貨,畫伏夜動,干竊化權。人不敢言,道路以目。 諫章十數,文宗不納。 尋授注通王府司馬,充右神策判官,中外駭歎。 一卷,令守澄召注對浴堂門,賜錦綵。召對之夕,彗出東方,長三尺,光耀甚緊。其年十二 八年九月,注進藥方 請付法司。」旬日內,

其說。是時,訓、注之權,赫於天下。旣得行其志,生平恩讎,絲毫必報。 月,拜太僕卿、兼御史大夫。 崩厥角。帝微知之,下詔慰諭,人情稍安。 忌李宗閔、李德裕,心所惡者,目爲二人之黨。朝士相繼斥逐,班列爲之一空,人人惴慄,若 已在禁庭,二人相洽,日侍君側,講貫太平之術,以爲朝夕可致昇平。 兩姦合從,天子益惑 盈於注門。九年八月,遷工部尙書,充翰林侍講學士。召自九仙門,帝面賜告身。時李訓 入禁軍,與守澄款密,語必移時,或通夕不寐。 |李訓旣附注以進,承間入謁,而輕浮躁進者, 注起第善和里,通於永巷,長廊複壁,日聚京師輕薄子弟、方鎭將吏,以招權利。 因楊虞卿之獄,挾 間日

乃以権茶爲對。其法,欲以江湖百姓茶園,官自造作,量給直分,命使者主之。帝惑其言, 頭宮殿鎖千門,細柳新蒲爲誰綠?」始知天寶已前,環曲江四岸有樓臺行宮廨署,心切慕 乃命王涯 訓、注天資狂妄,偷合苟容,至於經略謀餓,無可稱者。初浴堂召對,上訪以富人之術, 棄権茶使。又言秦中有災,宜興工役以禳之。

文宗能詩,嘗吟杜甫江頭篇云:「江

ď,

館,以時追賞。時兩軍造紫雲樓、彩霞亭,內出樓額以賜之。注言無不從,皆此類 旣得注言,即命左右神策軍差人淘曲江、昆明二池,仍許公卿士大夫之家於江頭 也。

密韶,迎而勞之,召至監軍府議事。注倚兵衞卽赴之,仲淸已伏兵幕下。 月,注聞訓事發,自鳳翔率親兵五百餘人赴闕。至扶風,聞訓敗,乃還。 斬注,傳首京師,部下潰散。 注家屬屠滅,靡有孑遺。 初未獲注,京師憂恐。 至是,人人相 九月,檢校尙書左僕射、鳳翔尹、鳳翔節度使。蓋與李訓謀事有期,欲中外協勢。十一 監軍使張仲淸已得 注方坐,伏兵發,

豈一時之沴氣歟。旣籍沒其家財,得絹一百萬匹,他貨稱是。 澄,亦神其事。 注兩目不能遠視,自言有金丹之術,可去痿弱重膇之疾。始李愬自云得効,乃移之守 由是中官視注皆憐之,卒以是售其狂謀。而守澄自貽其患,復致衣冠塗地,

年十一月,召充翰林學士,拜右拾遺、左補闕、起居舍人,皆充內職。 |甫所怒,罷學士,守都官員外郎,再貶號|||司馬。 五年,入爲吏部員外。 七年,改兵部員外 王涯字廣津,太原人。父晃。涯,貞元八年進士擢第,登宏辭科。 元和三年,爲宰相李吉 釋褐藍田尉。二十

列

男,學士如故。 郎、 知制誥 九年 十一年十二月,加中書侍郎、同平章事。 八月, 正拜舍人。 十年, 轉工部侍郎、知制誥,加通議大夫、淸源縣開國 十三年八月,罷相,守兵部侍郎,尋

若干之賞。 **熡愚心**,願陳萬一。 責也。 路:一路從龍州淸川鎮入蕃界,徑抵故松州城,是吐蕃舊置節度之所,一路從綿州威蕃 欲布露者, 姦謀,險其走集,此立朝士大夫皆知,不獨微臣知之也,祇在舉行之耳。 恩,爲邊鄙 入蕃界,徑抵棲雞城,皆吐蕃險要之地。」又曰:「臣伏見方今天下無犬吠之警,海內同覆盂 入寇,西北邊騷動,詔兩川兵拒之。時蕃軍逼雅州 戰之後,西戎之力衰矣。」穆宗不能用其謀 穆宗即位,以檢校禮部尚書、梓州刺史、劍南東川節度使。 每審我一警,則中外咸震,致陛下有旰食軫懷之憂,斯乃臣等居大官、受重寄者之深 雖承詔發卒,心馳寇廷,期於爲國討除,使戎人芟剪。 息者數矣,能制而服之者,唯在北蕃。 誠願陛下不愛金帛之費,以釣北虜之心。 開懷以示之, 臣觀自古長策,昭然可徵。 厚利以啗之,所以勸聳要約者異於他日,則匈奴之銳,可得出矣。 在於實邊兵,選良將,明斥候,廣資儲,杜其 如能發兵深 涯上疏曰:「臣當道出軍,徑入賊腹,有兩 臨遣信臣,與之定約日,犬戎悖亂負 晝夜思忖,何補涓毫? 所以 入,殺若干人,取若干地,則受 其年十一月,吐蕃南北掎角 然臣愚見所及,猶 慢 栅

慶元年,幽、鎭復亂,王師征之,未聞克捷。 涯在鎭上書論用兵曰:

毒流 也。 鎭 德 夕驅 [誕敷,武功繼立,遠無不服, 邇無不安。 列郡,釁及賓僚。 伏 以 以貔貅問罪之師,當猖狂失節之寇,傾山壓卵, 幽、鎭 雨州,悖亂天紀,迷亭育之厚德,肆豺虎之非心。 凡在有情,孰不扼腕?咸欲橫戈荷戟,問罪賊廷。 矧茲二方, 敢逆天理? 臣竊料詔書朝下, 諸 決海灌熒,勢之相懸,不是過 囚繫鼎臣,戕賊戎帥 伏以國家文

之師,參之晉陽,輔以滄、易,掎角而進,易若建瓴,盡屠其城,然後北首燕路。 關 不爲失信,於軍勢實得機宜。臣之愚忠,輒在於此。 扇 堅宜從易者。 **一茸,不席父祖之恩,成德分離,人多迫脅之勢。今以魏博思復讎之衆,** 動 屬城,以兵拒境。 但以常山、燕郡,虞、虢相依,一時興師,恐費財力。 且夫罪有輕重,事有後先,攻 如聞范陽肇亂,出自一時,事非宿謀,情亦可驗。 如此則幽、薊之衆,可示寬刑;鎭、冀之戎,必資先討。 鎭州構禍,殊匪偶然, 昭義願盡敵 況廷湊 在朝廷

以 之勢也。 重 兵。 臣又聞用兵若鬭,先扼其喉。今瀛、莫、易、定,兩賊之咽喉也,誠宜假之威柄, 俾其死生不相知,間諜無所入,而以大軍先迫冀、趙, 臣受恩深至,無以上酬,輕冒陳聞,不勝戰越。 次下井陘, 此百舉百全 戍

列傳第一百一十九 王涯

洎 涯 疏 至 盧. 士: 玫 已 爲 賊 劫,陷瀛、 莫州 、凶勢不 可遏。 俄而二凶俱宥之。

從之。 運使。 樂, 下侍 亭 尙 仍 有 年 帝 Ė. 銅 書 兼 選樂童按之, 鐵 月 一、充職。 頟 郎、弘文館大學士、 按之於會昌殿。 其年 冶 ,入爲太常卿。 江 七年七月, 南 每年額 入爲御 九月, 寶曆 榷 茶使 名 日 史大 利 守左僕射,領使。 以本 年 百餘萬,自收復,未定稅 ,檢校尙書左 夫。 上悅,賜涯等錦綵。 雲韶樂。 文宗以樂府之音 官同 太清宮使。 敬宗即: 平章事 樂曲成, 僕射、 位 • 九年 奏李師道 進封代國公、食邑二千戶。 。, 改 | 鄭 衞 ·五月,正拜司空,仍令所司册命, 興元 戶 涯 部 四 興 額,請復 太甚, 前據河南十二州,其兗、郿、淄、靑、濮州 年正月, 尹、山 侍 太常 郎、 丞李鄭、 南 兼 欲 係鹽 御史大夫, 西道節度使,就 守吏部尙書、檢校司空, 聞古樂, |鐵司,依|建中元年九月敕例 少府監庾承憲押樂工 命涯 八年正月,加檢校 充鹽 詢於舊工,取 加 鐵 檢校司空。 轉 加開府儀同三司, 運使, 復領 獻於黎園 開 俄 司 鹽 遷 元 大 空、門 制置, 界,舊 時雅 鐵 和三 禮 轉 部

門出, 獄 仇 具 士良 逢 左軍兵馬三百人領涯與王璠、羅立言, 鞫 人即 月二 涯 反 殺。 狀 十一日 涯 涯等蒼惶 實不知其故,械縛旣急,搒笞不勝其酷,乃令手書反狀,自誣 李訓 事敗,文宗入內,涯 步 出 至永昌里茶肆,爲禁兵 右軍兵馬三百人領賈餗、舒元興、李孝本, 與同列歸中書會食, (所擒, **丼其家屬奴婢,皆繫於獄** 未下筯,吏報有兵自閣 與訓同 謀 先

集賢殿學士孟堅,太常博士仲翔,其餘稚小妻女,連襟係頸,送入兩軍,無少長盡誅之。,自 以擊之。 赴 郊 廟,徇兩市,乃腰斬於子城西南隅獨柳樹下。 。中書房更焦寓焦璿、臺吏李楚等十餘人,吏卒爭取殺之,籍沒其家。涯子工部郞中、 涯以榷茶事,百姓怨恨,詬駡之,投瓦礫

致之。 涯 涯已下十一家,資貨悉爲軍卒所分。 家書數萬卷,侔於秘府。 涯 博學好古, 厚爲垣,竅而藏之複壁。 `能爲文,以辭藝登科,踐揚淸峻,而貪權固寵,不遠邪佞之流,以至赤族。 前代法書名畫,人所保惜者,以厚貨致之;不受貨者,即以官爵 至是,人破其垣取之,或剔取函奩金寶之飾與其玉軸而棄 涯積家財鉅萬計,兩軍士卒及市人亂取之,竟日不盡。

涯之死也,人以爲冤。 初宦官縱畫,凌藉南司。 昭義節度使劉從諫三上章,求示涯等三相罪名,仇士良頗懷憂 及從諫奏論,凶焰稍息,人士賴之。

之。

中,累歷員外郎。 履甚堅,累辟諸侯府。 元和中,入朝爲監察御史,再遷起居舍人,副鄭覃宜慰於鎭州。 | 番字魯玉。父礎,進士,文辭知名。 十四年,以職方郎中知制誥。 元和五年, 擢進士第, 登宏辭科。 寶曆元年二月,轉御史中丞。 風儀修飾,操

列傳第一百一十九 王璠

謙削去舊儀。今李絳所論,於禮甚當。」逢吉素惡絳之直,天子雖許行舊儀,中書竟無處分, 與欲參何殊。或中丞新授,亦無見僕射處。又參賀處,或僕射先至,中丞後來,憲度乖宜, 後雖去三事機務,猶總百司之權。表狀之中,不署其姓。尙書已下,每月合衙。上日百僚 射李絳相遇於街,交車而不避,絳上疏論之曰:「左、右僕射,師長庶僚,開元中名之丞相。 其 乃罷」一班,遷工部侍郎。尋罷解僕射,以太子少師分司東都。 事體,使永可遵行。」敕旨令兩省詳議,兩省奏曰:「元和中,伊愼忝居師長之位,太常博士庫 尊卑倒置。倘人才忝位,自合別授賢良;若朝命守官,豈得有虧法制?伏望下百僚詳定 拜者,遂從權便,不用舊儀。酌於羣情,事實未當。今或有僕射初除,就中丞院門相看,卽 賢臣,布政除弊,不革此禮,謂爲合宜。 苟有不安,尋亦合廢。 近年緣有才不當位,恩加特 列班,宰相居上,中丞御史列位於廷。禮儀之崇,中外特異。所以自武德、貞觀已來,聖君 時李逢吉爲宰相,與璠親厚,故自郎官掌誥,便拜中丞。恃逢吉之勢,稍橫。 其弄權怙寵如此。 嘗與左僕

入朝。三年,改吏部侍郎。四年七月,拜京兆尹、兼御史大夫。十二月,遷左丞,判太常卿 六年八月,檢校禮部尙書、潤州刺史、浙西觀察使。 **璠二年七月出爲河南尹。大和二年,以本官權知東都選。** 十月,轉尙書右丞, 敕選畢

八年,李訓得幸,累薦于上。召還,復拜右丞。曆以逢吉故吏,自是傾心於訓,權倖傾

朝。 內官,令璠召募豪俠,乃授太原節度使,託以募爪牙爲名。 九年五月,遷戶部尙書、判度支。 謝日,召對浴堂,錫之錦綵。其年十一月,李訓將誅 訓敗之日,蹯歸長興里第,是夜

人送之,是日悉爲亂兵所執。 璠 子遐休,直弘文館。 李訓舉事之日,遐休於館中禮上,同職駕部郎中令狐定等五六 定以兄楚爲僕射,軍士釋之,獨執遐休誅之。

爲禁軍所捕,舉家下獄,斬蹯於獨柳樹,家無少長皆死。

休。」璠 有石 也。 初璠在浙西,繕城壕,役人掘得方石,上有十二字云:「山有石,石有玉,玉有瑕,瑕卽 視莫知其旨, 礎生尙書,是石有玉也。 京口 老人講之日:「此石非尙書之吉兆也。 尚書之子名遐休,休,絕也。 此非吉徵。」果赤族。 尚書祖名崟,崟生磋,是山

尋以本: 功員 年,膀出後,正 太常少卿。 外郎。 賈餗字子美,河南人。 官知制誥,遷 二年,以本官知制誥。 長慶初, 拜 禮部 庫部 策召賢良,選當時名士考策,餗與白居易俱爲考策官,選文人以爲公。 侍 鄎。 n 頭中, 祖渭,父寧。 凡 典禮聞三歲,所選士七十五人,得其名人多至公卿者。 充職。 三年七月, 拜中書舍人。 四年,爲張又新所構,出爲常州刺史。 献進士擢第,又登制策甲科,文史兼美,四遷至考 四年九月,權知禮部貢舉。 大和初,入爲

五月,轉兵部侍郎。八年十一月,遷京兆尹、兼御史大夫。

罪,世多冤之。 發,兵交殿廷,禁軍肆掠,陳易服步行出內,潛身人間。翌日,自投神策軍,與王涯等皆族 進金紫階,封姑臧男,食邑三百戶。未幾,加集賢殿學士,監修國史。其年十一月,李訓事 **餗雖中立自持,然不能以身犯難,排斥姦纖,脂韋其間,遂至覆族。逢時多僻,死非其** 九年四月,檢校禮部尚書、潤州刺史、浙西觀察使。制出未行,拜中書侍郎、同平章事

舒元奧者,江州人。元和八年登進士第,釋褐諸府從事。大和初,入朝爲監察,轉侍御

史。

《尊,除祭天地宗廟之外,無合稱臣者。 王者父天母地,兄日姊月。 而貴神以九宮爲目,是宜 分方而守其位。臣數其名號,太一、天一、招搖、軒轅、咸池、青龍、太陰、天符、攝提也。此 九神,於天地猶子男也,於日月猶侯伯也。 陛下為天子,豈可反臣於天之子男耶? 臣竊以 奏曰:「臣伏見祀九宮貴神祝板九片,陛下親署御名,及稱臣於九宮之神。臣伏以天子之 初,天寶中,玄宗祀九宮壇,次郊壇行事,御署祝板。元輿爲監察,監祭事,以爲太重, 列 百 + 九 郭 行 餘 羅 立 言 李 孝 本

縱陰陽者流言其合祀,則陛下當合稱『皇帝遣某官致祭于九宮之神』, 愚瞽;未知其可。 乞下禮官詳議。」從之。尋轉刑部員外郞。 不宜稱臣與

爲過。

名。

臣

雖

中丞 宗寵 著作與,分司東都。 生於二凶也。 兼 遇,復召爲尙書郞。 元 (輿自負奇才,銳於進取,乃進所業文章,乞試劾用, 判刑 部侍郎。 訓竊發之日,兵自內出。 時李訓 是月,以本官同平章事,與訓同知政事。 九年,以右司郎中知臺雜。 丁母憂在洛,與元興性俱詭激,乘險蹈利,相得甚歡。 元興易服單馬出安化門,爲追騎所擒,送左軍族誅 七月, 權知中丞事。 宰執謂其躁競。 而深謀詭算, 熒惑主聽, 九年(三),拜御史 五年八月,改授 及訓 爲文 皆

訓欲竊發,令其募兵,乃授邪寧節度使。 月〔三〕,入爲大理卿。 郭行餘者,亦登進士第。 李訓在 東都時,與行餘親善,行餘數相餉遺,至是用爲九列。十一月, 大和初,累官至楚州刺史。 訓敗族誅。 五年,移刺汝州,兼御史中丞。九

司農 (少卿,主太倉出納物,以貨厚賂鄭注,|李訓亦重之。 ,坐糴米不實,計贓一萬九千貫,鹽鐵使惜其吏能,定罪止削所兼侍御史。大和中,爲 羅立言者,父名歡。貞元末,登進士第。寶曆初,檢校主客員外郎,爲鹽鐵河陰院官。 訓將竊發,須兵集事,以京兆府多

吏卒,用立言爲京兆少尹,知府事。 訓敗日,族誅。

也。 良曰:「追集所由,皆因縣令處分,予何罪也。」故中立坐貶,洪冤死。 陰知其故,恐以詐聞,不冤其累,乃以狀告|洪之詐。 (仇士良拘)洪入軍,洪衛中立之告,謂士 初立言集兩縣吏卒,萬年捕賊官鄭洪懼禍託疾,旣而詐死,令家人喪服聚哭。姚中立 長安縣令孟琯貶硤州長史,萬年縣令姚中立朗州長史。以兩縣捕賊官受立言指使故

單騎走投鄭注。 知臺雜,權知中丞事,最預訓謀。竊發之日,孝本從人殺內官十餘人於殿廷。 李孝本者,宗室之子也。累官至刑部郎中,而依于訓、注以求進。 至咸陽西原,爲追騎所捕,族誅之。坐訓、注而族者,凡十一家,人以爲冤。 舒元興作相,訓用孝 知事不濟,

列傳第一百一十九 校勘記

思,遽致血濺黃門,兵交青瑣。荷無藩后之勢,黃屋危哉!涯、鰊綽有士風,晚爲利喪,致身 先。 妨漢帝之明。蓋有管仲、亞夫之賢,屬之以大政故也。此二君者,制御閣寺,得其道也。 以寧,無思不服。 厚風 深帷,憤其廝養,欲鏟宮居之弊,載澄刑政之源。 作則者。 八校,小人方寸,即又難知。 昭獻忽君人之大體,惑纖狡之庸儒。雖終日橫經,連篇屬思,但得好文之譽,庸非致治之 鬼蜮之伍,何逃瞰室之災。非天不仁,子失道也! .俗,設武備以服要荒。俾西被東漸,皆陶於景化,柔祗蒼昊,必降於闕群〔8〕,自然懷德 且李訓者,狙詐百端,陰險萬狀,背守澄而勸酖,出鄭注以擅權。祇如盡隕四星,兼權 史臣曰:王者之政以德,霸者之政以權。 古先后王,率由茲道,而遂能息人靖亂, 如梓人共柯而殊工,良奕同枰而獨勝,蓋在得其術,則事無後艱。 況區區宦者,獨能悖化哉?故豎刁、易牙,不廢齊桓之霸;韓嫣、籍孺 但慮爲蚤蝨而採溪蓀,翻獲螾蜓之患也。 當宜禮一代正人,訪先朝耆德,修文教而 嗚呼明主, 夫何不 昭獻皇帝端冕 垂統 一, 何 而

贊曰: 奭、旦興周,斯、高亡溱。 禍福非天,治亂由人。 訓、注姦僞,血赬象魏。 非時乏

賢,君迷倒置。

校勘記

- (1) 陳弘慶 本書卷一五憲宗紀、新書卷一七九李訓傳作「陳弘志」。
- (11) 九年 合鈔卷二二〇舒元興傳作「九月」。
- (三) 九月 合鈔卷二二〇郭行餘傳作「九年」。
- (图) 必降於關群 合鈔卷二二〇闕文作「順」字。

